




3 1761 07295329 2



603

10/166



Digitized by the Internet Archive
in 2011 with funding from
University of Toronto

— خطا و صواب جدولی —

| صواب | خطا | سطر | صفحه |
|----------------|----------------|-----|------|
| مثبتہ سی دہ | مثبتہ دہ | ۵ | ۱۵۹ |
| نصارا | نصرا | ۱۴ | ۱۶۴ |
| ایتمش | ایمش | ۱۷ | ۱۶۴ |
| مشروعہ بی | مشروعہ بی | ۱۱ | ۱۶۶ |
| سطحی | سختی | ۹ | ۱۶۶ |
| برومفیلڈک | ومفیلڈک | ۱۷ | ۱۶۷ |
| طائفہ بدویہ | طائفہ بدویہ | ۹ | ۱۶۹ |
| نیچہ | نیچہ | ۱۶ | ۱۶۹ |
| اسلحہ متوقفہ | اسلحہ متوقفہ | ۲ | ۱۷۰ |
| اجانبہ | اجانبہ | ۱۰ | ۱۷۰ |
| طائفہ حاکمہ نک | طائفہ حاکمہ نک | ۱۴ | ۱۷۰ |
| مستغنی | مستغنی | ۱۱ | ۱۷۶ |
| واردیکہ | واردرکہ | ۶ | ۱۸۹ |
| عربک | عربک | ۴ | ۲۰۰ |
| تقید | تقید | ۷ | ۲۰۰ |
| جزئی | جزوئی | ۱۷ | ۲۰۳ |
| متفوقہ | متوفہ | ۲ | ۲۰۷ |
| اتلافی | اتلافی | ۱۱ | ۲۰۹ |
| افرنیجہ نک | افرنجک | ۱۱ | ۲۱۱ |
| حاکمیتدن | حاکمتدن | ۳ | ۲۱۳ |

- خطا و صواب جدولی -

| صواب | خطا | سطر | صفحه |
|-------------------|-----------------------|-----|------|
| وارد رکه | وارد رکه | ۶ | ۷۴ |
| Jewish | gewish | ۲۰ | ۷۵ |
| متمم | متمم | ۱۲ | ۹۳ |
| انجیله دن | انجیله دن | ۴ | ۱۰۱ |
| نصیحتده | نصیحتده | ۵ | ۱۰۹ |
| ایتدکاری | ایتدکاری | ۳ | ۱۱۰ |
| دوشو نمورده | دشمنورده | ۶ | ۱۱۶ |
| ولد نامشروع لرینی | ولد ز نای مشروع لرینی | ۲۰ | ۱۱۶ |
| حوزه | حوضه | ۱۵ | ۱۱۹ |
| ارکک | ارکک | ۱۰ | ۱۲۰ |
| تسکین | تسکیت | ۱۹ | ۱۲۰ |
| عاجزانه مجه | عاجرانه مجه | ۱۲ | ۱۲۳ |
| ارکک | ارکک | ۱۹ | ۱۳۲ |
| غضب | غصب | ۶ | ۱۳۴ |
| ایله | ایلیه | ۱۳ | ۱۳۸ |
| خرستیان | خرستیان | ۱۱ | ۱۴۲ |
| مغضوب | مغضوب | ۳ | ۱۴۴ |
| زنده کی | زنده کی | ۹ | ۱۴۵ |
| حقیقسنی | حقیقسنی | ۹ | ۱۵۱ |
| (کینه) | (کینی) | ۲ | ۱۵۲ |
| الیزابت | الیزابت | ۶ | ۱۵۲ |
| تجارتی | بجارتی | ۶ | ۱۵۶ |

خطا و صواب جدولی

| صحیفہ | سطر | خطا | صواب |
|-------|-------|-------------|-------------|
| ۶ | ۳ | لا یقیلہ | لا یقیلہ |
| ۸ | ۱۵ | صایبلان | صایبلان |
| ۱۲ | ۱۶ | خلفنہ | خلفنہ |
| ۱۸ | ۹ | کبسه نک | کبسه نک |
| ۲۳ | ۱۸ | ارضی | ارض |
| ۲۰ | ۱۵ | چارداغہ | چارمیخہ |
| ۲۴ | ۱۶ | قامش | قلنمش |
| ۲۵ | ۶ | حوضہ | حوزہ |
| ۲۷ | ۱۱ | شغلہ | شعلہ |
| ۳۱ | ۹ | مثلا | مثلا |
| ۳۱ | ۱۹ | پارہ سده کی | پارہ سده کی |
| ۳۲ | ۱۵ | اولہ | اولسہ |
| ۴۵ | ۱۸ | حوضہ | حوزہ |
| ۴۹ | ۲ | پایلدینی | پایلدینی |
| ۵۰ | ۱۸ | کوزلکیدر | کوزلکیدر |
| ۵۳ | ۲۱ | تیظقدن | تیظقدن |
| ۵۴ | ۱۲ | اولینورکہ | اولنورکہ |
| ۵۹ | ۵ | اولری | اولری |
| ۵۹ | ۱۶ | بابدہ کی | بابدہ کی |
| ۶۱ | ۳ | کلیسانک | کلیسا سنک |
| ۶۴ | ۲ | نصرانیتہ | دیانتہ |
| ۷۰ | عنوان | موفیتک | موفیتک |

کنديسني تحسين ايتمايز . »

۲۵ مارت ۱۹۰۷ تاريخي تريبون غزته سندن « عالم نصرانيتك
احوال اجتماعيه سني ممالك اسلاميه نك احواليه مقايسه ايتديكي صره ده
مؤلفك بزه مقابله وقوع بولان مؤاخذاقي همان كليت اوزره طوغريدر . »
Bulletin de la Société d'études Coloniales نام رساله شهریه نك ۱۹۰۷ مایس تاريخي
نسخه سندن « اسلامي توقير ايچون ترتيب اولنان بو اثر في الواقع شرقی بر
ذات طرفندن يازلمش ايسه ده مؤلفي انكليزجه ده سياست وافكار غربيون
حقنده بر وقوف كامله مالك اولديغنی ائبات ايديور . بوندن بويله شرقيلر
آره سنده دول غربيه نك تغلبنه قارشى بر فكر متحد حصوله كله جكني
بيان ايدن كلامي شايان اعتنادر . »

پارسده منتشر Revue du Monde Musulman نام رساله
موقوته نك ۱۹۰۷ مایس تاريخي نسخه سندن « خايل خالد افندي نك اثری پك
آجی ر تعريضي شامل فقط بويوك فوائدى حاويدر . بر حس سمعخانه ايله
يازلمش ومواد مندرجه سی اطرافيله مطالعه ايدلمشدر . مؤلف ، حكاياته
عطف اهميت ايتيور ويالكز وقايع عموميه يي قاله آليور وبر متن مؤثر ده
لايقل بر صورتده ترتيب ايچون بو وقايع عموميه يي تشریح ايايور . »

« هلال و صليب منازعه سی » نك انكيز جه سی حقنده انكيز

غزته لرینه یازیلان تنقید اتدن بعضیلرینك خلاصه سی :-

۱۸ نیسان ۱۹۰۷ تاریخی استاندارد غزته سندن « پارلاق بر صورتده ولیاقت ایله یازیلان بو کتابك مؤلفی نشریات متعدده سی ایله انكلتره ده کنديسنى طانتدیرمش بر مسلمان ذاتدر . اسلامیت ایله خرسیتیانلغك مدنیه خدمت خصوصنده کی فوائدینی سربستیء کامله ایله محاکمه ایدن بو اثری شایان اهمیتدر . »

۱۴ حزیران ۱۹۰۷ تاریخی ده یلی تلغراف غزته سندن « بو کتاب ملاحظه لی ، محاکمه لی ودانشلی بر اثر درکه او قویانلرك توسیع معلوماتنه خادم اولور . بو اثری او قویان بر کیسه نك شرقك نقطه نظرینی ده ا یقیندن تبیع ایده چکی لابددر . »

۳ نیسان ۱۹۰۷ تاریخی و ستمینستر غزت نام جریده دن « خلیل خالد افندی بر قاج سنه مقدم دخی بویه شایان اغتبا بر کتاب یازمیشیدی . بو اثری ده اعتدال تحریر ، استعداد تدقیق و تفکر سلیم کی مزایای حاویدر . »

۲۲ مایس ۱۹۰۷ تاریخی پال مال غزت نام جریده دن « خالد افندی نك بو اثری شرق حقنده افکار سخیفه لرینه اعتماد ایدن آوروپالیر ایچون پك مناسب بر واسطه تصحیحدر . »

۱۹ مارت ۱۹۰۷ تاریخی ده یلی نیوز غزته سندن « خلیل خالد افندی آوروپای نصرانی ده اغماض اولنان فحشیاته . وضع ایدلمش اولان تجربیات دینییه و ترویج ایدیلن ریا کارلقلره کمال جهد ایله و - قورقازرکه - حقنی بر صورتده هجوم ایدیور کنديسنه مغبر اولما ملیز ؛ بلکه دلائل قویه سنی سربسته جه وشایان دقت بر سلاست لسان ایله میدانه آتمسندن طولانی

زائله ده مغلوب دوشمش اولسهلر ایدی شیمدی آنلری ملل منظمه
ومتدنه دن عد ایدن غربیلر آنلرک حقوق حاکمیتی وحریت ملیه لرینی
دولت عثمانیه ویا ایرانیه نک حقوق حاکمتندن زیاده مستحق رعایت
کورمزلردی . مشرق غیر اسلامک ترقی واعتلاسنی کورمکله برابر ینه
تفاخر غالبیت ایله بیهوش قالان غریبون :

❖ آسیاده بزلر ایچون مواقع فتوحات وار ❖

سوزینی حالا دستور حرکات سیاسیه یاپوپ کیتمکده درلر . قوی اولانلر
ضعیفلرله اتفاق ایتیک ایستملر ؛ چونکه مشهور (ماکیاوه للی) نک
قولی وجهله ضعیف ایله اتفاق حین بجرانده قوی ایچون فوائد دکل مصائب
وموانع حدوتنه بادی اولور . بناءً علیه مشرق اسلام اکتساب شوکت
ایده جک ترقیاته صرف ما حصل قدرت ایدرسه مشرق غیر اسلام آنک
منافعی ایله کندی منافعی آرسنده بر مقارنت طبعیه بولمسنی اهمیتله تلتی یه
باشلار ؛ او حالده غربک او مغرور ارباب تحکمنه قارشی علی العموم اهم
شرقیه نک دخی بر دستور سیاستی بولنور وغربیلره اخطار اولنورکه :

« آسیا قطعه سی بوتون ابنای بشر ایچون ساحه
مهمانداریسنی آچیق طوتار ؛ فقط بعد ما فرنکارک بو قطعه
اوزرنده جهانکیرلکه قالدیشملری ممنوعدر ! »

اولسون — آثاری ظهوره باشلار . ترقیات زمانیه مالیه ، حیاتیله ، فکریله خدمت ایده جک مسلمانلرک عددی آرتدقجه آوروپالیره اولان احتیاجات مادیله ده اکسیلور . فرنکاک طوینی ، تفنکی ، ماکنه سنی ، آلات صناعیه سنی اخذ و تطبیق کبی احتیاجات مهمه نك تسویه سی مستنا اولوق اوزره لزومی محقق اولیان امتعه واشیاسنی اخذ واستعمالدن اجتناب ایتمک صاحب حمیت هر بر مسلمانک تعقیبنه سزا بر مسلك مهمدر .

Boycott ویا Boycotage دینیان مسلك امتناع وجهله بزه قارشی ابراز عداوت ایندن اجانبک امتعه سنی رد آنلره قارشی پک مؤثر بر سله مقاومت اولور . فقط مع التأسف مسلمانلر و علی الخصوص ممالک عثمانیه مسلمانلری بو Boycott اصولنک التزامنه عهد وميثاق ایده جک بر درجه متینه ده حمیت کوسترمیورلر ؛ حتی ایچلرنده افرنجی تقلید ایدنلر ، افرنجه عائد عادات کبی اشیانک ده علویتنه قائل اوله رق فرنکاشمکه اوغراشانلریله چوقدر . بونلر اسلامیه عائد هر دورلو مواددن تباعد ایله احوال افرنجی کندیلرینه نه قدر تطبیق ایتمک ایستلرسه ایستسونلر آوروپالیر آنلری ینه اقوام سفلیه افرادندندر دیه اتهام ایدرک کندیلرینه مساوی صاعیه جقلدر .

اسباب مسروده ووسائط سائر ايله موقعنی تحکیم ایدن مشرق اسلام مشرق غیر اسلامک ترقیاتندن دخی ماده ومعناً مستفید اولور وغریونک استیلا وغارت مستقبله سنه قارشی ده امین بر صورتده مصون قاله یلور .

اوتوز سنه مقدم روسیه یه قارشی مقاومت کوستره بیلجک بز مکندن ماعدا بر شرق مملکتی یوق ظن اولنورکن دهر بزه شوکتلی ، متانتلی بر چاپونیا دولتی کوستردی . اگر چاپونیلیر روسیه ایله اولان محاربه

آزلقری وپراکنده بر حالده بولملری حسیله جماعات نصرانیه آره سنه قاریشدیلر ؛ خرستیان اسملری اتخاذه ، نسایت و مذهب لرینی صاقلمغه ودها طوغریسی چوق یرده خرستیان قالبه کیرمکه مجبوریت حس ایتدیلر . مذهب نصرانیتک اساساً مذهب یهوددن اخذ احکام دینه ایتسی یعنی یهودیلکک دین نه دیمک اولدیغنی خرستیان کلیسا سنه کوسترمش اولسی بیله احقاد بنی اسرائیلی تعذیب نصارای افرنجدن صیاته مدار اوله مامشیدی . بو جهته یهودیلر — مالک اولدقلری فطانت قومیه اقتضاسنجه — عالم افرنجک پک بو یوک بر وجد درون ایله طانمغه باشدیغنی بشقه بر موضوع تعبد بولوب آنی اله کچورمکه چالیشدیلر یعنی ادخار تقود ایله پاره نک جاذبه معنویه سی سایه سنده قومیتلرینی مصائب تخریبیه دن محافظه یه پک اعلا موفق اولدیلر ؛ مطبوعات افرنجکک مهم قسمنی اللرینه کچیروب او واسطه ایله افکار عمومیه نصارایی ایستدکلری جهته میل ایتدیرمک ایتدیلر و بونده موفق ده اولدیلر .

غربک تعرضندن مهما ممکن مصون قالمق ایچون مسلمانلرده کندیلرینه مناسب نه قدر چاره بولمق لازم کلورسه آرمقده اهمال ایتمه ملیدرلر . نوع بشرک پک بو یوک بر قسمنی تشکیل ایدن اهل اسلام اولیه اون ویا اون بش میلیون یهودی خلق کبی هیئت اجتماعیه لرینی هیچ بر وقت قارومار ایتدیرمز لر . او ته یه برویه سرپیلن جماعات اسلامیه بلکه سلاح متفوق افرنج ایله تارومار ایدیله بیلور ؛ فقط اسلامک عضوا عظمی هیچ بر وجهه تخریب اولنه ماز . حتی ترقیات زمانیه دن استفاده یی مؤدی فدا کارلقلر کوستریلورسه شوکت قدیمه اسلامیه نک — ولوکه قسماً

بویله جه مسلمان مملکتلرینی اشغال وضبط ایتدکدن صوکره عالمه قارشی ده او مملکتده تمدن ، عدالت ورفاه کی نیچه آثار خیریه بخش ایدلدیکی بولنده یایغره لر آتیلور !

بو مقوله احوال علی العموم امم اسلامیة نی مساعدات متقابلہ ایله ویا ملاحظہ وظیفہٴ حمیت ایله ممکن مرتبه بر توحید سیاسی یہ سوق ایچون سبب کافی دکلې ؟ اقوام اسلامیہ دن هپسنگ هویت سیاسیہ سی ، حقوق استقلالیہ سی عین وجهله مہالک افرنجہ معروضدر ؛ هپسی ده غریبونک شرت تجاوزندن (الامان) چاغرییور . ائیدی بونلر آرسنده بر تعاون متقابلہ فکری وجودہ کتورلش اولسه مہالک افرنجک خیلدن خیلی یہ اوکی آئمش اولور . اسلامیت یالکز بر اعتقاد دینیدن عبارت دکدر ؛ بلکه آنک اہلی آرسنده ملت واحده افرادینہ مخصوص کی اولان بر عضویت اجتماعیه واردر کہ بو عضویت اجتماعیه نک تحکیمی هر دوردن زیاده بو زمان خطرنا کده فرض مطلق حکمنہ کچورلملیدر ؛ تا کہ بو فریضہٴ سیاسیہ آنلرک کافہ سنی حسیات قویہٴ مشترکہ ایله متحرک بر ملت کی بر امیدک اجراسنہ یعنی عالم اسلامیتک موجودیت سیاسیہٴ باقیہ سنی تخریب کلیدن صیانت ایلمک امیدینک استحصالنہ سوق ایلیہ .



طائفہٴ یہودک حالی بوندن عصر لرحہ مقدم نہ یہ دونده رلدی ایسہ بوکون نصارای افرنج اہل اسلامک موقعی ده اکا مشابہ بر حالہ صوقعہ اوغراشیور . احفاد بنی اسرائیل نصرانیتک تعدیات قہارانه سنہ قارشی موجودیت قومیه سنی محافظہ یہ چارہ لر بولشیدی . شویله کہ : یہودی لر

و حقانیت نامنه کیمسه وظیفه ایدینو بده صورهقی ایستیمور . کذلک مصر لیلرک بر اجنبی دولتک حاکمیت متمدنه سنه پک محتاج اولدینی اعلان ایدوب طورانلر بلغارلره استقلال تامه و یردیرمکه وانلری خارجک وصایتندن قور تارمغه اوغراشیورلر . بلغارلری عمومیت اوزره مصر لیلردن دهامدنی عدایلمک افرنجه مخصوص اولان سفسطه کاذبانه قیلندندر .



مسئله شرقیه نك تاریخی او یله دیپلوماسی وقایعی حاویدرکه بو وقایع — حرص اغتصاب ممالک ایله بصیرت انصافلری باغلمش اولان فتوحات مفرطه اربابی غربیلر ایچون — تدابیر محقه و مصیبه دن صایله ییلور ؛ فقط او وقایعه شرقیلر نقطه نظرندن باقیلنجه فرنک دیپلوماسیسنک شرت و شدت ایله ویا ساخته کارلق و شارلاتانلق ایله وجوده کتوردیکی اجراءات حقوقشکنانه دن بولندینی کوریلور : مثلاً آوروپا آهنگ اتلافی نامنه بر اجتماع دولی حصوله کتوریلور ؛ تسویه اموری مراد اولنان شرق دولتی بو اجتماع سببیه ابتدا اغفال صوکره اقتضا ایدرسه تهدید اولنور ودها صوکره آتی فعلاً اجبار کبی تدابیر روا کوریلور و بناءً علیه حدود ممالکندن مره بعد اخری قطعات اراضی آیریله رق تقسیم ایدیلور ویا بو قطعاتدن مسلمان سکنه نك ضررینه وخرستیارلرک نفعنه اوله رق مستقل حکومتلر تشکیل اولنور ؛ تاج و تخت اولایان برفرنک پرئسی ده بو حکومت جدیده دن بریسنه حکمدار نصب اولنور . دیگر طرفدن دخی ایکی ویا اوچ دولت آرسنده بر موافقت حصوله کتوریلهرک صرف اهل اسلام ایله مسکون اولان بلادی منطقه نفوذه تقسیم ایله استیلای آتی یه یول حاضر لنور ؛

« خارقه‌لر » وجوده کتورمک ایچون شرقده بولنش اولان مأمورین ملکیه وعسکریه نك ، میسیونه رلرک ، ایشی یوق پاره سی چوق سیاحلرک بر چوغی ایشته بو « پولتیقه جی منشیلر » کروهندن معدود در . بولرک هپسی ده یا نام ویا ثروت یا خود مأموریت اکتسابی او غورنده او یله بر دهشتلی سودایه مبتلا اولملردرکه ایشته بو سودا سائقه سیله وقوع بولان تشبثلرینک نتایج مضره سندن باشلیجه سی دول غریبه نك اقوام شرقیه یی کوز آجیریمیه جق درجه لرده تضییقه در . شرقیلر ایچون بو مقوله بر پولتیقه منشیسنک او مصیبت قلی - اکثریا معصوملرک تلفنه سبب اولان - آتارشیست خنبره سی قدر مضر بر آلت جنایتدر . نشر مدنیت ایچون شرقده نه یایماق لازم کله جکنه دائر بو حریفلرک آوروپا افکار عامه سنه ایما ایتدکلری ارشادات - که شرق ایچون عادتاً تخم وبا قدر مضر در - ستون جرائد ایله ، رسائل و کتب ایله ترویج اولتمقده در . چوق کره دول غریبه نك شرقده اجرا ایلدکلری فتوحات خونریزانه بو حریفلرک اختطارات تشویقکارانه سیله وجود بولشدر . شرقده تشوش اخلاق ، تعصب ، جهل وحقی وحشتدن ماعدا برشی کوره مین و کورسه بیله اعتراف ایتمک ایستمین بو اشخاصک نفوذ مفسد تکارانه سندن طولاییدرکه بین الملل وقوع بولان کافه اختلافاتده غریبون ملل اسلامیه نك حقوقی انصاف وینظرفی ایله ملاحظه ایتمه مکده در . مثلاً آوروپالیر نقطه نظرندن دخی مراکشدن دهها متمدن بولنمیان حبشستان کندی امورینی تدویر و اصلاحده سربست بر اقلیدیغی حالده اصلاحات تمدنیه اجرایی بهانه سیله مراکشک نیچون تجاوزات افرنجیه معروض قالدیغی انسانیت

غير قابل اسلحه تجاوزيه بخش ايدى ؛ ايدى مالك اولدقلى وسائط متوفه تعرضيه ايله لوازم مماثلہ جدالدين محروم اولان واسلامه تابع بولان افراد بنى بشر اوزرينه بلا آرام اجراى تحكيم ايتمكده درلر . بر شرق ملقى عرفان ، آداب ومؤسسات فاضلانه وانسانيتكارانه يه مالك اولسه ييله ينه غير متمدن اولقى اوزره انظار جهانہ قصداً تشبير اولنيور ودول غريبه دن برى لاجرم او ملتك همان دالنه بينيور ، محالنى قيريور وتابع تحكى ايليور . خادم مدنيت اولان بودول غريبه قواى متجاوزہ سنك پيشدارلى شرقك هر كوشه سنه صوقيليورلرده حاكميتلرينك فوائد عاليه سنى ترخم منخرت ايله چاغيريورلر ، راه استيلارلرینه مصادف اولانلره هييت كوسترييورلر ، تحكاملرينه مطيع اولميانلرى بلا آمان ازييورلر ، بر انكليز شاعرينك قولنه ماصدق اوله جق صورتده « ايليسلر آرش ايلرى قوشيورلر ، سيل طوفان كبي اوكلارينه كلنلرى سوپورييورلر ، عملاريله يالكز انسانلرى دكل ملكلرى بيله آغلاديبورلر . »



« شرق ايله غرب يكديكرينى آكلايه ماز » سوزى انكليزلر آره سنده عاداتا بر ضرب مثل حكمنى حائزدر . اسكى زمانلرده بو غفلت متقابله صرف جهلدين ناشى ايدى . زمانزده ايسه غربيليرك شرق حقنده كى سوء تفهمنى منفعتپرست و طرفكيز بر سورى اشخاصك سوء تاويلارندن ايلرى كليور . قلم فتن رقلرى پك ايشلاك اولان بو اشخاصه « پولتيقه جى منشيلر » تسميه ايتك اياسترم . پولتيقه جى منشيلردن مقصد يالكز مسلكلارى غزته جيلك اولان كيمسه لر ديك دكلدر . پيداي مستملكات امرى كبي

رجال مهمهٔ حکومتی آره سنده هیچ بر فرد بولنه مازکه نصرانیقی عالم اسلامه قبول ایتدیرمکک امکانه قائل اولسون ویا حصولنی صمیمتله آرزو ایتسون ؛ زیرا کندیلرینک حقیقتده غیر معتقد اولدقلری وآنحقوق مراسم وکوره نکه تبعاً جعلی بر صورتده ایناندقلری بر مذهبی بشقه لرینه قبول ایتدیرمکده کی لزومسزافنی البته هرکسدن ای آ کلارلر . بونکله برابر چوق کره واقع اولورکه مثلاً بر مذهب رسمیسی بولنمیان فرانسه جمهوریتنک وکلاسندن بریسی قاقارده مدنیت نصرانیه افکار وآنارینک مراکشد و ییلیم ده نره لرده انفاذی لزوم عاجلندن علناً بحث ایلر . کذلک پک چوق دفعه کورلمش اولان حالاتندرکه انکلیز وکلاسندن بولنان کیمسه لر ممالک عثمانیه اهالی خرسیتانیه سی ایچون اصلاحات لزومنی طلب ایدرکن بر موقع مهم رسمی صاحبی کبی دکل عادتاً پاپاسلق اجازتنامه سنی حائز بر واعظ دینی صورتده نصرانیت غیرتی اظهار ایدرلر . خرسیتانلق ومدنیت نصرانیه نامنه بو ذاتلرک کوستردکلری غیرتدن مقصد اصلی یا یکیدن امتیازات اقتصادیه فلان قوپارمق ویا توسیع حدود ممالک ایتمک اولدیفنی حالده صلیب وهلال اختلافنی اللرنده بر آلت اتخاذ ایلرینه باشلیجه سبب اولان شی تا قدیمدن بری قلوب نصارادن سیانه مه مش اولان عداوت اسلامیه حس موروثیدر .

اليوم غربك مشرق اسلام اوزرينه — دیانتدن زیاده سیاسته مبتنی اوله رق — وقوع بولان مهاجمات خصمانه سنک مضراتی اسکی زمانلرده — سیاستدن زیاده افکار دینییه یه مبتنی اوله رق — وقوع بولمش اولان تعرضاتنک ضررلرندن دهالیدر . شو صوک زمانلرده صنایع میخانیکه جه غربك اکتساب ایلدیکی ترقیات عظیمه دول غربیه یه مقاومتی

اون دردنجی فصل

بعض مطالعات اختتامیه

قارئین افرنج آره سنده بو اثرک انکلیزجه سنی بر جهد متعصبانه ایله یازدیغمه حکم ایدنلر بولنه بیلور ؛ آنلر وارسون او یله حکم ایتسونلر ! هلال و صلیب حقنده کی دغدغه مجادله یه کیریشمکلم بر وجود روحانی ایله جوشو بده بشقه لرینک ذهاب وجدانیه سنه تعرضات متعصبانه ده بولنمق ایچون دکلدور . مسئله یالکز اختلاف اعتقاد دن عبارت قالمش اولسه ایدی میدان معارضه یه کیریشمکدن بلا تردد اجتناب ایدردم . صلیب وهلال اختلافی کبی اغراضی تهییج ایدیجی بر محث خطرناکه آتیله قلم ایچون بشقه بر سبب واردرکه جدآ مجبر اولان بو سبب شرف دینی و ملیسنی تقدیر ایده بیلن هر مسلمان ایچون هلالک مدافعه سنی عادتاً حیات و ممات مسئله سی حکمنه وضع ایدیور . مبنای هیئت اجتماعیه مزک اساسنه آورو پای نصرانینک آتمقده اولدیغی ضربه تخریب فی الواقع تحکم سیاسی و تمکک حدود آرزوسندن ایلری کلیور ایسه ده ینه بو آرزونک موقع اجرایه وضعنده کی حرص اقدام تا صلیبیون زمانندن بری انتقال ایده کن عداوت دینییه حسیله تهییج اولیور . مقصد مزنی بر مثال ایله ایضاح ایده لم :

شرقک تدویر امور سیاسیه سنی درعهده ایتمش اولان دول غریه نک

اخراجی حقنده کی امل قدیم نصرانیت یالکز عثمانلی فتوحاتی دورلرنده
 آسیادن ککش وکتورلمش اولان اھالینک احفادینه منحصر دکلدر ؛ آوروپا
 طوپراغی اھالی اصلیه سندن اولوبده جماعت اسلامه تابع اولان طائفه لر دخی
 بعینه عداوته دوچاردرلر . بو تثبئات صلیبیه نتیجه سندن اولق اوزره
 مجارستانده ، یونانستانده ، افلاق و بغدادنده ، صربستانده هیئت اجتماعی
 اسلامدن بر اثر براقیلدیغی کبی مدنی دینیلن دول قویه نك یاردمیله بوسنه ده ،
 بلغارستان و کریدده دخی عنصر اسلامک تنکیلی ایله اوغراشلمقده در .
 ایشته بو حالردن آکلاشیلیورکه نصارای افرنجک نفوذی آلتنده اسلامه
 منسوب اقوام بشریه نك فرنکار طرفندن بر اخوت انسانیه ایله معامله
 ایدلمری احتمالی یوقدر .



حال بویله ایکن آوروپای غربی ده وعلی الخصوص انکلتزه ده « مسلمان مظالمه دوچار اولان » ممالک عثمانیه اقوام خرسینییه سی نامه قیامت قوباران او « مرحمتلی انسانیتپروران » هولاندا لیلرک مسلمانلره روا کوردکلری مظالمه هیچ ده سسلرینی چیقارمیورلر . یاربی ، مدنیت وانسانیت خادمی اولقی اوزره میدانله چیقوب سوز سویلین بو حریفلر نه قدرده ساخته اطوار مخلوقات ایش !



یوقاریدن بری ویریلن امثال یالکز خرسیتان حکومتلرک تحت اداره سنه کچن ممالک مسلمان شرقیه یه دائر در . آوروپا طوپراغنده ایسه عالم نصرانیت مسلمانلغه ومسلان مؤسسانته دائماً حسیات انصاف وشققتدن عاری بر صورتده معامله ایده کلشدر . معلوم اولدیغی اوزره نصرانیت آوروپا قطعه سنک غربنده عنصر اسلامی بوندن عصرلرجه مقدم کوکندن قازیمش ایدی . آوروپانک جنوب شرقی جهتلرنده دول نصارانک تشبثات متحده سی دخینه هپ بو مقصده مصروف اوله کلشدر . (ماکاوه ل) ک « پرنس » نام اثرنده تعیین ایلدیکی مسالک سیاسیه دن بریسی ده مغلوب اولان خصمک بردها کسب قوت ایده میه جک درجه ده شدتله تجریم وتنکیلی در . ایشته دول نصارا دخی آوروپانک بوجهلرنده تناقص حالنده بولنان قوای مسامه نک هر جزئی اییجه ازوب اعاده موجودیتنه میدان ویرمه مک مسلکینی التزام ایده کلشدر . بوقطعه دن عناصر اسلامییه عمومیته سوپوروب چیقارمق غرضیله عالم نصرانیتک ارتکاب ایتدیکی باربارلقلره اصلاحات مدنیه وخدمات انسانیتسکارانه آدلری طاقیلور ! مسلمانلرک آوروپا طوپراغندن کاملاً

مباحثی اوزرینه تألیفاته بولان فرنك محررلری بو دولتك مستملكاتده کی اصول اداره سنی بشقه دولتلر ایچون نمونه امثال اوله جق درجه ده مکمل کوستریورلر . مستملكات ماده سی صرف منافع مادیه نقطه نظرندن تدقیق اولنجه فرنك محررلرینه او اصول اداره شبهه سز خوش کورینور ؛ فقط مستملكات ترتیباتندن مقصد اصلی اولان هوس احتکار ، حرص اغتنام ، غرض قبول و آرزوی تحکم اگر مدنیت قلیفی ایله صاقلانماش اولسه او نمونه امثال عد ایدیلن اداره نك ماهیت حقیقه سی او زمان بللی اولور . « هولاندا هند شرقیسی » دینیلن آله لر مستملكاتی اهاالیسك پك چوقاری آوروپا لیلر طرفندن عادتاً اسارت منزله سنه ایندیرلشلر در . یا هولاندا مأمورلری و یا اکتساب ثروت خصوصاتنده آنلرله متفق ومشتراك اولان هولاندالی قومپانیالر اهای ی نباتات تارلا لرنده وسائر مشاغل کسبیه لرنده آغاریه اصولیه چالیشدیرمقده درلر . هولاندالیرك بو خصوصاتده روا کوردکلری معاملات تحکیمیه قارشى جاوه ده ، صوماترا طرفلرنده اهل اسلام دفعاتله مجبور عصیان اولدی . هولاندا عسا کرینك یرلیلرله محاربانده بولندیغی وهر محاربه ده بو عسا کر طرفندن کویلر یا قیلدیغی ، اولر ییقیلدیغی ، یوزلجه یرلی تلف ایدلدیکی حقنده آره صره آوروپا غزته لرینه تلغرافنامه لر کلیور . بوتلغرافنامه لك صورت افاده سندن یرلیلرک او وجهله مستحق تجریم ارباب عصیانندن بولندقلری معناسی آکلاشیلیور . او یله یا ، آوروپا لیلرک همتیله ادخال اولان فوائد مدنیه قارشى عصیانده بولنانلر او یولده تأدیبه مستحق دکلرمی یا ؟ عاصی دینیلن بو مسلمان خلک هولاندا لیلر طرفندن قتل عامی و یوردلرینک تخریبی نیچه سنه لردن بری دوام ایتمکده در ؛

قباكهانه طوغرى بو طرزده سوق مدنيت ايتمكللك نتايچندن اوله رق
اهل اسلام آره سنده ترك دار وديار ايتك مجبوريتى حس اولندى و بر
مهاجرت عموميه در باشلادى . خليج استانبول بو مهاجرتك درجه سنى دائماً
بر لوحه خزينه ايله ارائه ايدر . بو وصول مهاجرينده كى سفالت اليمه يي
مشاهده دن فرنكلرك نه يولده متأثر اوله قتلر يني بيانه حاجت يوقدر . خير
افندم ، خير ! آنلر مسلمانك سفالت اليمه سندن هيچ ده متأثر اولمازلر .
بو مسلمانلرك عزيز دار وسوكلى ديارلرينه اولان رابطه موروته لر يني فك
ايتار يني فرنكلر تعصب ديدكلرى بر وجد مذهبي جاهلانده اسناد ايدرلر .
ما ملكى يوق بهاسنه الدن چيقاروبده ارض اجدادى ترك ايللرى و بناء عليه
فقير و پريشان بر حالده ديار آخره هجرت ايتارى اويله بلا سبب بر خرستان
حكومه قارشى حس اولنان بر عداوت فلان نتيجه سى دكلدر ؛ بلكه عادات
قوميه سى ، اصول متخذة عائله سى ، حسيات معرزة دينيه سى اوزرينه
تقييدات متجاوزانه وضع ايده كلن اداره دن قورتلوق ايچوندر . روسيه
حكومتى ييكارجه خللك فوج فوج هجرتندن طولاي ضبط ايلديكى مملكتماره
عارض اوله جق كساد اقتصادى يي قاله آلاماش ايدى . بناء عليه ملاحظات
سياسيه ايله او مسلمانلرك قاچمارينه سبب اولان تعدياتى ارتكاب ايتدى .



شيمدى ايكنجى صنفدن بولوبده مستملكاته مالك اولان دولترك
تحت حاكميتارينه كچن مسلماناره نه يولده معامله ايدلديكنه نقل كلام ايله لم :
قديمًا بويوك بر دولت بحريه بولنش اولان هولاندا شرقده حالا بر خيلى
مستملكاته مالكدر كه بونارده كى اهاليك قسم اعظمى مسلماندر . مستملكات

اخلال ایتش ونیچه اقوام شرقیه نك حریت ملیه سنه تجاوز ایلمش اولان
 بودولتی شرقده آوروپا مدنیتك بر پیشداری اولوق اوزره آتیشلمشلردی .
 متوفی غلادستون عثمانیلره اولان معهود عداوتندن طولای روسیه یه « شمالدن
 ظهور ایدن محسن حریت » تعبیرینی بیله لایق کورمشیدی . عربك
 بوتزامنندن طولای دهها زیاده قوه قلب کسب ایتش اولان روسیه نك
 آسیا ایچریلرینه طوغری اساره اثار مدنیت ایتك صدندده بر خیلی اقوامك
 استقلالانی یا محما ویا تحدید وحریت ملیه لرینی کندی ارادات تغلیله تقید
 ایده کلسی تا کچن چاپونیا محاربه سنه قدر دوام ایلمش ایدی . جسملری
 کوچوك فقط خاصه ادراکاری پك بویوك اولان چاپونیالیرك متظم وفعال
 اوردو ودوننلری روسیه نك وظیفه تمدنك نه قدر چوروك بر ادعا دن
 عبارت اولدیغنی میدانه چیقارمشدی .

ایشته بزوجه معروض روسیه نك استیلای تمدنکارانه سندن
 طولاییدرکه قریمده ، قاقاسیاده وآسیای وسطا ده نیچه طوائف اسلامیه
 هیئت اجتماعیه سنك پك تهلكه لی صورتده صارصلدیغنی کورلدی . روس
 لسان وعاداتی حتی احکام مذهبیه سی بر ثبات مقرر دایله بو طوائف افرادینه
 عرض اولنه رق آنلرك حسیات ملیه ودینه لرنده جریحه لر آچیلدی .
 بعض یرلرده مسلمانلرك کتاب مقدسك آیاتنه بیله مداخله ایدیله جك
 درجه ده وجدانشکنلکار روا کورلدی . ملك اسلامه -- ترقیات ماده جه
 مسلمانار قدر کیری فقط فضائل معنویه جه مسلمانار دن پك کیری بولنان
 وعاداتا نیم بار بار بر حالده یشایان -- روس مهاجرلری دوکلدی وبو وجهله
 هیئت اجتماعیه اسلامك هر عضونده بر نقطه جارحه پیدا اولدی . آسیانك

بوکې غرور محقرانه یې اراڼه ایدن حاللری اولسه وجراد مضره کې مسلمان
مملکتلرینه دوشن میسیونه لرلری بولنسه بو خلق ثقلت استیلا سنه
مسلمانلرجه دها زیاده تحمل ممکن اولوردی . انکلیرک اهل اسلام ایله
تماسی کیندکجه آرتقمده اولدیغندن بوراده انکلیر مستملکات مسامه سی
حقتده ولوکه خلاصه اخلاصه اولسون بیان مطالعه یه کیریشمک ایچون
موضوع بحث مساعد دکلدر .

☆ ☆

روسیه دولتی دول مستولیة نصارانک اک ایلری کیدنلندن ایسه ده
دولت مشار الیهانک دخی شرقه مدنیت بخش ایتک ادعاسنده بولنسنی
عقل سلیم اصحابی البته تعجبله تلقی ایلر . فرنکلرک مدنیت وترقیلرندن
استفاده یه کنیدیسی ده محتاج اولان بر مملکتک اومدنیت وترقیی اقوام
شرقیه یه اعطا دعواسنده بولنسی ازمنه اخیره ده آوروپا مدینتی نامنه اجرا
اولنان ساخته کارلقلرک اک غریبلرندندر . مع مافیه بودوائتک مقتضای طالع
مالک بولنمش اولدیغی بر خیلی اذکیای سیاسیونک غیرتیه آوروپای
غربی ملتلی روسیه نک دخی شرقده بر وظیفه تمدن اجرا سنه صلاحیتی
اولدیغی نظریه سنی قبول ایتشار . بوندن طولانی ایدی که غریبلر وعلی
الخصوص انکلیرلر روسیه نک ممالک شرقیه اوزرینه وقوع بولش اولان
استیلای متزایده سنه آنجق بر ایکی دفعه آثار مخالفت کوستردکلری حالده
چوق کره موافقت ضمنیه وصریحه لرینی اعطاده تردد ایتمه مشلردی .
آوروپای غربی ده سیاسیون ومحررین آره سنده محب صلح عامه وخادم
حریت انسانیه کچینن بر طاقم کیمسه لر دخی اوته دنبری شرقک صلحنی

کیری طور میور . (۱) شیمدی بالفرض انکلتره نك تحت تابعتنه کچن مسلمانلر بو یولده بر تجربه دوچار ایدسه لر او تجریمك اجرا سی عجا نصل ممکن اولوردی ؟ بر حساب متوسطه کوره هندستانده وآفریقاده انکلتره نك تحت حکمنه کچمش اولان اقوام اسلامیه نك عددی یوز میلوئه بالغ در . زمانی کلوبده بو مسلمانلر انکلتره بویوندیریغنی اوزرلرندن آتمق ایستسه لر آنلری کلیاً تار ومار ایلمك دکل عددلرینی حس اوله جق درجه ده تنقیص ایتمك بيله امکان خارجنده قالور . اکر مسلمانلر ترقیات جدیده یه باشلیوبده کسب قوت ایستسه لر وتوحید افکار وتعاون متقابله وجوده کتوررك طلب استقلاله قالدشسه لر انکلتره آنلرك تجربینه دکل بالعکس مماشاتلرینی التزامه مجبور قالور . انکلزلرك قوته حرمت ، مسکنه حقارت ایله معامله ایتمکلی معلوم بر کیفیتدر . فی الواقع بر مسلمان ملت ایچون انکلز حاکمیتنه کچمك دیگر اجنبی حکومتلرك تبعه سی اولمقدن محقریت جهتیله پك اوقدر فرقلی دکلدر . شوقدرکه اهل اسلام ایله مسکون هیچ بر انکلز مستملکه سنه انکلز مهاجرلری کیدوبده توطن وتکثر ایده میورلر ؛ بو ایسه انکلز حاکمیتی اهنو شرین ایده جك بر حالتدر . مشرق اسلامده هر نره یه کیدسه توطن ایتمش انکلزلره نادراً تصادف اولنور . شرقده کی انکلزلرك بر قسمی تاجر وپك چوغی ضابط ومامورددر ؛ بونلرده یوکارینی طوتجه آوروپایه عودت ایچون جان آتارلر . بونلر مسلمانلری کندیلرینه هیچ بر وجهله مساوی عد ایتمه مکده دیگر ملل مستولیهدن ده ایلری کیدرلر ؛ ایشته

(۱) H. C. Morris نام ذاتك “ History of Colonization ”

عنوانلی تاریخ مستملکتندن آلدی . جلد ۱ . صحیفه ۲۱

گویند صاصیلدی . فرانسز لر یالکز امور خلقی ید تحکمه آلمقله قالمدیلر ؛
برده اسلامک حیات عائله یه تعلق ایدن امورینه چنکل آتدیلر . یازق
او مسلمان عائله لرینه که افرنج ایله پیدای اختلاط ایلمکی کندیلرینه بر شرف
صایار لر ! فرنگار اسلامک ایچنه انسان مدنی صورتنده کیردکن صوکره
مضر بر میقروب حانه انقلاب ایلور لر ؛ اصول حیاتیسه من بویله جه
قورتلانونب افکار ، حسیات وعادات موضوعه من تخیل مضره اوغرایور .
بالفرض جزایر مسلمانلرندن بعضیلری شیمدی ایستدکاری قدر فرانسز لشمش
اولسونارینه طوائف عادیة بشریه دن صایله جقلر در . جزایر ده خرسیان
ویا یهودی هرکس فرانسز ماییتی حقوق ووظائفه مالک اولدیغی حالده
مسلمانلر تبعه محکومه صفتنده قالمقده درلر .

اوتوز سنه اولنه کلنجه یه قدر بو بالایادن مصون بولنش اولان تونس
اهل اسلامی دخی شیمدی جزایر لیلردن ده مسعود بر حالده دکادر لر .



تاریخ مستملکات یا زان بر مؤلفک رأینجه بر دولت متمدنه طرفندن
تحت تابعیته آلمان بر قوم اگر او دولت طرفندن وضع اولنان احکام اداریه یه
معارض بولمقده دوام ایدرسه — بشقه بر چاره اقتناع قالمدیغی تقدیرده —
یا تماماً تحریب اولنلی ایش یاخود او قومک افرادی قولایلقله تحت ضبطده
طوبیله بیله جک درجه ده قیریلوب آزالتملی ایش . مؤلف مومی الیه هر نه
قدر بویله بر تدبیر شدیدک مخالف قواعد تمدن اوله جغنی اعتراف ایله برابرینه
مقتضای انتشار مدنیت بویله بر شدت معامله یه جواز بولنه جغنی ده ادعادن

بونی مها ممکن اجرایه تشبث ایتدیلر ایسه ده مقصده کافی کمدی . صوکره
 fusionnement دینیلن تدبیرك انفاذینی التزام ایلدیلر ؛ بوده فرانسه دن وحقی
 سائر لاتین مملکتلرندن هجرت ایدوبده جزایری وطن اتخاذ ایلمك ایستین
 افراده تسهیلات مقتضیه کوستر ك عددلرینی آرتیرمق و بونلر واسطه سیله
 اهالی اصلیه یه كرك اصراراً و كرك اقناع طریقله فرانسز عاداتی ، فرانسز
 حسیاتی وحقی خرستیان دیانتی تلقین ایلمك دن عبارت ایدی . بو تدبیر
 هیئت اجتماعیة اسلامی تار و مار ایتدی ایسه ده مسلمان عنصرینی محوه مدار
 اوله مدی . فرانسزلر شیمدی قالدوبده اوتا تمقسنزین « بز مسلمان اهالی یه
 حریت وعدالت و یردك ورفاه حال اسبابنی استحضر ایلدك » دیمكه قدر
 واریورلر . حال بوكه جزایر مسلمانلری قهراً و نیچه دسائس ایله ذلت احتیاج
 و محقوریته دوچار ایدلشلر در . فرانسه و پروسیا محاربیه سی صره سنده بعض
 مسلمانلر براز کندیلرینی طویلا یوبده مسئوللرك تحکمندن قورتله ق
 ایستمشلردی ؛ فقط نه چاره كه بر کره فرنك بویوندیر یغنه طوتیلنجه عددی
 آز اولان بر مسلمان ملت ایچون قوای مقاومه اکتسابی امکان خارجه چیقار .
 بناءً علیه جزایر لیلر ده او اختلالده مغلوب اولدیلر و بو وسیله ایله او توز
 میلیون فرانك پاره نك و اوچ یوز یك (هكتار) اراضی منبتة نك الارندن
 آندیغنی کوردیلر (۱) فرانسز استیلا سنك مضراتی مادی اولدیغنی قدر
 معنوی بر صورتده ده حس ایدلدی ؛ ادبیات عربیه ایله اخلاق اسلامیه دخی

(۱) بو تضمینات و مصادره نك مقداری J. L. de Lanessan نام ذاتك

« L'Expansion Coloniale de la France »

عنوانلی کتابندن آندی . صحیفه ۴۲

قويولدير ، بيكگرجه جانلر ياقدير ، نيچه او جاقار سونديردير ووحشی ديه دنياه اعلان ايتدکاری اهل اسلامدن قات قات زياده وحوشلقلر کوستردیلر .
 بو بابده کی وقایع متوحشه نك ماهيتنی عالم يالكز فرانسزلردن اوکرنديکی ايچون اصل مغدورينك قولى سمع تلقى جهانه واصل اوله ماش ایدی .
 عجباهانکی طرفك قولنه ده زياده اينانق لازم کور ؟ مراکش مسئله سی ايلک علولنديکی صره ده آوروپا دولترلينك مراکشده وضع آسایش ايچون فرانسه يي توکیل ایلديکی يولنده ميدانه بر روايت چيقمش ایدی ؛ ديپلوماسی بالاخره بوروايتك تکذيبه لزوم حس ايتديردي . مراکشيلر بو روايتی فرانسز اياچيسندن ايتدکارینی فقط فرانسزلر سلطان مراکشه بويولده هيچ برشی سويلنديکني ادعا ایلدير . هانکی طرف قولنده طرغری ایدی ؟
 معتبر صاييلان انکلیز غرته لری وعلی الخصوص تائيس جريده سی ایشی کسيديروب آتدير : « جهان مدنيت اويله نیم وحشی شرق امرا سنه دکل مدنی بر فرانسز چليسينك سوزينه اينانور » ديدیلر . عجبانيچون ؟ بر روايته جاذبه استماع وقوه اقناع بخش ايتمکده آوروپانك او مدنی ذاتلری ده زياده ماهر درلرده آنک ايچون !

هر نه حال ايسه . فرانسزلر جزایری قهراً وکرها آلدیلر وتديبر مدنيلرينك اجرا سنده باشليجه ايکی طريق اتخاذايتدير . بونلردن بریسی refolement مسلکی درکه بونک مقصد اصلیبی اهل اسلامی تا اطلاس طاغلرينك جنوبه وحتى صحرای کبير ايچريلرينه طوغری بوسکور دوب سورمک ایدی ؛ زیرا مستملکات مأمورلرنجه سواحلك واطلس جبالنك شمالنده کی قطعات منبته نك مسلمانلردن تخليه سی ملتمز ایدی .

موقع تطبيقه قونولديغنى كورمك دخی ابتدا آنلك تحت اداره لرنده كى
مبلمانارك حالته اماله نظر ايلمكلكره سبدر .



بوندن تقريباً سكسان سنه اول يازديغى بر كتابده آروبا دولترينك
استيلا ايتدكلى ممالك بعیده خلقى نه يولده قوللاندىلرينى مؤاخذه ده
بولمش اولان بر مؤلف « فرانسزلى اولسون بو معامله لك ارتكابدن
برى طوتمق موجب شرف بر استئنا اولوردى . حيفاكه استيلا ايتدكلى
بلاد اهالى اصله سنك حقوق وحسياتنه فرانسزلى دخی بشقه دولتر قدر
رعایتسزلكلر كوسترمشدر » ديور (۱) فرانسزلك مستلكات
مسلكى حقتده بو سوز سويلنديكى زمان آفريقانك شمال طرفنده فرانسه
تحكى هنوز تقرر ايمه مش ايدى . صوكره دن او طرفلر ده بر قاچ ميليون
امت محمد افراى فرانسزلك سلاح متوقفنه قارشى مقاومت كتوره ميه رك
تسليم حاكميت وحقوق ايلديلكه بو استيلايه فرنكلر « مدنيتك ادخالى »
دخی تسميه ايدرلر . بناءً عليه معنای ظاهر يسنى آكلایوبده عكسك اجرا
اولنديغنى مراكلشه كورديكز *pénétration pacifique* يعنى صلحاً
ولينت ايله دخول جزايرك استيلا سنده قولاً دخی وقوع بولماش ايدى .
بشقه بر يرده (۲) دخی ذكر ايلديكمز وجهله فرانسزلى قليب وباروت ايله
ايشه كيريشديلر ، قراوقصبات اسلامى بر برى آرقه سنه تخریب وغاراته

(۱) W. Howitt نام ذاتك « Colonization and Christianity »

عنوانلى كتابندن . صحيفه ۳۱۲

(۲) جزاير خاطر اتندن نام اثر عاجزى ده

بونك سبى حقيقتده تعصبى يوقسه مدنيت نامنه جبرا ادخال اولنان
 حالاتدن متولد ذلت اجتماعيه ، سفالت ماديه ومعنويه مى ؟ ايسته بونى
 آكلامق ايچون اجانبه محكوم تابعيت اولان مسلمانلرك حالى تدقيق ايتمليز .
 بونى اييچه آكلايه بيلمك اويله يالكزمائى كتابده ، صارى كتابده ودها
 بيلم نه رنكده كى كتابرده مندرج لوايح وتحريرات رسميه يى ، رجال دولك
 نطقلىنى ، تاييسك ويا تانك وجرائد مشهوره سائره نك بند مخصوصلىنى
 اوقومقله اولماز ؛ زيرا آنلرده كى معلومات وايضاحات باخلاصه حاده
 تميزدن كچورلدكن صوكره ساده دلان ناسك تالق بالقبول ايده جكى
 بر شكاده ميدانه چيقاراشدر ،

ابتداى امرده فرانسه نك تحت تابعيته كچن مسلمانلرك حائنه
 عطف نظر ايتمك ايسترز ؛ زيرا فرانسه جمهوريقى رسى بر دين طائيدىغندن
 آنك تحت تابعيته كى مسلمانلر سوؤ ظن مذهبيدن ، نفرت موروث
 نصرانيتدن آزاده بولمق و بناء عليه بالنسبه مسعود اولمق اقتضا ايدر ؛ بو ايسه
 بزي هر شيدن اول فرانسه اداره سنه توجيه نظر ايله كه سوق ايلر . بوندن
 ما عدا توسيع مستملكاتيه قويولاش اولان آوروپا ايلر آره سنده فرانسزلر
 شرقيلر ايچون اجرا ايده كلكلى خدمات تمدنيه ايله تفاخره همان
 انگليزلردن زياده مبتلادرلر ؛ بو خدمات تمدنيه دن مسلمانلرك نه قدر
 فائده كوردكلىنى آكلامق ايسه بزم ايچون بوراده هر شيدن اول لازمدر .
 على الخصوص بونجه فرانسز مؤلف ومحررلرينك حریت ، مساوات ،
 اخوت ، انسانيت ، حقوق بشریت وسائره وسائره حقنده جهانك اطلاعه
 عرض ايتدكلى نظريه لرك كنديلرى طرفندن مستملكاتده نه درجه يه قدر

منافعه قارشی جاهل ونیم وحشی شرقیلر طرفندن اتخاذ اولمش بر واسطه
مقاومت دکلی ایدی یا ؟

☆
☆

اتحاد مسلمانک تهلهکه سی نه اولدیغی آکلادق . شیمدی ده
استقلالیتی غائب ایدوبده فرنک متمدنلرینک ربهء تابعینه کچن مسلمانلرک
حاله بر کره عطف نظر ایده لم ده باقه لم محسنات اداره مدینه دن آلره نه
قدر بر حصه استفاده چیقارلش آکلایه لم . ابتدای امرده شوراسنی
سویایه لم که بو مسلمانلر دن بعضیلری فرصت آثاری کورنجه مملکتلرینی استیلا
ایتمش اولان فرنک دولترینه قارشی سلاح عصیان صاریلیور لر ؛ حتی بعضاً
متبوع «متمدنلری» طرفندن بر صورت غدارانه ده تجریم اولدقلری ، کسلوب
اولدقلری حالده یته سلاح عصیان صاردقلری اولیور . افکار عامه افرنج
بواقوام تابعه مسلمه نک کندیلرینه بخش اولمان عدالت ، حریت وانتظام
اداره علیهنده کی قیاملرینک سببی ادراک ایده میور ده « تحف شی !
بویرلیر کندیلرندن اولان امرامورینک تغای واداره مشوسه سی آلتنده
ظلم وعذاب چکوب طوررکن بز کندیلرینه عدالت وحسن اداره ویردک ؛
بونکاه برابر آنلرینه عصیان ایدیور لر » یوللو تعجبد بولنیور لر . محکوم
افرنج اولان او شرقیلرک عدم حسنودیسی . عصیانی فرنکارجه عجیب بر
حادثه صورتنده کورندیکندن اسبابی تحری اولمق ایستیلیور . بونک اوزرینه
رجال دول ایراد ایتدکلری نطقلرله ، سیاسیون دخی غرته لر ورساله
سیاسیه لرده کی مقاله لری ایله آنک سینک مسلمانلر مخصوص اولان
« تعصب » بولندیغنی اشاعه ایله کاه عامه ناسک او تعجبی زائل اولیور !

اسلاميه نك تزايد وانتشارينه سخته كتر ميشیدی كه اهل صلیبه اولك آياق
اولانلر ايچون يالکيز بو سخته بيله بر موفقیت عظمای صایامش اولسه کرکدر .
بو قیلدن اوله رق فسادجویان سیاسيون دخی مخاطره سنی خیال ایله
کوردکاری « پان ایزلامیزم » علمینده افکار غریبونی تحریک و تحریص
ایدرلرسه عالم نصرانیتک شرقرده کی منافع ومطالبنک تأمیننه خدمت ایلمش
اولورلر و بناء عایه آنک مخاطره سنی بر آن اول باصدیره بیلورلرسه مدنیت
نصرانیه نك مستقبلًا اسباب انتشارینی تأمین ایلمش بولورلر .
بوراده تدقیق اولنه حق بر مسئله واردرکه اوده : قوای باقیه
استقلالیه سنک محافظه سی اندیشه سیله اهل اسلام اگر بر حرکت مطرده ومقده
اجراسنه تشبث ایتسه لر آوروپا لیلر ایچون بوکا « مخاطره » آدینی طابق
حقیقت حاله معکوس بر تسمیه اولمازچی ؟ اصل تهلکه یه معروض اولانلر
شرقلیلر وتهلکه یی احداث ایدنلر غریبلر دکلی ؟ اوت اويله در ؛ فقط نه
چاره که بو معکوس تعبیر دخی فرنکارجه موافق سیاست بر تدبیر در .
بويله جه حقیقتی ترسنه چویرهک وتأویلات فاحشه سیاسیه ده بولمق فتوحات
مفرطه اربابنجه وطنپرورلک عد اولنور . ما دام که اساساً حیا سزجه سینه
بر یلانچیلقدن عبارت اولان بوکی بر تدبیری خواص رجال سیاسیه —
توسیع ممتلكات مسلکته مدار اولدیغیچون — تجویز ایدیورلر ایدی
عامه ناسک آکا اعتراضه عقلی یا تیشماز ؛ یا تیشسه بيله انسانیت ومدنیت
نامنه اتخاذ اولمش حیل جائزه سیاسیه دن اولمق اوزره تلقی ایدلیدکندن
اعتراضدن استنکاف ایدر . ذاتاً آوروپا مالکنده عامه ناسک ذهانبجه
« پان ایزلامیزم » دینیلن شی بر نوع فتنه خطرناک اولوب مدنیتک

شرقیہ نک بجرانی دور لرنده پارسده ، لوندره ده فلانده وقوع بولان اجتماع
عمومیلر ده کویا انسانیت ومدنیت ناهنه مالک عثمانیه جماعات خرستیانیه سنی
مدافعہ صدندنه « ترک مظالمی » تقییح ایدن بر ذاتدرکه اسمی
Baron d'Estournelles de Constant در . بشقه لرینک روایت
اولنان مظالمی سیدله او قدر مرحمت انسانیتپرورانه آثاری کوسترن
بو بارون جنابلرینک یورکی فرانسه نک آفریقای شمالی ده کی افعال
استیلاکارانهسندن متولد غدارلقاره کانجه بشقه یولده حس ایدیور واورلرده
مسلمان قوتلرینک محو ایدلمسنی توصیه ایلور (۱)

اتحاد مساهمین « مخاطره » سنک جداً وحقیقتاً موجود اولدیغنه
غر بلیرک الک احتیاطی ، الک بیغرض اولانلری آره سنده ییله اینانلر واردر .
بزبواعتماده تعجب ایتمه ملیز ؛ زیرا نشر حوادث ایله ترویج مرام ایدن
مفسدین سیاسیون بر شیء اصرار ایله مکرراً روایت ایتمکک — تکذیب
ومقابله قورقوسی بولمذقجه — افکار ناسده آثار قناعت وجوده کتوره جکنی
پک اعلا ییلورلر . اکر (پییه ر له رمیت) نام پاپاس متلاو کیسه لر
مسلمانلرک قدس شریفی تلویث ایتدکارینه نصارای متقیه بی اینانلر مامش
اولسه لر ایدی اهل صلیب سفرلری ایچون ایستکله حرکت ایدنلر چوق
بولماز ایدی . کنیسای نصرانیت دشمن صاییلان مسلمانلر علیهنده اجرا ایدیان
محاربات صلیبیه دن نافع نتیجه لر چیقار مشیدی : از جمله او زمانلر قوای

(۱) “ Les Congrégation Religieuses chez les ”

“ Arabes et la Conquête de l’Afrique ”

اجرا اوله کان افعال تحکم شبهه یوقدرکه شرقه عارض اولان فلا کتله سبیلله پک آرتدی . مع ما فیه بوتزید تحکم خرسی مشرق اسلام خلقنک بعضاری آره سنده هرچه باد آباد بر حرکت تحفظکارانه احداثه دخی باشلادی . فلا کتک عمومی اولسی و تحکم افرنجک بوتون ملل اسلامیه یه شامل بولمنسی بالطبع مدافعه عمومیه ایچون تشبثات متحده لزوهنی حس ایتدیردی ؛ چونکه ایش او درجه یه واردرکه کیت کیده هیج بر مسلمان ملت مستقلاً وطنه صاحب اولق حق طبعیسنی محافظه ده سربست بر اقلیمه جق ! ایشه بوندن طولایی عالم اسلامیتجه کوستریلن هیجان اندیشه یی آوروپا نك فساد جویان سیاسیونی « اتحاد مسلمان تهاکه سنی » صورتده تصویر ایلمکده درلر . غریبونک جرائد مهجه سی ایله ادبیات سیاسیه سنده او یولده کی مقصد فسادجویانه یی ارائه ایدن مطالعات دائماً نظر ترصده چار پتمتده در . مثال اولق اوزره فرانسه نك سیاسیون معاصره سندن اولان معروف بر ذاتک قولنی ذکر ایدلم ؛ تاکه او « مخاطره شرقک » ازاله سی ایچون ایدیلن توصیه نك ماهیتی آجیغه چیتمسون . بو ذات دیورکه : « بر ضابط ایچون مسلمانلرک قوتلرینی قیرمق وظیفه سی بر آدمک وطنه ایده ییله جکی خدماتک اک عالسی واک فائده لیسیدر . » ظنمجه بویله بر فکر یالکز فتوحات مفرطه طرفدار لغنده کی غرضی ارائه ایتمکله قالماز ؛ برده تمدنی ایله اعلان غرور ایدن بر ملت افرادندن بولنان کیمسه لرک قلبنده پک بویوک حسیات خدارانه موجود اولدیغنی افشایلر . بوسوزی سویلین ذات کیمدر ییلور میسکز ؛ آوروپا نك بعض بلده لرنده اجتماع ایدن صلح عمومی مؤتمر لرنده لوازم انسانیتدن دم اورن ، مسئله

اوز اوچنچى فصل

اتحاد مسلمين نرسله سى

بوراده « اتحاد مسلمين » تعبيرندن مراد مشرق اسلامده فساد چيقارمق و مداخله واستيلاي افرنجيه يول حاضرمق غرضيله آوروپا سياسيوننك اختراع ايتدكاري « پان ايزلاميزم » در . عجا بو تعبير افرنج نه كبي مفاهيمي شاملدر ؟ اكر بوندن مقصد مشرق اسلامك افكار منوره اصحابي آره سنده استقلال اسلامك آثار باقيه سنك اولسون محافظه سى قيدي خصوصنده كي توافق آرا ايسه هيچ شبهه يوقدر كه « پان ايزلاميزم » دينلن شي موجود در وحتى كيت كيده او بابده كي توافق آرانك دالل اسلاميه آره سنده تشبثات مدافعه كارانه ايچون بر توحيد افكار انتاج ايتمسي ده ملحوظدر . بناء عليه توحيد مسلميندن مراد اقوام اسلاميه نك ترديد قوت ايدوبده بالاتفاق فرنكار اوزرينه هجومي ديمك اولمديغندن « پان ايزلاميزم » نامي آتنده كشف اولنان عنقايه برده فضله اوله رق تهلكه اسناد ايتمك بر سفسطه در .

بين الملل اهميتي حائز اولان مسائل سياسيه نك تحولاتي صره سنده اكثرثيا كوردليكي اوزره بر مملكتك مصائبي ديكر بر مملكت ايچون منافع حصوله كتورر . غربك فتوحات مفرطه اربابي طرفندن بر وقتدن برى

وظیفه اولمشیدی . « محافظه استقلال » ایله « تمامیت ملکیه » تعبیرلرینک حقیقتده نه معناری متضمن اولدقلرینی احوال جاریه بزه پک اعلا شرح ایتدی ؛ شویله که : بو تعبیرلردن برنجیسی استقلالی وظیفه ایدیان بر دولت شرقیه حقوق حکمرانیسک تدریجاً تقییدی ، ایکنجیسی ده تمامیت ملکیه یه مالک اولان بر مملکتک تقسیمی دیمکدر . بناءً علیه تائیس غزته سنک مذکور فقره سنک ماهیتی شو مألده ایضاح اولنه ییلور :

آوروپا دول معظمه سی چینک تسخیر ویا تقسیمی کبی مراق وسودالردن آرتق واز کچمیلدر . انسانیتیه خدمت واصلحات مدنییه همت شکلنده ظهور ایدن بو اندیشه لرینی ازاله ایتمک ایسترلرله بعدما بو مقوله وظیفه لری اجراییه آنجق شرقک دها الویریشلی برجهتنده یعنی مالک اسلامییه ده فرصت بوله ییلورلر !



دول غریبه نك نه صورتله منطقه نفوذ تعیین ایتسی لازم کله جکنه دائر مقدا
مغروانه نظریه لر وضعنه قالدیشان فرنك محررلری بعدما چینلیلرک کندی
مکتلرینی ایستدکاری یولده اداره ده مختار بولندقلری حقیقت ثابته سنی
افکار عامه یه تلقینه باشلادی .

اقتصادی شرقده کی تحول احوالك نتیجه سی اولان بویکی دیپلوماسی
مسلکنی تلقی بالقبول ایتکه افکار عامه نك نصل استحضار ایدلدیکنه بر مثال
اولق اوزره ۲ کانون ثانی ۱۹۰۶ تاریخی تلمیس غزته سنك چین اوردوسی
تشکیلاتی حقمده نشر ایلدیکی بر بند مخصوصدن مأخوذ فقره آتیه یه دقت
بویوراسون :

» بو حال چینه دورت یوز او توز ایکی بیک کشیدن
مرکب جدا بر قوه مهیه بخش ایده جکدر . بو قوتک بر ربع میلیون ده
ردیفلری بولنه جفی نظر دفته آنور و بونلر دخی کچنکی مانوره لرده کوریلن
نمونه لر قدر کفایتلی چیقارسه چینک محافظه استقلال و تمامیت ملکیه سی
وظیفه سندن طولایی آوروپا دول معظمه سنك دوجار بولندیغی اندیشه بعدما
خیلی تخفیف اولنه جقدر .

بو فقره نك نه قدر معیندار اولدیغی حقمده بیان مطالعه یه
حاجت یوقدر . یالکز شوراسی ایضاح اولمایدرکه فقره مذکوره ده کی
» اندیشه « کلمه سی دول معظمه نصارانک غیر متمدن و یانیم متمدن عد
اولنان اقوام شرقیه نك سعادتیی ایچون — محضانیات مشفقانه ایلله —
بر معتاد کویستره کلدکاری « مراق » دیمکدر ! نته کیم بر قاچ کره بزم ده
محافظه استقلال و تمامیت ملکیه مز آنلر ایچون موجب مراق بر

نصارانك او « هوس تمدنبخشانه سنه » خلل ويره جك قدر بر مانعه
صايلاه يوردى . حال بوكه شرقك او جهتلرنده - ممالك عثمانيه ده
اولديغى كې - روملره ، ارمني لره ، بلغارلره مشابه جماعات خرستيانيه
بولنامسى يعنى رجال دول غربك آمال غاصبانه سنى اجرايه آلت اتخاذ
اولنه بيله جك عناصرك مفقوديتى تخطر بيله ايدليوردى . اقصى شرقده
سفر فتوحات آچمق ايچون مسافه مجريه نك او زاقافنى دخى او قدر موجب
انديشه صايلاه يوردى ؛ حتى - شرق قريب صولرينه اولديغى كې -
آسيای شرقى دكزلرينه دخى « بعض وظائف انسانيتكارانه وتمدنانه »
اجراسى مقصديله اويله هر ايستناديكى زمان حرب كيملى كوندريله ميه جكى
حسابه بيله قاتله يوردى . دها غريبى چا پونيا ليلر كې مترقى وقوى بر مملكت
خلقى بيله « اوفق بر ملت » دينيله رك پكده شايان اهميت صايلاه يوردى .
مدنيتك (يعنى آوروپا مدنيتك) مقتضاسى اوزره حركت ايتمى ايچون
بر آراق چين خيلى صيتشديرلدى ، قولاً وفعلاً تهديد دخى اولدى ؛ فقط
ارادات ازيله فرنك متمدنلرينك او بابده كى « نيات حسنه سنه » مخالف
اولمق كركدركه اليوم چينيلر دول نصارانك جبراً دلالت ايتمك ايستدكلى
خط حركتدن بوسبوتون بشقه بر مسلك تعقيب ايلامكه وكندى سلامتلرينك
تأمينى وظيفه سيله كندى منابع ثروت لر ينك استمالى حتمى كنديلرينه حصر
ايتمكه چالشمقده درلر . شو صوك بر قاچ سنه ظرفنده آوروپا دول قويه سنك
چين حتمده كى تدابير سياسيه سى پك معنيدار بر صورتده تحول ايتدى و غرب
حكوماتنك ديپلوماسيسى آرتق چينيلرك حقوق حكامانيلرينه مراعاتى
اصول جاريه بين الملل دن عد ايلامك بولنى طوتدى . اقصى شرقده

اسلامیه دن دائماً مجبرانه مطالب فاحشه ده بولنیورلر وایستدکرینی قوباره
 بیامک ایچون بعضاً مفرداً و بعضاً بر قاجی بر لکده قوه تهدیدیه اجرا سنه
 و بناءً علیه منافع حریصانه و خود کامانه لرینی انسانیت و مدنیه خدمت
 امیش کبی بر طور جمعی ایله ترویجه قالدیشیورلر . حقیقتاً انسان متمدن اولانلره
 حیا و یره جک نیچه عجیب بهانه لرله مسلمان مملکتلرینک حقوق مقدسه سینه
 تجاوز ایدرک امتیازلر قوباریورلر . اقوام اسلامیه یه قارشی سفر آچمقده
 حقیقی کورنگ ایچون آروپا افکار عمومیه سنی تحریکده نیم رسمی و غیر رسمی
 جرائد سیاسیه یه اشارت و یریلور . رجال دولک مروج افکاری اولان
 او جریده لر بو کبی اشارتلر اوزرینه اهل اسلامک ترقی ایچون وقوع بولان
 افعال تیقظیه سنی کویا مدنیتک انتشارینه قارشی طور مق ایچون اتخاذ اولمش
 تدابیر متعصبانه صورتنده تصویر ایدیورلر و بوکا « اتحاد مسلمین تهلکه سی »
 اسمنی و یریورلر . کله جک فصلده کوریله جکی اوزره بو « شرق تهلکه سی »
 قصداً معکوس بر معنا ده ایضاح اولنیور ؛ زیرا حقیقتده شرقده آروپا
 ایچون بر تهلکه موجود اولیوب بالعکس عالم شرق آروپا لیلر دن کلن
 بونجه تهلکه لره دوچار اولمقده در .

اقصای شرق خلقی آرتق بو فرنگ مخاطره لرندن سالم بولانه جق
 درجه ده بر وضعیت متینه کسب ایدی . سیاسیات جهانک صورت جریانی
 تعقیب ایدنلرک خاطر لرنده اولسه کرکدرکه اقصای شرقده دخی او معهود
 « وظیفه تمدن » تربیاتی اجرا ایتک هوسی یتین وقتلره قدر غربک محافل
 سیاسیه سنی پک زیاده شوقه کتیریور ایدی . حتی اولجه اقصای شرق
 ملتلرینک کنترلی و کومه لی بر موجودیت اجتماعی یه مالک اولملری بیله دول .

فرانسز علمای اقتصادیه سندن Leroy Beaulieu جزایرک ۱۸۹۸ سنه سنه

مخصوص مجموع تجارتی

“ De la Colonisation chez les Nations Modernes ”

نام اثر معتبرینک ۳۹۷ نجی صحیفه سنده شو وجهله کوستریور :

جزایرک فرانسه ایله اولان معاملاتی : ۳۳۰۲۹۴۷۰۲ فرانق

جزایرک انکلتره ایله معاملاتی : ۲۲۲۶۳۲۱۱۰ فرانق

جزایرک آمریقا ایله تجارتی : ۲۹۴۳۴۸۲ فرانق

سائر دولتلرک جزایر ایله اولان معاملات تجاریه لری دخی بالنسبه

غایت آزدرد . فرانسه نك تونسده کی او معهود « تشبثات متمدانه » سی

باشلايه لیدن بری آوروپانك سائر ممالکی معاملات تجاریه سی تونسده دخی

فرانسز تجارتنك قات قات مادونده قالمشدر . اشته بر مملکت اسلامیه نك

استقلالی بر دولت افرنجیه طرفندن احیا اولنجه او مملکتده سائر دول اجنبیه

تجارتنك نه درجه یه قدر دوچار زیان اوله جنی بو مثالدن آکلا شیلور .



وقایع شرقیه ده آوروپا دول قویه سنك اتخاذ ایلیدیکی دیپلوماسی

تدابیرینی دقتله تتبع ایدنلر پك اعلا آکلایه ییلورلرکه بو دولتلر ملل اسلامیه

ایچون یالکز حقوق استقلالیه نك لایق اوله میه جنی نظریه سنی ترویج ایله

اکتفایلمیورلر ؛ برده ممالک شرقیه نك اوتیه سنده بریسنده کورلرکه

باشلایان علائم تیقظی برتحاشی خصوصت ایله تلقی ایدیورلر واستقبلاً

اولسون محافظه سلامت قیدینه دوشمش اولان ملل اسلامیه نك مساعی

ترقیجویانه سنی اخلال ایده جك تدابیردن خالی قالمیورلر : مثلاً ملل

مخصوص فضائل معنویہ سی ، اوصاف مدنیہ سی بولنان اہل اسلام تعرض
 متمادی یہ دوچار ایدلمہ مش اولسہ ایدی عقل سلیم صاحبی هیچ بر شرقی
 غرب ایله شرقک تجارتی اخلاقی خیالانہ بیله کتورمن دی . بالعکس بر دولت
 افرنجیہ نك تحت حکمنہ کچمکلہ استقلالنی غائب ایتش اولان بر مسلمان
 مملکتی استقلالنہ مالک اولدیغی تقدیرده یا معاہدات قدیمہ اقتضاسنجہ
 یاخود صنایع جہیلہ نقصان ترقیسندن طولانی دیگر دولتلرک تجارتہ دخی
 میدان رواج تأمین ایدردی . فقط بر آوروپا دولتنک تحت حاکمیتہ
 مجبور دخول اولان ہر ہانکی مسلمان مملکتندہ دیگر دول اجنبیہ نك
 تجارتلری اویلہ بر میدان رقابت بولہ بیلیمک احتمالندن محروم قالور .
 شویلہ کہ : او مملکت مسئولیہ یہ حاکم اولان فرنک دواتی سربسئی
 مبادلہ اصول تجارتی اتخاذ ایتش حکومتلر دن بولنمش اولسہ بیلہ ینہ آنک او
 مملکتندہ کی مأمورلری وسائط متنوعہ ایلہ غیر رسمی صورتندہ کندی ماتلری
 تجارت وصنایعنی ترویج ایدرلر وھر دورلو مناقصہ لردہ ، سپارشاردہ کندی
 ماتلری محصولات صناعیہ سنی التزام ایلرلر ؛ مصرک حالی بوکا بر مثالدر .
 اگر او مسلمان مملکتی استیلا ایدن فرنک دواتی اصول حمایتی التزام
 ایتش اولان حکومتلر دن ایسہ دیگر دول اجنبیہ محصولات صناعیہ
 ومعاملات تجاریہ سنک آرتق اورادہ بر رقابت مشروطہ یہ میدان بولہ بیلمہ سی
 احتمالی زائل اولور ؛ جزایرک حالی دہ بوکا بر مثالدر . فرانسزلرک کمال
 فخر ایلہ ذکر ایدہ کلذکری جزایر ادارہ متمدنہ سی او مملکتندہ دیگر
 آوروپا دولتلرینک توسیع تجارت ایلملرینہ بر مانعہ جدیہ وضع ایلمشدر .
 بونی دہا زیادہ واضحاً اکلامق ایچون بر کرہ استاتیستیکہ مراجعت ایدہ لم :

دولتیرینک تبعه لریله اجرای معاملاتنی قطع ایتمک ایستمش اولسون ؛ مگرکه او دولتیرک معاملات تجاریه نی توسیع ایتمک وسیله سیله وقوع بولان تشبثیری استیلای حدوده مقدمه اتخاذ اولنمش بولنه . آوروپا تاجرلری قدیمدن بری مشرق اسلامده حسن قبول کورمشلردی . بر معتبر اجنبی تاجرینه کندیسيله معاملاتده بولندیغی خلقک افرادی دوست نظریله باقار ؛ زیرا تاجر خلقک خوشلانندیغی ویا محتاج اولدیغی اشیا یی جلب واستحضار ایلر . بوندن طولای مصرده وممالک عثمانیه نك هر جهتده فرنك تاجرلینه تسهیلات عدیده بخش اولمشیدی . که دول نصرانیه نك ارتکاب ایتدکاری نیچه سوء استعمالت ایله الیوم استقلال اسلامه ایراث خطر ایده جک بر حاله کتورلمش اولان — امتیازات عتیقه اجنبیه نك منبعی ایشه او تسهیلات دوستانه در . وقتا که دول افرنجیه ممالک اسلامیه حقنده تعرضات مدهشه ایقاع ایده جک بروضعیت اکتساب ایلدیلر ؛ ایشه او زمان شرقک مواقع معاملاتنده تجار معصومه دن زیاده نیات مضره صاحبی قسمت قووالایجیلر ، مأموریت آرایجیلر ومفسد پولیتقه جیلر توره مکه باشلدی . تاجرلر ماللرینی کتوره رک رفاه متقابله اسبابنی تسهیل ایدرلردی ؛ لکن او توره دیلرک آثار فعالیتی کندی مملکتلرینک اصول وعاداتنی کتورمک ، حاکمیت وآمریتی ادخال ایلمکدن عبارت اولدیغی کورلادی وبناء علیه بولر واسطه سیله استقلال اسلامک تملاری آتته هجوم لغملری استحضر ایلدی .

اگر آوروپا دول قویه سنک توسیع مستملکات خرصی یالکز دنیانک قبائل وحشیه ایله مسکون اولان قطعاتنه انحصار ایدوبده کندیسنه

ازلی یه علی العمیا تسلیم اولیویرمکن متولد « بر اهمال عاطلانه یه مبتلا
ایمشر . غالباً بوندن طولاییدرکه اهل اسلام ساکن اولدقبری ارض الیهدکی
منابع طبیعی ثروقی ایشلدوب متنفع اولمق وظیفه تمدنیه سنی فرنکلره
براقش عد اولنیورلر ! حقیقت حالده ایسه نوع بشرک استفاده سی ایچون
جناب منعمک خلق بو یوردیغی عطایای طبیعی دن مشروع بر صورتده
متنفع اولغه جبالاماق حکمت اسلامی یه مخالفدر . بونکله برابر او انعام
طبیعتدن اعتدال وقناعت اوزره مستفید اولمق ایستیمو بده چیلدیرمش کبی
بر خرصله هر شیء چارپوب قاقمق ودفائن طبیعی کوکندن چیقاروب
آشیرمق وبوصورتله الهک سائر قولرلینک حقوقنه عارسزجه سنه تجاوز ایتک
دخی احکام اسلامی یه مخالفدر . ایشته بو خصوصلرده اعمال مسلمین ایله
آوروپالی قسمت قووالاییحی حریفلرک حرکات تمدنانهلری بوسبوتون
بشقه اولمق اقتضا ایدر .



آوروپا دول مستولیه سنک ممالک اسلامی اوزرینه صالدره قدده
بر لرلینه رقابت ایدرجه سنه شدت حرص وطمع کوسترملرینک اسبابندن
بر یسی ده تزید تجارت قیددر . صناعی کیتدکجه ایلریلین بر ملت ایچون
تأمین تجارت قیدی عادتاً بر حیات وممات مسئله سی حکمنده اولدیغی یانندن
مستغنیدر ؛ آنجق بو مناسبتله بوراده سرد اولنه جق بر نقطه واردرکه
اوده « عجباً استیلا اولنان ممالک اسلامی دن هانکیسی واردی که آوروپا
ایله اجرای تجارتی آرزو ایتمه مشیدی ؟ » مسئله سیدر . بز ظن ایتیزکه
استقلالیتی معروض تعدی اولان ممالک اسلامی دن هیچ بر یسی آوروپا

بولیوردی . سطوت اسلامک تأیدینی متعاقب گذاران ایدن دورلرده
 اهل اسلام آره سنده شعبات علومک اوزمانلرده معروف اولان هر شعبه سنی
 ترقی ایتدیرمکله مشغول نیچه اصحاب کمال کادی کیتدی . فقط آوروپای
 نصرانی ملتلی تزاید ایده کن احتیاجات حیاتییه یی تسویه ایچون شرقک
 خزائن ثروتنی اغتنام ایلمک اوزره اجرای سفره باشلادقلری وقتدن بری
 اهل شرقک غیرتی صارصلدی ، ترقیسی سکتیه اوغرا دی . غربک
 اوسوریلرله کن آقینجیلرینک ، قورصانلرینک بلا فاصله مهاجمه لری
 مشرق اسلامک هیئات اجتماعیه سنی معنأ و ماده بر تزلزل دائی یه اوغراتدی که
 بوده پک وخیم بر انحطاط تدریجی یی انتاج ایلدی ؛ چونکه آوروپا لیلرک
 شرقده نفوذ وسامان قزاقی خرصلری تدریجاً آرتیوردی . بر آراق شرقک
 بر جیتنده قوه عثمانیتک ظهوری بو طغیان استیلا یه قارشی بر سد متین احداث
 ایلدی ایسه ده بو قوه مقاومه آنجق بر قاچ عصر قدر بر مدت ایچون
 استیلای افرنجی طور دیره بیلدی . حیفاکه عثمانیت عالم شرقه اولان
 بو خدمتندن طولای ایکی بویوک بلایه معروض قالدی : یعنی عالم نصرانیتک
 غایت متعصبانه وغایت مدهش بر عداوت منتهمانه سنه دوچار اولدی
 وکیت کیده افرنجک « شرق مسئله سی » نامنه اجرا ایلدکاری دیپلوماسی
 مسخره قلمری سبیلله نیچه فلاکتلر چکدی وحالاده چکیور .

شرق ایله غرب آره سنده قرون وسطا دن بری امتداد ایدن او
 مصادمه لر عاقبت غریبونک تفوقی ایله نتیجه لندی ؛ بو ایسه اهل شرقک
 هم مکتوبات عرفانیه سنه هم ده ترقیات مادیه سنه مشغول بر طور غولتق ایراث
 ایتدی . افرنجک ادعاسنجه مشرق اسلام خلقی « لا یتغیر اولان تقدیر

یازق که بعض مؤلفر بو کبی طنطنه لی مصطلحاتی محاکات فلسفیه ده بولنیورز ظنیه بر چوق سفسطه لک بیانی یولنده صرف ایدرلر . احکام اسلامیه هیچ بر زمانده انسانلری احوال حیاتیه نک اصلاحندن آلیقویمغه سبب اولدی ؛ بالعکس اشخاصی تعالی روحیه ومادیه ایچون ترغیب ایلیه جک بر خاصه تکمله مالکدر . هم ده نصارای غربک دها ترقی ومدنیت حقنده لایقوله موازنه لی بر فکره مالک بولمندیغی دورلر ده سالکدرینه او یولده ترغیبات ارائه ایلدی . اثبات مدعا ایچون بوراده مسلمانلرک اسپانیا ده کی ترقیاته دائر استشهاد ده بولمقلموزه حاجت یوقدر . یالکیز اسلامک ترقیات ایله مناسباتی بر احاطه مکمله ایله تصویر ایتمش اولان بر آمریقالی مؤلفک بو خصوصده نه سویلدیکنی نقل ایلیه جکز . بو ذات دیورکه « مسلمانلر دها بدایتده قطعات ممالک کبی زمین علومی دخی استیلایه قویولدیلر . حتی ارتحال پیغمبریدن یکریمی سنه صوکره عالم اسلامده علومک حمایه سی بر مسلاک متخذ حکمنه کچدی . صوکره لری خلیفه المنصورک پایتختی علم هیئت ، طبی ، وانواع ادبیاتی تعالی ایتدیرمکله مشغول نیچه اصحاب کمال ایله طولمشیدی » (۱)

جهت بشرک نفوذ اسلامیتدن آلدیغی شوق تعالی نه انکار ایدیله ییله جک قدر آز ایدی نه ده او نودیله ییله جک وقوعات روز مره دن

(۲) W. J. Draper نک :

“ A History of Intellectual Development of Europe ,,

نام اثرندن . جلد ۱ . فصل ۹

یاپله جغنی او مؤلف متمدنك كلامنه تنظیر صورتيله بز سويله يم : او
ديار لرك خلقنه كندی وطنلرينك منابعی كندیلرینه مناسب ومفید صورتده
ایشلتدیرمك فرصتی ویرلسون ؛ انسانیت ، نصرانیت ومدنیت ناملرینه برر
مناسب وسیله بولنه رق اویرلر خلقنه دائمًا تضییقات اجرا ایدلسون وهجوم
اولنسون ؛ تاكه آنلر قوت كسب ایده مسونلرده غربك فتوحات مفرطه یه
قویولان آج كوزلی قسمت قوغالاییجی حریفلرینك آقین ، اقین مملكتلرینه
طولملرینه قارشی مخالفته قدرتلری قالمسون ، وطنلرینی مدافعه یه مجاللری
بولنسون !

ما دام كه بزم مقصد اصلیز بو مباحثك یالکز مشرق اسلامه تعلق
ایدن جہتلرینی تتبع در او حالده بلكه بر غیرتلی فرنك چیقارده بزه
« اسلامیتك نفوذ تدنیکارانہ سی آلتده شرقیلر كندی كندیلرینه نصل
ترویج ترقی ایده بیلورلر ؟ اسلامیت ایله ترقی ممتنع التأیف ایکی ضد متقابل
دكلی ؟ » ديه صوره بیلور . معلوم یا ، غربیلرک ذهابلرنجه اسلامیت
ترقیات مدنیہ یه مخالف ایمش . بو ذهاب حتی علما دن صاییلان ، سربست
دوشونن وتعصب کینسائیہ دن آزاده بولنان کیمسه لرجه بیلہ شایان اعتماد در .
عالم کچینن مؤلفلردن بریسی بو بابده او درجه ایلری کیدیورده
« اسلامیتك ایلک پارلایان شرارۀ تعصبی سونمکه باشلیو بده مبنای حقیقیسی
میدانه چیقدیغی زمان انشراحه ، احساسات رقیقانه یه مستعد اولمادیغی
وترقیات معنویه ومادیه ایچون مخاطره لی بولندیغی کورلدی » (۱) دیور .

(۱) " Civilization and Progress " نك J. B. Crozier

عنوانی کتابندن . صحیفه ۴۳۱

قارشی — محافظه حقوق ایچون پک چوق وسائط صیانت بوله ییلور . حال بوکه
حامیسی بویوک دولتر اولان بو مقوله قومپانیا اداره لرینک ترقیات مدینه نامنه
اجرا ایلدکاری تداییر غاصبانه دن صیانت ایچون اهالی اصلیه بر استناد کاه
بوله ماز . عصیان ایله سلاحه صاراسه قومپانیانک منسوب اولدیغی دوتلک
عساکری آنلری باغی وحیدود عد ایله تنکیله شتابان اولور . او حالده بدبخت
اهالی اصلیه کیمدن استمداد ایله ییلور ؟ طبیعی آوروپانک او حریت پرور
مطبوعاتندن دکل ؛ زیرا بر قسم مهمی یهودی سرمایه دارانک تحت نفوذنده
اولان او مطبوعاتدن بر اثر التماس بکلنیه من . آنلر ادخال مدینیت نام
ساخته کاریمی ایله آسیا و آفریقا ده ارتکاب اولنان غارت و احتکارلری
تبیجیل ایله اعلان ایتکده پک بویوک فائده کورلر .



ایضاحندن مستغنی اولدیغی اوزره دول قویه نی شرق مملکتلرینه
مدینیت غریبه ادخال ایچون تشویق ایدن شی حسن اداره وقواعد عادلہ کی
وجائب انسانیه دکلدر ؛ آنجق فطرتک او مملکتلره بخش ایلدیکی منابع ثروته
دسترس اولق مثللو ملاحظات مادیه در . یو حقیقتی متعرف اولق اوزره
بر آمریقالی مؤلف دیورکه « اوزاق دیارلرده کی ثروت طبیعی بیلہ انسانیتک
فائده سی ایچون ملل متدنه افرادی طرفندن استعمال اولمایدیر وهر حالده
جهانک او دیارلری رابطه وضابطه آتته آلمایدیر ؛ تاکه هر طرفده سرمایه لر
امیتله یاتیرلسون و اشغال صناعیه او دیارلر لرلیرلرینک تعرضندن مصون بر
صورتله اجرا ایدلسون » (۱) ای صوکره دهانه یاپلسون ؟ صکره نه

بغایت مستفید اولان بر دولتدر .



بر آوروپا دولتنگ شرقده استیلا ایلدیکیی بر مملکتده کوستره جکی
تشیثات اعماریه شبهه سز بعض جهتله ازدیاد سامانی تسهیل ایلر ؛ فقط حکام
مستولیه معرفتیه وجوده کتور یان عمرانندن اصل مستفید اولان خلق دکل
خلقک ساکن اولدیغی ارضدر . یرلی خلقلک ثمرات عملی ایله ، ویردیکی
ویرکولرله خزینہ مملکت طولدیر یله بیلور اما او خزینہ نک مراقبه سی ،
ثروتک صرف وتوزیعی تمایله اجنبی مأمورلرک ید اقتدارنده قالور . مالکک
منابع ثروقی خلقلک نفعندن زیاده مسئولیلرک کاری نظر دقتہ آنه رق
ایشلدیلور . دولت مستولیه تبعه سندن اولان مالیون وارباب احتکار
مملکتک ثروتی طوپلار ، یوتار ؛ خلقه قاله جق حصه استفاده ایسه
استقلال ملینک ید اجانبه محوندن متولد زیان مادی وذلّت معنوی یه نسبتله
هیچ حکمنده در .

آوروپا لیلرک استیلا ایلدکلی آسیا و آفریقا بلادندن نیچه لری
«آنونیم شرکتر» واسطه سیله اداره اولمش ایدی ؛ حالا او یله اداره
اولنانلری ده واردر ، او مملکتلرک اهالی اصلیه سنک فرنکار طرفندن
ادخال اولنان آثار عمرانندن — دها طوغریسی ازدیاد مالی وتجاریدن —
نه قدر استفاده ایده بیله جکی آرتق تصور اولنسون . مقصد وغرضی هرچه باد
آباد تزید ثروتدن عبارت اولان بو مقوله قومپانیاره تودیع ایدیان اداره
حکومتدن نه حق وانصاف ویرلی خلقه قارشی نصل مرحمت مأمول
اولنه بیلور ؟ آوروپا ده عمله صنفی — سرمایه دارانک تعدیات محتکرانه سنه

بویولده بر حریت ویریورلرکه بوامتياز احرارانه لری البته شرقلیرجه منت ایله
تلقی اولماز. آوروپالی حاکم شکیات تظلمی بلا خوف وحذر دیکلمکده
وحتی او شکایاتک حقانیتی حسب المصلحه تسلیم ایتمه مکده مختار قالدیجه
اهالی مغلوبه ایستدیکی قدر وایلائی تظلم چیتارمقده سربست قالسون نه
حکمی اولور؟ دیشلری سوکیلن برکوپکک ایستدیککز قدر شدتله قویروغنه
باصیکز؛ باغیررو بلکه عوعوه ایله برابر صوکره سزه طوغری هجوم ده
ایتمک ایستر؛ فقط ایصیره مازحق ایصیرمغه یلتنسه ییله دیشی یوق که
تأثیرینی حس ایتدیرسون.

براجنبی دولتک وضع حاکمیتی اوزرینه بر شرق مملکتنده تأسس
ایده جک حریتدن اک زیاده استفاده ایدنلرینه او اجنبی دولتک مأمورلری
اولورلر؛ چونکه استقلالی احما ایدیلن شرقلی خلق آره سنده عدم خشنودی یی
افشا ایدرهر دورلو حسیناتی سربستجه یازوب سویله جک قدر احتیاطسزلر
بولنه ییله جکندن اجنبیلره ایجه ایال ویرلش، یولار کوسترلش اولور.
بناءً علیه او عدم خشنودی انتشار ایدوبده بر حرکت متحده ملیه یی انتاج
ایتمزدن اول اجنبی مأمورلری حیله ایله، خائنلر واسطه سیله، ویا رشوت
اعطاسیله ویا خودتجربیم اجراسیله ایشک اوکنی آلورلر؛ یعنی یانغین باجه یی
صارمازدن اول قولایلقه سوندیره بیلورلر. بناءً علیه حاکمیتلرینک ادامه سنی
بو وسیله ایله دخی تأمین ایلمش اولورلر. ایشته بر ملت محکومه یه حریت
نطق وسربستی مطبوعات اعطاسیله آنلرک حسینانه وقتیله واطرافیه واقف
اولتی بر تدبیر مهم درکه ممالک شرقیه ده توسیع حاکمیتله مشغول اولان
دولتله آره سنده انکلتره بو تدبیر مهمک ماهیتی لایقوله تقدیر ایدن واتخاذیله.

اولدقلى لسانی اقامه ایدرلر و بویله جه کندی عمل و حرکتلرندمه موقیتی تسهیل ایده جک بر واسطه حاکمیت بولورلر . ایدی شرقده آوروپا مدنیتک صورت انتشارینی نظر عبرتده ارائه ایلین بو مقوله حالات او مدنیت ناشرلرینه نیچه فوائد تفوق بخش ایلدیکی حالده استیلا اولان مملکت خلقنک اجتماعاً و یا سیاستاً و یا خود دانش جهتیله تعالی ایلک اقتدارینه پک مضر عارضه لر ایراث ایدر .

☆
☆ ☆

امرای قومیه سی طرفندن استبداد ایله اداره اولنه کلش بولان بر شرق مملکتی خلقنه آوروپا اداره متمدنه سنک تأسیله فوائد حریت کلدیکی عاداتا عمومیتله ذاهب اولان بر فکر در . شبهه سز حریت دینلن شی خالق متعالک انسانلره بر عطیه سبحانه سیدرکه آندن مشروعاً استفادمره مانع اولان ظالم لریکیم اولورسه اولسون حدت و شدت عامه یه دوچار ایدملی و آندن انتفاعمری تسهیل ایلینلر یانجی ده بولنسه لر مظهر احترام ناس اولمایدرلر . شوقدرکه بر خلقه ویریله جک حریتدن استفاده او خلقک حریت موضوعه یی نه یولده تلقی ایده ییله جکنه متوقمندر . ایدی اجنبی حاکملر شرقه اداره متمدنه ادخال و سیله سیله بر ملتک قوه استقلال سیاسیه سنی ازاله ایتدکن و مرور زمانله مقبولیت محترمه قزانش اولان مؤسسات ملیه سنی — یوزوقدر ، مناسبسز ، فائده سز در دیه — صار صدقندن واهالی محلیه یی اسلحه مقاومه دن تجرید ایلله مملکتک قوه ضابطه و محافظه سنی کندی مراقبه لری آکنه آلدقندن صوکره یا حریت خطاب و تحریر ویرمشر ویا ویرمه مشر نتیجه اعتباریله بویوک بر فرقی بولماز . ایسته آوروپا مسئولیری ملل مغلوبه شرقیه یه

عجبا نیچون ؟

ابتدای امر ده : او اجنبی حاکمیتی قهراً و کرهاً وضع اولنشدرده
آنک ایچون . مبادی ده فوائدی آلتیشلنن او اداره اجنبیه نک آره سی
چوق کچمدن اصلاح حقیقی یه بدل امحای حقوق قومیه اسبابی استحضار
ایلدیکی کوریلور . استقلاله مالک بر مسلمان مملکتی بلکه بر حاکم مستبدک
ویا اشخاص متعدده دن مرکب بر هیئت ظالمه نک اداره سی آلتنده قالش
اوله ییلور ؛ کرک او مستبد واحد و کرک او حزب قلیل مأمورین خلقک
اکثریت کلیه سنی تحملفرسا ظالمه دوچار ایده ییلورلر . بونکله برابر
شرف دینی واجتماعی تقدیر ایدن بر مسلمان خلق او ظلم وطنی یرنده
آمریت اجنبی یی کورمکدن ده زیاده توحش ایدر ؛ چونکه او ظلم محلی
ظالمک زوالیه مبدل عدل وصلاح اوله ییلور . حال بوکه حاکمیت اجنبیه نک
وضعیه او خلقک استقلال ملی سی کأن لم یکن حاله کیرنجه هر فرد
متبوعیت اجنبیه نک تحدید ایلدیکی دائره مادونیتک خارجنده بر صفت تمیز
اکتسابی قدرندن محروم قالور و افراد تابعه نک اک ذکی واک مقتدرلری ییله
اجنبی آمرلک مطیع اراداتی اولور . بوندن ماعدا اهالی تابعه نک مالک
اوله ییله جکی دهایی ملینک دائره انشراح ، ساحت تعالیسی هر طرفدن
خطوط مانعه ایله چویرلش بولنور . مملکتلرینه بر شکل تمدن ویرمک
وسیه سیله آقین ، آقین کان اجنبی مأمورلری کندیلرینه مخصوص اولان
ارکان قومیه یی ، کندی مملکتلرینک قواعد معاملاتنی بعضاً لیت ایله و بعضاً
تهدید ایله اذخال و تطبیقه قویولورلر . امور اداریه و عدلیه و تدریسه ده
مستعمل اولان لسان محلی یه ویا السنه مملکته بدل کندیلرینک متکلم

ایسته بوندن طولاییدرکه انکایزلرک آوسترالیاده یاپدقربی فرانسزلر جزایر ده
اجرایه یعنی اهالی اصلیه مملکتی کلیاً محو ایدوب میدانی یالکز کندیلرینه
حصر ایلکه موفق اوله مامشدر در .

بناءً علی ذلک اهل اسلام ایله مسکون اولان بر شرق مملکتی
مستولیلر ایچون حقیقی صورته بر « وطن جدید » تلقی اوانسه ماز ؛ او بر
مستلمکه در . بویله جه تمدن اصلی یی حاوی اولان بر مملکت خلقی استیلانک
مدتی دوام ایتدکجه تبعه محکومه صفتندن چیقه مازلر ؛ آنلرک هپسنه بر دن
« یرلی » تعبیر اولنسی ایسه اقوام وحشیه دن بولنان مستملکات طوائف
اصلیه سنه تشبیه دیمک اولدیغندن بر تحقیر کستاخانه در .

بویله جه مسقط رأس اعتباریله دکل آنجق استیلا سببیه علی
الاطلاق « یرلی » تعبیر اولنان یعنی فرانک مغلبه سنجه مادون صایلان بر
خلقک ممتازیت جنسیت ایله مفتخر بولنان ملت مستولیه افرادینه هر حالده
رضا ایله تودیع امور حاکمیت ایده جککری قیاس ایدیله ییلور ؛ فقط بر
دولت اجنبیه نک مجبور تابعیتی اولان اقوام اسلامیه حقنده بویله بر قیاس
البته صحیح اوله ماز . بر مسلمان خلق کندی جنسنه منسوب اولان حاکمک
تعذبات متادیه سنه معروض قامش اوله ییلور ؛ بونکله برابر او خلقک کندی
حکومت ظالمه سنه ترجیحاً بر آوروپا دولتک حاکمیتنی دعوت ایده جکنی
ادعا ایلمک حقیقت حالی پک بویوک بر جرأتله تغیر دیک اولور . ظلم البته
او خلقک افرانجه ده مفعور در ؛ فقط کندیلرله روابط قومیه وحسیه سی
بولنمیان بر اجنبی مستولینک اداره سی او ظلمدن دها زیاده بر نفرتله مردود
صاییلور .

اجراسی واجباتدن بولندیغندن آنلرک مخالفترینی ناچار جبراً باصدیرملی ایش؛
حتی دول متمدنه نك وافیاً مالک اولدقلری اسلحه متوقفه آنلرک مخالفت
فعلیه لرینی قولایجه ازاله ایده مزسه هر دورلو حیلۀ نفاق و افسادك اجراسیله
قوة مقاومه مجتمعه لرینك سکتۀ دار ایدلمسی جائز ایش .

✱ ✱

ایکنجی نوع عنصر مخالفی حاوی اولان بر شرق مملکتنه آوروپا
مدینتک بو صورت ادخالی وهله اولاده شایان تصویب بر مسئله کبی
کورینور وعلی الخصوص آوروپا لیر ایچون بر نظریۀ ثابته طرزنده تجلی ایدر؛
فقط بز بو ادخال مدینت ماده سنك تدقیق ماهیتنه عطف نظر ایتک
ایسترسهك مواجهه مزده غایت الیم بر حقیقت انکشاف ایلر . اکر او وجهله
ید استیلای اجابنه دوشن بر شرق مملکتک بر مزیت فاضله سی ، بر
مدینت مایه سی موجود ایه او حالده یرلیرک آوروپا دن کلن متوطنلر ایله
ممتزج اوله رق هویت اصلیه لرینی غائب ایتلری ویا عنصر مستولینك نفوذ
قاهره سنه طایفه میوب منقرض و نابود اولملری احتمالدن بعید در . دیگر طرفدن
دخی استیلا ایدن طائفه حاکمه نك آنلری اداره خصوصنده کی تشبثلری بر
موقفیت حقیقه تولید ایده مز ؛ چونکه استیلانك وجوده کتوردیکی حال
محکومیت طائفه مغلوبه یی بالطبع تدابیر امتناعیه تحریسنه سوق ایدر . قوای
مایه لرینك صارصلسی ، نظام اجتماعیه لرینك کسری اهالی مغلوبه یی مستولیره
قارشی ضدیت ایله حرکت ایتک حس متهمانه سندن هیچ بر وقت آزاد
ایله مز . بونلر خواص مدنیه دن وحشیات فاضله دن کلیاً عاری اولان یرلی
وحشیلر کبی او یله قولایجه قیریلوب مضمحل اولمق تهلکه سندن مصوندرلر .

تمدنروشانه نك نه كې آثار تولید ایتدیکنی آکلايه بيلور . بزم ایچون بوراده قید ایده جك بر نقطه وار ایسه اوده دول مذکوره نك اوهماتنك شرقليرك شرف ملی واستقلال حکمرانیلری بهاسنه ایدلديکنی بیاندر .



آوروپا دول غریبه سنك ممالك بعیده ده تعقیب ایتدکلی اخذ مستملكات مسلكنده ایکی دورلو عنصر مشكله تصادف اولمق لابد در : بونلردن بریسی تسخیر اولنان مملكتك خواص تمدنيه دن کلیاً بی نصیب اولان اهالی اصلیه سیدر . ائمدی مدنی مستولیر منفعتلرینه بو یرلیرك وجهاً من الوجوه حائل اوله بيله جکلیرینی حس ایدنجه آنلری میدانن قالدیرمقده او قدر مشکلات چکزلر . بناءً علیه تارومار ایدیلن او طائفه بدویه یا قیریلوب نابود اولورلر ویا ایچلرندن باقی قالانلر بولنسه بيله آنلرده خرستیان ایدلماکه برابر آنجی کندیلرینه مخصوص بر طبقه سفلیه اجتماعیه دائره سنده قالورلر و دائماً مستولیرك خدمتکارانی وظائفیه مکلف بولنورلر . ایشته بویه بر مستملکه ده فرنکارك امور تمدنيه سی موانع مزعجه دن سالم اوله رق اجرا ایدیلوب کیدر . ایکنجی عنصره کانجه : بوده مجبور تابعیت ایدیلن بر مملکت خلقتك کندیلرینه مخصوص احوال مدنيه یه مالک بولملیردر . آوروپا مستولیرینك بونلر ايله تماسی حالنده تدابیر افرنجك جریانی نیچه جدی حائله ره تصادف ایدر . بویه بر مملکت خلقتك کویا حسب التعصب بصیرتلی باغلی قالمش اولدیغندن بونلر مملکتلی اوزرینه وضع اولنان اداره متمدنه نك کیت کیده کندیلرینه تأمین سعادت ایده جکنی بر دورلو ادراك ایلیمزلر مش ؛ بناءً علیه مقصد تمدنك ترویجی ایچون هر دورلو فداکارلق

اون ايکنجی فصل

هرلک نخبی

Action Civilisatrice (یعنی تشبثات تمدنکارانه) اوپله بر تعمیر
 فرنکانه درکه تلفظی پک چوق کیمسه لک سمع تفهمنه اهمیتله تأثیر ایدر ؛
 حال بوکه سیاسیون افرنجک نطقلرنده ، محررین غریبه نك مقاله لرنده کثرتله
 استعمال اولنه کلدیکندن ادای خوش آينده سنی ضایع ایتش وشو صوک
 زمانلرده عاداتا بیاغیشمشدر . انگلیزلرک شو معروف Our good rule
 and justice (یعنی ادارهٔ حسنه وعادله من) سوزی دخی مباحث
 سیاسیه صره سنده استعمال فاحشه اوغرا دیله کلدیکندن جاذبهٔ اصلیه سنی
 غائب ایتش وعاداتا عامیانه بر لفظ تفاخر حالی کسب ایلمشدر . غرب اهل
 تمدنک بو تعبیرلرندن مراد اولان معنا شو درکه : « عالم نصرانیتک دول
 قویه سندن بری بر مملکت اسلامیه نك امور داخلیه سنی جناح حمایتی آلتنه
 آلمغه همت ایتدیکی زمان حریت ، عدالت وانتشار مدنیت او ادارهٔ
 حسنه نك ادخالنی متعاقب یا درحال ویا تدریجاً رونا اولورمش وعمران بلاد
 وسعادت عبادک آثار بر کزیده سی هر طرفده وقوعه کبکه باشلارمش ! »
 دول قویهٔ افرنجیه نك ممالک شرقیه حقنده اجرا ایلدکاری ترتیبات سیاسیه یی
 ماهیت حقیقیه سی اوزره تبعه مقتدر اولان هر بر کیمسه او مقوله همت

آنك حقنده معلومات ویرن اولورسه مكافات آله جقدر . »

« ماوی پو طورلی ، سیاہ پالطولی ، قویو اسمر رنکلی ، قیویرجم صاحلی ، قولانغی آلتون حلقه لی عبدالله الیاس نام مرا کشلی عرب-افندیسی اولان یوز باشی (سنت لو) نك نزدندن ماه - جارینك یکر می برنجی کونی فرار ایلمشدر . لوندره شهرنده دائماً کیمکده اولدینی آلاتورقه بر طاقم لباس ایله یته آلاتورقه بر نوبت عباسی ده برابر کوتورمشدر . هرکیم کندیسینی بولوبده (غرین ایستریت) ده کائن مستر (لوزهل) ك اویته کتورورسه بر کینی مکافات ویر یله جکدر . »

« افندیدن اولان بر ذاته خدمته لایق اون ایکی یاشلرنده بر زنجی چوجغنك (فینج له یں) نام سوقاقدده کائن (ده نیس) ك قهوه خانه سنده صایله جفی اعلان اولنور . »

« اون یاشلرنده بر زنجی اوغلانی صایلقدر . طالب اولانلر (تره نیدیل) سوقاغنده بولنان (ویرجینیا) قهوه خانه سنه مراجعت ایتسونلر »

« اون اوچ یاشلرنده هندلی بر اوغلان ماه جارینك سکزنجی کونی (باتنی) محله سندن فرار ایلدی . بویننده باغلی اولان طاسمه ده شو عباره یازیلی ایدی : (لیتقولن - این - فیلدسده ساکن لهیدی . ومفیلدك سیاہ کوله سیدر .) بو اوغلانی هرکیم بولوبده سیر ادوارد برومفیلدك خانه سنه کتورورسه بر کینی مکافات آله جقدر . »

او مسلمانلرک سایه شفقتنده تأمین معیشتی جانلرینه منت ییلورلر .

انکلتره دولتک ۱۸۷۷ تاریخنده مصر حکومتیله و ۱۸۸۰ ده باب عالی ایله منع اسارت ایچون وقوع بولان مقاوله سی . موجنجه آفریقا دن اسیر قاجیرلما سی تعهد آلتنه آلتش ایدی . مع ما فیہ ممالک عثمانیه آفریقادنینه اسیرلر آشیر ییلوردیه شکایت اولمقده در . مملکتیز ده عن قریب بو حالک اوکی آلتسی امید ایدیلور . آفریقا ایچریلرنده بو تجارت غیر مشرعه یی ارتکاب ایدنلر یالکیز عرب تاجرلری دکادر ؛ حتی آوروپالی بر خیلی قسمت قوغالایجیلرک ده بوندن متنع اولدقلری ثابت ایکن نه دن ایسه مسلمانلرک ایتدیکی فنانقلر بو فرنکلرک کوزینه دایماً زیاده جه باتار .



مشرق اسلامک بویوک شهرلرینه کیدوبده کمال مراق ایله اسیر بازاری واسیر آلیم صایمی کورمک ایستین وسخطی ومشوش معلومات آلهرق آنلر اوزرینه رومانلر ، هزیانلر یازان انکلیزلره بر خدمت ابرازی . مقصدیله زیر ده کی اسیر اعلاناتنی بعض آثار قدیمه دن بالائتقاط نقل ایلرز . کندی دار و دیارلرنده دها بر ویا بر بوجق عصر اولنه کلنجه یه قدر وقوع بوله کلش اولان احوال عجیبه اسارتی مصور اولدیغندن شرقدہ کی اسیراشترا واستخدامندن زیاده مراقلرینی تحریک ایده ییلور اعتقادنده یز : — « طقوز یاشلرنده ، قیر شایاقدن یایماش البسه اکتسا ایدر ، صاحبجری دیپدن کسدرلمش بر زنجی اوغلانی کچن آغستوسک طقوزنجی صالی کجه سی لوندره نک (سنت نیقولاس) سوقاغنده غائب ایدلری . مذکور سوقاغده (شکر کولچه سی) نام محله ساکن مستر طوماس به یکره

دول نصارانك اداره اسلامدن ضبط ايتديكي بلاد شرقيه ده اسكي
اسير بازارلری برنده ميسونه ر اداره لر ينك . مكته لر ينك فلانلر ينك تأسسني
وبو وسيله ايله اسلام اغنياسی المده بولنان اسيرلره تأمين آزادی ايدلديكنی
مقام تفاخرده اعلان ايتك غربك نشر نصرانیتله مشغول اولان کیمسه لری
ایچون قولایدر ؛ فقط بو مقوله تشبثات آزاد کارانه نك نه نتیجه لر حاصل
ايتديکني آ کلامق ایچون انکثره حکومتك بو بابده آره صره نشر
ايتديکي اوراق رسمیه بي تدقیق ایلک لازمدر . بو اوراقدن مستبان اولدیغی
اوزره مخالفین اسارت جمعیتك - که پك چوق اعضاسی یا رهبان گروهندن
یا خود پاپاس کبی غیرت متعصبانه کومستن ذواتدن عبارتدر - مسلمان ولیرك
تحت تملکندن حکومته چیتارتدیردیغی اسیرلر هیچ ده مسعود صایله جق
بر حال کسب ایده میورلر . افندیسنك اوینی ترك ایدن بر اسیره او مرحتلی
میسونه لر همان دست امداد اوزادیورلر وبویله جه یاقه ایه ییلدکلی
اسیرلرک اسامیسنی یکی خرستیان ایدیلان یرلیرك لیسته سنه بر سرور موقعیتله
قید ایلورلر . البته ایدرلر ! صلیک هلالدن آلدیغی هر غنیمت انسانیت
ایچون بر مظفریت صایلمورمی یا ؟ صوکره بو آزادیلیرك ای خرستیان
اولوب اولیه جملری او متقی ممدنلرجه پکده اهمیتلی بر کیفیت دکدر .
آفریقاده انکثره مأمورلر ينك مظاهرت ضمیمه ویا صریحه سیله میسونه لرلرک
مسلمانلردن قیدقلمی اسیرلرک اکثریسی آزادك کندیلرینه تأمين ایلدیکی
حیات جدیدده بر طریق مستقیم اوزره حرکت ایده مدکلرندن ما عدا
سرخوش ، خرسز ، اوغورسز شرشری حاللرینی کسب ایدیورلر .
بعضیلری ده محافظه راحت وناموس ایچون اسکی افندیلرینه رجوعی وینه

ایچون اغیاره پک بو یوک بر فرصت ویردی .

وهله اولاده اسارت ماده سندن طولانی اسلامه قارشی وقوع بولان تعرضات بر امل انسانیتکارانه یه مبنی ایش کبی کورینه بیلور ؛ مع ما فیه بو باده اتحاد اولان تدبیر مزیت صحیحه انصافدن عاریدر واسرای زنجیه تجارتک ترویجی خصوصنده عالم نصرانیتک ماسبقده کی معاملات غدارانه سنی ستره کافی اوله ماز . آفریقانک حاکمیت اسلام تحتنده بولنمان سواحلدن محیط اطلسیده کائن فرنک مستملکاته وعلی الخصوص آمریقایه کوتوریلن اسرانک عددی تقریباً یدی میلیونه بالغ اولمشیدی . بوکون او ممالکده اسرای مرقومه نک میلیونلرجه انسال واحفادی بولتمده در . فی الواقع جداری خرستیان ایدلش اولان بو سیاهیلر ده خرستیان مذهبیه معتقد درلر ؛ مع ما فیه جنس اییضدن اولان دینداشلری طرفندن حقزلنده یینه بغض واستکراه ایله معامله ایدلمکده در . نه خرستیان اولق نه ده مدنیت افرنجیه عالمی ایچنده یشامق او زوالیلری جنس سفلی افرادی صورتنده تلقی ایدلمکدن قورتاره مامشدر . هیئت اجتماعیه نصر آره سنده کی موقعلری دائماً منلول ، او هیئت اجتماعیه ایله اختلاط آرزولری ایسه دائماً مردود اولور . آمریقاده کی بو خرستیان سیاهیلردن بریسی جرائم عادیه دن بریسی بر بیاض آدم حتمده ارتکاب ایش اوسه بیاضلردن بر جمع غفیر انتقام آلیور سیاهی مجرمی ته لیورلر ، پارچه لیورلر ، جانی جانی آتشد یاقیورلر ، سیاهی مجرم حتمده قوانین احکامی هیچ ده قاله آلیورلر . انسانلک بویله انسانیتسز بر طرز عجیبی عالم اسلامیتک هیچ بر جهتده کورلمدی وکوریله مز .

کمی کوکرتنه لرنده ، اشيا کي کمی انبارلرنده استيف ايدرك فورطنه لی دریالردن
کچورسونلر ؛ آلیشمقلری اقلملرده اولنجیه قدر چالیشدیرسونلر ؛ عاقبت
اللهك بو فلاکتزده مخلوقلرینه ویريله جك مكافات معنویه مذهب
نصرانیتك نفوذ تسلطکارانه سی ایش ! اوت ، بویوك بر تضمین روحانی ؛
فقط آه ممکن اولسه ده روحك اضطراباتی آنکله تشفیه ، حیاتك آلامی
آنکله تسکین ایديله بیلسه !

الغای اسارت ماده سی وضع ایدیلور ایدلز غربك او متدین
انسانیتپرورلی یعنی عالم نصرانیتك او مرحمتلی راهبرلی عالمه انوار انجیلیه
نشری ایچون یکی بر میدان بولدیلر . قدیمده جریان امر اسارتی توسیع دائره
نصرانیته بر واسطه عدایتمش اولان کلیسا بو دفعه ده الغای اسارتی نشر
مذهب مقصدینه خادم بر چاره اتخاذا ایلدی . بوا یسه غایت معقول بر تدبیر
ایلدی ؛ زیرا بو تدبیر آوروپای غربی ایله آمریقانك ناشر دینلرینه یالکیز
خادم حریت اولمق شرفی قزاندیرمه قلمه قالمیه جقدی ، بلکه بر ده اسارتی
ترویج ایدیوردیه اسلامیتك نامنه لکه سورمکده کندیلرینه یکی بر آت
تأمین ایده جکدی . او یله ده اولدی یا ؟ فی الحقیقه حکومات اسلامیه نك
معلوم اولان عظالتی ، کوته بینلکی سببیه مشرق اسلام خلقی غریبونك
الغای اسارت وسیله سیله احداث ایلدیکی « انسانیت موده سنی » تقلید
ایده میوردی . متغلبین امرای اسلام ینه اسکیزی کبی سرایلرینی ،
قوناقلرینی کوله وجاریه ایله طولدیره رق عالم افرنجده وجوده کان تحولات
فکریه دن بیخبر بر حالده یشاپورلردی . شوراده بوراده ، تك توك اسیر
اشترا وفروختنك دوامی ایسه مؤسسات اسلامیه بی جهان نظرنده اتهام

تحت اسارتہ صوقق ایچون برحق بخش ایدر ؛ تاکہ اسباب انتشاری تسہیل اولنہ « دیش ایدی (۱) مع مافیہ اسارت مادہ سی آوروپادہ بر عکس عمل حاصل ایدوبدہ مخالف انسانیت کورنمکہ باشدقدن صوکرہ بر چوق خرسیان محررلی قبول نصرانیتدن اسرا ایچون ملحوظ اولان منافع معنویہ یی تمدادہ وحضور قلبی ایضاحہ قویولایلر . حتی الغای اسارتک اک غیور بر طرفداری بولنان (قاراقسون) بالادہ مذکور کتابک یوزنجی صحیفہ سندہ دیورکە « باربہ دوس مستملکہ سندہ بر بیاننامہ رسمی نشر ایدلمشیدی کہ بوندہ قوئہ یکرلک اسیرلینی محل عبادت لرینہ کتورمہ ملری امر اولندی . بو تدبیر کویا اسیرلرہ افندیلرینک احکام مذہبیہ سی تلقین اولنورسہ مستملکہ نک آسایشی مختل اولہ بیلہ جکی ذہانہ مبتنی ایدی . عمرلرنده سفالتدن ماعدا هیچ بر شی کورہ مین زواللی اسیرلر ایشته بویله جہ تسلی اعتقاد نصرانیت کبی یکانہ بر چارہ معنویہ دن دخی محروم ایدلدی . » فرانسز مؤلفی (والون) دخی اولکی فصلده ذکر ایتمش اولدیغمز (ازمنہ قدیمہ دہ کی اسارتک تاریخی) عنوانلی اثرینک مقدمہ سندہ بویولده بر فکر دہ بولنیورده « شوراسنی دہ اونوتمایہ لم کہ بو اسیرلر بزم دیانتمزہ دونده رملکە تسلی بولایلر « دیور . ایشته بویاناتدن دخی آ کلاشیلیورکە اساساً مقبوح اولان بر شیئہ تغیر احوال وایجاب زمان مثلاًو سبیلردن طولایی بر تأویل اعتذار بولق لازم کلورسہ آنی احداث ایتمکدہ دهای افرنج پک چوق مشکلاتہ تصادف ایتمز . اویلہ یا ؟ زواللی سیاهییلری مسکنلرندن ، مأولرندن ، عائله لرندن آیرسونلر ؛ وطنلرندن سوروب چیقارسونلر دہ حیوان کبی

انسانیت پرور لک بو تجارتده بر غداراق بولندینی هر نصابسه کشف ایللری
 اوزرینه انکاتره و فرانسه دن ماعدا دیگر ممالک غریبه ده دخی پک چوق
 کیمسه لر وجدانلرینک بو منفور تجارته مخالف بولندینی حسن ایدر
 اولشلردی . آرتق بوندن صوکره جنس ایض افرادینک تسکین طمع
 مقصدیله آفریقا دن سوریلوب چیقاریلان او بیچاره سیاهیلهر حقنده آوروپانک
 هر طرفده بر مر حمتدر باشلدی . بناء علیه بو حسیات جدیده ایله متهیج
 اوله رق ۱۷۹۲ سنه سنده دانیارقه دولتی اسیر اشترا و فروختنی منع ایلدیکی کی
 ۱۸۱۴ سنه سنده ده اسوج وهولاندا حکومتلری کندی مستملکه لرنده
 بو تجارتی الفا ایلدیر . (۱) اوت ، بر امر خیره امثال ایدمک لازمدر ؛
 بر دور تاریخی آچه حق قدر مهم اولان بر اثره ایسه امثال ایتک
 ایستینلر چوق بولنور ؛ زیرا یکی موده شکنده میدان چیمان افکاری
 اتخاذ ایتک هوسی عادت ساری بر سودا خسته لغی کیدر . دنیانک اک مقمن
 صایلان مملکتلرنده ایسه پک چوق کیمسه لک بو سودایه طوتلدلری هر آن
 کوره کلدیکمز امثالیه ثابتدر .

اسرایه مر حمتک واسیر تجارتنه مخالفتک بر موده کسایدیکی زمانلردن
 اول ارباب کنیسا اسیر ضطاتی نشر نصرانیه الویریشلی بر واسطه اولق
 اوزره تلقی ایدرلردی ؛ حتی بوندن طولای اولق کرکدرکه فیلسوف مشهور
 مونتسکیو « ضحجه بر دیانت آکا ایمان ایدن کیمسه لره آکا ایمان ایتینلری

(۱) G. P. Gooch نام انکلیز محررینک :

« Annals of Politics and Culture »

عنوانلی کتابی بالاده کی تاریخلری مصدقدر .

یوکسکلکی ایسه آنلرک ازدیاد لیاقتی ایچون بر تازیانه تشویق اولور . « (۱)
 فی الحقیقه اسیر تجارتک جهات اقتصادیسی لایقوله تبع وموازنه
 ایدلدکن صوکره انکاتره دولتی آنک الغاسی خصوصنده کی مطالبه موافقت
 ایلدی ؛ بونکله برابر الغای اسارت طرفدارلی ایچون حکومتک مذکور
 موافقتی استحصال ایلهک یکریمی سنه قدر بر اقدام متادی به محتاج
 اولشیدی . الغای اسارت حقنده کی لایحه بی پارلمتونک یدی دفعه تقض
 ایلدیکی معلوم بر کیفیتدر . بوخصوص حقنده جریان ایتمش اولان
 مباحثات مدیده صره سنده « انسانیتپروان » بو تجارتده کی مناهی
 ومعاصی بی نیچه ادله بلیغه ایله اورته به سوریورلردی ؛ حال بوکه اسیر
 تجارتک الغاسی سببیه ایشک اوجی منافع مادییه فنا صورتده طوقونه جفنی
 حس ایدنلر ایسه الغا طرفدارلرینک یاریا کارقلرینی ویا یکون صحیح ایله
 یکون مشوش آره سنده کی فرقی تمیز ایده میه جک قدر علم اقتصاد جاهلی
 بولندقلرینی کرسی خطابنده ولوله انداز بیان اولیورلردی .

❖ ❖

اسپانیا مستملکاتی ایچون خدمات اسرایه حاجت کورندیکی
 دورلرده یالکز - الیوم حریت وانسانیت نامنه ال اله چالشدقلری ادعا
 اولنان - انکاتره وفرانسه دکل حتی متمدن کچینن دیگر دول بحریه دخی
 اسیر صید وفروختنده بر برلریله عاداتا یاریش ایتک ایستمرلردی . حال
 بوکه اسیر تجارتک فوائدی مشکوک کورنمکه باشدقدن صوکره بر آلی

“Nouveau Dictionaire d'Economy Politique” (۱)

عنوانلی قاموس اقتصاددن مأخوذ در . جلد ۱ صحیفه ۹۳۳

شیطانی اصحابنک خیالخانه لرنده وجود بولور ؛ ایدی بو تدبیرک تأمل عمیقہ
قادر اولیان اکثریت ناسہ دائماً غرض وعوضدن سالم کبی کورندیکی امور
بشریہ نک صورت جریانی تفحص ایدنلرجه معلومدر .



آروپاده نیچه فنون وصنایع کبی علوم سیاسیہ نک تکملی ، ترقیات
مثبتہ ده او قدر اسکی دکلدرد . اسرای زنجیہ تجارتنک الغاسی ماده سی
حیز حصوله کلیدیکی زمانلرده نظریات سیاسیہ دخی بر طرز مثبت کسب
ایلهکه وعلی الخصوص مباحث اقتصادیه مجربات معقولہ اوزرینه تکمل
ایتمکه باشلمش ایدی . میلیونلرجه نوع بشر افرادینک حیاتی بها سنه اوله رق
جریان ایدن بواسیر تجارتی کبی بویوک بر معاملہ کسبیہ نک اقتصاد نقطہ
نظرندن تدقیق وقوع بولنجه اشغال واعمالک ترقیسی ایچون جبراً محکوم
اشتغال ایدیلن اسیرلرک دکل بلکه حر واجرتلی عملہ نک یاردمی دها چوق
اوله جفی حقیقی آکلاشیلدی . اراضینک تیاری واملاکک اعماری
خصوصنده و بونلره مقتضی ومناسب اولان آلات وادواتک اصلاحنده احرار
عملہ نک ثمرات اشتغالی دها مفید کورنمکه باشلدی . دیگر طرفدن دخی
چالیشدی رملق ایچون اشترا اولنان اسیرلرک فیائی حر عملہ نک اجرتندن دها
زیاده اولدیغی حالده ثمرات اشتغال او نسبتده ظهور ایتیوردی . ته کیم
فرانسزجه بر قاموس اقتصادده بو کیفیت شو وجهله سرد اولنیور :
« اسرانک اشتغالی املاکک وادواتک طرز اصلاح واکمالنه مدار اوله ماز ؟
بو کبی اکمالات الی هنرلی اوسته عملہ یه محتاجدر ؛ عملہ نک آلدیغی اجرتک

بالرفاقه الغای اسارت مقصدینه چالشمغه باشلدیلر . » (۱)

اوت ، الغای اسارت مقصد انسانیتکارانه سی ابتدا بونلر طرفدن ترویج اولندی اما اسارتدن متولد کارد ماهیتی ایله یکونی ولزومی ایله مضرتی لایقيله تدقیق اولندقدن واو بیاض رنگلی متمدن خرسیتانلرک منافعتک هانکی شقی اقتضا ایده جکی آکلاشلدقدن صوکره آفریقا سیاهییلری ایچون بر فکر رحیم انسانیت او یاندی . اسرای زنجیه حقنده تدقیقات تاریخیه ده بولنان آمریقایی R. R. Cobb اولجه ده استشهاد ده بولندیغمز کتابنده بو حقیقی دها واضح صورتده کوستریور « نه بر غیرت دینه نه ده بر هوس آزاد پرستی دکل آنجق منفعت مادیه بو سیاه رنگلی افراد مملوکه نک منع ادخالنی احداث ایلدی » دیور (۲) کتابنک دیگر بر فصلنده ده پانیسوانیاده کی قوئه یکرلر اسیر قلمکنه پکده او قدر مخالف دکلدیلر ؛ حتی بونلرک سرآمداندن اولان William Penn ک حین وفاتنده اسیرلره

مالک اولدیغی ییله داعی شهبه بر مسئله در « فکرنده بولنیور (۳) ایشته بو مثالو حقایق تاریخیه میدانده طوررکن اسیر تجارتنک لغوی صرف منفعت مادیه الجاسیله وقوعه کلش اولدیغنه شهبه ایدیله مز . ماهیتنده بر عنصر منفعت مندمج اولان بر تدبیری ملاحظه منفعتدن عاری بر حس انسانیتپرورانه اثری کی ارائه ایتک او ییله بر هنردرکه بعض تحمل

(۱) Clarkson نک :

“ History of the Abolition of the African Slave-Trade ”

نام اثرندن صحیفه ۹۹ و ۱۰۰

(۲) طقوزنجی فصلدن مأخوذ در .

(۳) اونجی فصلدن مأخوذ در .

منسوبلرینه بر غیرت بخش ایلمش اولدیغی کبی ینه آمریقانک پانسیلوانیا حوالیسندده اسرای زنجیه تجاری علیهنده وقوع بولمش اولان طغیان افکار دخی انکاترده کی قوئه یکرلره بر نمونه امتثال اولمش ایدی . « (۱) حیاتنک نیچه سته لرینی الغای اسارت خصوصنده چالیشمقله کچوروش وانکاترجه آزادی اسرانک مؤسسارندن بولمق اوزره طائمش اولان (قلارقسون) نام ذات دخی اسیر تجاری حقنده یازدیغی بر کتابده بر فقره سیله بزم تحریرزه یول آچور . باقیکنز بو متدین قوئه یکر ، بو انسانینلی انکلیز او فقره سیله اصل بر حقیقتک ظهورینه خدمت ایدیور : « قوئه یکرلرک آمریقاده بولنان منسوبلری واسع اراضی یه مالک ایدیلر ؛ فقط بو اراضی یی ایشلمک ایچون کافی مقدارده ایرغاد بوله میورلردی . قوئه یکرلرک عائله لری دخی کثرتلی ایدی ؛ بناءً علیه خدمتارینه یتیشه بیله جک مقدارده خدمتکار تدارک ایده میورلردی . بو مقوله احوال دن طولانی ظهوره کن احتیاجاتی تسویه ایچون آفریقا زنجیلری طوبیلوب آقین آقین آمریقا یه ادخال ایدیلور وهرکس بونلرک اشتراسنه طالب اولیوردی آمریقا قوئه یکرلری کرک تجارتک وکرک اسارتک رواجلی اولدیغی بر خطه ده ممکن اولدقلرندن کرک اسارت ماده سنه وکرک امور تجاریه یه عائد بر چوق اهمیتی معلومات استحصال ایلیورلردی . او خصوصلرده کشف ایلیه ییلدکاری نقاط مهمه و معلومات مکتبسه یی انکاترده بولنانلره اخبار ایلدکلرندن

(۱) Henry Wheaton نام آمریقا دیپلوماتنک:

“ Histoire des Progrès du Droit des gens ”

عنوانلی اثرندن . جلد ۲ . صحیفه ۲۶۲

مدت کچدیکی حالده او مدت مدیده ظرفده یشامش اولان خرسیانلردن هیچ بریسی عقل ایدوبده بو حقیقی کشفه مقتدر اوله مامش ایدی ! اسیر تجارتک الغاسنی حیزّ حصوله چیقارمق مقصدیله مرحمت عامه بی تحریکه او دیندار قوئه یکرلری سوق ایدن اسبابی دخی تحری ایده لم ده باقه لم میدانه نه چیقار .

اسیر تجارتی طبیعی پک کارلی بر معامله ایدی ؛ قوئه یکرلر ایه کار وکسبه اک زیاده وسعت ویره جک معاملات صرافیه و تجارتیه وصناعیه ده پک بویوک لیاقت کوسترمش وحقی شدت میلان تمول ایله شهرت بولش بر طائفه درلر . او حالده اسیر تجارتی کبی تمتع عظیمی موجب اولان بر مشغولیه قارشی فریاد اشتکا چیقارملری عجبا نه کبی اسبابدن انبعث ایدی ؛ بر شخصک اعتیاد معروفنده ویا بر فرقه ناسک مساک ملتزمده غیر منتظر بر اثر تحول ظهوره کلیویرهسی لا جرم شبهه بی دعوت ایدر و بنا برین شبهه نک مراقی ، مراقک دخی آرزوی تحری و تحقیق حصوله کتورمسی طبیعت بشریه مقتضاسندندر . اسرای زنجیه تجارتی باصدیرمق ایچون قوئه یکرلرک ایتش اولدقلری شکایتلرک ، نمایش مخالفتلرک اصلنی تحری ایه پک بویوک بر کرامت کشفه محتاج دکدر . تحریرده دلیل اولق اوزره بزینه محررین غریبه نک اسارت حقنده کی بیاناتنی حاده تدقیقندن کچوره لم :

حقوق بین الملل مؤلفلردن بر ذات اسارتدن بحث ایلدیکی صرهده دیورکه « بو حیثیتسز تجارتک علمینده چیقاریلان فریاد شکایت — اویله ظن اولندیغی کبی — انکلتزدهده باشلادی . آمریقاده ساکن قوئه یکرلرک بو بابده نشر ایتدکلری آثار محرره طائفه مذکوره نک انکلتزدهده بولان

سکته کتورر .

Amies des Noirs جمعیتی منسوبلرینک اسرای زنجیه ایچون
کوستردکری مرحت انسانیتکارانه او قبیل حسیات عجیبه دن بولمیه بیلور ؛
او حالده آنلری بو تشبث رحمانه یه سوق ایدن بشقه بر سبب آرا مقلغمز
لازم کلور . اساسنده خودکاملق اولان بر فعلک بعضاً صرف نفع انسانیت
مقصدیله بلا غرض ولا عوض اجرا اولمش تشبثات صورتمنده ارايه
ایلدیکنی تخطر ایلرسه ک آرادیغمز سببی بوله بیلورز : مادام که فرانسه ده
Amies des Noirs جمعیتی طرفندن اسرا لهنده کی تشبثلر اسیر تجارتنک
انکلیزلر طرفندن اله کچوردیکی وقتدن بر مدت صوکره وقوع بولمشر
ومادام که فی ما بعد فرانسه ایچون او تجارتدن بر تمتع عظیم استحصالی کسب
عسرت ایامشر ؛ او حالده بعض فرانسزلرک وجدان انسانیتکارانه لرنده بو
تجارت منفوره یه قارشی بر عداوت حسی او یانمسی او قدر شایان حیرت بر
کیفیت اوله ماز .



اولجه ده ایما ایلدیکمز وجهله انکلتزه ده اسیر تجارتنک لغوی
حقنده کی تشبثاتنک محرکری (قوئه یکر) طریقتی اصحابی ایدی . بونلرک
اسیر تجارتی علیهنده استعمال ایندکری دلائلک همان کافه سنده اسارتک
مذهب نصرانیتک اساسنه مخالف بولندیغی ایراد اولنیور . مذکور طریقت
اهلنک بو کشف خارق العاده سی کندیلرنندن اول دنیایه کلوب کیتمش اولان
میلیونلرجه خرستیانلرک روحلرینی غدا ب نجاته دوچار ایتسه کرکدر ؛ زیرا
ظهور نصرانیتدن تا الغای اسارت دورینه قدر بیک سمکز یوز سنه قدر بر

بولور . بومقوله کیمسه لرك اذهانی بر امر خیر اجرایی ایچون ما فوق الطبیعه
بر هوسله طولدیغی زمان یابدقیری شیر موازنه منطیقه دن مجرد نتیجه لر
تولید ایدر . بوحادثه روحیه - ایتالیالی بر عالمک تعریفی وجهله -
« احساسات عقلیه دن بعضیلرینک غائب ایتدیکی قوت سببیه یالکز بر
جنس حسک خلاف طبیعت بر مقدار فاحشده آرتسندن ، ایلری کلمش
اولسه کرکدر (۱) شکل دماغیسی بو وجهله انقلاب بولان کیمسه لر کوز
وکوکلدن بعید اولان فلاکتزدکانک آلامی حتمنده حسیات شفقت
ومرحمت کوسترمک ایستدکاری حالده کوزلرینک نوری وکوکلرینک
سروری اولسی لازم کن اقربا وتعلقات ایله یانی باشلرنده ساکن اولان
ابنای بشر افرادینک اضطرابات ویا احتیاجاتندن هیچ ده متأثر اولمازلر .
بو حال روحی بی بر مثال ایله ایراد ایده لم : بالفرض بومقوله انسانیتپرورلردن
بریسی لوندره دن قانقارده تا ماکدونیا ده بولنان بر خرستیان کونینک
چیچک خسته لغنه دوچار اولان بلغارلینه معاوته کیدر حتی بو خسته لغنک
صرف ترک مأمورلرینک غداراغندن طولایی انتشار ایتش اولدیغنه اینانور
وبشقهرلینی ده ایناندریمغه چالیشور . دیگر طرفدن دخی لوندره ده فقرا
محلهلرندن بریسنده ساکن والدہ سنی کورمکه کیتمش اولان بر خدمتچی
قیزی - چیچک خسته لغنک حکمفرما اولمقده بولندیغی او محله دن -
خسته لغنک میقروبنی نقل ایده ییلور ذهابیله خدمتسندن چیقارر ورزقنه

(۱) Cesare Lombroso نک : " The Man of genius "

عنوانیله انکلیزجه به مترجم ائرنندن . صحیفه ۳۵۱

فوائدنی تمامیه کندی تبعه سنه تأمین ایتک املیه اسپانیایه بر مقاوله امضا
ایتدیردی Pacto Asiento de Negros نامیه معروف اولان بو مقاوله
موجنبه اسپانیا مستملکاتده ایشلندیریله جک اسیرلری آولایوب کیملره نقل
ایتمک خصوصنی انکیلرله تودیع ایلمکی اسپانیا دولتی تحت تعهد آلدی .
بالاده استشهاداً ذکر ایلدیکمز بر تاریخ اسارته نظراً قرالیجه (آن)
پارلمتوده ایراد ایلدیکمی بر نقطده « بو اسارت مسئله سیله تبعه سنه بر بازار
تجارت تأمین اولندیفنی مقام افتخارده ذکر ایلمشدر » (۱)



غرب ملتری آره سنده اسرای زنجیه تجارتک تمتعندن استفاده
ایچون وقوع بولش اولان رقابت شدیدده بویله جه اوزون بر مدت دوام
ایلمشیدی . مع ما فیه ۱۷۶۱ سنه سندن صوکره نصارای غربک افکارنده
بو تجارت منفوره مناسبتیه بر تحول خارق العاده وقوعه کلمکه باشلدی
وبو حادثه عجیبه بیچارکان اسرانک استقبالی ایچون بر فال خیر کبی تجلی
ایلدی . بناء علیه فرانسهده Amies des Noirs نام جمعیت خیریه ارکائی
وانکلترده (قوئیکر) دینیلن طریقت متقیه اهلی اسیر تجارتی علیبنده
اعتراضه باشلدیلر . عجا بو تحول حسیات نه کبی اسبابدن نشئت ایتدی ؟
اکثر آوروپا مؤفلرینک قولنجه بو تحول محضاً بر امل انسانیتپرورانهدن
ایلری کلش . اوت ، بو نظریه شایان تدقیق بر درجه اهمیتی حائزدر .
دنیاده بعض کیمسه لر وقتاً من الاوقات بر نوع حمای وجده طوتیلورلر که
آنلرک حرکات عصبیه لری انسانیته خدمت ایتک سوداسی صورتنده وقوع

بر رئیس البحرک قومانداسنده ایدی . بو هیئت سفریه آفریقای غربینک (کینی) دینیلن ساحلندن پک چوق اسرا یا قه ایوب بحر محیط اطلا سینک او بر طرفنده بولنان اسپانیا مستملکاتنه نقل ایلدی . مخالف انسانیت اولان بو تجارتیه ایلک واسطه اولان انکلیزر ایسه — معلوم اولدیغی اوزره — جهانیه قارشو دایما خرسیتیانلک فضا ئلندن دم اوررلر . Hakluyt ک سیاحتنامه مجموعه لری آره سندده « قرالیچه الیترابت دوری کیمجیلرینک سفرلری » عنوانیه یازیلان بر اثر دن آکلا شلدیغنه کوره بو تجارت منفوره ایچون ایلک دفعه بادبانکشای حرکت اولان انکلیز کیملرندن بر یسنک اسمی (حضرت سلیمان) دیکرینک اسمی (حضرت عیسی) و بشقه برینک آدی ده حوارییوندن برینه نسبتله (یوحنا) ایش !

۱۷۰۱ سنه سندده فرانسه ده Compagnie Française de Guinée

عنوانیه بر تجارت اسرا شرکتی تشکل ایش و فرانسه دولتینک اجباری اوزرینه اسپانیا دولتی کندی مستملکاتنه اسرای زنجیه نقلی امتیازینی بو شرکته ویرمشدر (۱)

۱۷۱۳ سنه میلادیه سندده اسیر تجارتی معاملاتینک مرکزی بر خرسیتیان مملکتندن دیکرینه نقل اولمشیدی . او زمانلر انکاتره ایله فرانسه آره سندده بر « موافقت صمیانه » مؤسس دکلدی ؛ بناء علیه انکلیزر فرانسه بی بویه کارلی بر تجارتدن محروم ایتک و بونک منافع عظیمه سنی تحت انحصاره آلق ایستدیلر . بوندن بر مدت صوکره انکاتره اسیر تجارتینک

(۱) Rambaud - Lavissee طرفلرندن مرتب :

“ Histoire Générale ”

دن . جلد ۶ . صحیفه ۷۳۲

بر کرامت سر یعه اثری کوستره مه مشیدی . مؤلفین غریبه الغای اسارت
ماده سی کی بر امر خیرک فضیلتک دخی مدنیت خرسیانیه عائد اولدیغی
منسوب اولدقلری ملتر افرادینسه ایناندره ییلورلر ؛ فقط بوتون جهان
انسانیتک دخی کندی ادعالریله تشکیل ذهاب ایله جکارینی امید
ایدرلرسه پک یا کلش اولورلر . مشرق اسلامده یقین و قتلره کانجه یه قدر
بر طاقم معلومات سطحیه اربابی غرب مؤلفلرینک هر دیدیکنی محض حکمت
تلقی ایدرلردی . بو جهله الغای اسارته سبب کوستریلن انسانیتپرورلک
ادعاسنی دخی حقیقت ظن ایدنلر بولمشدیر . حمد اولسون الیوم اسیر تجارتک
الغاسنک سبب حقیقتنی دخی ادراک ایده جک درجه ده صاحب اذعان
وتبع کیسه لر من چوغالدی .

اسیر تجارتک صورت جریانی ایله بالاخره وقوع بولش اولان
الغای اسارت ماده سی حقنده کی معلومات تاریخیه یی شویله بر گره کوزدن
کچوره لم :

اون آلتینجی قرن میلادینک ابتدالرنده ایدی که پورتکیزلر
آمریقاده کی مستملکه لرنده چالیشدیرمق ایچون بیکارجه آفریقا زنجیرلینی
جبراً و قهراً زنجیر اسارته اوروب کیملره نقل ایتمک اصولنی وضع ایلمشلردی .
پورتکیزلر ایسه مذهب نصرانیتک مزایای انسانیتکارانه سی ایله دیگر ملل
افرنجیه قدر مفتخر بر قوم افرادیدرلر .

پورتکیزلرک آچدیغی بو طریق تجارتی یارم عصر صوکره انکلیزلر
کمال اهتمامله تعقیبه قویولدیلر . اسرای زنجیه اولامق مقصدیله ابتدا حرکت
ایدن انکلیز هیئت سفریه سی ۱۵۶۲ سنه سنده (جون هوکینس) نامنده

اون برنجی فصل

انای اسارتده کی مقصد انسانیت

ماضی مجهولدن بری انسانیته انتقال ایده کن عادت استرقاقی خرسیتیانلغک ظهورینک نه لغوه نه ده تعدیله مدار اوله مدیغنی بوندن اولکی فصلده اثبات ایلمشیدک . شیمیدی بوراده موضوع بحث ایدیله جک بر جهت ده وار درکه اوده : تحت اسارتله آکنه کلش اولان میلیونلرجه افراد بشر ایچون ناقابل تعریف بر صورتده سفالت وفلاکت ایراث ایتمش اولان اسیر تجارتنک طریق لغوینی استحضارده خرسیتیانلغک دخلی بولنوب بولنمدیغنی تدقیقدر . ظهور نصرانیتدن تا اسیر تجارتنک رسماً ممنوعیتی اعلان اولننجه یه قدر بیک سکزیوز سنه قدر بر مدت مرور ایلمشیدی . تاریخ میلادک ایلك عصر لرنده — اولجه ده بیان ایلدیکمز وجهله — او یله بر آرزوی انسانیتدن هیچ اثر کورلمدی . بر ده اسیر تجارتنک اعلان ممنوعیتی دوری اولان اون سکزیجی عصر دن اول مرور ایدن اوچ یوز سنه لك بر مدت ظرفنده ممالک غریبه خلقی طرفندن اجرا اولنان اسرای زنجیه تجارتی اولجه امثالی کورلمدک صورتده بر فعالیت مدهشه کسب ایتشیدی . ایمدی بر طاقم مؤلفین غریبه نک شو صوک زمانلر ده وقوع بولان تأویلاتی خلافنه اوله رق نصرانیتک نفوذ انسانیتکارانه سی بو تجارت منفوره نک اوکنی آله جق قدر

او اعمال خیریه بی صرف نشر نصرانیت مقصدی اوزرینہ اجرا ایتشلردی .
 بنا برین مسلمانلغک قاعدہ اعتاقدہ بر مقصد انسانیت موجود اولدیغی حالده
 خرستیانلرک او خصوصده کی افعال خیریه سی انسانیت املمدن زیاده دیانت
 مقصدی اوزرینہ مبیدر . حتی ادوار اخیرہ ده ییلہ مختلف خرستیان
 کلیساری ارکاننک الغای اسارت خصوصده کی مساعی عظیمہ لری هپ
 انتشار نصرانیت مقصدیلہ ترویج اولنه کلشدر . تته کییم بونک تفصیلاتی
 فصل آتی ده کوریلور .



اولدی . شوراسنی اعتراف ایتک لازمدرکه انتشار اسلامدن ایکی عصر قدر
 صوکره لری طوائف خرستیانیه آره سنده دخی اسیرلرک چکدیکی عذاب
 حیاتدن طولای بر درجه یه قدر مرحمت حسلری او یاندی . بعض ارکان
 کینسا اعتناق اسرا ماده سنک موجب غفران اولدیغنی واک بویوک اعمال
 حسنه دن بولندیغنی ناسه تلقینه باشدی ؛ حتی بونلر آره سنده کندی جماعتندن
 اولوبده تحت اسارته دوشمنلری اغیارک الندن بالمبايعه تخلص ایچون
 کایسارلینک اشیای متبرکه سنی صاتانلر بیله بولندی . مع ما فیہ فضائل
 اسلامیہ نك اسپانیا طریقله آروپایه دخولی دورلرندن اول فرنکار آره سنده
 اوکی اعمال خیریه نك موجود اولدیغنی مثبت هیچ بر اثره تصادف
 اولنه ماز . آروپایه عربلر واسطه سیله ادخال اولنان معارف شرقیه دن
 فرنکارجه نه قدر استفاده اولندیغنی معلومدر . یالکز شوراسنی تأییده
 حاجت واردرکه ازمئه قدیمه نك سوء ظن وحشیانه سی ایله مملو اولان اذهان
 عامه افرنج آروپایه حکمت اسلامیہ نك دخولندن صوکره محاسن
 انسانیتکارانه یی دهایی ادراکه باشدی وطبیعت نصارا بر ازدها مائل
 مرحمت اولدی و بناء علیه اسرا نك امر آزا دیسنده کی لازمه انسانیت ارکان
 کینسادن بر خیلیمی طرفندن حس ایدلدی

بونکله برابر کوستریلن لازمه انسانیتده بویوک بر قصور واردی .
 مثال کوسترنلرک طرز حرکتیله او مثاله اقتفا ایدنلرک صورت اعمال خیریه لری
 آره سنده کی فرق نظر دقتدن دور طوتلماق اقتضا ایدر . شویله که
 مسلمانلرک آزاد خصوصنده کی حرکات خیریه لری یالکز مسلمان اولان
 اسرایه منحصر عدا ایدلدی ؛ حال بوکه خرستیانلرک اکابر روحانیه سی

« پك دیندار ومتقى اولان قرانك سایه عافیتند مالک اولدیغنی » ذکر
ایله شد .

میلادك سكرنجی عصرنده انكاته ده (یورق) حوالیسی باش
اسقیوسی اولان (كه كه بهرت) مناسترله عائد اسیرلك آزادیسندن
او مناسترلك رهبان متولیه سنی منع ایتش و بوكی بر اعتاقی كناه اولق اوزره
تعین ایله شد .

سكرنجی قرن میلادی صوكانده انكاته ده ساقسون اعیانك
پاپاسلی پك چوق اسرایه مالک ایدیلر . انكلیز مؤرخى (جون لینفارد) ك
روایتنجه ۷۸۷ سنه سنده عقد اولنان (Culchut) مجلس روحانیسی
صاحبلى وفات ایدنجه بو اسیرلك آزاد صایلمسنة قرار ویرمش . حال بوكه
او مجلسك محفوظ بولنان ضبطنامه لرندن هیچ بریسی اویله بر قراری حاوی
دكلدر ؛ بالعكس بیکیرلك قویروقلرینك کسایمسی واتلرینك بینامسی
منوعیتی کبی اهیتی دون اولان امرلى محتویدر .

شارلمان بر فرمانده صاتیلق اولان اسیرلك معامله بیعیه سی ذوات
ممتاز حضورنده اجرا ایدلمسی امر ایلور و بو ممتاز ذاتلر آره سنده
قوتلرك ، اسقیوسلرك حضورینی صراحة شرط قویور . صحایف تاریخ
بزه بو ممتاز ودیندار ذاتلرك بویله بر انسان مزایده سنه نظارت ایله یكدن
امتناعلى وقوع بولدیغنی کوسترمیور .



كرك اسلامیتك ظهورندن اول وكرك آندن صوكره عالم نصرانیتده
اسیرلر حقنده نه معامله ایدلدىكى ایشته تاریخك بو شهادتلرندن مستبان

دوام اولمسنی تنیه ایلدی .

۶۱۹ سنه سنده (سه ویل) شهرنده اجتماع ایدن ایکنجی مجلس روحانی اولجه افندیسی بولمیش اولان بر اسپتپوس علیپنده سحر یاچمه جرأت ایده جک آزادی بر شخصک حال اسارته اعاده سنه قرار ویردی

۶۳۰ سنه میلادیه سنده (یعنی ظهور اسلامدن برقاچ سنه صوکره) رایس شهرنده عقد اولنان مجلس روحانی خرستیان مذهبنده بولنان اسیرلرک آنجق خرستیانلره صاتیلمسنى امر ایتدی - و بو امر یله یالکیز خرستیانلری اسیر تجارتنه مأذون برافعله قالمیوب برده او تجارتک معامله کسبیه سنی آنلره منحصر بر امتیاز صورتنده تأمین ایلدی .

۶۵۵ سنه سنده طلیطله ده عقد اولنان طقوزنجی مجلس کرک اسیر قادینلرک کرک بو اسیر قادینلردن نا مشروع صورتده طوغوبده پدرلری پاپاس بولنان چوجقلرک بابالرینک منسوب اولدیغی کلیسایه اسیر مؤبد صورتنده عائد بولملرینه قرار ویردی .

۵۵۸ دن ۷۴۷ سنه سنه قدر جانشین اولان فرانسه حکمدارلری نام دیگرله Maires du Palais de la Première race مناسترلره و کلیسالره پک چوق اراضی و عتقار وقف ایتملردی که بو املاکه عائد اشیا آره سنده ادوات و حیوانات ایله بر لکده کوله و جاریه دخی صراحة ذکر اولمشدر .
برنجی (داغوبه رت) ک اونجی سنه حکومتنده (سن ته لوآ) نام خزینه دار قرالینک (سولینعیاق) نام کنیسای کبیره وقف ایتدیکی املاکه متعلق دیر باش اشیا آره سنده اسیرلر حیوانات اهلیه ایله بر لکده ذکر اولمشلدر . مرقوم خزینه دار او باده کی وقفیه سنده بو املاک واشیایه

و بومدت ظرفنده بالطبع انسانیتک احوال وافکارنده خیلی ترقی وقوعه
 کلمش اولدیغندن اسرانیك اصلاح احوالی ویا تسهیل اطلاقی ایچون مسلماناق
 دهها مساعد دورله تصادف ایلمش دیه بر ادعا ده بولنانلر اوله ییلور . بویله
 بر ادعانیك نه قدر بر قابلیت قبوله مالک اولدیغنی آکلامق ایچون ظهور
 اسلامدن بر مدت اول باشلوب آندن بر مدت صوکره کی دورله قدر
 خرسایانلقده کی اسارت ماده سنی کوزدن کچورمک اقتضا ایدر . بو بابده
 بزه الک مختصر صورتده دلالت ایده جک اثر بوندن تقریباً قرق سنه مقدم
 فرانسز مؤلفلرندن Patrice Larroque نام ذات طرفدن خرستیان
 ملترلر نزده کی اسارت ماده سنه دائر l'Esclavage chez les Nations
 chrétiennes عنوانیه یازیلان کتابدر . ایشته بو کتابه برکوز کزدیره لم ده
 مذکور دورلر آره سنده کی مدتی احاطه ایدن تاریخ اسارتی بر وجه آتی
 فقره بقره درج ایلده لم . بو مؤلف بیاناتنی خزائن اوراقده کی قیودات
 رسمیه قدیمه ایله اثبات ایدیور :

« میلادک ۵۸۶ تاریخنده (یعنی ظهور اسلامدن تقریباً قرق سنه اول)
 طلیطله شهرنده عقد اولنان اوچنجی مجلس روحانی پاپا سار طرفندن اوطهلق
 اوله رق طوتیلان قاریلرک صاتیلهسی ایچون ایتسقیوسلره امر و یردی و بویله جه
 اسارت تجارتی ایچون آنلره بر مآذونیت بخش ایلمش اولدی .

۵۹۰ سنه میلادیه سندن ۶۰۴ سنه قدر پاپالقی مقامنی اشغال
 ایتمش اولان برنجی (غره غوار) ساردنیا ایتسقیو سنه یازدیغنی بر امر نامه ده
 خرستیانلغی قبول ایتمین کیسه لره قارشی شدتله حرکت ایتسنی و بونلر آره سنده
 حر اولانلرک یالکز حبسنی فقط اسیر بولانلری فلاقه بند اوله رق دوکمهکه

مخاصم بوله جقلر دركه بونلردن بریسی انسان آلوب صاتاآندر « بویورمشلردر .
 نفع شخصی مقصد دنائتکاریسی ایله مخلوق مدرکدن هر کیمک اولورسه
 اولسون حریت انسانیه سنی ازاله ایدنلر مغضوب الهی ، منفور پیغمبری
 اولدقلری کبی کافه ناسک حدت قهارانه سنه دخی دوچار ایدلسلر روادر .
 اسارتک حقیقته محاربه ده یاقه لنان دشمندن عبارت بولندیغنه بالاده ایما
 ایلش ایدک . اوائلده اسلامیت بو مقوله اسرآنک دخی کندی آزادیلرینی
 استحصال ایلملرینه مدار اوله جق فرصتلر تأمین ایتشیدی . مثلاً ، اسیرلر
 ایچنده طبع شاعرانه سی بولنانلرک بر قصیده تنظیم ایلملری بيله اطلاق و آزادی
 ایچون بر فدیة معنویه حکمنه کچردی . نظم اشعار سبیلله پک چوق اسیرلر
 کسب حریت ایدردی ؛ زیرا عربلر آره سنده — معلوم اولدیغی اوزره —
 شعرک قدری پک معتبر اولدیغی کبی شاعرلکه ده میلان طبعیسی بولنانلر پک
 چوق ایدی . ینه اسرا آره سنده صنعت خطاطیه یه واقف اولانلرده بولنوبده
 اون مسلمان چو جفته یازی اوکرتدکلری تقدیر ده عتاقه کسب صلاحیت
 ایدرلردی (۱)

ایشته قرآن کریمک اوامری ، حضرت پیغمبرک احادیثی و تاریخک
 شهاداتی ایله آکلاشیلیورکه اسلامیت دها ابتدای ظهورنده بند اسارتی فک
 ایده جک احکام وضع ایلدی . حال بوکه خرسیتیانلرک دخی ادوار ماضیه سنده
 عین مقصد حریتی عین اهتام ایله ترویج ایتدیکنه دائر میدانده هیچ بر
 دلیل یوقدر . اسلامیت نصرانیتدن آتی یوز بو قدر سنه صوکره ظهور ایتش

(۱) جودت پاشا مرحومک قصص انبیاسنده بوکا دائر اشارت واردر .

ایلمیشیدی (۱) خلیفهٔ عادلک برای مذاکره قدسه کیدرکن یاننده یالکز بر کوله بولندیفی و دوه سنه بوکوله ایله مناوبهٔ بیندیککی مشهور اولان قصص تاریخیه دندر . شهره کیدرکلری زمان بالتصادف نوبت رکوب کوله یه دوشمش و لکن دشمن مغلوبک مواجهه سنه واریله جغی بر آنده کوله افندیسنک بنسی هر حالده موافق مصلحت اوله جغی راینده بولنمش ایسه ده خلیفه یی بو تدبیرک قبولنه موافقت ایتدیره مه مشدر . کلیسا وقعه نویسلرندن برینک قولنجه پاتریق (صوفرانیوس) وقعهٔ استیاندن متولد بر حس محقریت ایله آره سی چوق کچمدن وفات ایلمشدر (۲) بز بوکا هیچ ده تعجب ایتمه ملیز ؛ زیرا کوله سنه دوه جیلک ایده جک درجه ده عدالتی افراطه واردیرن بر مسلمان امیرندن آمان طلب ایتمک او قوجه خرستیان رئیس روحانیسنک عظمتنه طوفنمش و اثر مقهوریت قابنه اینمش اولسه کرکدر .

☆☆

مسلمانلرده تجویز ایدیلن اسارت اساساً حرب اسراسندن عبارت اولوق اقتضا ایدر . جهانک هجری و وحشی مملکتلرندن چولوق چوجق قابوده بشقه دیارلره کوتوره رک آنکله تجارت ایدن بر آدم مسلمان بیله صایلماملیدر . حضرت پیغمبر « دیوان الهی ده اوچ کشی بنی کندیلیلرینه

(۱) Gibbon ك

“ Decline and Fall of the Roman Empire ”

نام تاریخندن . جلد ۶ - صحیفه ۴۲۹

(۲) Dictionary of Christian Biography عنوانی قاموسدن

دردنجی جلد . صحیفه ۷۲۱

ویرمیشیدی » (۱)

امرای اسلامیہ دن بر خیایسنک والده لری سیاه رنگلی مملوکه لردن
 منتخبدی . حال اسارت ازاله ایدیلہ بیلور ؛ لکن رنگ تن دیکشدیریلہ من-
 بشقه بر فصلده ذکر ایلدیگمز وجہله اسلامیته تخلف الوان بشریہ دن
 متولد اویله بویوک بر سوء ظن اثری یوقدر . بناءً علیه تاریخ اسلامده اسملری
 مقید اولان اکابر آره سنده اصلاً اسپر ولوناً سیاه اولانلر نادر دکلدر .
 هجرتک قرن اولنده حلبک فتحنه سوق اولنان بر قوه اسلامیہ نک سرداری
 اسپرلکدن یتشمش سیاه رنگلی بر ذات ایدی . مصرک اوائل فتحده
 عمرو بن العاص طرفندن مصر علیایه کوندریلن بر هیئت مرخصه نک رئیس
 او قدر سیاه ایمش که بیزاتین امپراطورلغی نامنه اورالی اداره ایدن
 (ماقوقاس) نامنده بر خرسیتاس والی او سردارک کرک اصلنی وکرک
 رنگنی وسیله ایدوب سوء ظنی آنک شخصیلہ مذاکره دن امتناعه قدر
 واردیرمش ! قدس شریف اهل اسلامه مجبور تسلیم اولدیفی زمان اوراده
 (صوفرانیوس) اسمنده بر پاتریق واردی که شرائط تسلیم واستیمانی
 بالذات خلیفه حضرت عمر ایله اجرا ایتک ایستدی . مؤرخ مشهور
 (کیون) ک تعبیرنجه « محاکم مقدسیتی و دشمن مغلوبک تسلی و تسیری
 مقصدیلہ » خلیفه غالب حضرتلری پاتریقک بو آرزوسنه موافقت

(۱) Thomas R. R. Cobb نام ذاتک

“ An Enquiry into the Law of Slavery ”

عنوانلی آرندن . صحیفه ۲۴۴

حر ایلهرق آره سنده اجتماع زوجیتک تأسسنى تسهیل ایدن شریعت محمدیه موقع ممتاز صاحبه سى اولان قادینلرله تأهله اقتدارى بولنمیان کیمسه لرك مملوکه لرله ازدواجنى توصیه ایدر ؛ زیرا اسیرلرده نوع بشردندرلر و افراد بشر ایسه اعضاى یکدیگر در . بو حکمه مبنیدرکه قرآن کریمده (ومن لم یستطع منکم طولاً أن ینکحَ المحصنات المؤمنات فمن ما ملکک ایمانکم من فقیاتکم المؤمنات) بویورلشدیر (۱) معلوم اولان وقایع تاریخیه دندرکه اسلامده یالکز صاحبه رفعت وغنا اولان قادینلرله تزوج ایده مین مؤمنلر دکل حتی امرا ییله اسرا ایله عقد رابطه ازدواج ایده کلدیر . بر مملوکه منکوحه نك تولید مشروعى او مملوکه به بخش حریت ایدر . عالم اسلامیده بو کبی قواعد انسانیتکارانه نك وضع اولندیغی زمانلرده فرنگستانده حر ایله عبدك ازدواجی غیر مشروع صاییلور فقط ولیلر اسیرلرینک نکح غیر مشروعه سربست قالورلردی . تاریخ اسارت حقنده بر اثر مهم وجوده کتورمش اولان آمریقالى بر مؤلف دیورکه : « قرون وسطی قوانین کنیسائییه ومدنیه سنجه حر اولان ارکک وقادینلرک اسیرلر ایله ازدواجی هیچ تجویز اولمازدی ؛ حتی ازدواج ایدنلر بولنمش اولسه آنلر حقنده مجازات شدیدیه ترتیب ایدیلوردی . بر قیز بر اسیر ایله ازدواج ایتمک ایستسه مجازاة اوقیزى اولدیرمک ایچون پدرینه حق ویریلور ایدی . حر بر آدم اسرادن اولان منکوحه سنى ایستدیکی زمان دفع ایدوبده یتاغنه بر حر قارى قومیق ایستسه جائز می دکل دیه روما مقام روحانیسندن صورلدقده پایا (له نو) جائزدر دیه جواب

آیات قرآنیہ ایلہ احکام انجیلیہ یی نظر امعاندن کچورنجه میدانہ بر
 نتیجہ قطعہ چقارک اوده نصرایتک اسرایہ بولندقلری حال سفیل عبودیتده
 قالمغی عادتاً مصرانہ امر ایلمسی و حال بوکە اسلامیتک ولیری انسانیتسزجه
 معاملاتدن منع ایلہ ممکن اولدیغی قدر امر خیر اعتاقه سوق ایتمسیدر .
 ایشته بوندن طولای اولوق کرکدرکه تا خرسیتانلغک مبادی ظهورندن اون
 سکرنجی قرن میلادی اواخرینه قدر ملل نصرانیہ افرادی اسارته
 فوق العاده بر رواج ویردیلر ؛ عالم اسلامیتده ایسه اسارتک صورت اجرا
 ویا وسائط الغاسی حتمده — آوروپا ده وقوع بولدیغی کبی — انسانیت نام
 جعلیسنه اوله رق اوکوستریشلردن ، او مباحث سیاسیہ دن هیچ بر یسنه
 لزوم حس ایدلمدی ؛ زیرا تحول زمان ایلہ افکار اسلامده وقوع بولان
 ترقی اسارت خصوصنده کی اوامر عادلہ نک انفاذینی انتاج ایدوب کیتدی .
 الحاصل اسلامیت ازمانک تجدیدی ایلہ اسارتک الغای طبعیسی اسبابی
 احداث ایلدی . حال بوکە آوروپا ده اسارتک لغوی ماده سی فرق مختلفه نک
 مسالاک سیاسیہ لرینه بر واسطه مباحثه اتخاذ ایدلمدی ؛ نته کیم بونک تفصیلی
 فصل آتی ده ویریلہ جکدر .



بک چوق احوالده تواضع ای بر صفتدر ؛ لکن اسلامیت تواضع
 نامنه اسرای بر درکۀ سفلیتده قالمغه سوق ایتمه مشدر ؛ بالعکس تعالی و ترقی
 ایچون آنلرک حسب البشریه مالک اوله بیلہ جکلری استعداد طبعینک
 انشراحنه میدان آچمشدر . بر اسیرک حال ما دونیتدن قورتلسمنه اک بویوک
 بر واسطه آنک ولیسی ایلہ یاخود احرار دن اولان کیمسه لرله ازواجیدر .

انجیلده مذکور اسارت ماده سنه بر کره دها مراجعت ایده لم :
 « اسیرلر ! حضرت عیسیایه اولدیغی قدر جسم فانی بولان ولیرلیکزه ده
 خشیت وخوف ایله ، خلوص قلب ایله مطیع اولیکز . » (۱) عجا بو آیت
 انجیلدن نه مفهوم مراد اولنه ییلور ؟ ایشته بونی آکلامق ایچون اعزه
 نصارادن بر یسنگ تفسیرینه باقدق . بو ذاتک قولنجه : دنیا ده اسارت
 دینیلن شی یالکز بر اسمدن عبارت ایمش ؛ ولیک ایسه بر جسم فانیدن
 عبارت اولدیغندن مدت ولایتی موقت ایمش ؛ زیرا فانی اولان هر شی
 محو وزائل اولورمش . (۲) پک اعلا ! فقط او حالده بر اسیر مغدور
 ایچون یا ولیسنگ جسم دهشت آوری زائل اولوبده روح شریری تا قعر
 جهنمه کیدنجه یه قدر ویا کندیسکی ملک الموت یدیله او ظالمک پنجه سندن
 قورتیلنجه یه قدر بکلمک لازم کلزی ؛ خدمات شاقه وعذاب ظلم آتنده
 ایکلین اسیرلر ایچون بوندن نه کبی بر چاره تسلی بکنیله ییلور ؟ عزیز
 مشار الیه تفسیرنده بر از دها ایلری کیدیورده درکه اسفل انسانیتده
 براقیلان اسیرلردن سوزی کتوره رک « دنیا ده کندی مرتبه مزی آشاغی
 طوتمک طریقنی ادراک ایتک حقیق بر نجاتدر « دیور . فرحلی بر
 موجودیت احرارانه ایچنده امرار اوقات ایتکک آنجق اوته کی دنیا ده
 بولنه ییله جکنه حصر امید ایتمش اولان او مخلوقات عاجزه ایچون بو نصیحت
 شبهه سز پک مناسب بر تسلی اولور !

(۱) انجیلک Ephesians بابنک آلتنجی فصلی . بشنچی آیتی .

(۲) St-Chrysostom نام عزیزک مذکور باب انجیل اوزرینه اولان بر

اولان اسیر بر نیچه قرباج ضربه سیله دوکیله جکدر « دینور (۱) شیدی اسرایه لایق کوریلن بو احکام تعذیبیه یی بر کره حضرت پیغمبرک عبدالرحمن حقنده کی معامله سیله مقایسه ایده لم : بر کون اسرادن بری فریاد بکا ایله نزد پیغمبری یه کلور و اوزرندن قانلر آققده اولدینی کوریلور ؛ اعضای وجودندن اک نازک بر محکم کسیدیکنی آکلایان حضرت پیغمبر بو فلاکتک مرتبکی کیم اولدینی صورار ؛ اسیرده افندیسی اولدینی خبر ویرمکه برابر طلب عدالت ایلر و بدایت عدالت اولق اوزره آزاد بولندینی خبر آلقله متسلی اولور . اسیرلرینی قتل ایدن افندیلری شریعت اسلامیه جزایه چارپه کلش و تعذیب غدارانده بولنانلرک اسیرلرینه حریت بخش ایتدیرمشدر . یکی ایمان ایتش امرای عربدن بر کون بریسی حضور نبوی یه کله رک عند الله مرغوب اوله جق نه کی بر خیر ایشلمک لازم کله جکنی صورمش ؛ جناب رسالتپناه ده « اسیر آزاد ایت ویا اسیرک یوق ایسه آزاد اولمنغه چالیشان بر اسیره یاردم ایلیه » یولنده جواب اعطا بویورمشدر (۲) اسلامده اسرانک یالکز آزادسی توصیه ایدلمکله اکتفا اولمندی حتی بعض احوالده عادتاً امر یله ایدلدی ؛ نته کیم یالان یره قصداً یمین ایدنلرک تلغین خدادن خلاص بوللرینک بر شرطی ده اسیر آزاد ایلمک اولدینی قرآن کریمده مذکوردر (۳)

(۱) لوقا انجیلک اون ایکنجی فصلی قرق یدنجی آیتنه باقیله

(۲) بو روایت مصر علماسندن احمد شفیق بکک الرق فی الاسلام نام کتابندن مأخوذدر .

(۳) سورة المائدة نک ۹۱ نجی آیتنه باقیله .

انجیلده « سکا اسیرمی تسمیه ایدیورلر ؟ آکا هیچ اهمیت ویرمه
وحتی سنی آزاد بيله ایتسه لرینه اویله قال « دینیور (۱) بو نصیحتی اسرایه
ویرن ذات (سن پول) در . مفسرین نصارا بو آیتی کندی مقصد لرینه
اویغون بیک طرزده ایضاح ایده بیلورلر ؛ فقط بو کبی احکامی حاوی اولان
بر مذهبک الغای اسرای میروج بولندیغنی ادعا ایدنلر وجدان عفتک خلافتده
بر سوز سویلمش اولورلر .

بر ده اسلامک بو بابده کی احکامی آکلامق ایسترسه ک کندی
آزادیسنی طلب ایدن اسرایه آزاد نامه اعطا سنده قصور اولنماسنک وولیرک
بالذات نائل اولدقلری عطایای ربانیه دن اسیرلرینی ده متنع ایلملرینک امر
بو یورلدیغنی کوریرز . ته کیم (والذین یتغون الکتاب میا ملکیت ایمانکم
فیکاتبوهم ان علمتم فیهم خیرا وآتوهم من مال الله ... الخ) آیت کریمه سی (۲)
بوکا اشارتدر . ماضی جاهلیتدن بری کوکاشوب قلمش اولان اصول رقیته
بر تبدل کلی اجراسنک همان عذیم الامکان اولدیغی دورلده بو امر
قرأیدن زیاده آزادی اسرای میروج بر تدبیر عادلانه وضعی عالم نصرانیتده
کیسه نک خیالندن بيله کچه مشدی .

« اسیرلر ! ولیریکزه کمال خشیت ایله منقاد اولیکز ؛ ولوکه آنلر
نجیا واعایدن اولیوبده ادانیدن بيله بولنمش اولسونلر . » بو نصیحت ده
اسیرلره (سن پترو) طرفندن ویرلشددر . ینه انجیلده « ولینسک آرزوسنی
بیلدیکی حالده آنک اجراسنه حاضرنامش ویا آکا کوره عمل ایتهمش

(۱) انجیلیک برنجی Corinthians کتابی . فصل ۷ آیت ۲۱ .

(۲) سورة النورک ۳۳ نجی آیتندن

اسلامیت ده توارث ایتدی نصرانیت ده . بشریتک مبتلا اولدیغی هوس
تحکم و آمریت سببیه وجود بولان وزمانزه کلنجه یه قدر دوام ایدن رقتک
اصلی ارائه ایچون بر مؤلف شو مطالعه ده بولمور : « حیات بشریه ده
حریت بر حال طبعیدر ؛ اشتغال ایسه حیاتک موقوف الیمیدر ؛ لیکن
مجبور اشتغال اولان انسان دائماً شغلاک زحمتنه قارشی ممانعت
کوستره کلشدر . مع مافیه او زحمتدن مصون قاله مدیغندن آنک تقاتنی
بشقه لرینک اوزرینه یوکلتمک ایستمش و بناءً علیه سائرلری اوزرینه آتدیغی
او اشتغلاک ثمره سیله راحتیه یشامق یولنی بولشدر . ایسته بین الناس بو
عدم مساوات اجداددن اولاده ، اسلافدن اخلافه انتقال ایلدیکندن
تا ابتدای انسانیتدن بری مولی ایله عبد موجود اولمشدر » (۱)

بووجهله تأسس ایدن اسارتی نه خرسیتیانلق نه ده مسلمانلق اورتهدن
قلدیره مامش ایدی ؛ فقط بو ایکی مذهب اهلندن هر بری کندی تابع
اولدیغی احکام دیانتک احوال اسرای اصلاح ایلدیکنی و بویله جه بر مسلک
عدل ایله اسارتک الغای مستقبانه بر چیغیر آچدیغنی ادعا ایلمکده درلر .
ایمدی بو ایکی مذهبدن هر برینک نه درجه یه قدر اسرانک موقعی اصلاح
و آتیاً اسباب آزا دیلرینی استحضار ایلدیکی تدقیقه محتاج بر مسئله در .
بو بابده کی تدقیقاته الک زیاده مدار اوله جق شی اسارت واسیرلر حتمده
انجیلده کی اقوال حواریون ایله قرآن کریمده کی آیتلردر . بز شیمدی
بونلردن بر قاجنی کوزدن کچوره لم :

(۱) H. Wallon نام مؤلفک " l'Esclavage dans l'Antiquité "

لكن بز هر حالده بو تدبيرلرله خرستيانلغك اسارتى تصويب ايلديكى
 حقنده كى ادعايه قانع اوله ميز . بو ادعائك ثم التدارك اولديغنه يالكز
 الفاظ اصلية انجيليه دكل حتى مال انجيل بيله بر دليل جليدر . ابتدا خدمتكار
 صورتنده وصوكره حسب المصلحة خدمتكار مربوط شكلنده ارائه اولغق
 ايستيلن شخصك « انسان حر » مقابلى اوله رق استعمال ايلديكى عبارات
 انجيليه دن پك اعلا آكلاشيلور . حتى مشهور (قالوين) انجيلك
 « اى خدمتكارلر ، حضرت عيسايه اولديغى قدر افنديلىكره دخی خوف
 و خجنان و خلوص وجدان ايله اطاعت ايديكز » كلامى (۱) تفسير ايلديكى
 صره ده بوندن مقصد « كيرا ايله طوتيان خدمتكار اولمديغى و آنجق پاره ايله
 آلمان ودائى صورتده قوللانيلان و عهده سنه هر دورلو تكاليف شاقه
 يوكتيلن و جواز قانونى ايله افنديسى طرفندن حيات و مماتنه تعلق ايده جك
 معاملات مستحق كوريلن » اسير بوانسديغى اعتراف ايلشدر . انجيلده
 عادت اسارت عليهنده هيچ بر آيت بولمديغى كى اسير صاحبلىرىنى اعتاق
 و آزادى يه تشويق ايجون هيچ بر توصيه ده يوقدر . حال بويله ايكن پك
 چوق مؤلفين نصارا اسارتك اساس احكام نصرانته مغاير اولمديغى ادعا
 ايده كمشلردر .



رقتك اساساً خرستيانلجه مردود اولمديغى ادعا ايلنلر ازمنه قديمه
 جاهليه دن موروث اوله كلن او عادت ظالمه نك ترويج دوامى اسلاميه
 عطف ايلمكه جراتدن ده كبرى طورميورلر . فى الحقيقه بو عادت قديمه يى
 (۱) بوكلام انجيلك Ephesian بابنك التنجى فصلى بشنجى آيتدن مأخوذدر .

اوننجی فصل

اسرای نصرانیہ واسلامیہ

فی الواقع خرستیان احکام مذہبیہ سی شایان حیرت بر درجہ ده تفسیرات ملائکہ یہ مستعددر ؛ مع ما فیہ کلمات انجیلیہ نک ارکان کنیسائیہ قلمیلہ بر طرز مہارتکارانہ ده تبدیل اولنہ کلسی خرستیان اولیان بر کیمسہ پی انجیلک او استعداد تأویلیہ سندن زیادہ دوچار حیرت ایتسہ کرکدر . غالباً بو تصحیح کلمات سبیلہ آیات انجیلیہ ده کی معانی اصلیلہ نک دیکشدیرلمسی غصب روح القدسی دعوت ایدہ ییلہ جکندن هیچ ده حذر اولنمیور ؛ فقط تنقید انسان بعض کرہ نہی رحماندن دها قورقنجدر ؛ ایدمی انجیلک لاتینجہ سندہ اسیر معناسنہ اولان (Servus) کلمہ سنی « خدمتکار » مثللو بر معنای ملائمی حاوی اولان لفظ ایلہ ترجمہ ایتمش اولان کلیسا مؤلفرینک خدمہ لری سر بستی مذهب ار باندن بعض ذواتک تدقیقات منقدانہ لری ایلہ چوقدن میدانہ چیقارلمشدر . پروتستان میسیونہ لرلی طرفندن بر چوق مسلمانلرہ فی سبیل اللہ طاعیدیلاں انکایزجہ انجیلدہ « خدمتکار » کلمہ سنک « خدمتکار مربوط » صورتہ تبدیل اولندیفی نظر دقتہ چار پئمندہ در .

اوت ، بو صورت تبدیل ایلاک باقیشده پک معقول کورینیور ؛

انسانیتہ ده . قضاة اسلامك عدل وحق ايله اجراى مأموریت ایدہ بیلہ جکی
 یرلر ده ودها طوغریسی احکام شرع وقانونی تشوش مداخله دن
 صیانتی تکافل عمومیه تحتنده طوته بیلہ جک حر ومستقل ملتر ارهسنده
 قدسیت ازدواجه مخالف او کبی حالده میدان ویرلر . امام اعظم حضرتلر یله
 آنک اجتہادینه سالک اولان فقہانک رأینجه تطلیق دینلن شی غایت مخاطره لی
 ومردود بر وقعه در ؛ چونکه مادی ومعنوی بر چوق مهام احوال حیاتیہ یی
 جامع اولان ازدواجی فک ایدر . شرح الوقایه صاحبک رأینجه طلاق نظر
 ربّانی ده منفور بر حالدر ؛ آنجق ضرورت قطعیه ظهورنده وقوع بولق
 اقتضا ایدر « ابغض الحلال الى الله الطلاق » حدیث شریفی ده بو حکمتدن
 طولای وارد اولمشدر . ضرورت قطعیه اوزرینه طلاق وقوع بولورسه
 مطلقه نك متضرر ایدله مسی متضای عدالتدر ؛ حتی قرآن کریمده
 « وَإِذَا طَلَّقْتُمُ النِّسَاءَ فَبَلَّغْنِ أَجْلَهُنَّ فَأَمْسِكُوهُنَّ بِمَعْرُوفٍ أَوْ سَرَ حَوْهْنَّ
 بِمَعْرُوفٍ وَلَا تَمْسِكُوهُنَّ ضَرَارًا الخ » بویورلشد (۱)

(۱) سورة البقرة - ۲۳۱ نجی آیت .



معروض قالوردی . پک خفیف حادثات نامرضیه بیلہ نسوانک حاسہ ادراک وقوہ تمکینی خالدار ایدہ بیلور وھیجان اعصاب ایله موازنه نسوان چیغرنندن چیقیویرنجہ فلاکت عائله یی موجب منازعه . مفارقت وتطایق سرعته بر برینی تعقیب ایلیه بیلور . ایشته نسوانک احوال روحیه سی حقنده کی وقوفدن استنتاج اولمان بو مخاطره دن طولایدرکه صلاحیت طلاق قادینلره او یله قولایجه ویرلمز ،

قادینلرک فلاکتی ، بدبختی حیاتی انتاج ایدن ازدواجلرده تطایق وقوعی « عصمت » دینیلن حقتک محافظه سیله ممکن اوله بیلور ؛ بر قادین حین نکاحنده بو عصمتی محافظه ایتکی شرط قویار ایسه طلاق ایچون ضرورت مجبزه ظهور ایله ییکی زمان او حقندن استفاده ایچون شریعتک حکمه مراجعت ایدہ بیلور . برده قوجه سندن اعتقاد دینسنی محل زندیقانه تعرضلر کورن بر قادین حرینک ید ضالتمندن عقدہ نکاحنی قوہ شریعت ایله ساب ایتدیره بیلور ؛ تته کیم وقتیه استانبولده کبار عالمان بر ذاتک نجابت اخلاقیه صاحبه سی بر قیزی دره چاقمه طوپلانش معلومات فرنکانه سیله حویبالغی آرتیش اولان بکاردن برینه تزویج ایدلش وبک جنابلرینک اسلامیتی قصداً تحقیره قویولسی وبوتحقیره فعلاً دخی بر شکل ردائت ویرمک ایچون قرآن کریمی آیاغی آلتنه آلمسی قادینک حمیت دینیہ سنی غایانه کتور مکاه اطلاقی دعوی ایتیش وتطایق امری اجرا اولمشدر . ارکک تطایق خصوصنده کی وسعت امتیازی سو استعمال اولنماق شرطیله مقید بولمایدیر . عائله تشکیلی مقصدیله دکل صرف ازاله شهوت ایچون متصل قاری آلوب بوشایان حرینلرک حرکاتی اسلامیه ده مخالفدر

ارکک — اگر کنديسنى خوشنود ايتمزسه — قارى يي ايتديكى زمان اولديره ييلوردى . صوكره لرى — زنا ارتسكابي كې بر حال مستثنا اولوق اوزره — ارکک قارى يي رد ايتمكه تسكين غيظ و غضب ايده ييلور اولدى . قادينّه تخفيف مجازاتندن ما عدا بعض حقوق تأمينى دخى باشلدى . بالاخره قادينك طلاقه صلاحيتي ييله تسليم ايديله جكى حتمده رايلىر آرتدى » (۱) ايدى بو مؤلفك نظار يه سنه اتباع لازم كلورسه اسلاميتك دها ابتدائى ظهورنده بويوك بر درجه تمدن كوسترديكى اعتراف اولمق لازم كلور ؛ زيرا خرسيتانلغك نيچه عصرلر صوكره ادراك ايله كه باشلديغى ضرورت تطليق دها او زمان حس ايلدى و شريعت طلاق ايچون احكام مصيبه وضعندن ما عدا تطليق اولنان قارى يه تأمينات حقوقيه ده بخش ايتدى .

اسلاميتك قاريلىدن صلاحيت طلاقى كلياً دريغ ايلديكى ادعاسى دخى ياكشدر . شريعتك حكى يالكز اركهك صلاحيت واسعه وممتازه وقارى يه صلاحيت محدوده ومقيده تأمين ايله كدن عبارتدر . طلاق ماده سنده كى بو عظيم مساواتسزلىك اسبابى ظاهر بينانجه پك عجيب تلقى اولنه ييلور ؛ فقط مسئله تدقيق ايديلانجه سبب تفريق وتميزك پك مهم اولديغى ميدانه چيقار . اگر قاريلىره اركهكلر قدر طلب طلاق صلاحيتى ويرلش اولسه ايدى پك چوق كيمسه لر ايچون متادى بر حيات عائله ذوقيله متلذذ اولوق احتمالى قالمازدى ؛ چونكه فطرت نسوانده مركزوز بعض حالات حساسانه دن طولايى بند ازدواج هر آن فك ايديله بيلمك تهلكه سنه

(۱) اولكى فصلده مذكور ” The Evolution of Marriage ”

عنوانلى كتابدن صحيفه ۶۴۷

تعیمید یاپدیرلمدیغی کبی ینه او احکامه مغایر اولوق اوزره طلاق وقوع بولش اولان کیمسه لرك حین وفاتلرنده بر دعای ربانی اجراسنک دریغ ایدلیدیکی واقع اولوردی . آیین مذهبینک یالکیز رسمیتدن عبارت قالدیغی شو زمان ترقی فکری ده بیله ماضی مظلمک یادکارلرندن اولان عناصر اعتقادیه ازدواج امورنده حالا حکمی آز چوق انفاذ ایلمکده در . بو سبیدن طولایدرکه طلاق خصوصنده کی تقیدات علیهنده دائماً اعتراض وقوع بولیور و امر تطلیقک ده مناسب بر صورتده تعدیل وتنظیمی طلب اولنوب طورییور . خرسیتیانلغک منع طلاق حقنده کی احکام قدیمه سنک بر عکس عملی اولوق اوزره آمریقانک بعض ایالاتنده او درجه افراطدن تفریطه کیدلش و طلاق صلاحیتی او قدر توسیع ایدلش که حیات مزوجه عاداتا آز بر مدت ایچون بر قاری ایله قیائوق کبی بر حاله دونمشدر ، ایشته کوریلیورکه او متمدن صاییلان عالم نصرانیتک « اطراد اصول ازدواجنده » مسلمانلر ایچون شایان امثال بر نمونه یوقدر .



تعدد زوجات بمشده استشهاداً ذکر ایلدیکمز بر اثر عالمانه ده لزوم طلاقک جمعیت بشریه طرفدن ابتدا نصل محسوس اولدیغی شو یولده بیان اولنیور : « ... شمدی یه قدر وقوع بولان تدقیقاتک نتیجه سندن تظاهر ایلدیکی وجهله هانکی مملکتده وماضینک هانکی دورنده اولورسه اولسون ارکک ایله قارینک رابطه اجتماعی آنجق قارینک ارککه انقیاد ایتسیله باشلادی . صوکره ازمانک تحویلله هیئت اجتماعیه نک درجه ، درجه کسب تمدن ایتسی اوزرینه قادیلرک موقعی اصلاح ایدیلور اولدی . ابتداری

بر اہتمام ایلہ مراعات اولئہ کبشدر . یالکز زنا مسئلہ سی طلاقہ سبب عد اولئجہ مسعودیت محبت وامتزاجدن عاری ظہور ایدن ازدواجلرہدہ بو حکم ایلہ فعل زنا ارتکابی ایچون قاپو آچیمش اولور . قدیمہ کلیسا شرایعی ازواجہ بر مقصد متصوفانہ عطف ایدردی وبر ارکک ایلہ بر قادین آرسندہ کی اتحاد زوجیتی حضرت عیسی ایلہ کلیسا آره سندہ کی التصاق معنوی یہ بالقیاس نا قابل تفریق فرض ایلردی . بو اعتقاد عجیب نصرانیت نیچہ عصرلر دوام ایلدیکندن تطابق احتمالی خرستیانلرچہ مقفود ایدی . طبیعت بشریہ یہ ، کذاران حیاتک ایجاباتہ هیچ دہ توافق ایتین بو ممتنع الفسخ ازدواج اصولی یتین زمانلرہ قدر دوام ایتدی . مع ما فیہ کلیسا ہیئتلی ایشلرینہ کلدیکی زمان بویوک حکمدارلرک ، نفوذلی پرنسارک طلاقلی ویا تکرار ازدواجلی خصوصندہ بر چارہ تجویز بولقدہ زحمت چکرلردی و « هر کیم قاریسنی فلحشہ لکدن ما عدا بر سبیلہ بو شارده بشقہ بر قاری ایلہ ازدواج ایلرسہ زنا ارتکاب ایلش اولور » مآندہ کی آیت انجیلی یی تأویلدہ عادتا ہزیان سویلہ مکہ قدر وارلر ایدی ؛ نتہ کیم اعزہ نصارادن بریسی اوآیتدن روح القدسک مقصدی طلاقک قطعاً منعی دکل آنجق رابطہ زوجیتک کوشک طولماہ سیدر دیش ایدی .

آور وپادہ فکر حریتک انتشارندن واستبداد دینی ایلہ مذہبیونہ قارشی بر حس مقاومت او یاندقدن صوکرہ طلاق ایچون بر چوق اسباب مجبرہ بولنہ بیلہ جکی حقیقی التزام اولئمغہ باشلدی . مع ما فیہ بوندن صوکرہ دخی استبداد مذہبیون ناسی ازعاجدن کیری قالمدی . کلیسانک التزام ایلدیکی احکامہ مخالف صورتدہ ایکنجی بر ازدواج عقد ایدنلرک چوجققرینہ

بو ادعای سرد ایدن ذاتک و قتيله هندستانده خدمات ملیکه ده
 بولنديغنی و مملکتنه عودتندن صوکره ممالک اسلامیه ده پروستانلغک ترویجی
 ایچون میسیونره جمعیتلرینه خدمت ایلدیکنی سویلرسه ک اسلامی سوء
 تأویلده کی غرضی میدانه چیقار ؛ لکن آنک غرضی یالکز بز
 آکلایه ییلورز ؛ حال بوکه غریبون آرمسند معترضین اسلامک سویلیدیکی
 شیرلی اعتمادله تلقی ایدنلر سویلینلرک کیملر اولدیغنی دوشمنلر و دوشمنکه
 وقتلری ده یوقدر . عجبا زوجیتک اطراد و تمادسی حقنده خرسیتیانلرک بعض
 مسلمانلره و یردکلی عبرتک یعنی او نمونه ممدوحه نک ماهیتی نه ایش که آکا
 امثال ایده مین هر مسلمان عقلنه اسدیکی ، کیفی طوتدیغنی ، حدتی قالدیغنی
 زمانلرده قاریسنی طو پارلیوب قاپو طیشاری آتارمش و بویله جه چوچقلرینی
 ملول و دلخون ایدر و سعادت عائله یی آلت اوست ایلرمش ؛ اکر او نمونه دن
 مقصد خرسیتیانلرک افعالی دکل خرسیتیانلغک وضع ایلدیکی احکام ازدواج
 ایسه بز آنی — تمدن نصرانیتک فضائلندن دم اورمقده پاپاسلر قدر
 طرفکیرلک کوسترن — او مقوله محررین عصریه افرنجدن اوکرنگک
 ایستیز ؛ چونکه آنلرک مسلک تأویل و تفسیرلرینه اینانق ایچون انسانک
 غربی هیچ ده طانیامسی لازم کلور . بز او باده کی ارکان خرسیتیانیه یی
 انجیلک کندیسندن اوکرنگک ایسترز . عجبا انجیل طلاق حقنده نه کبی بر
 حکمی حاویدر ؟ « سزه شونی اشعار ایدرم که ایچیکزدن هر هانکی
 بر کیسه فاحشه لیکن ما عدا بر سببله قاریسنی بر اقور و بشته بر قاری ایله
 تزوج ایدرسه زنا ارتکاب ایلهش اولور » دیور .
 ایسته انجیلک بو حکمی کلیسای نصرانیت طرفندن پک زیاده

طقوزنجی فصل

طریق مقننه در

ازدواجه عائد بر مسئله نك طلاقه ده تعلق بولنه بیلور ؛ حتی عقد
نکاح ایله فسخ نکاحك تقابل محتمله سندن طولاییدرکه وولتر « لغت
فلسفیه » نام اثرنده « ازدواج ایله طلاقك تاریخ تأسیسلی همان بر کیدر ؛
فقط ظمنجه ازدواج تطایقندن بر قاچ هفته دهاسکیدر « دیش ایدی .
ایشته ازدواجده برده طلاق احتمالی بولمنسه بناء بزده اسلامیتك طلاق
حقنده کی اصول واحکامنه دائر بر قاچ سوز سویلمک ایسترز ؛ فقط
ملاحظاتر احکام طلاقیه یه متعلق بر مباحثه فقیه اوزرینه دکل آنجق
متعرضین افرنجک طعنه قارشى وقوع بوله جقدر . شرقة انکلیز مأمورلرندن
بولندیغی صره لرده ایشی مستشرقاغه دوکن فقط بوتون قوه علمیه سنی
اسلامیه تعرض یولنده صرف ایدن بر مؤلفك سوزی او مقوله طعن افرنجیه
بویوک بر مثالدر . باقیکز بو مؤلف نه دیور : « اطراد زوجیت فکری
مسلمانلرجه قطعیا مجهولدر ؛ مکرکه تصادفاً خریستانلرک اثرینه اقتفا ایدن
زوجلر بولنه . بویله جه امثال ایدنلرک ازدواجلرنده بیله رابطه نکاحك
دوامی تمامیه زوجك کیفته تابعدر » (۱)

(۱) بالمناصبه بشقه بر فصله ده دخی ذکر اولنان (سیر ویلیام مؤیر) ک

Life of Muhammed عنوانی کتابندن .

بر کشتی بولنه ییلورکه اولوم دوشکی اوزرنده استغفار ذنوب ایلیه جکی
صره ده عمرنده یالکز بر قاریدن ما عدا سنه باقدیغنه یمین
ایده یاسون « (۱)

(۱) بالاده دخی ذکر اولنان متفکر مشهور (ماقس نور داو) ک :

“ Conventional Lies of our Civilization ”

عنوانیه انکلیزجه یه مترجم کتانبندن • صحیفه ۳۰۱



احكامی اساساً نقطه حرکت اولق اوزره قبول ایتش و مادام که انجیلده حضرت عیسی اسانندن اولق اوزره « ظن ایتمه که بن نقض و تغییر ایچون کلدیم ؛ بن آنجق انفاذ ایچون کلدیم » دیه یازلمشدر ؛ او حالده کتاب مقدسدن عهد عتیق موجب تعدد زوجاتی مناسب اولان محال واحوالده تجویز ایديویرملی والسلام . تخفی شوراسیدرکه خرسیتیانلرجه تجویز اولنیه جق و بلکه طعن و تشنیع ایدیله جک بر تعدد زوجات قاعده سی وار ایسه اوده غالباً مسلمانلرده رعی اولانیدر !

افیکاری منور ، اطواری مذهب ایکی کشینک اجتماعندن عبارت اولان وحدت ازدواج ایله بونلرک یکدیگری حقنده محبت ، فداکارلق کوسترمسی و یکدیگری ایچون هر حالده وقف حیات ایلمسی یک نظر ده بر لطافت شعریه صورتنده تجلی ایدر ؛ فقط — بر فرنک محررینک (۱) دیدیکی کبی — اکر کوزمزی دورت آچوبده « ملاحظه ایدرسه ک کوریرزکه زمانغزده اک متمدن اولق اوزره شهرت آلان مملکتلرده واک ممتاز کچین صنوف خلق آره سنده پک چوق کیمسه لرده تعدد ایچون بر حس طبیعی واردرکه اکا مقاومت ایلمک پک مشکلدیر . » استشهاد ایچون اولجه ده اسمنی ذکر ایلدیکمز بر محرر ایسه بو یوز قیزاردیجی حقیقی شو طرز سربستی ایله افاده ایلور : « فی الواقع ممالک متمدنه ده وحدت زوجة اصولی قانوناً وضع اولنیور ایسه ده ینه پک چوق ارککلر تعدد منکوحه یه مشابه بر حال اوزره یشامقده درلر . یوز ییک کشتی ده آنجق

(۱) Ch. Latournean نام فرانمژک "Evolution of Marriage"

عنوانی ایله انکلیز جه نشر اولنان کتابنه باقیله . صحیفه ۱۳۶

ویرک وظائف مکلفه سنی خلدار ائمه مسیدر .

☆ ☆

جماعات خرسیانیه آره سنده مرعی اولان وحدت زوجه اصولی
دینی اولمقدن زیاده رسمی در ؛ ائدی مسلمانلقده کی تعدد زوجاته عطف
اولنان مساوی اخلاقیه نک خرسیانلر آره سنده دخی حدودنه مانع اوله ماز .
قدیم ده اهل کلیسا آره سنده تعدد زوجاته مائل اولانلر بولندیگی کبی
زمانزده دخی — احوال استثنائیه تحتنده اوله رق — بعض بلاد ده تعدد
زوجات قاعده سنک ترویجنده بولنان رهبان موجود در . آفریقانک بتپرست
اقوامی آره سنده خرسیانلنگ انتشارینی تسهیل ایچون بعض میسیونره لر
تنصر ایدن سیاهیلرک اصول قدیمه لر وجهله تعدد زوجات اعتیادنده دواملرینی
پک اعلا تجویز ایتکده در لر (۱) او یله یا ، مادام که او بتپرستلر آره سنده
میسیونره لر طرفندن عرض اولنان شکل دیانتی قبوله میلان کوسترنلر واردر
او حالده آنلرک عادات معتبره لرندن اولان متعدد قاری آلق عادتنی تقبیح
ایله کندیلرینی خرسیانلقدن صوغوتق هیچ موافق سیاست اولورمی ؛ احوال
استثنائیه ده حسب المصلحه تعدد زوجات اصولی او یله جه خوش کور یورمک
ایچون کتب مقدسه ده احکام مساعده کارانه بولوق او جن فکرلی فرنک
پاپاسلری ایچون مشکلمی ظن اولنیور ؛ عهد عتیقه تعدد زوجاتک مرعیتی
کوسترنر احکام عدیده واردر ؛ بناء علیه ما دام که خرسیانلق عهد عتیق

(۱) بو حاله بر مثال اولوق اوزره D. A. Forget نام فرانسزک :

l'Islam et le Christianisme dans l'Afrique Centrale

عنوانلی کتابنه باقیله ۰ صفحه ۹۳

بر اعتیاد شیطانی یہ قارشی وضع احتیاط ایتک اولدیغنی « ادعا ایلور (۱) بوندن آکلاشیلدیغنه کوره پروتستانلک بویوک بر مجتهدی بولنان قالوین قاتولیک پاپا سرلنجه مرعی اولان عدم تزوج عادتته اعتراض ایدیور و روح القدسک پاپا سرلک هر حالده بر قاری ایله تاهللرینی مراد ایلدیکی یولنده تفسیر ده بولنیور . کلیسا مؤلفلرینک بوکبی مفاهیم دقیقه بی کشف خصوصنده کی استعداد خارق العاده لرینی تحسین ایتمه مک قابل دکدر ! بز مفسرلک دعواسنه قیام ایده جک قدر جرأت صاحبی دکز وعلی الخصوص مسلمان صفتیله انجیل نصارانک آیتلرینه دائر ایضاحاته تصدی ایتک ده وظیفه مزک خارجنده در . مع مافیه آکلایه بیلدیکمز بر نقطه وار ایسه اوده بالاده مذکور آیتک قاتولیک پاپاسلغنده کی عدم ازدواج اصولنه قارشی ایراد اولمش بر نهی قدسی فلان بولنامسیدر . » بر اپستقپوس تک بر قارینک قوجه سی اوللی « کلاندن مقصد ظن عاجرانه محجه اولا : اپستقپوس کی جماعت کثیره یه نمونه حرکات اوله جق بر ذاتک معیشت حیاتیه سی ساده و محویتلی اولسی واولیله بردن زیاده قاری آلتق کی مصرفل وکلقتلی شیلردن اجتناب ایلهسی در ؛ زیرا مذکور آیتک یازلدیغی عصرده اپستقپوسلر زمانزده کی انکلیز اپستقپوسلری کی سرایلره مالک اولمازلر ، طولون معاشلر آمازلر ایدی . ثانیاً : جماعتنه واهل کلیساسنه قارشی پک چوق مسئولیت ایله مکلف اولان بر اپستقپوسک بردن زیاده عورت ایله تزوج ایدوبده کورولتی یه ، امتزاجسزلقه ، عربده یه محل

(۱) بالاده کی عباره قالوینک ابواب انجیلله دن بعضیلری اوزرینه یازدیغی تفسیرک انکلیز جـ سندن مأخوذ در

اولق کرکدرکه مسلمانلر هیچ بر وقت طبیعتک میلاننه قارشی بو درجه مقاومت
مقدر اوله مدیلر ؛ دها طوغریسی هوس طبیعت بو درجه مقاومت محترانه یه
دوچار اولورسه عاقبت ینه غلبه چاله رق بشقه بر جهته ودها مضر ومنفور
بر صورتده پاتلاق ویره بیلور اعتقادنده بولندیلر .



نظریات جهتله وحدت زوجه اصولنک دیگر صورتناکجه دن
عالی اولدیغی باعث اعتراض بر مسئله دکلدر ؛ مع مافیه اتحاد زوجیتک
بو صورت نجیبه سنی خرسیتیانلغک نفوذیله وجود بولمش ظن ایتک ابنای
بشرك مدنی و غیر مدنی بونجه اقوامی آره سنده جاری اولان عادات ازدواجیه
حقنده بویوک بر وقوفسزلق کوسترمک در . کرک وحدت زوجه وکرک تعدد
زوجات خرسیتیانلغک ظهورندن اول جهانک مختلف یرلرنده جاری ایدی . حتی
تعدد زوجاتک خرسیتیانلغک ظهورندن صوکره بعض نصرانیلر آره سنده دخی
مرعی اولدیغنه دائر دلائل واردر ! وحتی اهل کلیسا آره سنده بیله متعدد
زوجهلره مالک کیمسلر بولنمش اولدیغی (سن پول) ک بر کلام انجیلیه سندن
استخراج اولنه بیلور . (سن پول) بو بابده نه فکرده بولنیور ؟
« بر افسقپوس تک بر قارینک قوجه سی اوللی » دیور . (۱) بو کلام
انجیلی ده مطلق بر مفهوم ضمنی بولنلی که انجیلک مفسرلری مبهم ومغلق
صورتده تشریحاتده بولنیورلر . اصلاح مذهب متشبثلرندن (قالوین) بو
ایضاحاتی صاحبه دیه رد ایتکله برابر کنیدیسی ده بر تفسیر مقنع ده
بولنه یور . « روح القدسک کلام مذکوردن مقصدی صوکره دن ظهور ایدن

قلمسی مصیدر ؛ مصیب عد اولنسه بيله هر حالده اهن شرین در . بناء
 علیه شرع اسلام طبایع بشریه نك مقتضا سنه دها مناسب صورتده وضع
 احکام ایلمشدر . اگر مذکور قدرت اختیار علی العموم خرسیتیانلر ده موجود
 بر موهبه ایسه اورا سنه بر دیه جکمز یوق . اوله بیلورکه کنیسه نصرانیت
 احکامنی وضع ایدنلر جسمک او اعتدالسز هوسنه مقاومت ایده جک درجه ده
 بر موهبه قدرته مالکدرلر ؛ نته کیم مؤرخ حکیم (کیبون) ک روایتی
 وجهله « مبادی نصرانیتده اهل کلیسا آره سنده بر چوق کیسهلر بر عفت
 ابدیه طریقه ذاهب ایملر . باکره قادینلر پاپاسلرله برلکده بر یتاقده
 یاتارلرلرلر وفوران آتش جسمک عصمتلری اوزرینه بر تأثیر شهوانیسی
 اوله مامسیله مباحی بولنورلرلرلر . ینه بو اسکی زمان خرسیتیانلرینک افکار
 متحده سنجه بر آدمک مدت عمرنده یالکمز بر کره ازدواجی کافه مقاصد اجتماعیه
 وطبیعیه ایچون کافی عد ایدلرکنندن ایکنجی بر ازدواج (زنا ی قانونی)
 اولق اوزره لکدنورلرلرلر « (۱) نفسک هوسات طبیعیه سنه قارشی وقوع
 بولان بو امتناع ملکیت او درجه یه واردیرلرلرلر اولمیدرکه بعض ارباب اتقا
 مالک اولدقلری رجلیتی تامیله الغایله ایتمشلر ؛ حتی انجیلده بعض کیسهلرک
 سلطنت عقبا او غورنده کندی کندیلرندن اقتدار تناسلی رفع ایتدکلرینه
 یعنی بالاخیار خادم آغالی حالنه کیرمش بولندقلرینه دائر بر اشارت
 موجود در . (۲) ظاهر ، بوکی فضائل مکاته عدم مظهریتلرندن طولانی

(۱) کیبونک "Decline and Fall of the Roman Empire"

نام تاریخندن . جلد ۲ . صحیفه ۱۱۰

(۲) متی انجیلنک اون طقوزنجی بابی اون ایکنجی آیتنه باقیله

مسلمانان نصارای افرنجك بو كبی حالاری حقهنده لفظ مراد بر تنقید ایله اکتفا ایدوب کچرلر ؛ حال بوکه فرنکالر اهل اسلامك احوالنه یالکز تعرض قولی ده بولنمله قالمیورلر حتی فعلاً مداخله ایده جك درجه ده شریرلکالر کوسثرییورلر .



تعدد زوجاتك تجویزنده کی حکمته دائر بوراده سویلنله جك برشی واردر : معلومدرکه امر تناکحه بقای بشریت مقصد اساسیدر . تناکح مشروعدن مطلوب اولان بر قضیه همه ده واردرکه آنك حقهنده -- ولوکه غایت مبهم اولسون -- بر ایماده بولنملغمی انکلیزلرك اوصیتی اخلاقیونی هیچ ده تجویز ایتزلر ؛ فقط بن اوقضیه همه دن بجه جرأت ایلیه جکم . بر ارکک هوس جسمانیسی تسکین اولنمه محتاجدر ؛ زوجه ایسه بدن جنسیتك مقتضای تشکیلی جهتیله خدمت تسکینه دائماً مقتدر اوله ماز . بر مردك وحیه عهده سی اولان احوال دن بریسی ده افعال فحشیه دن صاقتمق یعنی زنا ارتکابندن اجتناب ایلمکدر ؛ هم ده فحشه تمایل ایدن بر کیسه ایچون آندن بر خیلی غائله لر وجسماً قورقنج مضرتلر تولدی ملحوظدر . ایمی متاهل بر آدم او تقدیر ده نه یاعلیدر ؟ فی الواقع اغوای شیطانی ایله حاصل اولان هیجان جسمانی یه غلبه ایچون بر آدم ده پك بویوک بر قدرت اختیار بولنلیدر ؛ فقط مع التأسف عالمده بو قدرت اختیاره مالک اولان کیسه لر آزدر . بناءً علی ذلک زوجه ده کی مانعه موقته جسمانیه سببیه تسکیت هوسه واسطه بوله میان بر آدمک دیگر بر زوجه یه مالک اولسی وبویله جه زنا دن وآنك بر وجه بالا ایما اولنان نتایج مضره سندن آزاده

دوشرلر واختيارقلرى اکثريا مذلت فقر ايچنده ختام بولور . عمرلرنده
 زوجه لکه بدل (متره س) لکه لایق کوریلن قاریلر غیر مشروع
 چوچقلره ده والده اولورلر ایسه صوکره کی حالاری دهامشکل اولور یا .
 چوچقلرینی یتشدیرهک ، ایش اوکرتمک ، آز چوق تریه ایده ییلمک
 ایچون سنه لرحه عالم نظرنده کندیلرینی طول وچوچقلرینی مشروع کی
 کوسترمک و بناء علیه کرک نفسلرینی وکرک چوچقلرینی بشقهلرینک معاملات
 محقرانه لرندن صیانت ایلمک ایچون بو قادیلرک عمرلرنده چکدکلری عذابک
 درجه سنی آرتق سز تصور ایدیکز .

کرک شرقده کرک غربده حیات بشرک صورت کذارانی یقیندن
 تتبع ایدنلرحه مصدق احوالدرکه (متره س) طوتان متأهل خرستیانلرک
 عددی بردن زیاده زوجه ایله یشایان مسلمانلرککندن پکده آشای دکادر .
 بو ایکی حالدن هانکیسنک اخلاق شخصیه وعمومیه ایچون دهامضرقلی
 اولدیغنی تعیین ایده ییلمک طرفیندن هر برنجه اتخاذ اولنان معیار حیثیتی
 آکلامغه توقف ایدر . بونی بر مثال ایله شرح ایده لم : شرقده بر
 انکلیز مستملکه سنک والیسی حوضه ولایتنده بولنان دیکر بر انکلیز
 مأمورک قبول اسلامله ایکنجی بر قاری آلمق اوزره اولدیغنی ایشیدیر .
 بناء علیه اکر زوجه سیله امتزاج ایده میورسه بر (متره س) طوتسنک
 اصول اسلامیت اوزره اوسته بر قاری دهامتزواج ایلمسندن زیاده مناسب
 اوله جغنی او مأموره اشراب ایلر ؛ همده مأموریتنی غائب ایتمک احتمالی کی
 بر تهدید ایله اشراب ایلر . ایشته مسلمانلر ایله خرستیانلرک بو خصوصده
 اتخاذ ایتدکلری معیار اخلاق آره سنده کی فرق بو مثالدن منفهیم اولور .

یکی بر لذت — ولوکه موقتاً اولسون — یکی بر رفیقہٴ حیات بولمق
ایچون (متره س) طوتار لر . بویله بر تشبده بولان بر آدمک نتیجہ
هوساق اوله رق ایکی قادینک حیثیتی تذلیل ایدلمش اولور : بولردن
بر یسی کندیسنک زوجہٴ مشروعه سیدرکه آنک مراسم نکاحیه سی ایچون
مقدما بر جوق پارلر صرف اولنمش ونیچه زحمتلر اختیار ایدلمش و بر خیلی ده
آیین دینی پاتیردیلمی پاللمش ایدی . بویله جه مشاهدهٴ عامه ایله مشروعا
آلدیغی بر قادین ایچون درعهده ایلدیکی مسئولیت معنویه یه اهمیت
ویرمیوبده خفی صورتده بشقه بر قاری یه عقد رابطه ایدن بر آدم
زوجہٴ سنی تحقیر ایتمش اولور دیمکدر ؛ حال بوکه مردلکه یاقیشان شی
زوجہٴ نک شرفی هر صورتله حقارتدن محافظه ایتمکدر . دیگر طرفدن دخی
او یله بر آدم متره س اتخاذ ایلدیکی قارینک عامهٴ ناس نظرنده کی
ذلتدن ، سقوط ناموسندن مسئولدر ؛ زیرا متره سلکی قبول ایدن کنج
قاریلرک پک چوغنده آلفته لکه ، فحشیاته انهماک بولمیه ییلور . تاهین
معیشت ایچون اغفالچی حریفلر طرفندن بر امید ویرلمسه ایدی بو قاریلر
بلکه بشقه بر ایش طوتارلرده معیشتلرینی حلال صورتده قزاقمه وکندی
طبقهٴ اجتماعیه لرندن اولان کیمسه لرله — ولوکه فقیرانه اولسون — عقد زوجیه
رغبت ایلرلر و بناء علیه خلق نظرنده ناموس ایله کزیمکه چالیشورلر ایدی .
بو (مانتینوتا) لر صفت حقیقلرندن طولایی خلقک ترصدندن صاقلانمه دایما
مجبوریت حس ایدرلر . بناء علیه حال حقیقلری میدانه چیققدن صوکره
بر صورتله ایتم اولدقلری کبی یاشلنوبده طراوت وجودلری زائل اولمغه
باشلینجه معشوقلرینسک کو کلرندن اولدیغی کبی کوزلرندن دخی ایراغ

امرار ایلورلر ؛ زیرا متصل اندیشه قوت لایموت ایله معذب اولیورلر .
 بو بدبخت قادینلرک احوالی تدقیق اولنجه آکلاشیلورکه او حجابی یعنی
 او تولد نامشروع بلاسنی باشلرینه کتورنلرک اکثریسی هیئت اجتماعیه نک
 یوکسک صاییلان طبقاتنه منسوبدرلر . شهوتلری اوغورنده فدا ایتدکاری
 بو قیزلری تحت تزوجه آلملری ایچون او حریفلری - اکر ذاتاً متأهل
 ایسه لر - هیچ برشی اجبار ایده من ؛ هم ده ایکنجی بر قاری آلمق جنایت
 اجرا ایله کبی تلقی اولندیغندن قانوناً موجب تجریمدر . یا بکار اولان
 مغفلاری چوجق ویردکاری او قیزلری تحت زوجیه آلمق ایچون اجبار
 ایتمه مکه فصل عدالت تعبیر ایلملی ؟

تعدد زوجات مثلاً ممالک اسلامییه ده موجود اولان مؤسسته متصل
 هجوم ایدن نصارای متمدنه ابتدا کندی هیئت اجتماعیه لری آرہ سنده موجود
 اولان بویله یوز لرحه فناقلره ، فلا کتله چارلر آراسلر ده مناسب بر
 خدمت انسانیتکارانه ده بولمش اولورلر .



شیمدی بز بوراده نازک بر مسئلهیه کیریشمک - انکلیزلرک
 تعبیرنجه - دیکنلی بر محله کیرمک ایسترز : عالم نصراننده بر هیئت
 اجتماعیه نک تعدد زوجاتدن ده فنا بر حالدن مصون اولوب اولدیغنی
 وکلیسانک بعض احوالده استثنا صورتیه تعدد زوجاته اغماض عین ایدوب
 ایتدیکنی آکلامق ایسترز .

انسانلرک یکی ویا تازه بر شیئه اولان میلان طبیعیلری معلوم بر
 حالدر . ینه معلوم اولان حالاتندرکه عالم نصراننده نیجه متأهل کیسهلر

افشای خالدن خوفاً او قالدینه بر از پاره ویررک اسکات ایده بیلور . فقط بویله بر کیمسه شرع اسلامجه کندی حرکتک مسؤلیتندن او یله قولایقله برأت ایده مز . موقع اجتماعی حسبیله قالدینک کندی ما دوننده بولمنسی آتی تاهلدن و بناء عایه چوجغنی ولد مشروع یاقمقدن قاجنمق ایچون سبب کافی دکلدز . او یله یا ، زواللی قالدینی اغفال ایدهجکی صره ده آنک بر خدمتی ویا ایشجی قیز اولدیغنی دشمنیورده یالواروب یالتاقلیوریادی ، او پیوردی ده ا بیا هم نه خاطر ایدرک هتک عرضنه جان آتیوردی . مساوات انسانیه یه اک زیاده صورت امکان بخش ایدن اسلامتیده چوق کره ملوک و امرا یله احاد ناسک طبقات فقیره سندن اولان قیزلرله تاهل ایدرلر وقیزلرینی اصلاً احاد ناسدن ایکن برر صورتله تمیز ایلمش اولان کیمسه لره تزویج ایلرلر . بویله بر هیئت اجتماعیه ده افراد بشردن بر قسم فانیکن دیگر بر قسم فانی یه قارشی رجحانیت صنف ادعاسنده بولنلرینه پکده اهمیت ویرلرلر . انکلیز غزته لرنده دفعتله کوردک که کنج و فقیر قیزلردن اعدامه محکوم ایدیلرلر بولندی . نیچون می دینیه جک ؟ چونکه تحمل اولماز بر ضرورتک ، ازاله اولنه ماز بر حجاب عیمک سائقه مبرمی ایله ولد زنارینی اتلاف ایلدکاری ایچون ! بو مقوله فقیر و مغدور قیزلردن اتخاری ترجیح ایدنلرده بولندیغنی یه او غزته لرده کوردیکمز وقایع خزینه دندر . اولرده ، مغازه لرده ، فابریقه لرده ایشلین کنج قالدینلر آره سنده او یلدلری بولانیورکه یالکیز نفسلرینی دکل برده دساس مغفل حریفلرک محصول شهوتکار یلری اولان ولد زنا ی مشروعلرینی کچننیریه بیامک ایچون عمرلرینک اک عزیز زمانلرینی هرکون صباحدن اقشامه قدر ایشلمکله

سورملری عادتاً بر جرأتدر . وحدت زوجه نك مرعی اولدیغی یرلرده زنایه تمایل تعدد زوجاتك مشروع اولدیغی مملکتلردن زیاده در . بو حقیقی تسلیم ائمه مك یا طبیعت بشریه نك هوساتی بیلمه مك کبی بر جهالت اثریدر ویا بیلوبده تجاھل ایلمك مثللو مقبوح بر ریا کاولقدر . تعدد زوجات عادتك زنایه ابتلا درجه سنده بر اخلاقسزلق اولدیغی فرض ایداسه بیله فضله اوله رق زنانك پك بویوك بر انسانیتسزلك تحدث ایله بیله جکی حقیقی نصل خاطر دن چیقاره بیلملی ؛ بر قاچ قاری تزوج ایده بیله جك بر آدمك میدانده ولد زنا بر اقسی احتمالی پك بعید در ؛ زوجه واحد اصولك مجبوری اولدیغی یرلرده ایسه اولاد طبیعه نك کثرتله حصولی احتمال دن هیچ ده بعید دکلدن . بر مسلمانك متعدد عورتلردن اولان ذریقی مشروعدر ویا مشروع ایدیله بیلور ؛ فقط بر خرسیتانك زوجه واحده سنك غیری عورتلردن طوغان چوجقنری هر حالده غیر مشروع صاییلور . اولاد غیر مشروعه نك حق توارثی بولماز . احتیاجك ذلتی ، معیشت حیاتك اضطرارلرینی ییلنلر بر انسانك ذریتنك میراث دن محرومیتی بویوك بر انسانیتسزلك عد ایده جکارنده شبهه یوقدر . ذاتاً متأهل بولنان بر مسلمان زوجه مشروعه سنك غیری بر قاریدن طوغه حق چوجقنی او قادینی دخی تحت زوجیته آلمق صورتیله مشروع ایده بیلور وایتملیدر ؛ تا که او چوجق میراث دن محروم قاله یه ، سفیل اولیه و بنا برین کندیسنی بو عالمه کتوروبده عذاب الیم ضرورته بر اقان منحوس پدره هر ساعتده بر لعنت یاغدیرمیه .

شو متمدن انکلتاره ده بر آدم آرزوی شهوتپرستیسنی اجرا ایچون بر کنج قادینك باشنه بلا کتوردیکی زمان بغضاً کندی رضا سیله وا کثریا

شرعیه دن عد ایتسه ایدی ایش نه یه منجر اولوردی ؟ نسوانک او وجهله
ازدیادی ورجالک غزوات متتابعه ایله تناقص ددی کی ایکی بویوک وسیله دن
طولانی ذلت فحشیات بقای امت اسلامییه بی درکه انقراضه ایندیره جک
برحال دهشت کسب ایدردی . بو حال خطر اشتلاک اوکی آلمق ایچون
برآدمک - شرائط مجبره نك ایجابات متزایده سنه کوره - بردن درده
قدر قاری آله بیله جکی مشروع اولدی . تنه کیم یونان قدیمک آتیه
جمهوریتنده بویوک بر محاربه نك نتیجه سندن اوله رق ارککلر آزماش
و بر چوق قاریلر قوجه بوله ماش اولدیغندن هر ارککلک ایکی قاری تزوج
ایتمسی تجویز اولمشیدی .

معلومه درکه هر دورک احوالی کندیسنه مناسب احکام وضعی ایجاب
ایتدیرر . ادوار سالفه ده تعدد زوجاتک مشروعیتی ایچون موجود اولان
اسباب موجبیه زمانزده او قدر حس اولمیه یلور . بوندن ناشیدرکه اهل
اسلام آره سنده تعدد زوجاته مجبوریت حس ایدنلرک عددی دایما
آزالمقده در . تعدد ایچون وضع اولنان شرائط شمیدیلرده دها آغیر کلیور ؛
ایمیدی بو شرائطی یرینه کتوره بیهلک او یله اولور اولماز اصحاب جرأتک
کاری دکادر . حتی بر قادینی بیهل اعاشه و اداره نك مشکل اولدیغی بر
زمانده یشامقده اولدیغمزدن بر نیچه کیمسه لر متأهل بر طرز معیشته
مخصوص اولان اذواقدن بیهل ایستر ایستمر صرف نظر ایلمکده درلر .



تمدن معنوی جهتیله دخی مسلمانلرک ما دون اولدقلرینی ادعا ایابن
فرنک محرر لرینک اسلامده کی تعدد زوجاتک مغایر اخلاق بولندیغی اورته یه

زمان جاهلیت اقوامندن نیچه لری آرسنده کثرت زوجات بر حال طبیعی عدا ایداش اولدیغی کبی ظهور اسلامده دخی محدود بر صورتده تعدد زوجات اصولنک جریانی عربلرجه هیئت اجتماعیة نک مغیار اخلاقی نخل ویا سعادت عائله یه مغایر عدا اولنمایشیدی . اسلامیتک تأسسندن صوکره ایسه بویله محدود وشرائط مشکله ایله مقید اولق اوزره تعدد منکوحه نک مضر دکل بالعکس بعض احوالده مفید بیله اوله جفی تحقق ایتدی . شویله که :

تاریخک شهادتسندن آکلاشیله جفی وجهله اعتقاد باطلدن متولد بر عادت احتیاطکارانه اولق اوزره بر چوق عربلر قیزلرینی دیری ، دیری کومه رک اتلاف ایدرلردی . اسلامیت بو عادت ظالمه یی اورته دن قالدیردی . بو سببله مقدار نفوس نسوان آرتدی . دیگر طرفدن ایسه اوائل ظهورنده اهل کفره قارشی دائماً غزوات اجرا ایلمسندن طولایی رجال مسالمینک عددی اکسیلیدی . بناء علیه نیچه طول قادینلر و نیچه قیزلر ایچون آیری آیری قوجه بوله بیلک احتمالی مفقود ایدی ؛ هم ده بو حال اویله بر دورده وقوع بولیوردی که او عصرلرده نسوانک والده اوله بیلمکدن ما عدا هیئت اجتماعیه ایچون بر فائده جدیه سی موجود دکلدی . قوجه سز قالان قادینلرک - اویله زمانزده اولدیغی کبی - دورلو دورلو مشغولیت حیات بوللری امکافی معدوم ایدی ؛ بو ایسه بر طاقم باشسز ، صاحبسز قاریلرک اورته ده قالسنه و بو حال خطرناک ایله فحشیاتک آرتسنه سبب اوله جق ایدی . اگر حضرت پیغمبر کئنیساء نصرانیتک اتخاذ ایلدیکی قاعده یه اقتفاء بر آده ک عین زمانده بردن زیاده زوجة سی بولنماسنی احکام

بري اعتراضدن عاری بر صورتده جریان ایده کیش بولدی ؛ او بابده
یابه بیله جکی برشی وار ایدی ایسه اوده بو عادت مرعیه یی تعدیل و تحدید
ایتمک اولدی » (۱)

خرستیانلغک مبادی انتشارنده اهل کلیسا بر چوق مجوسی
عادتلرینی . اعتقاد لرینی آیین نصرانیت میاننه قاریشدر میشیدی ؛ بوندن
مقصد ایسه مجوسیلر آره سنده تنصر ایده بیله جک کیمسه لری نشر
نصرانیتک ایجاب ایتدیردیکی احواله ایصیندیرمق ، جذب ایلمک ایدی .
عربستانده ظهور ایدن او یله صاحب کشف بر ذات رسالتصفا تک
مجوسیلرجه مرعی اولان هر عادتک همان اورته دن قالدیرلسنی امر ایدرک
جهلای خلقی نشر ایلدیکی دین جدید علیهنده بوسبوتون قیشقرتمسی مسلك
دور بینی سنه البته موافق کلزدی . مع ما فیه طوائف عربک اقتضای
حاله کوره ماشاقی قضیه مهمه سنی نظر ترصد دن اوزاق طوئمان جناب
رسالتپناه زمان جاهلیه نک عادات وحشیه سندن اولان بر طاقم حالارک
تعدیلندن ده کیری طورمدی . ایشته بو حکمته مبنی درکه اسلامده
منکوحه لک تعددی قیود مانعه یه تابع قیلندی . حتی قرآن کریمده
(فَانْكِحُوا مَا طَابَ لَكُمْ مِنَ النِّسَاءِ مَثْنً وَثُلَاثَ وَرُبَاعَ فَإِنْ خِفْتُمْ
أَلَّا تَعْدِلُوا فَوَاحِدَةً الخ) بویورلشدر (۲)

(۱) Thomas Carlyle ک "Heroes and Hero-Worship" عنوانی

کتابنده « محمد » فصلنه باقیله .

(۲) سورة النساءک اوچنجی آیتنه باقیله

سکزنجی فصل

نعدر زوجات

معلوم اولدینی اوزره اسلامیتده کی تعدد زوجات اصولنی آوروپالیر
 پک تقبیح ایدرلر . معارضلرک قوانجه خرستیان هیئت اجتماعیه لری
 بویله بر ذلت شهوانیه دن آزاده ایش ! نصرانیتده مؤسسۀ کینسا
 عصرلردن بری اقوام بشرک بوبوک بر قسمنی ، تلویث اخلاق موجب اولان ،
 تعددک نفوذندن صیانتہ چالیشمش و فقط اسلامیت او طرز حیات شهوانیه
 ادامه ایلمش ! ایشته تعدد زوجات حقنده کی تقبیحات معارضین بو وجهله
 خلاصه اولنه بیلور . شیمدی بز خرستیان محرر وواعظلرینک بو مقوله
 ادعارنده نه قدر خاصه انصاف و عنصر حقیقت بولنه بیله جکنی تدقیق
 ایده لم :

اول امرده شوراسی قیده شایاندر که تعدد زوجاتک کویا
 اسلامیت طرفندن وضع اولمش کبی بر صورتده تنقیدی یا بر جهالت اثریدر
 ویا اویلیکیچ مقتدرده مثلی چوق کوریلن سوء تأویل نتیجه سیدر .
 حضرت محمد تعدد زوجات اصولنک مؤسسہ دکل که او بابده هجوملرک اک
 شدتلیسی اسلامیتہ قارشی وقوع بولور . متفکریندن (قارایل) ک
 دیدیکی کبی حضرت پیغمبر تعدد زوجات عادتنی « تا ادوار مجهوله قدیمه دن

بو بحث حقنہ ذکر اولہ جق بشقہ بر شی قالدیسہ اودہ
ازدواج مثلہ مؤسسات حیاتیہ نک اسلامدہ کی شکنہ اعتراض ایدن
منقدین نصاریہ ہر نہ دنسہ چوق کرہ تغافل ایتکاری شو آیت
انجیلیہ بی خاطر لمتقدر :

« کنری کوزکرہ کی سرنکی فائہ آلازسک دہ نیمونہ فرداسک
کوزندرہ کی موبی کوسترسک ؟ »



کیریشور : (استقباله راحت بر معیشت بولغه مدار اولان بویله بر فرصتی الدن قاجیرمق عادتاً بدلاق ، کلسی پک مشکوک اولان دیکر بر فرصتی بکلمک ایسه صوک درجه ده بر احتیاطسزلقدر . بر قیز اویره خیالی عشق قصه لرینی قفاسندن چیتارملی وهرشیدن اول منافع مادیه سنی دوشمنیلیر .) ایشه بو نصحیتده بولنان بر والده حقیقتده بر تمثال اخلاق دکل عادتاً بر پزه ونکدر ؛ هم ده فقیر ایشجی قیزلرک قولاغنه فحشیات توصیه سی فیصیلدایان جادی قاریلردن آشاغی قالماز بر اسکی پزه ونکدر « (۱)

مسلمان قیز لرینک ازدواج جبر یسی مناسبتیله دکل آنجق آوروپای غربی ده طائفه بناتک تأهل خصوصنده کی تقصائی اختیار لرندن طولانی بر فرانسز محرری ده شو ملاحظه ده بولنیور :

« ابوینک طول املنه وطمعنه فدا ایدیلرک حیاتلرینک موسم بهارینی مصیبت صورتلی حریفلرک آغوشنده کچور مکه مجبور قالان قیزلری وقایه هیئت اجتماعیه هیچ بر تکفل جدی تأمین ایلمیور » سوزینی ایراد دن صوکره کفو واقرانلغه هیچ ده مبتنی اولیان او مقوله ازدواجلردن دخی بجهله « بر آدمک فعل تولیده پکده قدرتی قالمدیغی زماندن صوکره وقوع بولان تأهل عجیبی قدسیت ازدواجی تلویث ایلر « دییور (۲)

(۱) متفکریندن مشهور Max Nordau نک

(Conventional Lies of our Civilization)

نام کتابندن . صحیفه ۲۶۶ .

(۲) Dr. Chaufeynon نک " Histoire de la Femme "

عنوانی کتابندن . صحیفه ۹۵ .

بوندن ما عدا ابوينك ويا اقر بانك آنلر ايچون رفقاي حيات تعين
 ايتلرندن متولد كدر و بدبختي اويله مبالغه اولنديغي صورته دأما دهشتلي
 چيقاز . برده « نكاحده كرامت واردر » كلام مشهورينك بويوك بر
 حقيقتي متضمن اولديغي آراي آخر ايله عقد ايديلان بونجه ازدواجلك مسعود
 ظهور ايتمسيله ده ثابتدر . هايدى ، قيزلك انتخاب و اختياري بولمقسرين
 مشرق اسلامده وقوع بولان تاهلارك عموميتله مضر و مشئوم چيتديغني
 فرض ايده لم ؛ فقط اسلامك او عادتني تنقيد ايدنلرك مملكتلرنده قيزلك
 بو حق انتخاب و اختياريك بشقه طريققلرله سلب ايديله كلديكني فصل
 تأويل ايتلي ؟ غربك ممالك متمدنه سنده اكترويا قيزلك ميلان قلوبندن
 زياده « پاره » ويا « عنوان » وياخود « موقع اجتماعي » كبي شير
 تنسيب و تعين ازدواجه سبب اولمقده درلر . كوزل قيزلري بولنان والده لرك
 آنلر ايچون كيسه سي كوزل زوجلر آلايه كلدكلى هر كسك بيلديكي
 وقايع روزمره دندر ، هم ده بو والده لر چوق كره اويله زوجلر تنسيب
 ايدرلر كه آنلرك جسم و اخلاقجه اولان نقصانلري آنجق كيسه لرينك
 مكمليتي ايله ستر اولمق ايسمئيليور . آوروپا نك هر طرفندن كترله بولنان
 بو والده لر حقتده افكار عميقه اصحابندن مشهور بر مؤلف شو يولده بيان
 مطالعه ايديليور :

« بويله بر والده اخلاق عاليه نك بر مثال مجسمي اوله بيلور ؛
 بونكله برابر قيزينه زنكين بر حريف تقديم ايلمك ايستيديكي زمان قيزك
 طبعي اولان كوكسزلكني اسلوبلي بر صورته بر طرف ايتديرمك ايچون
 كويا نصايح معقوله ويرمكه چاليشور وشو يولده بر ادای افتاعه

ایله — آچیق اولان کوکسی تا آغزینه ، کوزینه طوغری یناشمش بولسون ؛ بویله جه سماغانه رقصده جوشوب زییلا دقن صوکره تنفس ایچون برکوشه یه چکیلرک باش باشه مصاحبتیه قویولسون ! بو حاله مساعده ایده بیلور می یم ظنده سکز ؟ اصلا ! باروت ایله آتش یان یانه بر اقلما لیدر . بعض ممالک غربیه ده رقصه کیدن کنج قیزلر شیمدی آرتق رفاقلرینه بر مبصره ده آلیور لر ایش وحقی سربستی حرکتلرینی محافظه ایچون خانه لرینک جمله قاپوسی آناختارینی ده جیلرینه قویوب کیجه نک ایستدکاری قدر کیچ بر ساعتده عودت ایدیور لر مش . ایشلدیکنه کوره بر قیز اک زیاده التفات ایتدیکی رفیق رقصیه کیجه یاریلری بر عربیه یه بینوب اوینه قدر آنکله کلمکده مختار ایش . اکر بو حالار کرچکدن وقوع بولیورسه امین اولیکز که بز آوروپای نصرانینک بو مقوله عادات متمدنه سنی قبول ایتیه جکز وما دام که بو عادات متمدنه ، حاکمیت غربیه نک خلافتنه اوله رق ، شرقه طوب و تفنک زوریه اداخل اولمبور او حالده عادات مذکوره نک مملکتلرمزده انتشارینه ممانعته مقتدر اوله جفر ! »



حقوق نسواندن بر چوغی قاعده تستر سببیه تحدید اولنیور ظن ایدن کیسه لر کنج قیزلردن اکثرینک رفیق حیاتی انتخابه صالح اوله مدقلرینی مثال کوستریور لر . فی الحقیقه بنات مسامیدن بر چوغی رفیق حیاتی انتخابده میل طبعیلرینه تابع اوله مازلر . مع مافیه آنلرده بو صلاحیت اختیارک مقعودیقی مستثنا دینیله جک بر حاله وارمقده در .

ديك اوزركزه واجب اولور (۱) -

بويله جه اعصار قديمه دن برى انسانلرجه دائماً بر لعب مرغوب
عدايدلش اولان وسرور روحانىسى تقدير انجلى ايله ده ثابت بولنان
رقص كى بر ذوق مېعى مسلمانلر البته تقبيح ايده مزلر ؛ يالكز غربك
ما فوق التمدن دينه جك بر درجه يه واصل اولان ممالكترنده جارى عادات
رقصيه نك تقليدينه اعتراض ايلرلر . بر مسلمان كنديسى احوال زمانه نه قدر
اويديرمق ايسترسه ايستسون ونصاراى افرنجيه عائد شيلرى نه قدر مساعداتله
تلقى ايدرسه ايتسون ينه قيزينك ويا قاريسنك ييانجى بر حريف ايله كوكن
كوكسه رقص ايلمىنى خوش كوره مز . شيمدى بويله بر مسلمان قالقوبده
« رقص مختلط غايت معصوم بر اكلنجه در ؛ رقص ايدنلرك چوغى اخلاق
مېذبّه وادب صاحبي كيمهلر اولدقدن بشقه تا ايام صباوتلرندن برى رقص
مختطه آليشمشدر ؛ كنج ارلك وقادينلرك برى رقص اجتماعندن اخلاقه
مضر بر حال تولدى احتمالى اندر نوادر قيبيلنددر ؛ بالعكس فرصت رقص
بعضاً سعادت ازدواجى وجوده كتوره بيلور الخ » يوللو اقناعاتده
بولتمق بيهوده در . مدعيات مذكوره يه قطعياً قائل اوله مدقدن ما عدا بلكه
شو يولده مقابله يه بيله قيام ايدر :

« خير ، خير ! نفس امّاره سى يا شامپانيانك ويا مستحضرات
شيطانيه دن اولان مسكرات سائر نك تأثيريله هنوز چيغرنندن چيقمش
اولدينى حالده ديوانخانه رقصه كلن بر دليقانىل قيزيمى ويا قاريمى قوليله
تا بلندن كر بند ايتسون ؛ صوكره ده قادينك — ده قولته دينيلن بر طرز

قدر طپان تپرمی ، فیریلداق کبی دونرمی ؟ وهر طپان تپدکجه انفاس
 نامعدوده جمعیت ایله افساد اولمش بر هوای زهر ناک کی هیچ یوتار طوررمی ؟
 ارککارک رقص مختلطه اولان ابتالاری ایچون بز بشقه بر سبب ایق
 بوله میورز . نسوانک کمال وجد ایله حس ایلدیکی انهما که کانه آنلر ایچون
 موجود اولان اسباب دها معقول ومعذور در ؛ تته کیم بر محرر متغزن قادیلرک
 سبب ابتلاسنی شو یولده معذور طوتیورده « رقص ، نسوانک عضلات
 عصبیه سنک تهیجنه مطرد ومشروع بر شکل جریان ویرر ؛ اگر بویله اولاماش
 او اسیدی او غلیان هیجان دها مضرتلی بر صورتده پاطلاق ویرردی » دیور (۱)
 ایشته رقصک انسانلرجه حس اولنور بر احتیاج عضوی اولدیغنی
 آکلادق . شیمیدی بوندن استخراج اولنه جق بر نقطه واردرکه اوده بو
 احتیاج عضوینک اساساً قوه قدسیه فطرت ایله حصول بولسیدر . بناء علیه
 — عهد عتیق انجیلینک بر تعبیری وجهله — موسیق « سره دودوکنی
 چالدیغنی زمان » حرکات عضویه کز ایله بهشتی بر ذوق درون حس
 ایلدیگکی کزی ارانه ایدرسکز ؛ بو ایسه ولوکه بر مدت ایچون اولسون سزی
 اکدار دنیویه دن آزاده قیلار . ینه عهد عتیقه (۲) دینیلدیکی کبی
 « ماتم ایچون ده بر وقت مخصوص واردر رقص ایچون ده » . بناء علیه
 بویله بر آن سروره مظهر اولدیغکز وقت عرض تحمیدات ربّانی مفوض
 عهده کز اوله رق « یا الهی ! بنم ماتمی ذوق رقصه تبدیل ایتدک »

(۱) علم روح مدققرلندن H. Ellis ك « Man and Woman »

نام کتابندن مأخوذ در . صحیفه ۳۵۵

(۲) عهد عتیقك Ecclesiasts بابی ۳ - نجی فصل - ۴ نجی آیت .

عادات افرنجك على الاطلاق اتخاذينه وقوع بولان اعتراضك ماهيتنى ايجبه
الكلامق ايچون مسئلہ يى بر مثال ايله تصوير ايلك اقتضا ايدر . ايمدى
بو بابت بر مثال اولق اوزره آوروپا عادات اجتماعيه سندن اولان رقص
مخلوطى تتبع ايدہ لم :

ابتداى كلامده شوراسنى ايضاح ايدہ لم كه بز رقص كى مضرتسر
بر اكنجه حنقه ابراز بغض ايدن متعصبardon دكلز ؛ حق رقصك
طرز غير مرتبك بر احتياج عضوى حالده تجلى ايتديكنى ده بيلورز .
رقصك شكل اصليسى بر خراش عصيدين ، خلجان حركت عضويدين منبعث
اولمده در . رقص ، هيجان سرورك نوعا تظاهرنندن عبارتدر كه يالكز سن
رشد اصحابى اوزرنده دكل صبيانده بيله آثارى تجلى ايدن بر عارضه
طبيعتدر . بنى بشر آره سنده رقصه اولان اهمكك تاريخى افراد بشرك
جمعيت حالده تشكىلى تاريخى قدر قديمدر دينيله مبالغه ايدلمش اولماز .
ازمنه اوليه انسانلى آره سنده رقصى الهلرينه عبادت مقامنده اجرا ايدنلر
بولنوردى . (۱) رقص ازمنه وحشيه ده الهلره عبادت ايچون وقوع بولمش
اولديغى كى زمانز اهل تمدنى طرفندن دخى معبوده قلوب اولان نازنينلره
طابق مقصديله وقوع بولسه كركدر . واى ، بو ملاحظه يه نيچون تعجب
بو يوريلور ؟ اكر جمعيات غربيونك ترتيب ايتديكى بالولرده وسائر رقص
سالورنلرندہ او الهه جلالر بولمسه اذعانى اولان بر اركك قالقارده تا صاحله

(۱) بو طرز عبادتك تفصيلى ايچون Albert Réville نام مؤلفك

(Les Religions des Peuples Non-Civilisés)

عنوانلى كتابنه باقيه . صحيفه ۲۶۷

ساکن اغنیا طاقمنک ویا اورته حالی عائله لرك نسوانی حتنده دها زیاده جاریدر و آنلری منسوب اولدقلری هیئت اجتماعیه ده زیاده مفید اوله یلمک اقتدارندن آلیقویمقده در . بوتقیداتک تولید ایتدیکی مضرتلك تفصیلاتنه کیریشمک بزی مبحث اساسیمزدن بوسبوتون آیرر . بوراده یالکیز شو امیدمزی اظهاردن کیری طورمایز که استقبال قرییده او مثلاً مناسبتسن تقییدات دن واز کچیلور و او قادینلرك حریت حرکاتی شرع اسلامک احکام حقیقه سنه دها مناسب بر صورتده توسیع ایدیلور . مع ما فیه بو کبی اصلاحات قانون تحوله تابع اولدیغندن احتیاج محسوسه کوره یوماً بعد یوم تدریج ایله وقوع بولور . او یله « قاجمق ، یا شما قلمق قالمق ، قالدیرملی » کبی اورته یه آتیه کن فکرلر یالکیز عامیانه دکل برده پک مستبدانه در .

تغلبه قارشی رفع لوای شکایت ایدنلرك کندیلمی مستبد و متحکم کسینه ملیدرلر . بز او یله هر شیئه نظام یامغه قالمیشورسه ق شیرازه انتظامی بوسبوتون بوزمش اولورز ؛ قاش ییارکن کوز چقاریرز و بناء علیه هرج و مرج اجتماعی یه دوشه رز .

حریت نسوان نصل توسیع اولنورسه اولنسون اهل اسلام آره سنده کی عقل سلیم اصحابنک متحداً آرزو ایده جکلری بر حال واردر که اوده نسوان غریبه نك اطوار حیاتییه سنک کیشی کوزل بر صورتده اخذ و تطبیق اولنماسیدر . بو آرزوی بیافزدن طولای او اطوار حیاتییه نك ید ابلیس ایله ترتیب اولندیغنی ادعا ایلدی کمز آ کلاشمسون ؛ زیرا بز آنجق کندی حالمزه مطابق کله جک صور حیاتییه نك رجحاننه و برشیء بلا تمیز تقلید ایتمکک چوق کره انتاج مضرات ایله جکنه قائلز .

عارسز شمشلرچی ؟ غالباً مدنیت غریبه ایله تفاخر ایتک و شرک زمانزده کی مغلویت متابعه سنی کورمکه آلیشقی بو آدمیری بوسبوتون شمارتش ، شریر ایتش !

بوراده ایضاح اولنه جق مواد دندرکه جسم نسوانی قماش ستر ایله قابلامق آنجق آنلری حدود عفت داخنده بولمغه اجبار ایتک ایچون اختراع اولمش بر تدبیر دکلدیر . یانه حاجت اولدیغی اوزره عفتک قدسیتی لایقيله تبجیل ایده مین بدنام بر عورت اک صیقی چارشافلره ده صارمش اولسه ینه دائره عفتدن خارجه چیقه بیلور . عادت تسترک التزامنه ده مهم بر سبب واردرکه اوده اورتینک اخلاقشکنلکه ابتلاسی اولان بونجه بی ادبان رجالک تجاوزینه قارشی بر نوع مانعه بولمسیدر . تستر عادتق اولیان یرلرده بو مقوله کیمسه لر نیت اغوا و تجاوز ایله قادیئرک سمته یاقلاشقی ایچون البته ده زیاده فرصت بولورلر . اغفال رجالک نتایجله معناً و جسماً معروض مخاطره اولان نسوانی صیانت ایچون نه دورلو تدبیرلر اتخاذ اولنسه ینه اصابت ایدلمش اولور . بناءً علی ذلک تستری نسوانک برحق حریتی الغا معناسنده تلقی ایتک خطادر .



ماهیتنده بر عنصر حقانیت اولیان قواعد وارکنی مدافعه ایتک مقبول بر مسلك اوله ماز . بناءً علیه شیمدی بز قالدوبده بالاده کی ملاحظاتمزه تردیفاً بعض بلاد شرقیه ده نسوانک حرکات مشروعه سی اوزرینه وضع اولنان تقیدات غیر محتمه بی مضراتدن خالی کی کوسترمک ایستر ایهک حد انصافی تجاوز ایتش اولورلر . بو کی تقیدات شهرلرده

عليهن من جلاييهن الخ » آيت كريمه سندن (۱) بو بابتده نه امر بويورلديغي تظاهر ايدر . بو مقايسه دن استتاج اولنه بيله جكي اورره خارج بيته مخصوص اولان كسوه سترك غريون طرفدن تماميله بر طرف ايدلسي اساساً اوامر انجمله دن دكلدر ؛ بلكه عادات مجوسدن اولق اوزره توارث ايده كمشدر . وجه نسوانك يبانجيلر نظرندن تماميله اخفاسي ايسه قرآن كريمك اوامرنن زياده ظهور اسلامدن صوكره كي اعصارده تقرر ايتش قواعد اجتماعيه يه مبتيدر ؛ ار ككلرك طبعي اولان قيصة انجملقريني براز افراطه وارديرملري ايسه ممالك اسلاميه ده عادت تستره شدتله رعائتك سبب اصليسيدر .

نوع بشرك مختلف هيئت اجتماعيه لري آره سنده موجود اولان احوال متخالفه بر محله بر شكل اعتيادك ، او بر محله بشفه بر عادتك اتخاذيني اقتضا ايتش وهر عادت آني استعمال ايدن جمعيتك مرور ازانه موجب مراعاتي اولمشدر . بر هيئت اجتماعيه افرادي ديكرى طرفندن اتباع ايديان اركان وعاداته ايسنديكي قدر تقايص بولغه چالشمتمده مختار در . ايمدي آوروپاي نصراني ده شو حسابسز محررلر ، واعظلر بيلم نه لر قالفو بده نه حق ايله عادات واركان اسلامه مداخله ده بولميورلر بر دورلو آكلايه ماز ؛ عجا بو حريفلر بويله بر صورت تعرضده بويوك بر كستاخق بولنديغي آكلاميورلرمي ؟ يوقسه بيلورلرده محضا كافه احوال ماديه ومعنويه جه كنديلرينك عالي وعافل وبزلك اذنا وجاهل بولمقلمز كبي بر ذهابي جهان قبول ايتديرمك ايسديه جك قدر

اقتناع ايلمك امكان خارجنده در .

☆
☆ ☆

تستر اسلامك لوازم اساسيه سندن بریسی ده نسوانك سن رسته
وصولدن بر خیلی زمان اول یوزلرینی رؤیت رجالدن صاقلاملریدر .
آوروپا قادینلری کبی مواجهه ناسده آچیقجه کزنمك مشرق اسلامك هیچ
بر طرفنده تجویز اولنمامقده در ؛ بو قاعده شرقیه ایسه اکثر غریبون
طرفندن نسوانك حریت مشروعه سنی تحدید اولمق اوزره تلقی اولنیور .
ابتدای امرده بو طرز تسترك نسوانك حریت مشروعه سندن بر قسمی
الغامقصدیلله وضع اولنوب اولمادیغنی تدقیق ایتمك لازمدر .

وقایع تاریخیه نك تصویرنده بعضاً بر رسام محررین غریبه نك
پك چوغندن زیاده صمیمیتله اجرای وظیفه ایدیور ؛ مثلاً رسام بر مریم
تصویری یامش اولسه باشندن آشای یارم چارشاف اورتیلی بر شکل
کوستریور . بو شکل ترسیمك حقیقت حاله موافقتی ایسه انجیلک
قرائتیده ده تبین ایلیور . انجیل مستوریت حقنده نه امر ایدیور ؟ « بر
قادین که باشی آچیق بر حالده طاعاتده بولنور ورای ایمان ایدرسه باشه
ناموسسزلق دعوت ایتش اولور » دیور . (۱) بناء علیه بر خرستیان
قادینك ستر راسی ایچون استعمالنه مأمور اولدیغی اورتی اساساً قرآن
کریمك اودن خارجه حیقارکن اکتساننی قادینره توصیه ایلدیکی لباس
مستوریتدن فرقلی برشی اوله میه جفی ادعا ایدیلله بیلور . قرآن کریمده
بو بابده نه اشارت وارددر ؟ « قل لازواجك و بناتك و نساء المؤمنین یدنین

(۱) انجیلک Corinthians بابی . اون برنجی فصل . بشنجی آیت

طوتديغنه دائر پك چوق تفصيلات ويررك اكلنديرييور و برازده كندی
ايدوب طوتديغندن بحث ايلور .

« جنوب موسمی يتديكندن ماری ده مملكتنه دونيور ؛ تبديل
آب وهوا سبيله هم ده اويله بنبه يناقلى بر حال صحتده دونيور كه ژورژ
آنى قارشيلمق ايچون دمير يولى موقفنه كيتديكى زمان وجه دلر باسنگ
مشاهده طراوتيله موازنه تفكرينى شاشيروب آداب تمدنى فلانى
اونوتويورييور وهمان كمال شوقله ماري يى مواجهه ناسده شاپير ، شاپير
اوييور . اوه كلكارى زمان ماريدن سياحتنه دائر بر چوق شيلر
صورييور ؛ مع مافيه قادينك حركت عفيفه سندن عدم امنيتى اظهار ايدر
حرف واحد سويليور . بالطبع سويلمز ؛ چونكه زوجه سنك مسئله عفتك
اهميت مقدسه سنى تماميله ادراك ايده جك درجه ده عقل سليم صاحبه مى
اولديغنى ييلور . ذاتاً ژورژ مسعوديت عائله نك آهنگنه سكته ايراث
ايده بيله جك او قبيل شبهات عاميانه ايله فكرينى يورميان ، كوكلى معذب
ايتمين جهان ديدكاندندر . »

شيمدي بز اشخاص مخيله دن اولان ژورژ ايله ماري يى كندی
عالمارنده برافه لم ده شرقيلرك اصحاب اذعانى او يولده بر طرز حيات التزام
ايدنرك حركتانى نصل بر حس خشيت ايله تلقى ايدر لر آنى آكلايه لم .
اصول غريبه اوزره قادينره حریت ويرمكل كك عادت شرقيه وجهله آنلر
اوزرينه بر قدرت آمریت وضع ايلمكدن دهآ از مضرتلى اوله بيله جكنه
دائر ايستيلديكى قدر دليللر كتورلسون ينه متمدن آوروپا نك اركاننده
اصابت و طرز شرفيونده بر اثر وحشت بولنديغنه او اصحاب اذعانى

تئسیب اولنیور . ژورژ بر مرد زندوستدر ؛ بناء علیه ارکان تمدنجه قادینلرک
هوسات معصومانه لرینه نه قدر رعایت لازم اولدیغنی ای ییلور . ایمدی
قالقوبده « یوق ق ق ! باق قوزم بن آ کاراضی اوله مام » دیمک الندن
کلز . بویله بر معامله او ارکان تمدنه مخالف اولدقدن بشقه مملکتلرنده
تأسس ایتیش اولان اداره احرارا نه جه دخی مجاز صایلماز ؛ او اداره
حریتک تمامی جریانی ایسه قوس قوجه بر فرنک دولت متمدنه سنک تحت
تکفلنده در . بناء علیه شرق تغلبی آ کدیزر او کبی بر معامله
خود سرانه نک دوری چوقدن کچدی ؛ حق وحریت نه دیمک اولدیغنی
چوقدن آ کلاشیلدی .

« ماری رفیقہ سی قادینله فرانسه نک جنوبه متوجہاً حرکت ایدیور
وبعضاً نرسده بعضاً ده قانده فلانده اوطوریور . قشین بورا لری ممالک
متمدنه نک هر طرفندن کلش زوار ایله تولیدر . هله تبدیل هوا ایچون
اورا لره کلش اولان کنج دیپلوماتلر ، ضابطلر ، بانکر اوغلاری ،
قوتلر ، بارونلر وانسانک قیزی نی ، قاریسنی رفاقت صحبتلرینه اطمئنان
قلب ایله تودیع ایده بیله جکی دها نیچه شبان لطافت اندام اوتلارده ،
پانسیونلرده ، غازیولرده معروض تماشای انام اولوب طورییورلر
ویا تعبیر معبودیله جاچه صاتیورلر . بوصره ده شونک بونک ما جرای
عشقه نه دائر کفتکولر جریان ایدرکه بو دیدی قودیلره فرنکلرک اصطلاح
اجتماعیسنده « رذالت » اطلاق اولنور ؛ فقط هر حالده آنلرجه رذالتک
بو معناسی بژده اولدیغنی قدر بر قوتی حائز دکادر . ایشته ماری هر
هفته منتظماً قوجه سنه یازدیغنی مکتوبلرده اوته کینک بروکینک ایتدیکنه

قوجه سنی یالکز غیاباً طانیور ایسه ده ماری یه امنیت تامه سی بولمخسندن
 طولای مستریج القلب بر صورتده ایشیله مشغول اولیور ؛ چونکه ماری
 کندی حیثیتی اداره ایده جک صورتده تریه کورمش ، تمدن ایتش بر
 قادین اولدیغندن آنک حقهده او یله مناسبتمز شبهه لره دوشمکه محل یوق .
 مارینک کیتدیکی یرده پک اعلا اکلممکه اولدیغنی آندن آلدیغی
 مکتوبلردن آکلایان ژورژ « اوخ . اوخ قادینجغزم آمان بر از
 اکلسون ؛ اخیراً پک زیاده صیقلش ایدی » دیه ممنون اولیور . ماری
 مسافرلکده ایکن رقص جمعیتلرینه دعوت اولیور . دوستنک آشنا لردن بر
 چوق کیمسه لره تقدیم ایدیور ؛ بولردن بعضیلری ایسه مزاج آشنا دلیقانلیلر
 اولدقلردن کوزل ماری یه خوش کورمک ایچون نه قدر هنرلی ،
 معرفتلی وار ایسه ارائه ده قصور ایتیورلر . بعض اقشاملری کاغد
 اوینانورکن بوکنجلر اویننده مارینک رفاقتنه نائل اولق ایچون عادتاً
 یاریش یاپیورلر .

« مدت مسافرت یتیور ؛ ماری ده خانه سنه عودت ایدیور .
 او قیش ساکن اولدقلری شهرک هواسی پک فناکیدیور . موسم
 شتاده اعتدال هوا یه مالک واکلنجه لی بر یر وطنلردن موجود
 اولدیغندن ماری آوروپا ده مشهور اولان جنوبی فرانسه یه کیدوب قیشک
 بر قسمی او طرفلرده کچورمک آرزوسنده بولنیور . مع التأسف کثرت
 مشغولیت قاریسنه رفاقتدن ژورژی منع ایدیور . زوالی شیمدی نه
 یاپسون ؛ چونکه کوکلنده سوکیلی قاریسنک آرزوسنی یرینه کتورمک
 حسی غالب . عاقبت مارینک طانیدقلردن رابطه لی بر قادینک رفاقتی

« یکی اولمش کنج بر قاری ایله بر قوجه فرض ایدیکنز . زوجین اصلاً و نسباً شرفیدرلر ؛ فقط مملکتلری وظیفه تمدن اجرایی در عهده ایلهش بویوک بر فرنک دولتک اداره عادلہ سی تحتہ کچدیکندن اورته لقدمه شایان حیرت بر حال حریت حکمفر ما اولیور . کرک زوج و کرک زوجہ فرنک دیلی اوکرشلر ؛ هم ده او قدر مکمل صورتده اوکرشلرکه اکثریا مکملہلری و دائماً مکاتبہ لری فرنکجه جریان ایدیور . کرک قاری کرک قوجه ارکان متمدنہ افرنجی لایقہ اتخاذ ایتشلر والحاصل اییجه فرنکشملر . حتی زوج اسم اصلسی اولان محمدی براقوب (ژورژ) آدینی طاقمش ، زوجہ ایسه فاطمہ دیہ خطاب اولمقدن آرتق صیقلیمغه باشلیوب (ماری) اسمیلہ یاد اولمغی ترجیح ایلهش . (ماری) بدناً و ذہناً بر از استراحتہ مجبوریت حس ایلدیکندن او طور دینی مملکتدن اوچ یوز کیلو مترو مسافہ ده کائن شہرندہ اسکی دوستلرندن بر کنج قادینک خانہ سنہ مسافرہ کیدیور . (ژورژ) قاریسنی آلوب عربہ ایله دمیریولی موقفنہ کوتوریور و مارینک صندوقی یوک و اغوننہ وال چانطہسی ایله ماتوسنی ده اوطورہجفی محلہ یراشدیر دکن صوکرہ آلا فراغہ - دها طوغریسی - آلا آنغلہ وداع وقوع بولیورکہ بودہ یالکز ال صیقمقدن عبارتدر . انکلیزلرک عادتہ کوزہ مواجہئہ ناسدہ او پوشمک کبارق علامندن دکدر . قطار قالمق اوزرہ اولدیغندن (ژورژ) کیری چکیلیور . ماری « کولہ ، کولہ قال عزیزم » ژورژ ده « کولہ ، کولہ کیت سوکیم » دیور . (ماری) عربہ نک پنچرہ سندن (ژورژ) دخی موقفک سدی اوزرندن ال ساللا یورلر ؛ عاقبت قطار کوزدن نہان اولیور . (ژورژ) قاریسنک بو اسکی دوستی قادینی و آنک

انكلترده اولديغي كېي بر از تبديل موقع وهوا ايلك و بر ازده اكلتمك اوزره
آره صره اوطورديغي شهر دن چوق اوزاق محلرده ساكن احباسنه كيدوبده
كونلرجه مسافرتده قامغه اولي بر مسلمان قادينك قطعياً اختيارى بولنه ماز .

شيمدى اسلامك مقتدرلى ديه بيلورلر كه حقوق نسوان نه قدر تأمين
ايدلمش اولورسه اولسون شريعت اسلاميه يه تابع اولان ملتلك قادينلرى ينه
بر نوع اسارت آلتنده يشايورلر وقوجه لر ينك تغلبنه بويون اكمكه مجبور قالورلر .
بو مقتدرلك ادعاسنجه غربيون آره سنده موقع نسوانه متعلق هر دورلو اركان
وعادات على الاعلا در . شبهه يوقدركه بو مقتدرلك ادعالى بر از سفسطه ليدر ؛
زيرا -- همان پك آزى مستثنا اولق اوزره -- غربك او اركان متمدنه سنك
نسوان اسلامك احوالنه تطبيق محالدر . حتى ديه بيلورلر كه تطبيقه اصلا
احتياج ده يوقدر . ادراك وتجربه يه مالك بر مسلمان قادينى غربك هيئت
اجتماعيه سنك احوالنه يقيندن كسب وقوف ايده بيلمش اولسه كال فخر ايله
اعلان اولنه كان او اركان وعاداتى اتخاذ رغبت ايتمز . استانبولده بر ويا
ايكى فرنك ديلي او كرئمكاه شيشكينلكرى قدر روز كلكرى دخی آرتان
بعض كنج قادينلر ك حيت مليه حسنى قاله آلميوبده راست كله بيلدكرى
فرنكلره موقع اجتماعيلرندن شكايت ايتدكرى ايشيد لمكده در . كنديلرينى
سائر مسلمان قادينلرندن ده ازياده مترقى وممتاز ظن ايلين بو صنف كنج
خانلرك تحسّر ايتدكرى عادات اجتماعية افرنجى كليشى كوزل بر صورتده
شرقيلرك احوالنه تطبيق ايدلم ده او زمان ميدانه نه نتيجه لر چقيورمش
كوره لم . بو بابده بر فكر استحصالى ايچون مسئله يي شويله ساده جه بر
مثال ايله ايضاح ايتمك ايسترز :

کندیسنه مفتون ایتمک آرزوسيله مراجعت ایلدیکی وسائط جلوه کارانه بر
قادینک تخیلات اختراعیه سنی آرتیر مشدر . دیگر طرفدن دخی آدابه مبین
بر طاقم حالاتی چو قفلرک رؤیت وتفهمندن صاقلامق وظیفه سی و ماه بماء
وجود انانده حصوله کن انحراف طبیعتک قیر غینقلرینی حسب التریبه عادی
وعمو می مزاجسرقلردن ایش کبی کوسترمک مجبوریتی اواعتیاد نسوانک
اسبابندندر . بناءً علی ذلک شهادت نسوانده کافی درجه ده خاصه افعاع
بولنه میه جخی حقنده قهای اسلامک من القديم التزام ایلدیکی رأیک اصابتی
بویله جه تدقیقات فنیّه جدیده ایله دخی ثابت اولور .



بر مسلمان قادینی تأهل ایلدیکی زمان کندیسنه ایکی قسم نقد نکاح
تأمین اولنیور : بونلردن تأدییه سی ابتدای امرده لازم کنه مهر معجل
دینیور . دیگر قسم ایسه قادینک استقبالی تأمینه مدار اولق اوزره وضع
اولنمشدرکه « مهر مؤجل » دینیلن بو دینک ایفاسی زوجک بویننده بوج
اوله رق قالور . ایمی دی بر قادینک خانه سندن آیریلوبده کونلرجه مسافرتیه
کیتمسی قرجه سنک رخصتیه وقوع بوله بیله جک حقوق زوجیتدن
اولدیغندن اگر زوج اداسی مقتضی اولان مهری ویرمه مک ایچون بهانه لر
بولق ایسترسه زوجیه بلا رخصت قالدوب کیده بیلور وایستدیکی قدر اقرباسی
اونده قاله بیلور ؛ تاکه زوج حتمسرلغنک نتیجه سنی آکلایه ده انصافه
کله . اما زوج تعهدینی صادقانه ایفا ایلرسه او حالدیه قاریسینی بر قاچ
کرنندن زیاده اقرباسی اونده وسنه ده بر کورندن زیاده احباسی نرزدنده
مسافر قالمقندن منعه صلاحیت کسب ایتمش اولور . فقط هر حالده مثلاً

اسلاميه نك قادينلردن مهم بر صلاحيتي نوعما دريغ ايتمسي يعني آنلرك دعاوى ده شهادتلىنك پك او قدر معتبر طوتلما سيدر . قاريلر هماي كبي يالكز نسوانك دخول ايده بيله جكي محللار مستثنا اولق اورزه بر ماده حقمنده ايكي قادين ، حتى تمامي موافقت ايله ، شهادت ايتمش اولسه لر معتبر طوتلماز ؛ مكر كه آنلرك شهادتلى بر ارلك طرفندن دخي اشهاد وتأييد اوله . بو حكم فقهي اسلامده قديمدن برى موجود در . جنسين نوع بشرك خواص روحيه سنى تتبع ايدن زمانز ارباب علمنك آثاريني اوقورسه ق بو حكم فقهنك اصابتى مصدق رايلى تصادف ايلرز . بو ذوات فاضله نك فكرنجي قادينلرك حادثات غير منتظره دن وهلة وافراط ايله متحسس اوليويوملى آنلرك اكثر خصوصاتده غلط ذهاب حاصل ايلملىنه سببدر . نسوانك امور واحوال حياتيه سى كندىلرينى رجال درجه سنده پيشكين ومحمتمل ايتمكه كافى دكلدر ؛ بو جهتله قادينار حادثاتك ذهنه ايصال ايلديكي اخطاردن ده قولايجي متأثر اولورلر . فى الواقع اركلرك همان كافه سى بعضاً ارتكاب كذب مائل بولنورلر ؛ هله بعض حريفلىر يوزلىر هيچ ده قيزارمقسزىن آتارلر يالانى يا ! بونكله برابر بر ماده نك حقيقتنى پرده خفا ايله اورتمك ميل قادينلرده عموميتله جارى بر عادت كيدر . عجا بو اعتياده دن نشئت ايدييور ؟ بو بابده بر جوق سببلر كوستريلىوركه بونلردن وارد خاطرمن اولان بر قاجنى بوراده ذكر ايده لم : اعصار غير متمدنه دن برى جنس قوي رجالك شدت آمرىتنه تابع اوله كلكارندن مدافعة نفس ايچون قادينلرده حقيقتى خياله تقليب ايتمك عادتي نشوونما بولمشدر . رجاله مفيد كورنمك ايچون ويا آنلى

معلومدر . بونکه برابر تاریخ حیات بشرجه تبین ایش مهم بر حال
واردر که اوده ازدواج مسئله سنده بعضاً مزاج بشرک معروض تحول
اولسیدر . کرامت نکاح ایله یکدیگرینه بند ایدلش اولان ایکی کشی
یک وجود ایش کبی بر رابطه تاهه ایله یشامق اقتضا ایدر ایسه ده هر
حالده قاری ایله قوجه نك کیسه لرینی آیری طوماری مصیدر . طبیعت
بشرده بعضاً عجیب بر ردائت ظهور ایدیویردیکنی پیش ملاحظه دن
آیرماملی ؛ زیرا زوجین یکدیگری حقنده ماده فداکارلغی صوک درجه یه
واردیردقدن صوکره عدم امتزاج علامت الیه سی سرزده ظهور اولورسه
بر برینی اوپه جک یرده احتمالکه خشونت غضب ایله بر برینه دیش
قیجیرداتمه باشلارلر . العیاذ بالله ، بو حال ایله محکمه طلاقه کیملری احتمالی ده
موجود در . میلادک در دنجی عصری اغرّه نصارا سندن بری متأهل
قادینلره خطابله « سن نه سویلورسک ، ای قادین ؟ تزوجکدن صوکره
آرتق سنک نفسکک سکا عائد اولدینگی در کار ایکن کندیکه مخصوص
ما ملکک ، تقودکی اوله بیلور ظن ایدیورسک ؟ » دیور . (۱) بو
صدای نصیح اوصاف خرسنانه بی نشر وترویحله مشغول اولانلرک سمعنه
پک مؤثر بر علویتله عکس ایده بیلور ؛ فقط آندن آله جق درس اخلاق
حیات بشرک صورت کذارانی بیلنلرجه بر قیمت عملیه دن عاریدر .
بوراده اعترافنه لزوم کوردیکمز بر مسئله واردرکه اوده شریعت

(۱) بو عزیز نصرانی قسطنطنیه ايسقویوسی (سن قریسوستوم) در که
بالاده کی سوزی (سن پول) ک قصص انجیلیه سی اوزرینه یازدینگی اوننجی
موعظه دن مأخوذ در .

اولان ابنای بشره دخی تشمیلی ایچون بو کبی تدابیر تسهیلیه یه لزوم واردر !
 مع ما فیه بزم بو بابده کی ملاحظه مزك شكلی بوسوتون بشقه در وا کر
 فکر مزك او رقت قلب صاحبه سی اولان قادینه بر تأثیری اوله بیله جکندن
 امین بولنسه ایدك موازنه منطقیه سنی او حس شفقت ورقته فدا ایلمه مسنی
 توصیه ایدردك . بوندن صرف نظر حالنه آجیدینی او مسلمان قادینك
 او یولده کی تشبثات خیریه نصرانیه یه عرض احتیاج ایدوب ایتیه جکنی
 بر کره تحقیق ایلمسی لزومنی دخی اخطار ده بولنوردق . او یله بر ذهابده
 بولنان فرنك قادینی قالقوبده ممالك اسلامییه یی باشند باشه طولاشمش اولسه
 عجبا نه کبی احواله واقف اولوردی ؟ شبهه سز قوجه لرینك تعدیات
 ظالمانه لرندن صوك درجه ده مضطرب اولمش قادینلره تصادف ایلردی .
 بونکله برابر قاریلرینك عارسز لغنندن ، خویر سز لغنندن الامان چکن
 ارککلرک مقداری ده تقریباً او نسبتده بولندینی کورردی . بو مثالو
 حالات ایسه مستثنا قیلندن اولدقدن بشقه ممالك غریبه ده دخی موجوددر .



بالاده حقوق نسوانه ایما ایلدیکمز صره ده اسلام قادینلرینك ملک
 ذاتیلرینی قوجه لرینك مداخله سندن مستقل اوله رق تصرفه صالح
 بولندقلرینی ده قید ایلمش ایدك . طبیعی قاری وقوجه دن هر برینك دیکری
 اوغورنده هر دورلو فداکارانی اجرا ایتمی پک مناسب و پک لازمدر .
 زوجینك احدهما آخر حقنده علو جناب ایله معامله ایلمسی حیاتک کوکل
 خوشلغی ایله کچمسته مدار اولان حالات مهمه دندرکه حسیاته متعلق
 اولان بو مسئله اهل اسلامک صاحب ادراک اولانلرنجه اوته دن بری

على العموم حقوق نسوانه متعلق وقوع بولش اولان اصلاحات ممالك غير نصرانيه قادينلري ايچون موجب غبطه اوله جق درجه ده ميدر ؟ بز بو سؤالزى شريعت اسلاميه نك حكى آلتنده بولنان نسوانك احوالنده آجينه جق پك چوق مثلئر بولغه چالیشان مدنيت خرستيانيه مروجلرندن بكارلز ؛ بو سؤاله « اوت ، موجب غبطه اوله جق درجه در » ديرلر ايسه او آدمئر خلاف حقيقت بر حالى قصداً التزامه جرأت ايديورلر ؛ بناءً عليه عارسزجه سنه بر ادعايه تصدى ايلورلر ديمكدر . ملل غريبه قادينلرينك امتيازات حقوقيه سنى تدقيق ايله بر فيكر حاصل ايتمك تحرى كته او قدر محتاج دكلدر ؛ يالكلز آوروپا نك بلاد مختلفه سنده وقتاً من الاوقات عقد انجمن ايدن قادينلر قونغره سنك غزته لرده نشر اولنان مذاكراته عطف اعتنا ايله كافيدير . آندن آكلاشيله بيلوركه آوروپا مدنيتنك محسنات اجتماعيه سنه مفتون قالانلرك ادعائى خلافه اوله رق نسوان ايچون ده بر عدل كامل دورى آچيلماشدر .

تحف شى ! اسلاميتك « نفوذ تدليله » سى آلتنده قادينلر اركلركلر او تحملفرسا اولان رقيتلىنى قبوله مجبور ايشلر ! نه عجيب بر فكر سخيف ! بو فكره اعتماد ايدن يوركى تميز ومرحمتلى بر فرنك قادينى — هم جنسندن بولنوبده شرع اسلامه تابع قالان — ميلئونلرجه نسوانك امر آزاديسى تسهيل مقصديله خرستيان ميلئونه رلرينك كيسه لرينى آچوب بوتون آلتونلرينى ميسيونره ر جمعيتلرينك — او طولق بيلمز — صندوقلرينه دوكدكلرينه تأسف ايتسه كركدر . معلوم يا ، بو مدنى خرستيانلره منحصر اولان حسيات انسانيتكارانه وهوس مردانه نك تحت تحكم اسلامده قالمش

حيث اجتماعيه سی ما دون اولان ويا خدمات رقيت ايله محکوم
بولنان قاريلىك املاکه صاحبيتي پکده فرض ايديله مز ؛ حال بوکه ذلت
ورقيت حالنده بر اقلد قلى معارضين نصارا طرفندن ادعا اولنان نسوان
مسلمه بر حق تملکي حائز در . قادينلر تملک ايتدکلى اشيا واملاکی -
اکر آرزو ايدر لر سه ويا مناسب کورر لر سه - قوجه لر ينک مداخله سندن
تاميله مستقل بر صورتده اداره يه صالحدر لر . نسوان اسلامک استقلال
تملکی - اويله نيچه معارضاتدن صوکره بر پارلمتونک تنسينه بناء نسوان
غريه دن بعضيلرينه ويريلن امتيازات حقوقيه کبی - وقايع زمانيه دن دکدر ؛
بالعکس بوندن بيک اوچ يوز بو قدر سنه اول ظهور ايدن بر واضع
شريعتک احکام عادلّه سيله تأمین اولمش بر حقدر . بو قولرى تأييد ايچون
منتدين افرنجه قارشى کتب فقهيه مواديله استشاده قالقيشقم نه ممکندر نه ده
مفيد ؛ يالکيز آلره کندی اسانلرينه مترجم بر قرآن کریم نسخه سنی آچوبده
دردنجی سوره سنک حقوق نسايه متعلق اولان اياتنک ارايه سی اثبات
مدعا يه کافی درظن ايدّه رز . هر دورلو اصول واحکامنک مکمليتی اهل
شرقک ديکليه ، ديکليه آرتق اوصانديغی او متمدن آوروپا ده حقوق
نسوان آنحق بوندن يارم عصرلق بر مدت اول تلقی عادلانه يه مظهر اولغه
باشلدى . محرر مشهور انکلتريه لی (جون ايستوارت ميل) ک
Subjection of Women يعنی نسوانک رقيتي عنوانيله يازمش اولديغی بر
کتابدن حتی اون طموزنجی قرن ميلادیده ييله انگليز قادينلرينک موقعی
نه درکه ده بولنديغی پک ای آکلاشيلور . شيمدی بز بوراده بر سؤال
ايراد ايدّه لم : بو صوک زمانلرده غربک مترقی صايبان ملکتلرنده

ادعادن واز کچمیلدرلر ؛ زیرا او یولده کی افتخارلری ساخته کارلقدن عبارت قالور . فی الحقیقه اسلامیت قادیلرک قوجه لرینه اطاعت ایتملرینی آمردر ؛ فقط بوندن بر حاکم مطلقه قارشى بر عبودیت قیاسی چیقاریلهماز . « قادیلرک ، الله اولدیغی قدر ، زوجه لرینه دخی پرستش » ایتملرینی امر ایلین قرآن دکل آنحق انجیلدر (۱) ینه انجیلک بر آیتنده بو عبودیتک بلا قیود اوله جفی ذکر اولنیور حتی بوندن طولایی اولق کرکدرکه « زوجهلر هر خصوصده زوجلرینه تابعدرلر » دینیلور (۲) انجیلک بشقه بر باینده دخی ارکک درجه علوتینی ارائه ضمنده « اللهک مدار افتخاری » دیه توصیف اولنیور (۳)

نسوانک تابعیت عیدانه سنی تعیین ایدن او آیات انجیلیه « توصیه محبت » اولق اوزره تفسیر — دها طوغریسی — تأویل ایدلمشدر ؛ پک عجیب بر تأویل دکلی ؛ طبیعت بشریه هر یرده عین صورتده تجلی ایتمسه کرکدرکه بر خرستیان قادینی صرف نصیحت و توصیه اوزرینه قوجه سنی سوه بیلور اوللی وبو نصیحت خرستیانه ده مطلقا بر الهام قدسی اثری بولملی ! بزم بیلدیکمزه کوره بر قاری بر ارککدن تنفر ویا تباعد ایدرسه نه نصایح صمیمه نه ده نیاز نازکه آنک اعاده محبتنه خادم اوله ماز .

(۱) عهد جدیدک Ephesians بابی . بشنجی فصل . یکریمی ایکنجی آیت .

(۲) » » » یکریمی دردنچی آیت .

(۳) انجیلک Corinthians بابی . اون برنجی فصل . یدنجی

وطقوزنجی آیتلر .

کبی ذکورک بو فضل تفوق نسوان ایچون بر جزای آلهی صورتندہ (۱)
 تلقی اولنامشدہ . بالادہ کی روایتی اختراع ایدنلرہ ساختہ کار اطلاق ایلمسندن
 طولای وولترک خشونت طبعنہ حکم ایتمک بحق اولہماز . حضرت محمد کبی
 عادل اولان بر واضع شریعتی حقوق وحیثیت نسوانہ عدم رعایتلہ اہتمام
 ایلک البتہ بویوک بر یالانچیلقدہر . قادینلرہ قارشى تعدیاتندہ بولمق جناب
 خالقک پک چوق محاسنہ واسطہ اولمق اوزرہ یراندیغی بر شیئہ عداوت
 ایتمک قدر فنا بر حالدر ؛ نتہ کیم قرآن کریمدہ (فاعرضوا عنہما ان اللہ کان
 تواباً رحیماً) بویورلمشدہ (۲) والہلر حقندہ کی احکام قرآنہ دخی او یولده کی
 اوامر عادلہ دندر . (۳) زوجہلر حقندہ اجراسی ذکورک عہدہ سنہ مفوض
 اولان وظائف دخی پک عادلانہ تعیین اولمش وتہ کیم بر آیت کریمہ دہ
 (ان خلق لکم من انفسکم ازواجاً لتسکنوا الیہا وجعل بینکم مودۃً ورحمۃً)
 بویورلمشدہ (۴)

ایشته بونلر موقع نسوان مناسبتیلہ ذکرینہ کیریشدیکمز بحث
 حقندہ احکام اسلامیہ نک یالکز بر قاچ مثالیدر . فکر بشرہ بوندن دہا
 عالی بر حس انسانیت وعدالت بخش ایدہ جک احکامی انجیلاردہ بولمق
 ممکنیدر ؟ ممکن ایسہ کوسترلسون . اگر کوسترہ منزلر ایسہ خرسٹیانلغک
 موقع نسوانی عدل ایلہ تعیین ایتمکدہ شرایع سائرہ یہ متوقف اولدیغی

(۱) عہد عتیقک ایلک فصلندہ حضرت حوا حقندہ کی غضبہ ایمادر .

(۲) سورة النسانک یکر می اوچنچی آیتنہ باقیلہ .

(۳) سورة النسانک یا ایہا الناس اتقوا . . . دیہ باشلایان آیتنہ باقیلہ .

(۴) سورة الرومک یکر منچی آیتنہ باقیلہ .

مخصوصدر . « (۱) ايمدی بر واعظ انجیل قالقارده خرستيان قادينلرينه شرع اسلامجه موقع نسوانك نصل تذليل ايدليکني روايته باشلارسه آنک حکاياه سنی قادينلر بلا محاکمه تلقی ايدرلر . بو کیفیت بزه فيلسوف وولترک بر سوزینی خاطرلنديريور . وولتر بر مقاله سنده « بز قرآنه پک چوق مناسبستز شيلر اسناد ايده رز ؛ فقط قرآن بولردن هيچ بريني حاوی دکلدرد . مسلمان بولملری سبيله بالخاصه ترکر عليهنده پاپاسلرمز طرفندن پک چوق کتابلر يازلدي . عددلری يکچريلردن ده زياده اولان بو کلیسا مؤلفلری قادينلرمزى کندی فکرلرينه طرفدار ياقمده مشکلات چکديلر . پيغمبر مسامینک طائفه نسایي پک آز عقله مالک صرف بر نوع حيوان عد ايتديکی وشریعت اسلامیه نک قادينلره اسیر معامله سی ترتیب ایلديکی و بناء عليه مسلمان نسوانك بو دنیا ده ماللری بولنه میه جعی کبی اوتیه کی دنیا ده دخی صفای جنته اشتراکدن محروم قاله جقلری یونده کی اقناعلرنده بو پاپاسلر مظهر موفقیت اولديلر . روايت اولنان بو مقوله شيلرک هب ساخته بولنديغی ظاهر ايکن ينه هيسنه اعتماد اولندی « ديمشیدی (۲)



قوة فاطره نک جنس ذکوره بر موهبه سی اولان صفات تفوقک شرع اسلامجه مصدق اولديغی انکار ايمه ملیدر ؛ مع ما فيه انجیلده اولديغی

(۱) La Femme Criminelle نام اثرينک آلتنجی

فصلنه مراجعت اولنه

(۲) وولترک Dictionaire Philosophique عنوانی قاموسنک (القرآن)

کلمه سنه باقیله

روح بولنديغنه و بناءً عليه قادينلر ايچون آخرت احتمالي موجود اولمديغنه اينانديقلريني يازيبور . فكرجه افرنجك اسلاميته عزو ايتديكي بالاده مذكور ذهاب باطل اساساً بو كې طوائف ضاله دن طولاي اذهان افرنجه يرلشمش اولسه كركدور .

هرنه ايسه . بز بوراده معارضين افرنجك نظر دقتنه شو مهم نقطه لري عرض ايتك ايتترزكه اهل اسلامك ار ككلري « روحسز درلر » كې بر بهانه ايله قادينلريني صفاي جتدن محروم ايتك ايسمزلر ؛ چرنكه او محل صفاي كندى نفسلرينه حصر ايده جك درجه ده خودكام دكلدرلر وقادينلر اولقسز ين جتك بيله طادى چيتميه جغه قائلدرلر . اوت ، اوت ، قادينلر ده روح وار ؛ هم ده بعضيلرنده پك نجيب روح بولنديغى دائماً آتاري كوريلن حقايقندور . شو قدركه بعض نسوانده رحم و شفقت و واسطه اولان كوكلدن اثر اولنديغى بونجه عشاق جهانك فرياد اشتكاليه ثابتدر ؛ ايشته بويله قلب رحيمدن محروم اولان قادينلره قارشى باب جنت مسدود قالسه سزادر .

اسلاميتده اويله باطل بر حكم بولنديغى ايشيدن فرنكلر البته اكا اينانورلر . اعتقاد متعلق بو كې روايات اكثريتله اهل كليسا طرفندن تلقين اولنور . آراي رهبانك جنس نسوان اوزرنده كي تاثيرى ايسه قديمدن برى معلوم بر كيفيتدر . حتى بوندن طولاييدر كه علم روح مدققلرندن بر ذات شو مطالعه ده بولنش ايدى : « اعتقاد مذهبي تلقيندن متحصل اولور ؛ قادينلر ايسه تلقين مذهبي يي استحصاله ار ككلر دن زياده متايل بولنورلر ذاتاً فكر اعتقاد قادينلره ار ككلردن ترشح ايدر ؛ صفت رهبانيت ايسه ار ككلره

بیان تأسف ایتش . بو رهبان حقیقتکویانندن بریسی ده مقابله یه جرأتله
 « یاسز هجنسکردن بولان بونجه قادینلرک آخرته روحسز کیتلرینی روا
 کوررمیسکز ؟ » دیه لطیفه ده بولمش !

معلوم یا ، پک چوق فرنگار مسلمانلغک آخرتده قادینلر ایچون
 روح بولمیه جنی حکمی وضع ایلدیکنه ذاهیدرلر . شبهه سز باطل بر ذهاب ؛
 فقط اختراعی پک قدیم اولان بو مقوله روایات سخیفه یی افکار افرنجدن
 چیقارمق پک مشکدر . قرآن کریمی انکلیزجه یه ترجمه ایتش اولان
 (جورج سه یل) نام ذات قادینلرک روحدن محروم بر اقلملری کبی بیاغی بر
 اعتقادی اسلامه اسناد ایلین آو روپا مؤلفلرینی ترجمه سنک دین اسلامه دائر
 اولان مدخلنده (۱) ساخته کارقله اتهام ایلیورکه اتهامنده تمامیه حقلیدر .
 اساطیر باطله علی العموم وهله تخیل اولمش شیلر دکدر ؛ بعضلری ده حادثات
 سائر نک اذهانه نقل و نقش ایتدیکی بر فکر و یا حسک نتایجندن اوله رق
 طولانیسیله و شکلاً متغیر بر حالده وجود بولور . تنه کیم ممالک عثمانیه ده
 و علی الخصوص وطن عثمانینک سوریه و عراق آره سنده کی حوالیسندده بعض
 طوائف صغیره ساکندرکه ظاهراً اهل اسلامدن کچندکلی حالده حقیقتیده
 نیچه افکار باطله یه اعتقاد ایدرلر . بو افکار باطله ایسه یا ازمه جاهلیه دن
 توارث ایدوب کلش و یا بر پیر سحر بازک خیالخانه سنده اختراع ایدلمشدر .
 ایشته سوریه قطعه سنده ساکن نصیری لر او مثلاًو طوائفنددرلر . جودت پاشا
 مرحوم نصیری لر حقنده تفصیلات ویردیکی صره ده (۲) بونلرک نسوانده

(۱) بو مدخلک سکساننجی صحیفه سنه باقیله .

(۲) تاریخ جودت . برنجی جلد . ۲۶۵ نجی صحیفه .

یدنجی فصل

اسلامبندہ موقع نسوانہ

چند سنہ مقدم سودان مصری ده قیصہ جہ بر سیاحت اجرا ایتش
ایدم . خرطوم شہرندن قطارہ بینوب وادی حلفایہ متوجہاً عودت ایدرکن
دمیر یولی کنارندہ بر عربک ، دوه سنی بر از ایلری ده کی چالیقده براقوب ،
ادای صلاۃ ایتدیکنی کوردم . قطارک طعام عربہ سندہ بولنان یولجیلردن بر
انکلیز قادینی بکا دونوب « آمان شو حریفہ باقیکنز » دیدی . عربک روحی
او قدر مستغرق طاعات بولنش اولمیدی کہ نہ قطارک صوت سپرندن نہ ده
قطارده بولنان یولجیلرک عطف نکاھندن متأثر کورغیوردی . بویله دغدغہ
عالمدن علاقہ سی کسیلمش کبی عربک رکوع وسجود ایله مشغول اولسی
کندیسنہ تحف کورونوب کورغیدیکنی بو انکلیز قادیندن صوردم . « خیر ،
بالعکس تحسین ایدرم . بو حالی هندستانده ده کوردم . بز اولسہ ق بویله
آچقده اجرای رکوع عبادت ایتمکله عالمہ کولنج اولورز ذھاییلہ حذر ایدہرز ؛
حال بوکہ مسلمانر وقت عبادت کلنجه پاک بولدقلری یرلرده حضور قبلہ وظیفہ
طاعاتی اجرا ایدیورلر » یوللو جواب ویرمیشیدی . بو قادینک مسلمانر حقندہ
اولقجہ حسن ظنی وار ایدی ؛ حتی خرطومده ایکن فرنک میسیونہرلرینہ
سودان خلقتک دینی تغییر ایدہ جک افعال ایله مشغول اولملرندن طولانی

ماهیت اسلامه کسب وقوف ایدنبجه احکام اسلامیه بی قبوله میلان حس
ایدیورلر . اسلامیتی بیغرضانه تدقیقه کیریشنلر آنده فکر بشرک تمایل
ایده جکی پک چوق فضائله مصادف اولورلر .

اسلامک ممالک غریبه ده کی منقدرلی اسکی زمانده اهتدا ایتش
اولان آوروپالی ذواتک مقصدلرینی جلب منفعتدن عبارت بولدقلری کبی
زمانزده مسلمان اولان آوروپالیلری ده خفت عقل ایله اتهام ایلورلر . بو
منقدرلر ایله او مهتدیلرک احوالی یقیندن تتبع ایده بیلنلر ایکنجیلری برنجیلردن
دها زیاده سلامت عقله مالک بولسه لر کرکدر . اکر هیئت اجتماعیه جه
منفور وعائله منسوبه لری طرفندن مردود اولق قورقوسی بولنماش اولسه
قادین وارکک بعض انکلیزلرک علناً اسلامی قبول ایتلری محققدر .
زمانزده کلیساکلرک آفاروزینه او قدر اهمیت ویرلمیه ییلور ؛ لکن هیئت
اجتماعیه نک آفاروزی پک مؤثر در . دینسز اول ویا بودا مذهبنی قبول
ایله ؛ لکن زههار مسلمان اوله ؛ زیرا بو متمدن خلقلک تا اهل صلیب
ادوار متعصبه سندن بری توارث ایده کلدیکی عداوت اسلامیه نک تأثیری
پک یماندر !



بر مسلمان واعظانك نسخه سندن شفا امید ایدر ؛ امید اعتقاد ایسه چوق
کره تقویه اعصابی و بناء علیه شفای بدنی یی موجب اولور .

☆
☆ ☆

نشر دیاتنده کی رقابت اسلامیه متعلق دیگر بر مسئله دها
وار در : خرستیان میسیو نه لرلینک افراد مسلمه یه تبدیل مذهب ایتدیرمک
ایچون وقوع بولان غیرتلی همان ثمره سز کی قالب کیتمکده در . حال
بوکه آوروپا لیلرک افکار منوره صاحبی اولانلری آره سنده بیله وقت
بوقت قبول اسلام ایدنلر کوریلور . اعصار سالفه ده شرقه کیدوبده
توطن ایدن فرنکلرک اکثریسی مسلمان اولورلردی که تاریخ عثمانی
صحیفه لری بو مقوله مهتدیلردن مراتب عالیه احراز ایتش اولانلرک اسملریله
مملودر . ایدی آوروپا محررلری بونلری آنجق جاب منفعت ضمننده
تبدیل دیانت ایتش اولقله اتهام ایدرلر . حال بوکه زمانزده شرق احوالی
بوسبوتون بشقه اشدیغندن بر فرنک شرقه کیدنجه اساساً منسوب اولدیغی
مذهب ودولته تابع قالقله دها زیاده تأمین منفعته مقتدر در . بونکاه برابر
هیچ بر سنه کچمبورکه بعض آوروپا لیلر قبول اسلام ایله مباهی اولق
ایستسونلر . شرقه کیتیلر آره سنده دخی مسلمان اولانلر اکسیک دکل .
بو مثالو فرنک مهتدیلری ایسه آز چوق موقع اجتماعی وثروت شخصی صاحبی
اولدقلرندن آنلرک کسب مادی غرضیله اهتدالری فرض اولنه ماز ؛ بو جهته
بشقه اسباب اهتدا تحریسی لازمدر . شویله که : اسلامیتی افراط ایله
تخطئه و ذم ایلمک اعتیادی بعض حقایقجو اولان کیمسه لری شبهه یه
دوشوریور ؛ بناء علیه بعض کیمسه لر حقیقی منابع اصلیه دن بالتمجری

بررسی ایش کبی امرار حیات ایلر ؛ مثلاً کندیسی عرب ویا ترک ایسه — غریلرک کندی مزایای قومیه لریله مفتخر اولدقلری قدر — آنک ده منسوب اولدیغی قومک ماضی ده کی آثار عظمت وفضیلتی ایله افتخاره حق واردر . بونکله برابر — زمانزده آوروپا متحکملرینک مقصد سیاسی ایله استعمال ایتدکاری معنا وجهله — علویت وسفلیت قومیه نظریه سنه اهمیت ویرمزر .

حال بوکه خرستیان میسیو نه رلری نشر مذهب مقصدیله آسیا ویا افریقانک بر جهتنه کیمک ایستدکاری زمان آنحق بر مدت محدوده ایچون حرکت ایدر لر . اصلاح حالنی درعهده ایلدکاری او جهتلر خلقتی « یرلی » دیه خوار کوره رک آنلرله مساوات کامله ارکانسه توفیقاً اختلاط ایده مزلر . یرلیرک اصلاح حالی صددنده خدمات انسانیتکارانه ابرازی آرزوسنده اولدقلرینی ادعا ایلدکاری حالده — منسوب اولدقلری دول غریه نك تحکم غاصبانه لری کوز اوکنده بولندیغندن — کوستره بیله جککاری همات خیرییه وانسانیتکارانه او خلق طرفندن دائماً اشتباه ایله تلقی اولنور و او مولدیغی قدر مقبوله ده کچمز . بالعکس ابراز ایده بیله جککاری لطفکاراقده حسیات اخوت آثاری دکل بلکه بر ادای تعظم مشاهد اولور . عزت نفس ایسه رنگ اییضدن اولان غرب نصاراسنه منحصر بر موهبه سبحانیه اولیوب اقوام سائره نك دخی آندن نصیبی بولنه جغندن « یرلیر » کندیلرینه مساوی نظریله باقغه تنزل ایتمیلرک او لطفکارقلرینه ، او حمایتکارانه معامله لرینه پکده کوکل ویرمزر ؛ مثلاً بریرلی خسته اولمش اولسه طبابتدن آکلایان بر غرب میسیونه رینک علاجندن زیاده

تعظلمرينك وسوء ظن الواندن متولد بو مقوله مساواتسز لفرلک تأثيرى اوله ماز .
 اهل اسلامجه جلد ابنای بشرده کی رنکارک تخلفری آنلرک جنسلرنده کی
 علویت وسفلیتی اراءه ایچون قوه فاطره نک خاصه تصنیع ایلدیکی بر علامت
 فارقه عد اولماز . جنس اصفر دن اولان بر چینلی ، اسمر لونلی اولان بر
 هندلی ویا مصرلی ، جنس اییضدن بولان بر عثمانلی — مسلمان صفتیه —
 یکدیگری حقنده مساوات اخوتکارانه ایله معامله ایدرلر .

بنم عثمانیلری جنس اییضدن اوله رق بیان ایتمکلم غریبونک
 اکثرینجه وعلی الخصوص انکلیرلر دن ترکیایی آفریقای وسطا ده کائن
 ظن ایدن اشخاصجه تعجیله تلقی ایداسه کرکدر ؛ زیرا بولرک ذهاب باطنجه
 ترکار اسمر لونلی عجایب صورتلی مخلوقاتدن ایمشلر !

نفرت لونک انتشار مذهب حقنده کی تأثیرندن بحث ایتمکلمز
 مناسبیه بعض خریستانلر قالدوبده بزه جواباً « بوکی منافرت اساساً احکام
 نصرانیه مخالفدر وخرستیان کلیسائی میسیونه رلری شفقت دیندارانه یه
 مخالف اولان بو مقوله سوء ظنلرله خط حرکتلرینه خلل کتورمز » دیه
 بیلورلر . فقط هر حالده مذهب نصرانیتک لون اییضه مالک پاپاسلرینک
 منسوب اولدقلری قوملر ایچون عادتاً طبیعت ثانیه حکمه کیرمش اولان
 او سوء ظنلردن آزاده اوله بیله جکری داعی اشتباه بر مسئله در . بر مسلمان
 ناشر دینی بر قوم محسوس آره سنه کیدوبده افرادینی دینه دعوت ایلدیکی
 زمان او قومک رنگ بدنسنک صاری ویا سیاه اولدیغنی نظر دفته آلماز .
 آنلر آره سنده ساکن اولدیغی زمان آنلرله دوشر قالقار ، بر لکده یر ایچر
 وحقی آنلردن بریسیله عقد صهریت دخی ایلیه بیلور . والحاصل آنلردن

قادین ایله ازدواج صلاحیتنه ده مالک اولور » (۱)



اکثر یسینک رنکی بیاض اولان آوروپای نصرانی خلقنک جنس
 اصفر واسود دن بولنان ابنای بشره قارشی حس ایتدکاری شدت نفرتک
 مثله اهل اسلام آره سنده تصادف اولماز . بناءً علیه اسلامیتک رنک بنی
 بشرک تخلفنه اهمیت ویرمه می دخی آنک ترویج انتشارینه سبب اولان
 حالاتندر . دنیانک هر طرفنه میسیونره ر صالدرمقده اقوام نصرانیه نک
 هپسندن ایلری کیدن آنغلو — ساقسون طائفه لری تلرینک بیاضلیغی ایله
 مفتخر کوروندکن بشقه برده اسمر ودونوق رنکده دریلری اولان اقوام بشر
 حقنده بر استکراه نا روا علائی کوستریورلر ؛ کذاک هیچ بر آفریقالی
 وحی هیچ بر آسیالی نی کندیلرینه مساوی عدایمک ایستیمورلر . بیاض تلی بر
 آوروپای غربی خرستیانی شفقت حمایتکارانه سنی فی الواقع بعضاً الوان
 اخرادن اولان اقوام بشر افرادی حقنده ابرازه عنایت بویورر ؛ چونکه
 بویله بر متمدن ذات آنلرک بولندقلری درکه سفلیتدن تخایصلری وظیفه سنی
 کندیزی ایچون بر ودیعہ صمدانیه عدا ایلک خلیاسنه دوشمشدر ! مع
 مافیه آنلره حقیق وصیمی صورتده بر مساوات اخوت تأسیسنه تنزلدن ده
 هر حالده امتناع ایلر ؛ چونکه بویله برشی آنک نه جوهر طبعنه نه ده
 نشر مدنیت صددنده اتخاذ ایلدیکی مسلك سیاسی یه موافق دوشر .

لوی محمدی آلتنده بولنان اقوامک مناسباتنی تعیینده بوکی جنسیت

(۱) Meredith Townsend نام محررک « Asia and Europe »

عنوانلی کتابندن . صحیفه ۵۵

مكلف بولنور « دیور . (۱) بر انکلیز مستشرق ده بو تساوی مسامینی بر تشبیه ایله آکلاتق ایچرن « بوتون اهل اسلام حقیقتده بر طریقت خلقی کیدر ؛ بوکا داخل اولان بر کیسه اوته کیلرک هپسنه مساوی صایلور « دیور . (۲) بو حالک هندستانده کی تأثیرندن بحث ایلدیکی صره ده بر انکلیز محرری شو مطالعاتده بولنور « نشر دین ایتک ایستین مسلمانلر بر هندویه کیدو بده صنف اجتماعینی ویا طبقه منسوبه اصلیه سنی بر اقسنی طلب ایتمزل ؛ یالکیز منسوب اولدیغی طبقه اصلیه یی — الک واسع واعضاسنی بر برینه مزجه الک مساعد واک مفتخر اولان — کندی طبقه لريله یعنی اسلامیتله دیشمسنی ایستزلر . ایشه او هندو بو طبقه عظیمه یه داخل اولنجه اورایه منسوب اولانلرک کافه سی آتی اخواندن عد ایدرلر وکندیسنه آرتق اولیه بر درجه مساوات ایله معامله اولنورکه بوکا نسبتله آوروپا لیلرک مساوات حقنده کی نظریه لری کآن لم یکن حکنده قالور . مثلاً اسرای زنجیه نک وقایه وآزادیسى حقنده فدای حیاتی کوزه آلدیرمش اولان (جون براون) نام انسانیتپرور صوک درجه ده مرحمت کوستردیکی بر زنجی یه کندی قیزی تزیوج ایله اتلاف پیننده مخیر قلمش اولسه اتلافی ترجیح ایدردی ؛ حال بوکه مسلمانلغه داخل اولان هر بر کیسه دینداشی اولان خلقدن بر

(۱) Theodor Nöldeke نک انکلیزجه یه مترجم :

« Skatches from Eastern History » نام کتابندن صحیفه ۱۳

(۲) Stanley Lane-Poole ک « اسلام » عنوانلی رساله سندن .

او تقدیرده مشکوک ظهور ایتک وحقی عملیات قطعیه اتاج مخاطره ایلمک
احتمالدن بعید دکادر . بر حدیث شریفده علم ابدانک علم ادیانہ تقدیم
اولنه جفی مصر حدر . هر نه سبدن اولورسه اولسون انسانک مبتلا
اوله بیلجهکی عوارض جسمانیہ آنک وظائف معنویہ ومادیہ سنک ایفاسنه
انکل اولور ؛ بناءً علی ذلک صباوت وشباب چاغلرینی کچورمش اولان
بر کیمسه اهتدا ایتک ایسترسه هیچ بر مانعه تکلف ومراسمه ، هیچ بر
محدوره تصادف ایلهز .



مساوات عامه یه اک مساعد بر قانون اجتماعی بولمسنندن طولانی دخی
شریعت اسلامیہ کندیسنه پک چوق مهتدیلر جذب ایدر . بو مساوات عامه یه
آوروپا لسانلرنده بر معنای سیاسی ایله مستعمل « ده موقراسی » لفظنک
اطلاق افرا دینی جامع بر تعریف اوله ماز ؛ چرنکه آوروپا خالقنک امرای
جابره ویا صنوف متغلبه نک ید تحکمندن یا سلاح قوتیه ویا مجادلات مدیده
سیاسیه نتیجه سی اوله رق آلدقلری بر حق ملی یه بکرزه من . بو ، شرع محمدینک
بر عطیه شامله سیدرکه اسلامه ایمان ایدنلرک کافه سی طبیعت حال اقتضاسندن
اوله رق آندن استفاده ایدرلر . مشهور بر آلمان مستشرق بر مسلمانک
دیگرینه قارشلی اولان مناسباتنی تعیین ایدن بو حقی تعریف صد دنده « فانی
اولان افراد بشرک کافه سی حضور خالق متعالده مساوات کامله اوزره تلقی
اولور ؛ بوجهله اسلامه داخل اولان افرادک هر بری اساساً — اک
بویوکدن اک کوچوکه قدر — عین حقه مظهر اولور وعین وظیفه ایله

بوراده معارضه طرفندن بزه بر سؤال وارد اوله بيلور : « هر نه قدر قادين ايچون مسلمان اولمقده مشكلات بولمسه بيله اركك اهتداسي ايچون بر وجع جسماني ايقاعنه ضرورت يوقى ؟ » دينيله بيلور . بوكا قارشى ويريله جك جواب پك بسيطدر . بر عضو بدنه تعلق ايدن بو كيفيتك اجراسي حقهده كي حكم مذهبي او قدر قطعي دكلدر . بني اسرائيلك طوائف مختلفه سي آره سنده عموميتله مرعي اولان قطع حشفه امرى اسلامه ده توارث ايتش بر عادتدر ؛ يوقسه اوامر قرآنيه ايله تاكيد وفرض قيلنامشدر . بو عادت قطعك صحت بشرجه مجرب اولان محسنات طاهره ومفيده سنه بناء عموميتله اتخاذي ايچون تصويب نبوى وقوع بولمشدر . بناء عليه بوسنتك تأسسنده كي حكمت اصليه بر وظيفه معنويه اولوب بر طاعت دكلدر . تدقيقاتزه كوره بو قطع حشفه كيفيتي يهوديلرك مذهبجه دخى بز امر تقديس صاييلماز وخرستيانلرك وافتيزينه قياس اولتماز ايتش (١)

سنتك جسم بشر اوزرينه اولان تاثير مفيد صحتسني آكلادقلىرندن طولاي آوروپانك بعض يرلرنده وعلى الخصوص انكلتره ده چوجقلىر اوزرنده عمليات ختايه نك اجراسي اطبا طرفندن توصيه اولنيور . نزد مسلمينده سنتك چوجقلىر حقهده اجراسي ايچون اهتام تام وقوع بولور ايسه ده دور شباتي آشيرمش اولان بر كيمسه مسلمان اولور سه اجراي سندن بعضاً حسب الضروره صرف نظر ايديلور ؛ زيرا صحتك مقصد اصليسي

(١) بو روايت Gewish Encyclopaedia عنوانلى قاموس يهوددن.

سرکش دیگر خرسیانلر طرفندن آتشده یاقیمسی محقق ایدی . هر نه حال ایسه مادام که میدان اهداده مختلف میسیونر هیئتلی طرفندن کوستریلن مساعیده بر هم آهنکی یوقدر او حالده بر دین جدید قبول ایتمک ایستین بتپرستک طرق نصرانیه دن هانکیسنی قبول ایتمک مناسب اوله جغنی شاشیرمسی بدیهیدر . بتپرستک ذهنی دها زیاده قاریشدیره حق بر حال وارد که اوده بو طرق نصرانیه میسیونرلری آرسنده کی رقابتدر . حریفک عقلنی حیرتله غرق ایده جک بر شی دها وارد که اوده بر طریق مذهبدن چیقوب دیگرینه انتساب ایتمک ایستین بر خرسیانک بیه — کویا اوله منسوب اولدیغی نصرانیت کلیسای حضرت عیسا طرفندن طانیلماش کی — تصدیق رسمی دیانتنه یکیدن داخل اولدیغی کلیسا پاپاسلری طرفندن لزوم کوسترلسیدر .



مسلمان اولوق ایستین بر آدم بو مقوله موانع ایله ازعاج اولماز ؛ آنک اهداسی آنجق کندی اختیار یله وقوع بولور . نشر دین ایتمک ایستین بر مسلمان یا واعظدر ویا معلم ؛ بناء علیه رهبانیت صفتی حائز اولماسندن طولای قبول مهتدی کی بر وظیفه در عهده ایتمسی احتمالی یوقدر . مادام که بر کیسه اهدا ایتمک ایستدیکنی معان بر شهادت کتورر او حالده مسلمانلرک آنی دینداش طانیملری ضروریدر ؛ اکر بو شهادتی خلوص نیتدن عاری وغرض مضمره مبتنی بر ساخته کاراق ایسه او حالده اهل اسلام او منافق مرأینک غرضنی آکلادقلری کی اعتمادینه اهمیت ویرمیوب کچرلر .

وتقاسیر انجیلیه نك كافه سی تتبع ایدلسه ینه او کلام حقنده عقله
یاتشه ییله جك بر معنا چیقاریله ماز . بناء علی ذلك خرستیان میسیونه رینك
صوك تدبیر اقناعیسی بو کی معنویات دینه یه اعتقاد ایدیورمك لازم
کله جکی واعتقاد متردد ایله ایمان صحیح وجود بوله میه جفنی بیاندن عبارت
قالور . فقط نه چاره که ابنای بشرک بر قسم کلیسی بویله بر شکل
اعتقادیك ماهیتنده کی تصوف خوش آینده دن ذوقیاب اوله ییله جك
درجه ده حسیات رقیقه یه مالک اولمقلرندن ناشر دیانت جنابلرینك صرف
ایتدیکی امکار هبا اولور کیدر ؛ بو حال ایسه اهل اسلامه تزیدد اخوان
دین ایچون بر فرصت احداث ایلر .

اسلامك اللهی بر اولدینی کی غیر مسالمه قبول اسلام ایتدیرمك
ایچون مالک اولدینی واسطه نشرده بر درر . حال بوکه متعدد خرستیان
میسیونه لرلی خرستیانلغك مختلف اشکائی دنیایه یایمقله مشغولدرلر . ایشه
بویله جه میدان تنصیرده قاتولیک میسیونه لرلی ، پروتستان میسیونه لرلی ،
اورتودوکس میسیونه لرلی بیلم نه میسیونه لرلی عرض وجود ایلمکده درلر .
بوندن ما عدا پروتستانلغك بعض طرق مذهبییه سنك دخی کندیلرینه
مخصوص واحدهما آخر ککمندن بوسبوتون مستقل میسیونه رلکاری واردر .
غالبا دیندارانی درجه قصوای افراطه واردیران هر بر مجذوب خود سر
جوش و خروش ایله وجده کلدیکی بر آنده کندیسنه مخصوص بر نوع
خرستیانلق وضعنه لزوم حس ایتمش ومع مافیه آجدینی طریقتی ینه حضرت
عیسایه نسبتك لزومنی خاطر دن چیقاروبده ایکنجی بر مسیح اولمق ادعاسیله
میدانه آتیلامش ؛ آتیلسه ایدی او یله پیغمبرلك طاسامغه جرأت ایدن بر

دین اسلامه مخصوص بر نیچه اوصاف وارد رکه افکار بشردن
 يك چوغنه بر آرزوی اتباع القايلر . اسلامك عناصر ايمانیه سی قبول
 اشتباهه مساعد دكلدر ؛ احكام اعتقادیه سنده کی صافیت ایسه یکی ، یکی
 معتقدلر جذبندن هیچ بر زمان ومكانده خالی قالماز . قبول دیانت ایتیمی
 كرك مسلم و كرك ذیر مسلم ناشر دینلر طرفندن آرزو اولنان بر بتپرست
 اوله ییلورکه هنوز تمدن کوره مش بر آفریقایلدر ؛ فقط آنك افکار
 منوره دن محروم اولدی ذکای فطریدن دخی محرومیتنه حکم ایچون سبب
 کافی دكلدر . ایتدی او بتپرست کندیسنه تکلیف اولنان او ایکی طریق
 مذهبدن هانیکسینك قوه ادراکيه سنك تفهمنه دها موافق کله جکی موازنه
 ایده ییلور . مثلاً اسلامك جناب خالق تعالی حقنده کی شکل اعتقادیسی
 و قرآن کریمك « لم یلد ولم یولد » کلامی وهر شیده قدرت خالقه سی مثبت
 اولان الله تعالینك زمان ومكاندن منزله اولدیغی و ناشر اسلامیت اولان
 رسول اکرمك خالقه قرابت نسلیه سی — ولوکه معنای مجازی وتصوفی ایله
 اولسون — فرض اولنه میه جغی کندیسنه آکلادیلور . صاحب اذعان
 اولان او یله بر بتپرسته برده انجیلی آچوبده « اب ، ابن ، وروح القدس »
 کبی بر کلامك مفاهیم تصوفیه سنی تعرینه قویولان خرستیان میسیونه رینك
 حالی دوشونه لم ؛ عجباً بویله بر کلام مبهم المرام حقنده ویره جکی
 تفصیلات مفسرانه بتپرستك حوصله ادراکنده یرطوته ییلورمی ؟ بز
 امیزکه بتپرستك او تفصیلاتدن بر حظی بوانه ماز ؛ حتی دیه ییلورزکه
 خرستیانلغك تأسسندن بری مرور ایدن اعصارده یازیلوبده بر آرایه
 کتورلسه همان اهرام مصریه تشکیل ایده جك قدر چوغالمش اولان شروح

ثابتۀ فنیہ صورتندہ اشہادہ قالقشقی ایستیمورز ؛ چونکہ ادعای فناء اثباتہ
مقتدر دکاز .

ای بیلورز کہ عالم نصرانیتندہ بعض کیمسہ لر فن ایله روایات انجیلہ
آرہ سندہ تعارض بولمندیغنی دائماً میدانہ سورر لر حتی کتاب مقدسارندہ کی
بوروایاتی ادلہ فنیہ ایله اثباتہ چالیشورلر . فی الواقع بونلردن بعضیلری جدیت
وخلوص نیت ایله میدان بحشہ آتیلہش اعتقاد مفرط صاحبی کیمسہلردر ؛
بعضیلری ایسہ فکرّاً مادیاتہ مائل اولدقلری حالده کرک فنک وکرک عقائدک
تبلیغ ایتدیکی شیرک ہیسنہ ده تبعیتده منفعت کورن اشخاصدر . مثلاً
انکاتره ده انسان بعضاً اویلہ کیمسہلرہ تصادف ایدیورکہ بونلر بر
دار العالمده علم طبقات الارض درسلی ویرلر و بو درسلرده ارضک احجار
ومعدنیاتندن بعضیلرینک نیچہ یوزیک سنہ لک مدت تشکیله یه توقف
ایتدکارینی تفصیل ایلرلر . حال بوکہ بوبابده کی تعریف وتفصیلاری انجیلک
عهد عتیقندہ تشکل ارضہ دائر مقید اولان تفصیلاتہ هیچ ده موافق کلز .
دیگر طرفدن ایسہ بو مقولہ کیمسہلرک علوم الہیہ یه دخی انتسابلری اولہ بیلور
وحتی ایچلرنده رتبہٴ رهبانیتی حائز اولانلری بولنہ بیلور کہ بوصفله ده آیریمچہ
بر معیشت قاپوسی بولمق احتمالی واردر . ایشته بو مقولہ عالم بر خرستیان
ایچون نصرانیت ایله فنونی ممکن اولدیغنی قدر توافق ایتدیرمک او قدر
مشکل بر تدبیر دکادر . حیفاکہ بز بو مقولہ اصحاب ذکآنک کوستردیکی
اثرہ اقتفا ایدہ بیلہجک درجہده بر استعدادہ مالک دکاز . بناءً علیہ حقایق
اسلامیہی اثبات صدندہ فنون طبیعیہ ایله استشہادہ قدرتیاب اولہ میز .

آلتنجی فصل

رقابت اسلامیه ده کی موفیقیتک اسبابی

مسلمانلغک خرستیان مذهبی ایله اک زیاده شدت رقابتی وقوع بولدیغی بلاد اهل محوسده اسلامیتک اکثریا غلبه چالدیغی او یله یر حقیقتدرکه حتی جهانک کاملاً خرستیانلغه تبعیتی اعتداله انتظار ایلینلرجه بیه اعتراف اولمقده در . شیمدی بز بورقابتده کی موفیقیتک اسبابی غرب محررلری طرفندن قصداً و یا خطاءً نظر دفته آلتماش اولان بر نقطه دن تحری ایده لم :

عجبا دین اسلام قدرت خارقه معنویه سندن طولایی می او یر لرده مذهب مسیحی یه ترجیحاً قبول اولنور ؟ بو یوله بر ادعایی ایلری سورهمکن صرف نظر ایتملیز ! امر اعتقاد ده معقولاته تمایلات آرندیغی بویه بر عصر تیقظه بر آدم قالدوبده کندی اعتقاد مذهبیسنده کی نفوذ مافوق الطبیعه بی اثباته اوغراشورسه هیچ بر صاحب ادراک و دانش آنک ادعاسیله ملزم اولماز ؛ ولوکه او آدم طرفندن ایراد اولنان دلیل پک فطینانه ترتیب ایدلمش ، استعمال ایدیلن قوه ناطقه پک کسکین بولمش اولسون معقولاته مستند اولمیان او مقوله مدعیاتک ثبوتنه مدار اوله ماز . ایشه بو حقایق نظر اعتنایه آلدیغمرذن طولاییدرکه بز دین اسلامک رجحانیتی بر

مشهور ورعنا بر عبادتگاه مسلمانی تخریب ایتدیر و بده او واسطه ایله هند ده نفوذ اسلامی ازاله ایلمک آرزوسنده بولمورلر . (١) روسیه ده بر وقتلر بو مثللو تدابیر جبارانه قوه اسلامییه یی احایه یار دم ایده ییلوردی ؛ حتی بو مقصدله « حق فتح اولمق وایجاب حال وزماندن بولمق سمبیله جامعلرک تخریب ایدلدیکنی بر روس پاپاسی (٢) انکلیز جه یازدیغی بر کتابده اعتراف ایلور . فقط بعد ما بوکی تدابیر شدید روسیه ده دخی ثمره مطلوبه حصوله کتورمه جکدر . روسیه ده مشروطیت اداریه لایمقله تأسس ایدرو بده سر بستئ و جدانه دها زیاده رعایت اولنجه نفوذ اسلامیتک ترقیسی ده او نسبتده آرته جقدر ،



اسلامیتده اسارتک جوازی دخی نشر دیاتنه بر واسطه اولمق اوزره تلقی ایدلدیکندن منقدین نصارا بو اسارت ماده سنه ده پک چوق تعرض ایتمکده درلر . بو بابده کی مقابله من اسارت حقنده کی فصللر ده ذکر اولنه جقدر .

(١) بو روایت بالاده مذکور Bosworth-Smith ک اسبق هندستان والیسی لورد لورانسک ترجمه حالی حقنده کی اثرندن : جلد ٢ . صحیفه ٢٤٨
(٢) بو ذات لوندزه ده روسیه سفارتخانه سنک راهب رستیسیدر . کتابنک ١٠ نجی صحیفه سندن

« مسلمان دولتلك قوه اجرائيه وسياسيه لرینی ضایع ایتملریله اسلامیت ضعف بولماز . » شرقده وقوع بوله کان تحکم دول نصاری غایت متعصبانه بر شوق ایله آقیشلیه کلش اولان عالم بر انکلیز مستشرق بو خصوص مناسبتیه یانه یاقوله شو ملاحظاته بولنیور « اسلامك شان سیاسیی اورتہ دن قلدیردی ؛ لیکن آوروپا دول معظمه سی طرفندن اجرا اولان نفوذ معنویه قورقارزکه بالنسبه آز واهمیتسز در » دیور (۱)

کرك بو مقوله حقایقك دلالتی و كرك تاریخك ویردیکی امثال عالم نصرانیتده بزه قارشی او فسادلری قوران کیمسه لره شو نقطه مبهمه یی اوکره ده مشدرکه نشر دیانت ماده سی استقلال سیاسی یه مالک بر دولت طرفندن کوستریله بیله جك یارده توقف ایتمز . بناء علیه انتشار اسلامیتی بر سکتہ کایه یه اوغرا تمغه چالیشان مفسدین افرنجك آثار عملاری هیچ بر وقت تاج موفقیت ایله تزیین ایده جك کبی کورنمه مکله برابر آنلرینه ملل اسلامیه نك النده قالان کافه حقوق و قدرت استقلالیه یی محو ایچون اوغرا شوب کیمکه درلر . ایشته بو آرزوی عداوت ایله درکه بو مفسدین افرنجدن بعضیلری یکی خرستیان اولش ویکی اعتقادك بخش ایلدیکی تازیانه تعصب ایله شوق وحشیانه سی آرقش اولان آفریقالی بر زنجی قراله « ملکنده مسلمانلغك قتلی موجب بر جرم اولق اوزره تعیینی صورتیه منع ایداسنی تحت تعیده آلدیرلر » (۲) بعضیلری ده هندستانده اك

(۱) Sir William Muir ك بالاده مذکور کتابندن . صحیفه ۱۰۰

(۲) Carl Peters نام آلمانك “ New Light Upon Dark Africa ”

عنوانی اثرندن . صحیفه ۴۰۳

قتل عام اولنوبده هر نه دنسه ينه ميليونلرجه افراډى باقى قالان — شرق خرسټيانلرينك مسلمانلر طرفندن كسيلوب بيمورلمكده اولديغى حوادلرني تكرار ميدانه سوررلر . ايشته بو صورتلر ايله ترك مظالمى علپهنده عالم نصرانينده بر آواز غصبر قوپار .

آرتق بويله بر دم هيچانده اهل كنيسانك شدت تلاشنى كورملى !
 رهبان انصاف عنوان حضرتانك بو تلاشلى وهيجان عامه يي تزويد خصوصنده كي غيرتلى يالكز شرقده ارتكاب ايديله كنن دسايس دوليه يي صواب كورمرندن ناشى دكلدر . هر نه قدر حسيات وطنپرورانه سائقه سيله منسوب اولدقلى دولتلك او دسائس دوليه يه اشتراك ايلمسنى و بناء عليه اخذ امتياز و يا غصب حدود ممالك مثلاً بر حصه استفاده چيقارمسنى ايسترلر ده بو بابه مراجعت اولمان وسائط منفوره يي وجدانلى تصويب ايلمسه كركدلر . كروه رهبانك بو قارغشعلغى تزويد خصوصنده كي مساعيسى دها بويوك بر مقصدك حصولى ايچوندر ؛ او مقصد ايسه اسلامك قوه باقيه سنده بر ركن مهم اولان دولت عثمانيه يه صوك ضربه احمايى اورديره بيلمكدلر .

حرص و غرض كې تعصب مذهبي دخی انسانك بصيرت انصافنى باغلار ؛ ايمدى چشم ادراكلرى پرده تعصب ايله بورينن پاپاسلر او بابه كي تخمينلرنده پك ياكيمته درلر ، آمريقالى بر محررك (١) ديديكى كې

(١) نيويورقده مطبوع :

“ Concise Dictionary of Religions Knowledge ”

عنوانلى قاموسدن . صحيفه ٦٠١

ملایمت و شفقتی آمر اولدینی ادعا ایدیلور ؛ ایدی بو ادعا ده بولنانلر حضرت محمدی ونشر ایتدیکی دیانتی غلطله تحقیرك آنجق کندی ادعالرینی مناقض ومقصد اساسلرینه مانع اولمقدن بشقه بر فائده حصوله کتوره مدیکنی آکلادیلرده آنک ایچون تبدیل قول ومسلك ایتدیلر .



بر قوم مسلك استقلالیه وقوه سیاسیه یه مالک اولسی دخی نشر اسلامیه مدار اولان اسبابدن صاییلور . بناء علیه بویله بر استقلال وقدرت سیاسیه یه نه قدر چابوق خاتمه چکیلورسه نشر اسلامیتک بویوک بر واسطه سی ده او سرعتله حکمی غائب ایتش اولور ظن ایدیلور . ممالک عثمانیه یی بوکا بر مثال اوله رق موضوع بحث ایده لم : معلوم یا آوروپا دولترینک ممالک عثمانیه ده کی شو معهود « مطالب محقه » لرینک هیچ آردی آرقه سی کسایمز ؛ حال بوکه بو « مطالب محقه » اکثریا مثلی کورلدیکی اوزره بر غصب وغارت مقصدندن عبارتدر . بو مطالبک تسویه سنی دیپلوماسی طریق نازکیله وقوع بولان تدابیر اقناعیه بعضاً تأمینه کافی کلز . فرنککار او اوقه لی سوزلرینک مقصده خادم اوله مدیغنی کوردکری زمان شو معهود کوز داغنی تکرار ایچون جدیتله قوللرینی صیغامغه باشلارلر . بر موافقت دولیه ، بین الملل بر قونفراس لقردیسسی در میدانه چیتار وممالک عثمانیه نک اجزای باقیه سنک تقسیم یوانده کی روایات تهدیدیه دیلارده طولاشمغه باشلار . بونلرده کافی کلینجه دول نصرانیه سفن حربیه سی شرق صولرینه شویله جه بر اوفق تفرج یا پویرمک ایچون دمیرلری طوپلار . بوندن صوکره دخی راویان اخبار افرنج — دائماً

دیور . (۱) آمریقادن ظهور ایله شرقده انوار روحانیه صاحبی اوزره میدانده آتیمش اولان بر واعظ انجیل دخی خلقی قاندرمق ایچون « بکا شو علم دین ایله مشغول طلبه دن مشقت سفریه یه متحمل یوز کشتی و آنلرک مصارفنه مقابل ده یکریمی بیک لیرا بولیکیز . ایشته او زمان معبد محمدینک دیرکلرینی الله تاملدن صار صار وعر بستانی پنجه شیطاندن قورتار مقله ابن الله شان قزانور » دیور (۲)

بو مقوله مجادلئ مذهبییه حقنده وقتيله آشنالردن بر راهبک نظر دقتنی جلب ایتیش ایدم . بو ذات مذکور تعرضلرک پک حیا سزجه بر صورتده وقوعنی اعتراف ایتدکن صوکره « بز شمدیلرده محمد حقنده (یلانچی پیغمبر) تعبییری یله تجویز ایتورز » دیمش ایدی . بو ذاتک سوزندن آکلاشیلیورکه عالم نصرانیتده بو خصوصده کی آداب مناظره براز یولنه کیرمش . بونی اوکرنگک ده بزم ایچون بادئ شکر اندر ؛ فقط عجباً مسلاک مناظره نک تبدیلنده کی سبب ندر ؛ عجباً بو صوکه زما لرده طبیعت بشریه ترقئ مدنیت ایله براز دهامی کسب ولایت و نزاکت ایتدی ؛ یوقسه عالم مدینتده مرعی اولسی لازم کن نزاکت بین المللک خرستیان اولیان اقوام حقنده دخی اجراسی زمانیمی کلدی ؛ خیر ، بز بو ایکی احتمالدن هییج بر یسنه قائل دکیز . فکر مزجه ما دام که مذهب عیسوینک انسانلر حقنده

(۱) ینه بو کتابک عین صحیفه سندن .

(۲) John R. Nott نام انکلیز راهبک یازدیغی :

« Evangelization of the World in this generation »

عنوانلی بر کتابدن . صحیفه ۱۴۵

انكليز ناشر دینلری تلقینات نصرانیہ ایچون میدانی تمامیلہ آچیق بولمقده درلر . بونکاه برابر هندولری دائرہ نصرانیته ادخال خصوصنده مسلمانلر آوروپالی میسیونره لر قدر وحقی بعض محالرده خرسٹیانلردن قات قات زیاده مهتدیلر جلبنه موفق اولیورلر . هندستان احوالنه لایقیله واقف اولان انکلیزلر بوقولک حقیقتنی — ولوکه بیان تأسف ویا تعجب طریقله اولسون — اعتراف ایتکده درلر .



انتشار مذهب خصوصنده کی رقابت اسلامیه نك تأثیری زهباندن بعضارینك اعصابی او قدر تخریش ایتمش اولمیدرکه اسلامیت حقمده بسیلدکاری غلظت حسیاتی علناً اظهاردن کندیلرینی منع ایده میورلر . مثلاً بونلردن بریسی اسلامیت حقمده : « محمدیلک بر کره بر قومی دائرہ ضالته آلورسه آرتق بوتون صور شهوانیه وظالمه ایله اجرای نفوذ ده دوام ایدر . اسلامیتک زیر حکم صلیبده نه زمان اتکای مقهوریت ایده جکینی آرتق الله بیلور ؛ یالکمز بزم ایچون او زمانک سرعت وصولنی تمی ایتمک لازمدر » دیور (١) واعظ فضائل انجیلیه اولان دیگر بر راهب دیانتپرورده شو یولده آوازہ کینی چیقاروب « مسلمانلقده کی ذهاب دینی اویله بر ضالات آباد درکه نفس انسانی قعرینه دوشورمک ودوشوردکن صوکره ده چاره خلاصه میدان ویرمه مک ایچون بر مهارت شیطانیه ایله ترتیب اولمشدر . محمدیلک انجیلی تغلیط ایچون ابلیس طرفندن ایجاد اولمش غایت قورقنچ بر طرز مذهبیدر ودهای شیطانک اشهر آثاریدر »

عامه دوچار اوله رق توکتمک اوزره بولنديغی اوتهدنبری آوروپاچه جدیتله روایت اولنه کلمشدر — بوکون بر قاچ میایون نفوسلی جماعات خرستیایه یه مالکدر و بوجاعاتدن هر یری کندی کلیسا سنک ارکان و اصول قدیمه سنه تابع اولمقده در . اکر — معارضلرمزک ادعاری وجهله — دین اسلامک تلقینی ایچون اجباره جواز شرعی بولنش اولسه ایدی بو خرستیانلری وقتیه سیف عثمانیدن هانکی دولت نصرانیه قورتاره ییلوردی ؟ و او تقدیرده انکلیز اسپقوسلری ایله رجال سیاسیونی — ظاهرده ممالک عثمانیه خرستیانلرینه آجیمق و حقیقتمده استقلال عثمانی علیهنده بر اتحاد دولیه حصولنه چالیشمق اوزره — ترتیب اولنان اجتماع عمومیلرده کی نطقلرنده هنر بلاغتلرینی عالمه کوسترمک ایچون فصل فرصت بولورلردی ؟ الحاصل نه شرق خرستیانلرینک مقاومت شجیعانه لری نه ده خرستیان کلیسا سنک نفوذ کرامتی خرستیانلره اسلامیتی جبراً قبول ایتدیرمکه مانع اوله مازدی . شرق خرستیانلرینک کندی کلیسالرینه اتباعده مختار براقلملرینک سببنی آنجق بالاده نقل اولنان آیات قرآنیه نک ماهیت عادله سنده آرا ملیدر .

خرستیان منقدرلر آره سنده سیف ابرامی نشر اسلام ایله تردیفاً ذکر ایدنلر دوشمنیورلرکه مسلمانلرک قلیجی چوقدن پا صالاندی ؛ سیف مسلول نصرانیت ایسه اهل صلیب دورلرندن نشانه اوله جق صورتده قبادا ییلقلرله جهانک باشنده پارلایوب طورمقده در . مثلاً شیمیدیلرده هندستانده سیف اسلامک حکمی جاری دکدر ؛ بوتون خطئه هند بر خرستیان دولتک — هم ده الیوم ملل اسلامیه دن برر برر استقلال سیاسیه حقنی سلب ایده کلن بر خرستیان دولتک — تحت حکمنده اولدیفندن میسیونرلر علی الخصوص

عددی اوتوز ایله اوتوز بش میلیون آره سنده بر شیرد . چینه کیدن بعضی عربلرک دلائیلہ اسلامیتک چینیلر طرفندن تک توك قبول اولمسی یدنجی قرن میلادی ده با شامش ایدی وینه بو قرن میلادی ایچنده ایدی که چینه کیتمش اولان بر خیلی نسطوری پاپاسلری خرسیتیانخی ترویجہ قویولشاردی . او حالده یا نیچون خرسیتیانلق چینده اسلامیت قدر خارقه انتشار کوستره مدی ؟ اون یدنجی قرن میلادیده وعلی الخصوص اون طمورنجی قرنک مبادیسنده اقصابی شرقده کی خرسیتیان میسیونه رلکی ممالک غریبه نک جمعیات مذهبیہ سی طرفندن پک بویوک مظاهرتلره مظهر اولدی . فرصتک خرسیتیان ناشر دینلری حقنده کی بونجه مساعداتیلہ برابر بو کون چینده کی مسلمانلره نسبتله خرسیتیانلشمش اولان چینیلرک عددی اهمیتسن بریکون تشکیل ایدیور .

چیندن (ماله ی) جزائر مجتمعه سنه نقل بحث ایده لم : اقصابی شرقک بو آطهلری عصرلردنبری آوروپا دول نصاراسی دوتملارینک تحت تهدیدنده بولندیغندن اورالده انتشار اسلام ایچون پک بویوک مشکلات احداث ایداش اولق احتمالی طبیعی کورینور . مع ما فیہ بو آطهلر خلقتندن میلیونلرجه ناس بو کون دین اسلامه معتقددرلر ؛ هیچ بر مسلمان حکومت بر دوتما تشکیلی ایله هند دکرلرینک شرقنه کچوب بو جزائر مجتمعه یه قدر سیف اسلامی ایصال ایده مه مشیدی . حقیقت حال بو مرکزده ایکن ینه بو آطهلر خلقتندن بر خیلی میلیون افراد بشر اسلامیتی دین قومی یاپدی و حال بوکه او خلقتک پک آز بر قسمی خرسیتیان ایدیله بیلدی .

ممالک عثمانیه - که اهالی خرسیتیانیه سنک سیف تعصب ایله قتل

کتورمک تدبیری بر وظیفه اسلامیہ در (اذْعُ إِلَى سَبِيلِ رَبِّكَ
بِالْحِكْمَةِ وَالْمَوْعِظَةِ الْحَسَنَةِ وَجَادِلْهُمْ بِالَّتِي هِيَ أَحْسَنُ) (۱)
اسلامیت قلیچ قوتیلہ انتشار ایلمش ! غالباً خرستیان کلیسانک عالمہ
تلقین ایله اوغراشدیغی مذهب ده کرامت ایله شیوع بولیورمش ! فقط
حواریون زمانندن تقسطنطین کی جبارہ حکمدارانک دورلرینه کلنجہ یه قدر
نه حکمتہ مبنی ایسه بو کرامتک بر تأثیر حقیقیسی ظهور ایتمه مش ایدی .
آندن صوکره سیف جبارہ کلیسا ارکاننه بر اعانت خارقه بخش ایتدیکندن
پاپاسلرک نشر مذهب خصوصنده کی غیرتلرینک آثار غالبه سی هر یرده
کورونمکه باشمش ایدی



شیمدی بز معارضلرمزه شو سئواللری صوره لم : چین قطعه سی
هیچ بر دولت اسلامیہ طرفندن فتح اولندی ؟ اولمندی ایسه چینده
بولنان میلیونلر جه اهل اسلام نه واسطه ایله قبول دیانت ایلدیلر ؟ . سیف
اسلام چینده هیچ بر وقت شعشعه پاش اولدی . حال بوکه چین
مسلمانلرینک عددی وقتیلہ چینده فرانسه مصلحتکذارلغی ایتمش اولان
de Thiersan نام ذاتک حسابنجه (۲) یکرمی میلیون متجاوزدر .
آوروپالیر طرفندن ده صوکره وقوع بولان تبعاتنه نظراً چینلی مسلمانلرک

(۱) بو آیتلردن برنجیسی سورة البقره دن ایکنجیسی سورة یونس دن
اوچنجیسی سورة النحل دن آلمشدر .

(۲) بو ذاتک Mahométisme en Chine عنوانلی اثرینک مقدمه سنه
باقیه .

اويله رجال سياسيه ورهبان منجمه كوردك كه شرق مسئله سنك اويانديرلديغي زمانلرده بو مقوله خدعه لره توسل ايلديلر . بوندن ده آ كلاشيلور كه اجرائى فتنه ايچون شرق مسائليله مشغول اولوق بو مدنى خريستيانلرك منافعى اقتضاسندندر ؛ بنا برين بو مقصدك خيز حصوله ايصالى ايچون توسل اولنان هر دورلو تشبثات حيله كارانه رجال سياسيه واركان رهبانيه جه مشروع صايليلور . اكر قارشيلرينه بر مسلمان چيقوبده بونلرك قرآن واسلام حقنده بلا حيا ارتكاب ايتدكلرى سوء تاويللارى علناً يوزلرينه اورمق ايسنسه آنك مقابله سندن تاميله تجاھل ايتك ينى آنى هيچ ده آلديرمامق بو ذاتلرك وقار متمدنا نهلرينه پك موافق كليور . اويله يا ، بار بار بر هيئت اجتماعيه يه منسوب اويله بر حريفك اورته يه آتيله رق تكذيبه جرأت ايلمسندن نيچون محجوب اولمى ؟ ذاتاً آوروپاده افكار عموميه او مقوله بر حريفك مايلى ومذهبي عليهنده نه سويلنسه اعتماد ايله تلقى يه آليشتين دكلى يا ؛ اكر بو حريف قائلار ده ينه تكذيب ايچون غزته لره مكتوب ياز مغه تصدى ايدرسه او مشهور غزته لر مديرلرينك آنك جواب مدافعه كارانه سنى مندر آلتى ايتلرى ويا -- -- تعبير ديكرله -- ييرتيق كاغد سپنه آتلرى اغلب احتما در .

اسلامك نشرنده اجبارك عدم جوازينه دائر اولان احكام مجله يي معارضلرمز هيچ ده قاله آمازلر . قرآن كريم انسانلرى مؤمن اولوق ايچون اجبار ايتمكيز ديه امر ايلر . (أَفَأَنْتَ تُسْكِرُ الْنَّاسَ حَتَّى يَكُونُوا مُؤْمِنِينَ . . .) زيرا مسئله ايمانده اكراه مقبوح بر شيدر . (لَا إِكْرَاهَ فِي الدِّينِ . . .) معقولات ايله ، نصايح جميله ايله انسانلرى طريق حقه

کندیلرینه بر سلهٔ مقابله دعوت ایدر . اکر اخلاقیوندن بری شرق ایله
غربک حیات اجتماعی سنی بیطرفانه تدقیق و مقایسه ایتمش اولسه خرسیتیانلر
آره سنده خفت اخلاقک مثالی دها چوق بولور . تذکیره سی اک بوزوق بر
حکومت اسلامی بيله دائرهٔ حاکمیتده فحشیات خانهلرک رواجنه جواز ویرمز .
حال بوکه شرقده آوروپا یلر طرفندن اداره اولنان فحشیات اوللری قیادلش
اولسه آوروپا دولترلرینک — کویا تبعهلرینک تجارت مشروعه سنه خلل ایراث
اولنش کی — او یله بر تدبیره مخالفت ایده جکلرنده شبهه یوقدر .



نشر دیانت خصوصنده کی رقابتک اسباب موفقیتندن اولق اوزره
منقلدر دائماً سیف اسلامک قوهٔ مجبره سنی اورته یه سوررلر . ممالک
نصرانیه ده عامهٔ ناس سیف اسلام حقنده کی بو روایتک صحته قائلدر .
شرق خرسیتیانلرینک « قتل عام » اولندقلرندن بحث ایديله جک مسائل
سیاسیه میدانده چیقدیغی زمان قلیچ ایله قبول اسلام ایتدیرمک ماده سی مخصوصاً
و مکرراً روایت اولنیور . بناءً علی ذلک ممالک اسلامی ده فرنکلرک حسب
السیاسه بر فساد هیجان چیقارمغه لزوم حس ایتدکاری صره لرده بوندن
بالاستفاده هر پاپاس ، هر پوتیقچه جی بو « جبر سیف ایله اهتدا »
ماده سنی بر سرمایهٔ مقال اتخاذ ایدیور و بو بابده کی ادعاسنی خلقه تفهیم
ایده بيلهک ایچون قرأندن ، حدیثدن معناسی یا کلیش آکلاشیله بيله جک
بر صورتده ناتمام عبارهلر تقلیده دلیل اوله رق کوستریور . اهل تمدنک
عادتده بو کی خدعه لر جائز در ؛ شو شرطله که بو ساخته کارقلر عامهٔ ناسک
فرقنه واره میه جفی صورتده اسلوبلیجه ترتیب اولنه . بز انکلتره ده

شیمی بونلرک مطالعاتدن بعضیلرینی تدقیق ایده لم :

شہوت نفسانیہ ایچون بر واسطهٔ سیله اولدیغی ادعا ایدیلن تعدد زوجات ماده سی بواسابدن بری اولق اوزره دایما ایلری سورولمکده در . اسلامده نسوانک موقعی تدقیق ایتدیکز زمان تعدد زوجات مسئله سی حقنده کی معارضاتی آیریجه بیان ایلیه جکز . بوراده یالکز ذکر اولنه جق بر نقطه واردرکه اوده پک چوق کشیلرک اهتدا ایلملری اسلامده تعدد زوجاتک جوازندن طولاییدر دیمک پک چوق افراد بشرک خرستیانلغی رد ایلملری خرستیان کلیسا سنک تعددی منع ایلمسندن ناشیدر دیمک قدر مناسبتسز بر ادعا در . اسلامیتی قبول ایدن بتپرستلرک پک چوغنک مذهب اصلیلرنده تعدد زوجات عادتق ممنوع دکلدرکه آنجق اکا فرصت بولق ایچون مسلمان اولمش بولسونلر . بالفرض معارضلرک او ادعالری حقلی اولسه بیله قادیلر آره سنده اسلامیتی قبول ایدنلر بولمنسته نه دیه لم ؟ آنلر ایچون اهتدا ایله بر زمانده ایکی ویا اوچ قوجه یه وارمق احتمالی موجود دکل یا ؟ معارضلرک قولنجه تعدد زوجاتدن مقصد اصلی ارضاء شهوت اولدیغندن واسلامیت ایسه تعددی ترویج ایله اتهام ایدلدیکندن بر آدم دین اسلامی قبول ایدنجه کویا او مقصده نائل اولورمش ! شهوت حیوانیسنی ایستدیکی قدر یرینه کتورمک ایستین بر حریف مسلمان اولقسزین و بر دن زیاده قاری ایله اولنوبده کندیسنه یکی مصرف ، یکی غائله قاپوسی آچمقسزین دخی آرزوی شهوتنی اجرا ایده مزمی ؟

اسلامی بویله جه فساد اخلاقه مساعد کوسترمک منقیدین نصارانک یالکز اجرای معارضه ده کی نامرد لکلرینی کوسترمکله قالماز ؛ برده

امر اهنك اويله جه طوپ وتفنك حمایه سی آتنده اوله رق اجراسنه تثبث اولنیور .



نشر نصرانیت طرفدارلری « نصل اولوبده عربستانده ظهور ایدن (بر اعتقاد باطل) خرستیانلق کی مقبول ربانی اولان بر مذهب ایله رقابت ایده بیلور » دیه تعجبد بولنیورلر . عالم نصرانیتک تعلیم مخصوص کورمش ذکی ، دانشمند ، موظف وکارگذار بیکارجه میسیونره لرله مالک جمعیتات دینه سی یوقی ؟ یالکزر انکلتره ده اعانه ، وصیت وسائره ایله بونشر دین جمعیتلرینک الله سنه ده ایکی میلیونه یقین پاره کچمیورمی ؟ آمریکا دخی انکلتره قدر فداکارلق ایدوبده دنیانک هر طرفنه بیکارجه میسیونره ر کوندرمیورمی ؟ اویلہ ایکن بوکی وسائطدن کلیاً معروم اولان اسلامیتک خرستیانلق ایلہ اولان رقابتنده کی موفقیتک سببی نه اوله بیلور ؟ ایشته مدنیت نصرانیه نك انتشاری ایچون اوغراشان افرنج بو حالارک اسبابنی کشف ایتمک ایستیورلر .

مادام که انتشار اسلامک اسبابنی تنقید ده خرستیان کلیسائی منسوبلری ذهنلرینی غرض وسوء ظندن تجرید ایده میورلر وما دام که خرستیانلارک تزاید انتشارینه چالیشانلر پاره مثللو وسائط مادیه یه مالکیته اهتدای دها زیاده تأمین ایلہ جکنه ذاهب اولوب کیدیورلر ؛ او حالده موفقیت اسلامک سبب حقیقیسی آنلرک حوصله ادراکنده یر بوله ماز . مع مافیه اسلامیتک معارضلری اهل خبره صفتنی طاقنه رق بو رقابتک اسبابنی ایضاح ضمننده بر آلائی مطالعات تغلیطیه دن دخی کیری طور میورلر .

بشنجی فصل

نثر دیاندره رقابت

فصل سابقده انجیله ایمانك مسلمانلرجه قطعاً ممنوع اولدیغنی ذکر
ایتمش ایدك . بوراده ایسه اسلام دینك قوتی یالکز موقعنك محافظه سیله
قالدیغنی وحی خرسیتیانقله اولان رقابت انتشاریه سنی اثباته مقتدر اولقده
بولندیغنی کوشتره جکز . بورقابت خرسیتیان کلیسائی اصحاب روحانیه سی
ایچون هیچ ده خوشه کیمیه جك احوال مشکله تولید ایلمکده در بوایه
بوتون دنیا یی نصرانی یایمق ایچون انجیلك امر ایتدیکی وظیفه نك انفاذی
ماده سنی مشکوک بر موقعده بر اقیور . مع ما فیه ملل عالمك تاملیه خرسیتیان
ایدلمسی حقنده کی امر انجیلی مجبوری الاجرا صایلدیغندن « او مضر »
رقابتك اوکنی المق او ذوات روحانیه نك بر عزم قطعیسیدر . بناءً علیه
بو مقصدك حصولی ایچون تدابیر لینه کافی کلمدیکی زمانلر خرسیتیان
میسوینه رلکی دول معظمه نك بویوک چاپده وسریع آتشلی طوپلرینك
حمایه سی آلتنده اوله رق اجرا ایدیلور ؛ او دول معظمه که اوردولریله ،
دونمالریله مدنیت خرسیتیانیه نك شاننی ممالک غیر نصرانیه ده فعلاً اثبات
ایدوب کیمکده درلر ! امثالی شو صوک دورلرده دفعاتله وقوع بولدیغنی
اوزره تدابیر مصلحانه ووسائط لینه بر نتیجه مطلوبه ویرمینجه میسونه رلک

های هوایلرینی بر مصر اشکنک آ کیرمسندن دها مقاملی بوله ماز ،
 وکذلک ، اویله کیمسه لره ده تصادف اولنورکه فلان موسیقی شناسی تقدیر
 وفلانی تخطئه ده هیچ زحمت چکمزله ؛ حال بوکه بر سالونده پیانونک
 اوکنه اوطورسه لر پارملرینک حرکتندن هنر مطربانه لرینک قباق سازی
 چالان بر زنجیدن پکده فرقلی اولدیغی میدانه چیقار
 ریم شرقیلیری غرب مدینتیک بو مقوله ساخته کارلقلرینک تأثیرندن
 صیانت ایلسون !



اهل شرق غائب ايديلن زمانلرك قضاسى ايچون استقبالا پك چوق غيرتلىر
كوستره جكلر وآوروپادن پك چوق شيلر اوكرنكه چباله جقلدر . مع
مافيه بر زمانلر نفس ممالك عثمانيه ده وخطه مصریه ده توره مش اولان
بر آلاى هيولالرك — اصليتى بوسبوتون ترك ايدوبده فرنكلشيويرومكدن
عبارت اولان — او منفور مسلكارى تعقيب اولميه جقدر . شرقليلرك
صلايت عقليه صاحبي اولانلى آوروپا مدنيتك او دائما مبالغه لرله اعلان
اولنان شاننده پك بويوك شينلر بولنديغنى ادراك ايديبورلر ودهاى بشرك
ترقيات مفيده سى نسبتنده برده غايت مذموم (شارلاتان) لقلر آرتوب
كيتديكنى و بو (شارلاتان) لقلرك صنايع نفيسه ايله موسيقى يه عائد مباحثده
دخى پك چوق وقوع بولديغنى كوريبورلر . مقصدمزى ايضاح ايچون بر
ايكى مثال ويره لم :

مثلا آوروپاليلر آره سنده بر آلاى اشخاصه تصادف اولنيوركه
بونلر پك وقوفانه بر ادا ايله صنعت ترسيم و هنر تصوير حقنده متصل
« افكار عاليه » صاچارلر ؛ حال بوكه دوستلرندن برينك چوغنك
يادكار دفتري اوزرينه قورشون قلميله شويله سطحيجه بر طوموز شكلى
چيزملرى كنديلرندن طلب اولنسه اللرى ياقيشاز . كذلك ، بو مقوله
كيمسه لردن بعضيلرى تغنيك روچه اولان تاثير دلفريبنى غوامضيله ادراك
ايده جك درجه ده نشو و نما بولاش بر استعداد ممالك بر صنعتكار كبي
موسيقى حقنده مطالعاته آغاز ايدرلر وحتى دنيانك الك مشهور مغنى
ومغنيه لرينك مهارتلى حقنده تنقيده كيريشورلر ؛ حال بوكه بر مجلس
يارانده تغنى ايچون آغيزلرني آچمش اولسه لر انسان آنلرك او دلخراش

بالعكس اكر ماضى ده هيئت كندى سائيه نك مداخله و تقيدات متعصبانه سى
 بولنامش اولسه ايدى بو ترقى و تكملك ممالك غريبه ده دها اركن باشامش
 اوله جغنى ادعا ايدنلرك صحت قوللرينه قائلز . غربك ترقياى هيچ ده
 كليسانك يد كرامتيله وقوع بولماشدر . غربك فن ، صنايع و موسيقى
 كى خصوصاتده تميز ايتمش اولان ارباب اقتدارينك اصلى آراشديرلش
 اولسه بو ذواتدن بلكه او چده برينك يا خالص ويا ملز اوله رق يهوديلكى
 ميدانه چيقار . كندى كليسالرينك مانع ترقى اولان مسلكى حقننده كى
 قيودات تاريخيه يي قاله آلميو بده اسلاميتى مانع ترقى اولقى اوزره تصوير
 ايده كلن مخررين نصرانيه نك حقسزانه يلهم كه نه ديملى . احكام
 اسلاميه ده انسانك استعداد طبيعيسنك انكشاف و تعاليسى مانع بر قيد
 صحيح يوقدر . اوللرى صنايع نفيسه نك عالم اسلامده نه مرتبه ترقى ايتمش
 اولديغنى اثباته كافى بر نيچه آوروپا اهل تدقيقى طرفدن آثار مهمه ترتيب
 ونشر اولمش ايسه ده حيفاكه بو مثللو آثار بويوك كتبخانه لك رافلرنده
 توزلر ايچنده ياقوب قاليور ؛ حال بوكه غرب خلقنك اكثريت . عظيهمه سى
 شرق و عالم اسلام حقننده كى معلوماتى او هرزه كو رومانجى لرك قصه لرندن ،
 سياهلرك سطحيات ايله طولى اولان روايتلرندن اقتباس ايلور .

بو كتابك مباديسنده اشارت اولنديغى اوزره مشرق اسلام
 تاريخنجه معلوم اولان بر طاقم موانع كونه نك بر برينى متعاقب تحدى
 شرقك بوكونكى كيريلكنه سببدر . ترقياى ماديه نك هر شعبه سنده
 اولديغى كى صنايع نفيسه ده و موسيقيجه دخى شرقلر غريونك خيملى
 مادونده قالمش . صوك سنه لرده كوريلان علام تىظمدن آ كلاشيله ركه

دعا دن اول قالقوب كيدنلره - كويا پاره وير مكسز ين قاجيورلر مش كې -
كيسه اوزاتيور ايكي كشي ده جماعت صافلريني حاوی اولان صره
صنداليه لرينك برر اوجنه كيدرك اعانه كيسه سني بويله جه صره ايله الدن
اله نقل ايتديريورلر وبو آنده كيسه اوزرينه اويله بر صورتده كوزلريني
ديكيورلر كه انسان آنلرك جماعتدن بعضيلرينك كيسه يه پاره بر اقلرينه دكل
بلكه پارمقلری اوجيله اورادن پاره آشیر ماملری ايچون اهتم
كوستردكلرينه ذاهب اولور .

ايسته بر شرقلينك كليسا و عبادت نصرانيه حقنده حاصل ايده جكي
فكرلر اوزرينه يوروديان مطالعات آننه كوسترييورر كه ميسيونرلرك جلبنه
چاليشدقلى شرقليلردن هيچ بريسي اويله كليسا اركاني ، نمايش آيين
كې شيلرله قبول نصرانيته هوسلنديريله من . آره صره خرستان ايديلنلر
بولنسه ييله آنلرده اعتقاد خالصدن مجرد اولان ومنفعت شخصيه سنك
الجاهنه كوره قولايقله هر قابله كيروب چيقان مسلكسز ومرائي كيسه لردر .



بالاده موسيقينك عبادته ادخالى ومعابدك ترسيمات مزينه سني
حقنده كي مطالعاتم صنايع مرغوبه دن اولان موسيق وترسيم عليهنده
بر نفرت متعصبانه نتيجه سي اولق اوزره تلقى ايديله مليدر . هيچ شبهه
يوقدر كه خرستيانلقده هيئت كنيسائيه نك غرب ملتلى آرمنده صنايع
نفيسه نك انشراح وتكلمنه پك چوق مدارى اولدى . بو حقيقتنه قانع
اولمقله برابر كنيسانك اوبابده كي خدمتى سبق ايتمكسز ين موسيقينك وصنايع
تصوير يه نك لاييقله ترقى ايتمه جكي حقنده كي ادعا يده قبول ايده ميز ؛

موعظه ده نقشاً عرضك كنديسي ايچون بر حكي يوقدر ؛ چونكه صنعت ترسيمدن ذوق آلمق دياتته تعلق ايتمين موضوعات صناعيه ده دخی ممکندر . هله او چيريل چيلاق (آدم و حوا) تصاویر مخيله سنك جاملرده نقشی کبی بعض قاتولیک کلیسارنده کوربان شیر هیچ ده خوشنه کیتمز .



شرقلینك خوشنه کیمیه جك بر حال دهها واردرکه اوده اثنای عبادتده جمع تقود اولمئسیدر . بر آراق راهب قالقارده مقدا طوپلامش اولان اعانات ایله کلیسالك مصارفی موازنه ایچون تفصیلاته کیریشور . بو مقوله آلیش ویریش مباحثك ادعیه وآلهی آره سنه صوقوشدیرلمسی اکا پك تحف کورینور . هله اعاناتك صورت جمعی آنك حیرتنی جلب ایدر . فی الواقع مسلمان مسجدلری ده اعانات خیریه یه پك محتاجدرلر ؛ فقط او مسجدلرده زمان صلات و طاعاتده پاره دن بحث اولماز . جماعتدن صدقه ویرمك ایستینلریله وقت عبادتده دكل آنجق مسجده کوروب چیققلری صرملرده ویررلر . اعانه و صدقه اعطا سنده کوستریشك پك فنا بر حال اولدیغی معلومدر ؛ پاره چینگرتیسی ایله عبادتك روحانیتنی افساد ایسه مکروه برشیدر . پاره چینگرتیسی انساندن زیاده شیطانی حرکتیه کتوردیکندن آنك بو وسیله ایله فکرة الغا ایلدیکی اغوال نفس عبادتك صافیتنی بوزار و بناءً علیه بر علویت معنویه ایله مشغول اولمسی مطلوب بولنان روح عابد بلکه مادیات دنیویه یه ، غرض و عوض حیات شائبه لرینه میلان کوسترر . شرقلی زائر اثنای عبادتده کی اعانه جمعتك صورت اجراسنی ده حظ ایتمز . پاره طوپالانه جفی وقت بر آدم همان قابویه قوشیور و ختام

بوکا مقابل بر دلیل اوله رق کتوريله بيلورسه ده بو حال بزده پک عارضی
ومستثنا اولدقدن ما عدا حسیات دینه سنک شرفی ، صلابت اخلاقه سی
کمال جهد ايله محافظه ایدن اکثریت مسلمینجه مردود در .

بر کلیسانک مزییات داخلیه سی دخی شرقدن یکی کلدیکی
فرض ایتدیکمز کیمسه نک نظر دقتنه چار پار . خرستیان مبائی دینه سندن
بر خیاسنک حسنی -- صنایع انشائیہ خصوصنده ذوق سلیمه مالک اولیان
بر کیمسه ایچون بيله -- شایان دقت درجه ده در . فی الواقع شرقده دخی
بعض مساجدک صنعت تزئینیه سی بو کلیسار دن آشاغی قالمازسه ده
اسلامک عبادتنه عائد کافه احوالده ساده لک مطلوب اصلی اولدیغندن بویه
تکلفات زینته مالک اولان مساجدک عددی محدود در و بونلر ده همان علی
العموم مائل استبداد اولان امر ا طرفندن یاپدیرلشدر . عظمت خالق اولان
ایمانک علامتی او مقوله عظمت مبانی ايله ارائه ایدلمز ؛ بلکه ارباب استبداد
خود پسندانه بر شان احرازی آرزوسيله او تکلفات انشائییه بی اختیار
ایلهلشدر . مساجدک اشکال معتاده سی بسیط و تکلفسز اولور و دیوارلرینی
یالکمز لویج محترمه ايله خطوط متبرکه وزمیننی بر قاچ پارچه پاک کلیملر تزین
ایدلر . ایشه بویه عبادتگاهلرده ادای طاعته آلیشمش اولان او شرقلی
زینتلی بر کلیسایه کیردیکی زمان اک زیاده کوزینه چارپان شی جاملرده کی
ترسیمات و نقوشک کوزا کیدر . شو قدرکه حضرت عیسا بی بشقه بر صورتله
تقدیس ایدن او شرقلی بوکی ترسیمات مزینه نک او پیغمبر محترمه تابع
اولنله دکل بلکه نقوش و اشیا یه طابینان اهل مجوسه یاقیشه جغنی ده
دوشونور . عهد عتیقهده روایت اولنان قصص و وقایعک پنجره لرده و محل

ایسه امالهٔ نگاهلری هر آنده انسان ایچون موجب سرور درون اوله جق درجه ده کوزلدر . اويله مشرق اسلامده پاییلدیغی وجهله قادیلر محل عبادتدن تبعید اولمازلر ویا آیریجه بر محفله طقیلازلر . هتمدن بر خرسیانه کوره بویله بر حال اسلامک نواهی استبدادندن عد اولنور ؛ زیرا آنک فکرنبه عبادتگاهده قادیلرک ارککارله مختلطاً موجودیتلری عبادته بهشتی بر طرز نورانی ویرر مش . لکن مسلمانلرک بو باده دخی کندیلرینه مخصوص بر نقطهٔ ملاحظه لری واردر : شویله که آنلرجه عبادت اثناسنده مطلوب اولان شی سرور نورانیت دکل بلکه وقار سکینت در . عابدک کرک فکری کرک نظری یالکز احسن الخالقینه توجه ایلمک اقتضا ایدر . اگر اثنای عبادتده کوشهٔ نظر بر روی دلفریب زنه تصادف ایدرسه او حالده ابلیسک اغوای فساد کارانه سی روح عابده یول بولور . حتی شرقدن یکی کلدیکی فرض اولنان کیمسه نک کوش اطلاعنه واصل اوله جق حالاتدن بولنسه کرکدرکه اويله مختلطاً محل عبادته کیدن کنج ارکک وقادیلر موعظه ودعادن زیاده احدهما آخرک تماشای لباس وجمالیله اشغال ذهن ایدیورلر . کچنلرده مشهور بر لوندردر غزته سنک بر مقالهٔ مخصوصه سنده بو کیفیتی تنقیداً « قاته درالنک باش راهی اخیراً ویردیکی بر موعظه ده کنج قادین وارککارک آشفته لک مقصدیله محل عبادته کله ملرینی اخطار ایدیوردی . قورقارزکه جلوئه معاشقه یه بر محل ترویج یاپیلان عبادتگاه یالکز اوکیسا دکادر « دینیلوردی (۱) رمضانلرده استانبولک بعض بویوک جامه لرنده بر طاقم اسافلک ارتکاب ایتدکاری اوعارسزجه جلوهر

(۱) ده یلی تلغراف غزته سنک ۲۷ ایلول ۱۹۰۴ تاریخلی نسخه سندن منقولدر

مناسبتله « هر هانکی دفعه بر مسجده کیردهسه کو کلمه بر تأثیر معنوی پیدا
اوله رق حتی مسلمان اولدیغنه تأسف ایلدم . » دیور . شرقده خرسیان
میسو نه راکنک منافعی ترویجه چالیشمش بر انکلیز مؤلفی دخی شو یولده
بیان حسیات ایلور : « مسجده کیدن بر کیمسه ایچون جماعتک
حالده کی صمیمیه ، استغراقه ، وقار دیندارانهک تأثیرینه حیران اولماق
امکانسزدز » (۱)



برده شیدی انسان کنیدی شی شرقدن انکاتره یه هنوز کاش
وبالاده سرد اولنان صورت عبادته آلیشمش بر مسلمانک یرینه قویسونده
بر کلیسا یه کیتسون ؛ اوراده حاصل ایده جکی حسیات کنیدی شی نصرانیه
قبوله باقه لم شو قلندیره ییلورمی . ما دام که او یله بر کیمسه شرقدن هنوز
کاش فرض اولندی ؛ او حالده کنیدی سنه کلیسا ده مراعاتی لازم اولان
بعض تعلیمات اعطاسنه احتیاج واردر : ایدی ابتدای امر ده او آدمک
ممکن اولدیغی قدر انتظام اوزره اکتساء لباس ایتیمی و بناء علیه شرقیلره
اسناد اولنان بیچمسنز لکده کیمه مسی لازمدر . کلیسا ده تمیز کورونمک ده
پک لازم بر شیدر ؛ بو ایسه (النظافة من الایمان) قاعده سنه رعایتدن زیاده
قادینلره خوش کورونمک ایچون پک ضروری بر کیفیتدر ؛ زیرا کلیسا لرده
رجال ایله نسوان مختلطاً اجرای مراسم مذهبییه ایلرلر . بو قادینلردن بعضی

(۱) R. N. Cust نام محررک

“ Evangelization of the Non - Christian World ” عنوانلی

کتابندن . صحیفه ۲۶۴

اسلامك انتشارينه اك زياده مدار اولان شي عقائنده كي ساده لكدر .
 واقعا صوكره دن بو عقائده بر طاقم اعتقادات باطله قاريشديرلديغي
 انكار اولنه ماز ؛ فقط بو عناصر مخلوطه نك مقداري پك محدود اولدقدن
 بشقه اساساً جماعات اسلاميه يه دخالت ايتش اولان خريستان ويهودي
 وسائر مهتديلر طرفندن كتورلشدر . بو مقوله اعتقادات غير معقوله
 اسلامك صافينه بويوك بر تأثيري موجب اوله ماز ؛ زيرا بر ديانت اركاني
 آره سنده بولنه بيان اعتقادات سخيفه يي حسب المنفعه تروييج وادامه
 ايده جك اك بويوك بر قوت وار ايسه اوده قوه رهبانيتدر و حال بوكه
 اسلامده رهبانيت يوقدر . اسلامك عباداتي دخي او قدر ساده دركه
 بو بابده بر فكر حاصل ايتك ايچون انسان كنديسني بر مسجده فرض
 ايتليدر ؛ چونكه اوراده كوريلور كه مراسم زائده يي حاوي اولماقوله برابر
 عبادتده بر تأثير علوي ، بر تهيج روحاني واردر . صورت عبادت بر
 سكينت حزينه يي حاوي كبي كورينور سه ده ماهيتنده صميميت ابديه يي
 مؤدى بر خاصه مستحسن بولنور . بر كشي سركار جماعت اولور و قرآن
 كريمدن آيات مناسبه اوقور ، تكبير كتورر ، عابدين دخي مستغرق سكونت
 بر حالده امامته تبعيت ايدر . جماعت آهي نامه باغير وب چاغير ماز . كليسا
 ارغونوي كبي بر آلت موسيقي ايسه مسلمانلرجه عبادت ك سكينت روحانيه سي
 ايله قابل تأليف اولمان بدعتلردن صاييلور ؛ زيرا وقت تضرعده فكر عابد
 معبود خالق اولان جل جلاله حضرتلرينه تماميله متوجه اولمق اقتضا ايدر .
 اسلاميتي فنونه مغاير ظن ايدرك تنقيد ايلمش اولان بر فيلسوف (١) بو

دنیاده مشکل بر ایش اوله میه جفی آوروپا و آمریکا میسیونه رلری ظرفندن
 بیه اعتراف اولمقده در . هیچ شبهه ایتیه لم که مسلمانلر کندیلرینه عنایه
 تکلیف اولنان وافتیزک خاصه قدسیه سنی کله جک ایکی یوز سنه ظرفنده دخی
 قبوله متایل اولیه جق در . بوندن ایکی یوز سنه صوکره اذهان بشرک نه
 دورلو حسیات مذهبییه مالک اوله جفی فنا ویا فلسفه تعیین ایده بیلیمک
 او قدر مشکل بر مسئله درکه او بابده بیان مطالعه ایلیمک بنم حدمک
 فوقنده در ؛ شو قدر جق بر مطالعه یه جرأت ایدرم که اگر دنیاده بر
 زمان کلورده مسلمانلق اورته دن قارقارسه او زمان میدانده خرسیانلقدن دخی
 بر اثر قاله ماز . ایدی استقبالده اهل اسلامک نصرانیته انقلابی کبی بر
 ذهاب سخیف دخی ذهندن چیقارلق اقتضا ایدر . کینساء نصرانیت عقلاره
 حیرت ویرر بونجه وسائط تنکیله ایله عصر لجه اوغراشمش اولدیغی حالده
 اون ، اون بش میلیون طائفه یهودی بیه تحویل و مزجه موفق اوله مدی ؛
 او حالده یالکز ایکی عصرلق بر مدت ظرفندن اسلامیتی مزج وقلبه
 فصل مقتدر اوله جق بر دورلو آکلایه مایز ؛ او اسلامیتی که ایکی یوز
 آتمش میلیون متجاوز افراد بشر طرفندن جهد تام ایله التزام اولنیور واحکام
 معقوله سنده کی علویه حرز جان ایله ایمان ایدیلور ؛ او اسلامیتی که
 اصحابی بیننده بر رابطه معنویه عدا ایدلرکن زیاده بر امل ملی حکمنده
 طوتیله رق مدافعه سنه اوغراشیلیور . بو خصوصده جالب اعتنا بر نقطه ده
 واردرکه اوده مسلمانلرک نصرانیت حقنده کی معلوماتی آرتدقجه آندن
 تباعدلری ده او نسبتده زیاده شمسیدر .

کرامت اظهار ایتک ایستور ؟ شرقده استیلای متحکمانه یه قویولش اولان
 آوروپا دول معظمه سنک بو تحکمه قارشی قویه جق مسلمانلری اوزمانه قدر
 روی ارضدن سوپوره جککارینی می کشف ایدیور ؟ چوق بیان چوق
 یا کیلور دیه ترکیه بر ضرب مثل واردر یا ؟ ایشته عمق علم ایله معروف
 اولان بو ذات دخی غرور معلوماتیله سرمست اولش بولمایدیرکه بو درجه ده
 جرأتلی بر کرامت صاتمغه قالمیش . شرقلیلر طرفندن دکل یه آوروپالیر
 معرفتیه وقوع بولان تخمیناته کوره دنیاده کی اهل اسلامک عددی ایکی
 یوزالی میلیونی متجاوزدر . شرقده کی آمال سیاسیهر لینگ ترویجنده
 حسیات دیندارانه لریه مغلوب اولان بعض انکلیزرجالی عدد اسلامی ایکی
 یوز میلیونه یقین اولق اوزره جف القلم تعینه تنزل بویوریورلر ایسه ده
 آلمانلرک بو بابده کی تدقیقاتی بوسبوتون فرقلیدر . بو خصوصده اک زیاده
 تدقیقاتده بولمش اولان بر آلمان مؤلفی مسلمانلرک ایکی یوز آلتمش
 میلیوندن زیاده اولدیغنی اثبات ایلیر (۱) آفریقا وآسیاده تأمین مستملکات
 وتوسیع حدود ایچرن وقوع بولان هجوملرنده اوروپا دولتلی عساکرینک
 سنه ده اون ویا اون بش بیک قدر مسلمان جانی تلف ایتدکارینی فرض
 ایده لم . بو وفیات زائده ایله برابر یه ایکی یوز سنه ظرفنده اسلامیه
 منسوب افراد بشرک توکنمسی احتمالی یوقدر .

بو مسلمانلرک حوضه نصرانیته دخولی احتماله کلنجه : ابتدای
 امرده شوراسی تخطر اولمایدیرکه مسلمانلری خرستیان یاپه بیلمک قدر

(۱) آلمانیالی دوقفور Herbert Jansen نام ذاتک استاتستیق اوزرینه

اطلاقی ایسه آنجق آداب جاریه نك خارجنده وقوع بولش اوله ییلور .
ابتدای فصلده ذکر ایادیکنز آیتده کی « مخلوق » تعبیرینك
بعض مسلمان لسانلرینه رابطه سز بر مآلده ترجمه ایدلش اولمسی دخی
محتملدر؛ چونکه انجیلک « هر بر مخلوق » دیمسندن مراد مخلوق ناطق
ومدرک اولدیغی ومعنائك حیواناته شمولی بولنه میه جغی منفهمدر . نته کیم متی
انجیلنده مسطور بر آیتده (۱) مذهبه دعوتك « بوتون مللره » وقوع
بولمسی تصریح اولمسنندن دخی آکلاشیلدیغی اوزره کله مذکوره انکلیز
میسوینره لرلی طرفندن « مخلوق » دکل « بشر » دیه ترجمه اولمق اقتضا
ایدردی .

الحاصل خرسیتان ناشر دینلرینك مکلف اولدقلری وظیفه حقیقه
نوع بشرک اقوام عادیه سنی نفوذ عالییه نصرانیتله اصلاح امیش ! عجباً
مسلمانلرک دخی قبول نصرانیت ایلملری ممکنمیدر ؟ ایشته شیمدی بز بو
مسئله بی تدقیق ایتك ایسترز :

ابتدا معلم ایکن صوکرده وکلای دولت صره سنه کچمش وشیمدی ده
دیپلوماسی خدمتنده مهم بر موقع اشغال ایلمکده بولمیش اولان بر انکلیز
صاحب قلبی طرفندن (۲) کشف اولندیغنه کیره مسلمانلای اولسه اولسه آنجق
ایکی یوز سنه ده با بولا بوله بیله جک امیش ! عجباً بو ذات دانشمنات نه

(۱) متی انجیلنك ۲۸ نجی بابی ۱۹ نجی آیتی .

(۲) الیوم واشینگتونده انکلیز سفیری اولان ترک دشمنلغنده کی شدتیه
معروف مستر (برائیس) درکه بو کتابك انکلیز چه سندده اسمتک تصریحندن
اجتهاب اولندی .

دردنجی فصل

نصرانیت و موقع اسلام

انجیلده « دنیانک هر طرفه کیت ده انجیلی هر بر مخلوقه تبلیغ ایله » دینیلیور (۱) جهانی کاملاً ایمانه کتورمک مقصدیله وارد اولدیغی ملحوظ بولنان بو آیت انجیلیه ده کی امری انفاذ ایچون کتاب مقدس نصارانک یوزدن زیاده اسانله ترجمه ایدلدیکی معلومدر . بونکله برابر ده یوز میلیونلرجه بنی بشر افرادینک کتاب مذکوری کندی لسانلرنده قرائتله مباحی اولمغه حالا فرصت بوله مدقلرینه بعض دیندار خریستانلر تأسف ایلمسکده درلر . بویله جه حال ضالانده قالان او یوز میلیونلرجه افراد بشرک احتیاجنی تسویه ایچون انجیلی آنلرک لسانلرینه ده ا مصحح ، ده ا بلیغ وده ا مؤثر بر طرزده ترجمه ایتمک اقتضا ایلردی . بو امر اهمه شیمیدی یه قدر بر دقت لازمه عطف اولنوب اولمادیغی اشتباهی موجب بر مسئله اولسه کرکدر . بو کتاب مقدس نصرانیتک بز کندی لسانلر ده کی ترجمه سنه باقارسه ق حیرتله کوریر زکه عهد عتیقک ابتدالرنده واقع « اناث » تعبیری « دیشی » دیه ترجمه ایدلشدیر . معنای کلام ایسه طائفه نسا دن اولان فرد دیمکدر . لسانلر ده « دیشی » لفظی حیوان حقیقده مستعملدر ؛ قادینلره

(۱) سن مارق انجیلنک اون آلمنجی بابنک اون بشنجی آیتی .

اولدی ؛ اختیار ، ارکک ، قادین ، چوچق نیچه بیچاره لر قتل عام
 اولندی مالاری یغا ، عرضلری هتک ایدلدی « وهکذا وهکذا . کرسی
 وعظک سیاستدن بچث اولنه جق بر موقع خطابت بولمندیغی ادعاسی بر نوع
 رشوت کلامدر . بویله رشوت کلام ایله ترویج مرام ایتمک ایستین یاووز بر
 ناطقه پرداز ابتدای امر ده سامعینک جذب اعتمادینه چالیشمیدرکه بالاخره
 یورطلیه جنی جواهر آنلر طرفندن بلا تردد یوطیله . غرائب وقایع کائناتدن
 اوللق کرکدرکه افکار صلییونک بویولده تهییجی هر نصلسه دایما انکثره نک
 شرقده توسیع حدود وتأمین منافع ایچون ترتیبات سیاسیة اجرا ایلدیکی
 زمانلره تصادف ایدیور . ایدی رهبان کرامک او مساعی زاهده سی او یله
 ساده دلان ناسه غرض اولندیغی کبی انسانیت بر همت آرزوسیه دکل آنجق
 انکثره نک تدابیر سیاسیة سنه بر خدمت مقصدیله وقوع بولور .



شرق خرستیانلرینی اسلام مظالمندن ، ترك تعلبندن قورتارم دقلری علاناً تعیب ایدیلور . ایشته بوسوك ققره دن آ کلاشیلیور که خرستیانلغك افراد بنی بشر یبنده صلح ومسالمتی مروج اولدیغی حقمده کی ادعای نصارا البته طوغری دکدر ، پاپاسلارله مفسدین سیاستون برلشیورلرده دول معظمه یه « هایدك نه طور ییورسكز بو قدر قوی وكثیر اسلحه تخریبه یه مالکسكز . شرق خرستیانلرینی تخلیص وشرقه ادخال اصلاحات بهانه سیله کیدك شو مسلمانلری اورك ، ییتك ، شو تركرك النده کی مملکتلری آلك ، تقسیم ایدك » ديك ایستیمورلر ! خیر ، خیر ؛ خرستیانلق عامه افراد بشر آره سنده صلح ومسالمتی هیچ بر وقت مروج اولامشدر واوله ماز ، انجیلده « بن روی ارضه ایصال صلح ایچون کادم . خیر ، صلح دكل بلکه بر قلیچ کوندرمك ایچون کادم » دینور (١) وارسون مفسرین نصارا بو آیتی دخی ایستدکاری صورتده اسلوبلیجه تأویل ایتسونلر بزم ایچون معنای آیت صریخدر ؛ شمدی یه قدر وقایع عالم ده آنك معنای ظاهر یسنى مثبت بر حالده ظهور ایده کاشدر . وقت بوقت مسئله شرقیه او یاندیرلدقجه بو تهیج عمومی ده تجدد ایدر . فقط رهبان کرام کویا انکلتره دولتلك شرق مسئله سنده او ینادیغی سیاستدن بیخبر ایمش ده صرف انسانیت نامه هیه جانه ککش کبی کورینور . کلیسارده بو مناسبتله ویریلن موعظه مخصوصه لرده پاپاس افندی شو وجبله کلامه آغاز ایلر : — « کرسی وعظ پولاتیه دن بحث اولانه حق بر موقع دکسه ده نه چاره که شرقده ظهور ایتمکده بولمان وقایع الیه آنی ایجاب ایتدیردی . شرق خرستیانلرینك حالی پك یمان

بويوك اسپتوسلردن طوتيكزده تا عادی کوی پاپاسلرينه وارنجه يه قدر لابس لباس قطرانی هر بر شخص روحانی سوزده قاریشيور . کذالك بو مناسبله مذاهب مختلفه خرسيتازيه صنوف رهبانی آره سنده کی اختلاف معتاد بر طرف ايديله رك کافه ارباب کنيسايك وجود ويك صدا دینه جاك بر صورتده عالم نصرانیتده بر غلیان حس وقوعنی طلبده بولنیور ؛ هم ده اویله بر صورتده که او بابده ابراز اولئان غیرت دینه اهل صلیب دورلری رهبان دیشانک روحنه غبطه بخش اولسه سزادر ! ظاهر حاله نظراً سلاک روحانینک بوفریادی او بیچاره شرقی « خرسیتانلر » نفعه اوله رق قوپاریلیور . مدافعه نفس وسائطندن کلیاً محروم اولان او بدبخت شرقی خرسیتانلر — محضاً عیسایه ایمان ایتدکاردن طولای — مسلمانلر طرفندن وحشیانه تعذیله دوچار اولیورلری یا ؟ ایشه انکثره ده کی رهبان حقیقتکویان حضراتی معصوم شرق خرسیتانلرینک استخلاصنک آنجق « او منفور هلاک بیرینه او مقدس صلیب » رکزیله ممکن اوله جغنی ادعا بویورلر ! حتی بومبارک ذاتلر او ادعایک صحتی ایچون مین ده ایتش اولسهر باشلری آغریماز . انسانیتپرورلکدن دم اوران سیاسینک ترتیب ایتدکلری اجتماعاتی بر خیلی متخیزان رهبان حضور پرغرورلری ایله اهمیتلندیرلر . غلیان افکار عامه نی موجب بلاغتلی نطقلر ، آتشین موعظه لر کرسی خطابدن کواله کی باطلا دیلور . جرائد معتبره نک بر خیلی صحیفه سی رجال کنیسا طرفندن او مظالم اسلامیة علیهنده یازیلان مکتوبلرله طولار . مسلمانلق وعلی الخصوص عثمانلیق علیهنده کی تحریکات صلیبیه نک کافه سنده — بونجه اسلحه تحریبیه یه مالک اولان — دول معظمه خرسیتانیه نک برلشوبده

بلکه محکمہ طلاقی سوق اولیور .

ممالک نصرانیہ نک اکثر پسندہ ازدواجہ متعلق قیودات مذہبیہ او قدر صیق درکہ تاهل ایتمک ایستین کیسه لر غایت متنور الافکارده اولسه لر وابطیل مراسم روحانیہ دن قلباً متنفر یله بولنسه لرینه بر طور جعلی ایمان ایله کلیسا لرده عقد ازدواجہ مجبوریّت حس ایلیور لر . نشانلیسی قولتوغنده اولدیغی حالده ذهاب قلبه رغماً کلیسایه کیدرک عقد نکاح ایچون راهبک تجویز روحانیسنی آلمغه محتاج اولان وجدانلی بر آدم کیم یلیور نه قدر اضطراب درونی حس ایدر !

الحاصل نصرانیتک مراسم تنکیحیه سنده کی او نمایشلی آیینلر فی الواقع بنم کبی احساساتی اولیه غرب مدنیلرینکی قدر رقت کسب ایتمهش بر مسلمان ایچون ییله موجب تهیج بر لوحه شیرین عرض ایدر ؛ فقط شورا سنی ده بیاندن کنیدی آله مام که بو معرض نمایشده برده بویوک بر مسخره لک بولندیغی دخی کوزه چارپار ،



رهبانیتک ادامه نفوذہ اک زیاده فرصت بولدیغی بر منطقه دها واردرکه اوده منطقه سیاسیاتدر . ممالک نصرانیہ نک سیاسیات داخلیه سنه رهبان طرفندن وقوع بولان اشتراک فعلیدن بحث ایتمک ایستیز ؛ یالکز دولترک سیاسیات خارجیه لرینک ملل اسلامیه یه تعلق ایدن قسمندہ پاپاسلرک نه قدر تهالکله اعمال نفوذہ چالیشدقلرینه ایما ایتمک ایسترز . مسلمان مملکتلرینه متعلق اختلافات سیاسیه صنف رهبانجه وعلی الخصوص انکلتره محافل رهبانیه سنجه پک جاذبه لی موضوعلر عرض اییدیور . بوندن طولانی

آ کلاشامقده در . حقیقته ایه مادام که بر ازدواج کلیسا مأمور روحانیسی
یدیه قدسیت عقده مظهر اولما مشدر ، او حالده نظامنه توفیقاً ده وقوع بولش
اولسه ینه خلعتک معتبر کچین صوفی طرفندن ممدوح بر ازدواج تلقی اولمئور .
بو صوف معتبره افرادی وعلی الخصوص قادیئلری ازدواج غیر مذهبی یه
قارشی قیلمنده بویوک بر نفرت بسیلورلرکه بو حس نفرتی — اخلاق عمومیه یی
کویا بر محور حسنده طوتمق ایستین — کلیسا منسوبان و طرفکیرائی
ملاحظه منفعت سیبیله تحریک ایده کلنکده درلر .

عالم اسلامیتده نکاحک عقدی هیچ بر شخص روحانیک همته
محتاج دکلدر . شویله که نکاحک عقدی ایچون طرفینک اقربا واحباسی بر
اوده اجتماع ایله امور عقدی مشاهده و جریان صحت عقده شهادت ایدرلر .
قاضی — که حقیقته بر شخص روحانی دکل بلکه بر مأمور عدلدر — بو
صحت عقده دائر اذننامه اصدار ایلر . عقد ازدواج اقشامی بر اوده اقربا
وتعلقات برلشوب یا امام ویا اوقویوب یازمق ییلور بر ذات دخی زوجین
منعقدینک امتزاج وسعادتنی مستدعی قیصه جه بر تضرعه بولورلر . بو
خصوص ایچون مسجده فلانه کیتمه لزوم کورغز و (ای اب مقدس ،
سوق ایله بزی هدایته) یولنده الهیلرده چاغیرلماز (۱) چونکه بونی چاغیرمقده
اولیه اومولدیغی کی دائماً ای بر نتیجه چیماز . ازدواجلرده جناب
عاقده الامور بعضاً او مقوله تضرعات بشریه یی سمع قبوله آلمدیغندن ابلیس
لعین ایشی همان ید اغواسنه کچریبورده زوجین بر بیت مسعودیته دکل

(۱) انکلز کلیساسنک O,Lead us Holy Father دیه باشلیان رسم

نکاح آلهیستدن کنایه در

آ کلاشيله ماز . شاعرك ديدىكى كې قويدن چىقارلىش بر قاچ طامله صويك
روح بشرى تطير ايدى يامسى خىلى شاشيله جق حالاتندىر .
افرادك حىن وفاتندى ايسه بر تكفين وتدفين متعهدىنك وحى بر
مزارچىنك ييله خدماتى نه قدر ضرورى اولدىغى معلومدر ؛ آنلك ياردمى
اولسه بزدن ابدىآ آيرىلن سود كارمىزك جسدلى ميدانده قالور ، چورر ،
قوقار ، داغىلور . زمان حياتلرنده بزانلرى نه قدرده سومش اولسه ق
بو حالات سببيله هواى تنفسمىزك فسادندن طولايى جسدلرینه لعنت او قومغه
باشلارز ؛ ايمدى تدفين متهدى ايله مزارچىنك خدماتى ايشته انسانى بوييله
ملوث ومهلكه لى بر حالدى آزاد قىلار . حال بوكه تدفين اموات ماده سنده
خلق مأمور روحانىنك اجرا ايلدىكى وظيفه آينه دهآ زياده احترامله باقارده
مزار جىلى واو سياه لباسلى تدفين متهدلرینی مغمور كورر ؛ طبيعت
بشریه ده كى خود كاملقدن طولايى هر كس راهبك ايراد ايلدىكى طلاق
ادعیه ايله متسلى اولق ودهآ طوغرىسى قلبى تفكرات موتك اضطرابندن
تخليص ايلمك ايستر .



« ازدواج » حيات بشرىك اكهيجانلى وقايعندن اولدىغىنن عقد
ازدواج ماده سنده بند رهبان طالب نكاح اولان هر خرىستىانى دهآ شدتله
تحت قیده آلمقده در . اك مدنى عد اولنان ممالك غرىبه ده اكر بر نكاح
نظامنه توفىقآ عقد اولنورسه صحيح صابيله جغندن كليسانك وظائف
تقدسيه سنه قاعده ضرورت بولماق اقتضا ايدر ؛ فقط بو قاعده نك يالكنز
نظرى اوله رق موجود بولنديغى او ممالك متمدنه ده كى جريان احوالدىن

اولان ارکان تضرعیه ، نیچه نمایشلر ، نیچه تکلفات جعلیه هب مراسم مذهبیہ ایلہ مزج اولنوب کیدیور . ایشته ناسک بو یولده کی هوساتنی وزمانک بو مقوله تمایلاتنی ترصد ایدن رهبان صنفی خدمات روحانیہ سنک لزوم وفوائدینی اثبات ایچون یکی یکی فرصتلر کشف ایدرک نفوذ قدیمه سنی ابقایه موفق اولیور ؛ نته کیم آوروپا مؤلفین قدیمه سندن بریسی « خلق طرفدن مراعات اولنان هر دورلو آیین دینلرده کی مراسم ، رهبانیتہ بویوک بر وظیفه آمریت بخش ایدر » دیشیدی (۱)

ممالک غریبه نك هر جهتده کوریلن او تکلفاتلی مراسم دولندن ماعدا افرادک تولد ، ازدواج ووفاتی خصوصاتنده دخی رهبانیتک ایفاسیلہ موظف اولدیغی خدمات بر شرقلی ایچون موجب حیرت اوله جق درجه لرده در ؛ بر آوروپا لینگ منسوب اولدیغی قومک ترقیات علمیه وتنورات فکریه سی حقتنده کی تفاخریله برابرینه اباطیل اعتقاددن متولد ارکان ومراسم سببیلہ — تابشیکدن مزاره قدر — پاپاسلغک تأثیر نفوذینه معروض قالسی او شرقلی نظرنده قابل تألیف کورنمز .

افرادک تولدی خصوصنده بر قابله نك خدمتنه اولان ضرورت پک اعلا آکلاشیلور ؛ زیرا ایه نك اعتنای رقیق ایکی جانک صیانتی کی بقای نوع بشره مهم بر خدمتی موجبدر . حال بوکه طوغان چوجق ایچون تعمید آیینی اجرا ایدن پاپاس افندینک اهمیت مأموریتنه نظراً ایه نك موقعی هیئت اجتماعیه جه پک دون قالور . یا وافتیزک انسانیتہ نه لزومی واردر بر دورلو

(۱) بو کلام Helvetius نام فیلسوفک de l'Home عنوانلی کتانبندن .

بر ایکی نمونه ازانیه سیله اکتفا ایده جکز :

عق تفکر صاحبی اولان بر آلمان فیلسوفی وارسون ایستدیک
 قدر انسانلرک مدعیات مذهبییه لرینی چوق کره مسخره لق درجه سنه واردقلری
 حقنده کی حقیقت بسیطه یی تشریح ایله او غراشسون ، صحیفه لر طولدیرسون ،
 انی کیم دیکلیه جک ؟ بناء علیه چینه ادخال صلیب ایتمک ادعا سیله کیدن
 بر آلمان میسیونه ری چینلیلر طرفندن اتلاف اولنورسه آلمانیا دولتی قیامتی
 قوپارر وچینلیلر دن اخذ ثاره قیام ایدروبو وجهله چینه صلیب نصرانیتی
 متعاقب لوای استیلا داخل اولور . نته کیم چند سنه مقدم بو حال واقع اولدی .
 کذلک بر دین رسمی طانیماق ادعا سیله حریت مذهبییه نک حامیسی
 کچنمک ایستین فرانسه بر طاقم پاپا ساری وطن اصلیلرندن سوروب چیقارر ؛
 حال بوکه ممالک اسلامیه ده مؤسسات نصرانیه احداث ایلین پاپا ساری
 او ممالک حکومتلرینک مضرترینه اوله رق حمایه ایلر . بو ایسه اوویه ادعا
 اولدینفی کی متعصب مسلمانلرک تعرضه قارشى مدافعه حق ایچون دکل
 آنجق او پاپا سارک شرقده فرانسز سیاستنی وآمال سائره سنی تزئید ایده جک
 زمینلر پیدا سنه وساطت ایللرندن ناشیدر .

☆
☆ ☆

مال غریبه دن هر برینک طبقات متخالفه سی آرہ سنده هر آن
 آرتقمده اولدینفی کوریلان هر دورلو رسمیت اجتماعیه آنجق مدنیتک
 ایلرولسندن تولد ایدیورمش . شرقلی بر منقد نظرندہ غربک جماعات
 متمدنه سی آرہ سنده وقوعه کن بو ازدیاد مراسم اجتماعیه نک آیین مذهبی
 خصوصاتنده دهاکمکف صورتده تجلی ایتدیکى آشکار اولور . کویا دیندارانه

بشقه نیجه فوائد مادیه یی دخی حائز اوله جعنی اثبات ایچون عوام ناسجه مقبول وسائط اختراعنه بالطبع بذل جهد ایلر . بو ایسه شرقد نشر نصرانیت ایتیمک اموری نی دول نصارانک نشر تمدن وظائفه توفیقاً اجرا ایلمکله پک اعلا استحصال اولنه بیلور . حتی بوندن طولای اولق کرکدرکه اک معتبر ارکان کنیسا مذکور دولترک لوای استیلالرینک دنیانک اک هجری کوشه لرینه صلیبک ایزی نی تعقیب ایدرک کیر دیکنی افتخار صد دنده بیان ایتمکده درلر . بزم بویله بر اعترافدن استدلال ایده جکمز بر نقطه واردرکه اوده دایماً قلیج وآتش ایله محاط بر صورته طاشینان لوای استیلانک ممالک غیر نصرانیه دهشتنای دخول اولسنه رهبرلک ایدنلرک باشلیجه لری پاپا سار بولنسیدر ؛ حال بوکه بو پاپا سار ناصح صلح ومسالت اولان حضرت عیسی نامه ایفای وظائف روحانیه ایتیمک ادعا سنده بولنیورلر . ایشه پاپا سارک بو نوع اشتغاللردن طولای اولق کرکدرکه انگلیز فیلسوفی مشهور (ه ر بت اسپنسر) بر اثرنده « اقوام وحشیه کهنلری آره سنده اولدیغی کی نصرانی آوروپا ده دخی پاپا سارک نیچه عصرلردنبری محاربات خونریزانه یه اشتراک ایلدکلری کورلشدر » دیور (۱)

ممالک غیر نصرانیه یه ادخال صلیب ایدن میسیونره پاپا سارینک خدماتی آوروپا دول مسئولیه سی طرفندن نه قدر بویوک تقدیراته مظهر اولدیغنه و بو تقدیرات سایه سنده صنف رهبانک اهمیت مسلک لرینی اثباته نه وسعتلی بر میدان بولدیغنه دائر پک چوق مثال کتوریله بیلور ؛ فقط بز بوراده

(۱) اسپنسر رک Ecclesiastical Institutions نام اثرینک اوچنجی

خدمت ایلک اعتقادیلہ تروتلرینک بر مهم قسمی میسیونہر جمعیتلرینہ وصیت ایدرلر . حال بوکہ تجار و سرمایہ داران آره سنده بو جمعیتلرہ معاونت نقدیہ وصیت ایدنلرک ده او قادیلر مثلاً غرض و عوضدن عاری اوله رق ابراز سخاوت ایتیش اولملری احتمالی پکده شہبہ دن آزاده دکدر . بویله برزنکیان آدمک - اغلب احتماله کورہ - میسیونہر لرلک کیتدکلری ممالک غیر نصرانیہ ایلہ مناسبات کسبیه سی بولنیش اوله ییلور . یوقسہ اویله جنات عالیا تده بر مقام راحت بولق امیدیلہ کیسه خیری او قدر بول آچماش اولسہ کرکدر . بر فکر متجسسہ کورہ بویله بر آدم نشر نصرانیت خدمتی اوغورنده ایتیش اولدیغی ہدیہ خیریه سی ایلہ یا ایام حیاتمده طمع ادخارندن وطولانیسیلہ اخوان بشریہ سندن بر خیلینک خرابنہ سبب اولدیغندن ناشی کفارت ذنوب امید ایتیشدر ویا تجارت خارجیہ یه پیشدارلق ایدن او دیندار میسیونہرلرہ امور کسبیه سی ترویج ایلملرندن طولانی فعلاً مقابلہ ایلک ایستمشدر . بو احتمال اخیر عقلہ دہا یقیندر . میسیونہرلرک آفریقا ایجریلرنده کویا نصرانی ومدنی یاقیق ادعاسنده بولندقلری یریلری آوروپایہ اخراج اولان خام اشیا و نباتات صنایعہ یتشدیرمکده چالیشدیرملری وینہ آفریقا وآسیادہ بعض فرنک شرکتلرینک رواج معاملاتنہ دلالت ایتلمی دخی بو احتمال اخیر ی تأیید ایلر .



احوال آخرت حقدہ ترددک آرتقده اولدیغی بویله بر زمانده رهبانیتک خدمات مقدسہ سنہ عامہ ناس طرفندن پکده اعتماد عطف ایدلمیور؛ امید ی اذکیای رهبان پاپا سلغہ عائد اولان وظائفک روحانیتدن

پاپاسلڻڪ بو مقوله خدمات ديندارانه سي تقدير عومي يي جاب
 ايده جك بر خاصه سحرانه يه مالكدر ؛ بو تقدير عامه ايسه رهبانيتك افراد
 ناس اوزرنده كي نفوذ قديمك ادايه سنه خادم اولور . علم الهيات اربابندن
 بر ذات « رهبانيت كندي مسلكنك فائده سزلكي حقهنده بر ذهاب شيوعه
 هيچ بروقت ميدان ويرههكه چالشمليدر ؛ زيرا رهبانيت محضا لزومني
 حس ايتديرمك صورتيه تأسس ايلمشدر « ديور (۱) نفع وظائفني ابراز
 ايتديرمكاه رهبانيتك انكاترده نه درجه يه قدر مظهر اعتبار اولديغي حقهنده
 بر فكر حاصل ايتك ايچون انكليز غزتلرينك دائما نشر ايتدكاري (وصيت
 وتوارث) اعلانلرينه عطف نظر اولمليدر . ايشته اوراده كوريلوركه بعد الوفات
 مؤسسات رهبانيه يه وعلی الخصوص هيسيونره جمعيتلرينه كيتلي پاره بر اقانلر
 آرهسنده اك زياده سماحت كوسترنلر ياعمرلرنده هيچ ازدواج ايدهمه مش
 اختيار قادينلر وياثروت كلييه صاحبي سرمايه دارلر وتاجرلدر . خير متاهل
 قادينلرك وصيتلرنده كي خلوص نيت وساده اك پك آشكاردر . شويلاهكه :
 طالع ناساز او قادينلري كنجلهكارنده كوكلرينك اك بويوك آرزوسندن محروم
 ايتمش اوله كر كدر . بناء عليه حيرتپورانه حركت ايتمكه البته او قادينلر
 تسلي قلب بولورلر وحياتلرنده كي كدر نويمدينك آخرته اجريني كوره
 جكاريني اميد ايدرلر . حال ضلالتده قالدقلى پاپاسلر طرفدن تلقين اذهان
 عامه اولنه كان بونجه غير نصراني افراد بشرك طريق هدايته كتوريله جكه

(۱) بو عباره آلهيات عاماسندن Albert Réville ك

« Prolégomène de l'Histoire des Religions »

نام اثرينك دردنجي فصلندن .

تبلیغی ایله دنیایی کاملاً تنصیرہ مأمور اولمشد. کندیلرنجه دها محقق بر صورتده معلوم اولان اسبابدن طولایی اولمیدرکه کروه رهبان انجیلک تعمیم نصرانیت حقنده کی او حکمنی احکام سائرہ دینہ لرندن زیاده بر غیرتله انفاذه اوغراشمقده درلر . مع مافیه خرستیان کلیساسنه تابع اولان اقوام بشر آرسنده سفسطہ مذهبیه دن زیاده معقولات فلسفیه یه میلان آرتسی او غیرت مذهبیه بویوک بر حائله تشکیل ایلمکده در . بناء علیه مادیات مفیده ایله مشغول اولان بویله بر دورده نشر نصرانیت مقصدی ینه مادیات اوزره حرکتله وزمانک تمایلاتنه متناسب بر صورتده ترویج ایدمک ایجاب حالدن کوریلور . بونی بر مثال ایله ایضاح ایدلم : مثلاً خرستیان اولیان ممالکده نشر مذهب ماده سی دول مستولیه نصارانک ترویج تجارت مساکیله متحداً جریان ایتدیریله یلور . بو فکر حقنده قناعت حاصل ایتمک ایچون مراکز عظیمه تجارتده بولنان بر کلیسایه کیدلمی ده بر موعظه دیکلمی . اوراده نه ایشیدیله جکدر ظن ایدیلور ؟ « حیثیت تجاریه نک اخلاق بر کزیده سائرہ کی اوصاف خرستیانیه دن بولندیغی وای خرستیانلرک ممالک بعیده ده کی تشبثات کسبیه لرینی جناب حقک مطابق مظهر توفیقات ایلیه جکی وانجیلک میسیونه درلر طرفندن صوقولدیغی هر دیاره تجارت نصرانیه نک ده کیره جکی والحاصل صلیک تجارتیه بر رهبر حقیقی اولدیغی » یوللو سوزلر ایشیدیلور . اوت ، زمانزده نصرانیت صایبی رهبر تجارت اتخاذا یلمشد . حتی بر انکلیز دیلوماتی بو حقیقی پاره سده کی انکلیز تجارت اوطه سی مواجهه سنده ۲ کانون اول ۱۹۰۲ تاریخنده ایراد ایلدیکی بر نطق علی ایله تأیید ایتمش و « میسیونه درلر استعداد تجاری یه طریق رواج آچورلر » دیمش ایدی .

ایدر . خرسټیانلده کی کشیشلکک نفوذندن اقوام نصرانیه یه کلن نفع
 و ضرری حاده تمقیددن کچورمه که بر صلاحیتیز بولمیه بیلور ؛ فقط ام
 خرسټیانیه نك اهل اسلام و طائفه یهود ایله وقوع بوله کش اولان تماسنی
 انسانیتک منافی نطقه نظرندن مطالعه ایدرسهك کوریزکه رهبانیتک
 احداث ایلدیکی نفاق خطرناك توکاری اور پرتهجك قدر مدهشدر . صحایف
 تاریخ آنك نفوذ متعصبانه سندن متولد نتایج سیئه ایله طولیدر . اهل صلیب
 غدارلقری ایله (انگریسیون) تجرباتی — که پاپاسل طرفندن التزام و ترویج
 اولمشیدی — اخلاف بنی بشر ایچون دائمًا نفرته یاد اولمغه مستحق
 احوالندر . رهبانیت بوزمانلرده دخی ملل نصاری ای او مقوله کبائر جرائمه
 سوق ایلمکه قادر دکلسه ده عصرلردن بری مالک اولدیغی نفوذ فوق العاده
 سنك الیوم عالم نصرانیتده کوربان ترقیات فکریه نسبتنده بر سرعتله زائل
 اولقده بولندیغی ده پك او قدر طوغری اولسه کرکدر . بوندن ما عدا
 مسالکنده کی تلون حیل سببیه بو رهبانیت خرسټیانلرک قرون وسطادن بری
 توارث ایده کلدکلی سوء ظن متعصبانه لرینی مهما امکان احیا و ادامه یه
 مقتدر اولوب کیدیور . بو نفاق تعصبک ترویجی اسکی زمانلرده اولدیغی کبی
 صرف جهالت و اعتقاد دینی اوزرینه دکل آنجق دورک تمایلات سیاسیه
 اجتماعی سی نظر دفته آلهرق اجرا ایدیه بیلور .



رهبانیتک بو دورلرده دخی نفوذ قدیمه سنی اجرا ایچون عامه
 نصارا نك معاونتی نه صورتله استحصال ایده بیله جکنی تدقیق ایده لم :
 معلومدرکه خرسټیان رهبانلغی احکام انجیلیه نك کافه بنی بشره

احتیاج حس ایتدکری الطاف الهیه نک طلبنده ویا ارتکابندن کندیلرینی
آله مدقاری معاصینک کفارت ذنوبنده پاپاس شککنده بر سیمساره لزوم
وار ایمش !

وظائف دیانتی ایفا خصوصنده کی دلالت رهبانه کلنجه : ابتدای
امر ده شوراسی بیللملدرکه اوپله بر خدمت اسلامیتجه ضرورت قطعیه دن
صایله ماز . احکام دینیه یه آز چوق وقوفی اولان هر فرد اجرای امامت
وارکان عبادتک اداسنه دلالت ایده ییلور ؛ چونکه نه ارکان دیانت نه ده
مراسم معتاده عبادت طنطنه لی تکلفاته تابع قیامامشدر . فی الواقع وظائف
طاعتک اجراسنده صاریقلی جبهلی بر طاقم ذواتک دلالتی کورلمسکده در ؛
انجق بو ذاتلر حقیقتده نه بر صنف روحانی یه منسوبدرلر نه ده امتیازات
معنویه یی حاوی بر صفت استحصاله صلاحیتدار درلر . بناء علیه اماملرک
حالی - آنجق بر مقام روحانیدن اجازت آملقه وظائف رهبانیت اجرا
ایده ییلن - پاپاسلرک صفتنه قیاس ایدیلنه من .

اسلامیتده پاپاسلق سلکینک تأسیسنی مانع بر مقصد دها واردرکه
اوده خدمت رهبانیتک ازمنه قدیمه ده کی کاهنلکدن تولد ایتمش بولمسیدر .
کاهنلک ایسه اعتقادات باطله ایله اذهان ناسی ضلالتنه سوق ایتدیکنندن
مکروه بر شغلدر . فی الواقع ازمنه اخیره ده کی پاپاسلق - ازمنه قدیمه
جاهلیه ده کی کاهنلک کی - افعال سحریه اجراسیله مشغول اوله ماز ؛ مع
ما فیه ساده دلان ناس اوزرنده نفوذ مسحرا نه اجراسندن ده خالی قالماز .
ایمدی رهبانیت بویله جه اجرای نفوذ ایلمسندن طولانی کرک ایچنده بولندیغی
هیئت اجتماعیه یه وکرک علی الإطلاق نوع بشره فائده دن زیاده ضرر ایراث

رهباندر، اشخاص رهبان دكلدر. هيچ شبهه من يوقدر كه پاپاسلردن بعضيلري شخصيت اعتباريله هيئت اجتماعيه نك اك معتبر طبقانته منسوب ذوات درجه سنده فضائل شخصيه يه مالكلدرلر .

امت محمدك افراد منوره سنك ذهانبجه اسلاميتك اك زياده غير قابل تأليف اولان خصمى نصرانيتده كي پاپاسلقدرد ؛ چونكه پاپاسلغك ماضياً وحالاً اسلاميت عليهنده جهانك سوء ظن وغرضى تحريك ايدة كلديكي و بناءً عليه اهل اسلامك حقوق مهمه سنى سكته دار ومؤسساتنك اك معززلرين تارومار ايتديرنكه چاليشديغى بر امر ثابتدر .



بعض مؤلفرك ادعاسنجه دنياده رهبانته مالك اولمان هيچ بر مذهب يوقش . بوا دعا اعتراضدن سالم بر حقيقتى متضمن دكلدر ؛ چونكه فى الواقع نصرانيتده — تعبير انجيلسى وجهله — مقدس بر رهبانيت (۱) موجود اولديغى حالده واضع ديانتز اولان حضرت محمد « لا رهبانية فى الاسلام » كلام مجبلى ايله مؤسسه رهبانيه نك تشكلى صراحةً منع ايلمشدر . عجباً اسلامده رهبانيت نه كي ملاحظاتدن طولاني تجويز اولمىدى ؟ قوة خالق ايله مخلوق مدرك اولان بشر آره سنده توسط مناسبات ايچون ينه افراد بشردن بولنان كيسه لك همتته احتياجي عقل سليم قبول ايتزده آنك ايچون . خرسيتانلده ايسه اويله جه بر شخص ثالثك آره يه كيرمسنه اوتنه دنبرى حاجت مس ايتمش ؛ كوياكه انسانلرك دائماً

(۱) بو تعبير سن پترو انجيلنك برنجى قسمى برنجى فصانك بشنجى آيتده

اوچنجی فصل

خرستیانلقده رهبانیت وموقع اسلام

هلال ایله صایبک مناسباتی اساساً بر صورت دوستانه ده جریان ایتمک لازم کلورکن عکس حال واقع اولدیغی وتضاد متقابلنهک عالم نصرانیت طرفندن احداث ایدلدیکی فصل سابقده کی اشاراتدن منمهم اولشیدی . مزایا و اوصاف نصرانیهک شرقة انتشارینی ترویج ایدن بر انکلیز مستشرقی « خرستیانلقک بر رقیب مضری وار ایسه اوده دین اسلامدر . مذاهب مختلفه مجوسیهک هیچ بر یسندن خرستیانلق ایچون حذر اولنه حق بر صورت ملحوظ دکلدر ؛ نفس اسلامیتده ایسه بزم ایچون قوی وموثر بر عداوت مندمعدر « دیور (۱) بوقول مناسبتیه بزده ادعا ایده ییلورز که اسلامیت ایله نصرانیت آره سنده کی شغلۀ عداوتی ایقاظ ایدن بر عنصر مضر وار ایسه اوده خرستیانلقده کی رهبانیت در . بناء علیه بو فصلده رهبانیتک اسلامیت علیهنده کی معامله سندن بحث ایده جکمز . اول امر ده شوراسنی قیده لزوم کوریرز که بز رهبانیت حقنده کی ملاحظاترله هیچ بر فرد راهب حقنده ذره قدر بر ایماء محقرانه ده بولمق ایستیورز . موضوع بحثمز مسلك

(۱) Sir William Muir نام مستشرقک Muhammedan Contraversy

عنوانلی اثرینک ۲ نجی صحیفه سندن .

اولدیی اوزره خلیفه المأمون دورنده خرستیان و یا یهودی نیچه علمای دین و فلسفه مسلمانلار ایله مباحشه یه دعوت اولنوردی و هرکس نقطه ملاحظه سنی ایستدیکی کبی تشریح و ترویجده سربست بر ایلوردی . آمریقایی بر مؤلف فاضل بو خصوصی تأیید ضمننده « جماعات مختلفه یه منسوب اولان بو علما یا لکمز مظهر شرف علما اولقله قالمالزردی ؛ بر ده آنلره اک مهم مناصب حکومت تودیع ایدیلوردی . بر آدمک تولدی ، مملکتی و یا افکار دینه سی نه اولورسه اولسون بورلاری هیچ ده قاله آلمازدی » دیور (۱)

تاریخدن اوکرده بیلدیکمز اخباره نظراً اوزمانلر آوروپای نصرانی ده هیچ بر مملکت یوقدی که عین مقصدله علمای اسلامدن برینک وجودینه تحمل ایده ییلسون . حتی اسلامده بو حریت مذهبییه نك ، بو مساعدات انسانیتکارانه نك تأسیسندن عصرلرجه صوکره بر مذهب نصرانیت اربابی دیگر مذاهب نصرانییه یه منسوب اولان علما نك وجودینه بیله تحمل ایده مزلردی . بر صنف نصرانیتیه منسوب اولان نیچه ذوات فاضله اکتساب تفوق و تغلب ایدن دیگر صنف اربابی طرفندن آتشده یا قیلهرق اتلاف ایدیلوردی ؛ هم ده او یله بر صورتده تلف ایدیلوردی که احراق خصوصنده کوستریلن وجد شوق معبود باطلاری نامنه انسان قربان ایدن قبائل وحشییه غبطه لر بخش ایده جک درجه ده بولنمش اولسه کرکدر !

“ History of the Conflict J. W. Draper (۱) نام مؤلفک

Between Religion and Science عنوانی اثرینک دردنجی فصلندن

ایدی (۱) بر حدیث مروی یہ نظرآ بر مسلمانك والدہ سی خرستیان بولنوبده مرض ویاشیخوختی حسبیلہ ادای عبادت ایچون کلیسایہ کیمکھ مقتدر اولہ مازسہ اومسلمانك والدہ سنی ، دکل آت ویاعر بہ ایلہ ، حتی ضرورت مس ایدرسہ آرقہ سنہ بیلہ بیندیروب کلیسایہ کوتورمسی امر ایدلمشدر .

☆☆

خلفای اسلامك سرایلرنده صاحب علم وکمال بر چوق خرستیانلر مظهر توقیر اولہ کلمشردی . حوضہ نصرانیت خارجنده بولنان اقوامہ افکار عالیہ انسانیتکارانہی لایق کورمیه جک درجہ ده سوء ظن صاحبی اولان بعض آوروپا مؤلفری علمای نصرانیہ حقنדה کوستریلن بو تقدیر احترامکارانہی کویا آلرہ مخصوص اولان بر تفوق ذکایہ عطف ایتک ایستورلر . بولنرك ذہانجہ غالباً بویله بر ذکای متفوق خرستیانلرہ قوۂ قدسیہ طرفندن منحصرآ بخش ایدلمش بر موهبہ اولمی . سوء ظن جبلی بو مؤلفرك بصیرت انصافلرینی او قدر باغلاش اولمیدرکہ مسلمانلرك دخی نوع بشرہ منسوب اولدقلرینی و بناء علیہ هر درلو موهبۂ خلقتدن انلرك ده حصہ دار اولملری اقتضا ایدہ جکنی عادتاً کورہ من اولمشدر . اسلامیت قدیم دن بری علم و عرفانی توقیر ایتمش اولدیغندن او علم و عرفان اصحابك مذهب وجنسیتنه باقیماز ؛ ایشته بوندن طولاییدرکہ نیچه عالم یہودیلا دخی دول قدیمہ اسلامیہ نك مناصب عالیہ سنی احراز ایلہ مشرف اولمشردی . « علم مسلمانلرك غائب اولاش مالی کبیدر ؛ آتی نرہ ده بولورلرسہ هان آلمیدرلر » مآندہ کی حدیث شریف اهل اسلام آرہ سندہ پک معروفدر . خلفای عباسیہ تاریخی اوقویانلرجه معلوم بر کیفیت

(۱) ینہ T. W. Arnold ك مذکور اثرینك الی طقوزنجی صحیفہ سنہ باقیلہ

طوشمشلردی . آنلری مضاربهدن آییروبدە موقەمک قدستی تلویت
مشاتمەدن صیانت ایتمک ایچون آریه کیرن مسلمان عسکرلردن بعضیلری
شدتله یارەلتمش وضابطلردن بریسی دە برکوزینی غائب ایتمش ایدی .



اوائلدە خرستیانیلرک بشقە بر موقە مقدسی دها واردی که اهل اسلام
طرفدن احترامات مخصوصه ایله توقیر ایدلدی ، اوده دمشق شامده بولتمش
اولان (سن ژان) قاته درالی ایدی . بلدە مذکورەنک فتحندن صوکره
مسلمانلر نصارانک رضاسیله (سن ژان) معبدینک بر جەتندە عبادتە باشلەشلر
ایدی . بو اشتراک معبد سکسان سنە قدر دوام ایتدی . خرستیانیلرە فاتحین
اسلام طرفدن ویراش اولان آماننامە سببیلە انک مسجده تحویلی و صرف
عبادت مؤمنینە تخصیصی طلب اولمندی . فقط صوکردری خرستیانیلرک کویا
آلهی تلاتوی اولمق اوزره ایشی واویلائی تغنی یه اوردیرملری مسلمانلری
پک چوق ازعاج ایتدیکندن فکر اشتراکدن واز کچدیلر ومع ما فیہ معبد
مذکور یئە کندیلر یئە حصر ایتمک قیدینە دوشمیدیلر . (١)



یئە خرستیانیلرە تأسیس مقارنت آرزوسیلە رُجال مسالەنک نسوان
نصرانیە ایله ازدواجی مشروع قلمش ایدی که مسلمانلرە واران قادیلرک تبدیل
دیانتە اجبار اولملری هیچ بر وجهلە تجویز اولمندی . خرستیان قادیندن متولد
بر سردار اسلام والدەسک . عبادتی ایچون بر کلیسا انشا ایتدیرهش

(١) T. W. Arnold نام ذاتک Preaching of Islam عنوانلی کتابنە

باقیلە . صحیفه ٥٠

ایچون بر موقع احترام اولمقده دوام ایلدی .

ایمدی ملاحظات سیاسیه دن زیاده بو احترام دیندارانه دن طولاییدرکه اعصار متعاقبه ده مسلمانلر ارض قدسی اهل صلیک استیلاسنه قارشی مدافعه ایتشلردی ؛ بونجه جانلر فداسیله وقوع بولان مدافعاتله غربک اباطیل اعتقادات وسیئات عاداتک صلیبیون طرفندن ارض قدسه ادخالنی منع ایتمک ایستورلردی ؛ زیرا او صلیبیون که انسانلر آره سنده صلح و مصافات تأییدینی توصیه ایتش اولان حضرت عیسانک امتدن اولدقلرینی ادعا ایتدکاری حالده صلح و مسالمت بین الملک مقتضیاتنه مغایر نیچه افعال خونریزانه ارتکاب ایتمکله نه مقوله مخلوقاتدن اولدقلرینی شرقلیره اراءه ایلورلردی .

زمانمزه دخی مسلمانلر طرفندن قدس حقنده کوستریلن آثار احترام خاچه طاپان طوائفک اظهار ایلدکاری علائم تقدیساتدن زیاده خالصانه در . بیت المقدسک آناختارلری بیله مسلمان محافظله تودیع اولنیور ؛ نیچون ؟ قدسده بر حکومت اسلامیة اداره سی موجود ده آنک ایچونمی دینیه جک ؟ خیر ، اسباب سیاسیه دن طولایی ! تقوای دیانت دعواسنده بولنان فرق خرسیتانیه دن هر بری دیگرینک اکتساب تحکم سیاسی ایتمک مثلاً بر مقصد غیر مقدس اوغورنده چالشدیغنه دائر اشتباه قوی حس ایلور . اون طقوزنجی قرن میلادینک اک بو یوک محارباتندن اولان قریم محاربه سنک اسباب اصلیه سندن بریسی ده ارضی قدسده ملل نصارادن بعضیلرینک تفوق نفوذ استحصالنه چالیشلرینک دیگر بعض مللر طرفندن اعتراض رقیبانیه دوچار اولسی ایدی . بوندن ده اچند سنه مقدم طوائف مختلفه یه منسوب بعض رهبان غرض رقابت وحسد ایله بیت المقدس جوارنده بر عریده باغیانیه

ایدیلن عداوت متعصبانه یی خرستیانلر کندی آرہ لرندہ آراملیدرلر . بو عداوتک احداثده خرستیانلقدہ کی رهبانیت سلکنک بر عنصر نفاق تشکیل ایتدیکی بر امر محققدر .



عالم اسلامیتک اک شوکتلی دورلرنده ییله خرستیانلرک ماشانہ چایلشلیغنی مثبت احوال سائرہ موجوددر . نصاراجہ مکرم اولان ارض قدسہ مسلمانلرک نہ درجہلرده احترام کوسنر دکلیینی بوکا بر برهان واضح اولقی اوزره ایراد ایدہ ییلورز . ظهور اسلامدن صوکرہ قدس شریف بر خیلی مدت مسلمانلر طرفندن قبلہ کاه عبادت اتخاذا ولتمشیدی (۱) حضرت محمد بو وجه عبادتی بلا مشکلات تبدیل ایدہ ییلوردی ؛ زیرا تقوی دینیلن شی یا شو جہتہ ویابو طرفہ طوغری اتکای تواضع ایلمک دیمک دکلدی ؛ نتہ کیم قرآن کریمده (لَيْسَ الْبِرَّ أَنْ تُوَلُّوا وُجُوهَكُمْ قِبَلَ الْمَشْرِقِ وَالْمَغْرِبِ) بویورلمشدر عالم اسلامیت ایله نصرانیت آره سنده بر جسر مصافات تأسسیني منعدہ بر فائده ملاحظہ ایدن طائفہ یہود بو خصوصده اعمال دسائس نامحدود ایلدکلرندن حضرت پیغمبر عاقبت اوقات طاعانده قدس شریفہ توجہ عادتندن واز کچدی . (۲) مع ما فیہ ارض قدس اهل اسلام

(۱) راہب D. D. Smith ک Bible and Koran نام کتابنہ

باقیلہ ۳۹ نجی صحیفہ

(۲) Encyclopaedia Britanica نام قاموس محیطک Muhammedanism

مقالہ سنہ باقیلہ . جودت پاشانک قصص انبیاسنده دخی بوکا دائر بر اشارت وارددر .

ایدیوردی . شوآیت کریمه عیسویله قارشى اسلامك اوائلد نه کبی بر حس
ایله متحسس اولدیغنی اثبات ایدر . وَلَتَجِدَنَّ أَقْرَبَهُمْ مَوَدَّةَ لِلَّذِينَ آمَنُوا
الَّذِينَ قَالُوا إِنَّا نَصَارَى (۱) شفقت ومودت جهتله کندیلرینه الك یقین بر
طائفه عد ایتدکلری نصرانیلرک آلامیله اهل اسلامك اوائلد نه قدر متأثر
اولدقلرینه مثال اوله رق شووقعه تاریخیه یی ذکر ایدلم : حضرت پیغمبر مکه
محو سیرلی ایله اوغراشدیغی بر صرهدده ایران محوسلرینک بیزانتین خرستیانلری
اوزرینه بر غلبه عظیمه سی وقوعه کلشیدی . محوسلک حسبیله ایرانیلری کند
یلرینه مذهبداش واهل کتاب اولملری سبیله خرستیانلری اهل اسلامه طریق
آهی ده یولداش عد ایدن مکه لیلر ایرانک بو غلبه سنی آقیشلیدلر و بناء علیه اهل
اسلامه خبر کوندرک یقینه کندیلرینک دخی « اخوان نصرانیه لری » کبی
مقهور ایدیله جکلری یولنده اعلان تفاخر ایلیدلر . خرستیانلرک مغلوبیتی خبری
حضرت پیغمبر ایله اصحاب کرامنی پک مأیوس ایتش ایدی ؛ مع مافیه آره سی
چوق کچمدی (اَلَمْ غَلِبَتِ الرُّومُ فِي اَذْنَى الْاَرْضِ وَهُمْ مِنْ بَعْدِ غَلَبِهِمْ
سَيَغْلِبُونَ) آیت (۲) کریمه سنک تبلیغ کرامت آوری اوزرینه قلوب مسامین
بر ظفر قریب امیدله تسلی بولدی . آره دن بر ایکی سنه قدر بر مدت
کچدکدن صوکره یعنی میلادک ۶۲۵ تاریخنده وقوع بولان دیگر بر محاربه ده
ایرانیلر مغلوب ایدلدی واوردولری تمامیه بیزانتین امپراطورلغناک حدود
ممالکندن خارجه سورولدی .

ایشته بوندن آکلاشیلیورکه خرستیانلق علیهنده اسلامیه اسناد

(۱) سورة المائدة نك سکسان بشنجی آیتنه باقیله

(۲) سورة الروم ك ایلک آیتنه باقیله

جرائم منقوره اربانه لایق اوله جق اولیله بر صورتده اعدامی حوصله ادراك اسلامه صیغیه جق قدر رابطه سز بر روایتدر . بر آدمی الوهیت مرتبه سنه چقارمق و صوکره اکاسفلی بر صورتده جزای اعدام لایق کورمک فکر مسله ییجه یالکز منطقسزلق دکل بلکه بر کفردر . خرسیتانلرک « حضرت عیسی امتک کفارت ذنوبی ، خیری ایچون او عذاب چکدی » یولنده کی ایضاحاتی نصرانی اولیان بر منقادی اقناعه هیچده کافی دکلدنر . انجیلک اوبابده کی حکمنی بر نسخه مغفرت ویاحائل سلامت فرض ایدوبده « عیسی بزم کناهلره ایچون عذاب موت چکدی » دیهرک آتش جهنمه قارشی کندیلرینی سیغورطه لی ظن ایتک وایستدکاری قدر ارتکاب معاصی ایلمک غالباً بر چوق خرسیتانلرک ایشنه یرایور . بوخاچه چکلمک حقنده مسلمانلرجه دینله جک بر سوزدها واردرکه اوده : خرسیتانلرک ، ایمان ایتدکاری بر ذات قدسیسماته اولیله جه بر فوت سفلی اسنادیله قناعت ایتیه رک او فوتک اشکال مخیله سنی صنایع نفیسه ده کثرتله مستعمل حزلی بر موضوع ترسیم یاپمیلریدر ؛ اولیله بر موضوع ترسیم که نه برخاصه حقیقه مالکدر نه ده طبع مهذبه موافق ! ابن الله دیدکاری حضرت عیسیای چیریل چیلاق بر صورتده چارداغه چکدیر یورلرده وجودینک اوتیه سنه بروسنه صاپالانان اوقلرک جریحه لرندن قیزیل قانلر آقیتدیر یورلر ؛ نه ده منفور بر تصویر مخیل !



شیمدی تاریخک بزه کوستردیکی امثله سائرده ایله ده اسلامیتک اساساً مذهب عیسویه مخاصم اولدیغنی اثباته نقل قلم ایدلم : حقیتمده اسلامیت اهل مسیحی ضدشکیم صورتنده دکل بلکه طرفدار رحیم مقامنده فرض

احترامکارانه ده بولنورلر . اعتقادات مذهبيه قارشى وقوع بولهيله جك تجاوزلك جرائم شديده دن عد ايدلديكى دورلده حضرت عيسانك قدسيت تولدى حقه ده تعدى ايدنلرى اهل اسلام جزايه چار پار ايدى . بر انكليز مؤلفنك روايته كوره و قتيله بر خرستيان قبول اسلام ايتمش و آندن صوكره يكي دينداشلىرى كويا ممنون ايلهك ذهاب جاهلانه سى ايله عيسى عليه السلامه شتم و لعنتده بولمش . حال بوكه آنك بو تجاوزى اوزرينه مسلمانلر كنديسى حضور قاضيه كتور مشلر و اعدامنه حكم طلب ايلمشلر (۱) و قتيله ممالك عثمانيه ده دخى بوكا مائل بر وقعه حدوث ايتكله محكمه شرعيه عين صورته تعيين جرم ايتمش . شويله كه : بر يهودى حضور مسامينه حضرت عيسانك تولد نا مشروعى ادعا ايلمش و بناء عليه بو تقوى اوزرينه حكم اعدامه مستحق كورلش (۲) طبعى بو جزا يهودينك تجاوزندن طولاي اولوب تولد مسيحك قدسيتنه عدم ايمانندن ناشى دكلدر ؛ چونكه اكراهى تجويز ايتمن شريعت اسلاميه بر كيسه يي ايناندينى بر مذهبك عقائدينى قبوله اجبار ايلمز . اسلاميتك وفات عيسى حقه ده كى اعتقادى دخى عيسويلرك ذهابنه مخالفدر . كرك تاريخاً مثبت بر حقيقت اولسون كرك اولسون اسلاميت حضرت عيسانك خاچه چكديكى روايتنى قبول ايتمز . آنك يرنده بشقه برينك خطاء خاچه چكلمش اولهيله جكى نظريه سى مسلمانلرجه عقله ده ا يقين كوريلور ؛ چونكه مسيحك موقع علويسى ايله

(۱) Bosworth - Smith نام ذاتك - Muhammed and Muham

عنوانلى كتابنك ۲۶۹ نجى صفحه سنه باقيه
medanism

(۲) فتاواى على افندي ده بوني مصدق بر فتوى صورتى واردر .

ایستملر . آرهدن بر مدت کچدکدن صوکره آکا « قاچ الله وار ؟ » ديه
 صورمشلر . ترك ده جوابنده « بردانه بيله يوقدر » ديمش . بونكله دوچار
 حيرت اولان اصحاب سؤال « نه ديمك ، دها كچن كونه قدر الله بردر ديوب
 طور بيوردك يا ؟ » يوللو استيضاحده بولنجه ترك ده « اويله اما سرك پاپاسلر يكر
 بكا آنى ده يديروب يوطيردى » ديه مقابلهده بولنمش . مكرسه قبول نصرانته
 علامت اولق اوزره تركه ويريلن تعميد صوي وعشاى ربانى ترك
 ايچريسندن ابليس لعنى اخراجه قادر اوله مامش ! عجا نيچون ؟ بو مقوله
 نصرانى آينلرينك ترك اوزرنده خاصه كرامتنى كوسترمه مسى ترك جنسندن
 اولان بر كيسه نك - مشهور غلادستونك بر تعبير غليظى وجهله - انسان
 شكللى انسانيتسز بر مخلوق (۱) اولديغى ايچونى ؟ بو حكايه ارتداد وهله
 اولى ده جديتن عارى كورينه ييلور ؛ مع ما فيه عقل سليم صاحبي بر مسلمانك
 نصرانيت كلياسانجه مرعى اولان اعتقاداتى هيچ بر وجهله قبوله رغبت
 ايتيه جكنه بر مثال واضحدر .



كندى رسوللرينك كافه افراد بشركى طوغوب وفات ايلديكنى بيلن
 مسلمانلر حضرت عيسايه « روح الله » تسميه ايده جك قدر بر اعتقاد

(۱) Anti-human specimen of humanity يعنى انسان شككنده
 انسانيتسز مخلوق تعبيرى عالم نصرانيتك بر بويوك آدمى صايلان غلادستون
 طرفندن استعمال اولنشيدي . موسوف طرفدار لغنى التزام ايدوبده روسيه ايله
 صوك محاربه مز صردسنده علمه مزده Bulgarian horrors ناميله يازديغى
 رساله منفوره سنك ۱۳ نجى صحيفه سته باقيه .

رد ایتمکه برابر اسلامیت حضرت عیسانک قدسیت تولدینی انکار
ایلمه مشدر . پروتستانلک مؤسسی اولان (لوتر) بیله . « مسلمانلر عیتینی
حقنده شهادت تکریمده بوانورلر » دیه بو حقیقتی تسلیم ایدیور (۱)
فی الواقع بر حس حقیقجویانه یه مالک اولقله اکثریتدن تمیز ایدن بعض
خرستیان محررلری اسلامک بو شهادت تکریمینی انکار ایلمیورلر ؛ فقط
بونلرده مسلمانلرک حضرت عیسانی تمامیله « صفت حقیقیسنده »
طایمداقارینی مؤاخذه ایدیورلر . اوت ، مسلمانلر البته عیسی علیه السلامی
خرستیانلرجه ویریلن بر صفتده طایفه مازار . مثلاً « اب ، ابن ،
روح القدس » کی بر اعتقاد مذهبینک حکمی انظار اسلامه دائماً آکلاشیله .
ماز بر صورتده معروض اوله کمشدر . حتی عالم شرقک افکارنده تحری
معقولاته میلان آرتدقجه او مقوله احکام اعتقادیه نک مبهمیتی دهه زیاده
عجیب کورینه جکدر . شو دانشمند میسیونه رلرک بو کی احکام مذهبییه
حقنده ویردکلی ایضاحات مدققانه نک بر قوه اقناعیه یی حائز اوله بیله جکی
فرض ایدله مایدر . غربک علما ی کینسائییه سنک مهارت مدققانه لریله اعمال
اولنه بیلن نه قدر دلائل وار ایسه اورته یه کتورلسون ینه او اوچ کله نک
حقیقته نه مفهومی متضمن اولدیغنی اهل اسلامه آکلاشمه خدمت ایده مز .
بو مسئله مناسبیله خاطره کن عجیب بر حکایه یی بر وجه آتی نقل ایدلم
وقتیله بر موسقوف جنرالی حربه اسیراً آلان کنج بر عثمانلی یی پارسه
کوتورمش . پارسده بعض اصحاب انجیل بو مسلماننه نصرانیق قبول ایتدیرمک

(۱) Luther's Table Talk نام انکلیزجه کتایک ۳۵۹ نجی

صحیفه سنه باقیله

محمدك مقتدرى بزه واضحاً بيان ايده ميورلر . زمانزده آوروپاي نصرانيك
 عادت و رسميت صورتنده تعقيب ايتديكي خريستيانلق يعنى او ايمان جعلى —
 كه بز مسلمانلر نظرنده جاذبه كرامتنى ارائه ايده جك بر شكلده دكلدر —
 عجباً حضرت محمدجه دهامقبول بر وجهله تلقى ايديلور ميدي ظن اولميور ؟
 مسلمانلرك اعتقادنجه حضرت محمد كجى عيسى عليه السلام دخى تبليغات
 معنويه يه مظهر اولمش بر « رسول » ايدى ؛ شو فرقله كه حضرت پيغمبر
 تبليغات قدسيه نك مائى هر درلو تغليط وتبديله قارشى صيانت ايچون آيات
 قرآنه نك حافظه يه نقشك بر امر خير اولديغى ذكر ايتدى . بوندن
 طولاييدر كه وفات پيغمبر يدن تا زمانزه كانجه يه قدر جهان اسلاميتك هر
 طرفنده يوز بيكارجه كيمسهر قرآن كريمى عبارء اصليه سى اوزره حفظ ايده
 كيشلردر . حادثات عالمك جريانى صمره سنده بعضاً اساطيرك — حقى آرز
 بر مدت مروريله بيله — حقيقت محضه شكلنه صوقولديغى وبعضاً دخى
 حقايقك خرافاته قلب ايدليكي دوشونيلورسه حفظ قرآن امرينك نه قدر
 معقول بر تدبيره مستند اولديغى آكلاشيلور . بر مصحف دينى كه او
 دينك واضعنك وفاتندن صوكره قرناً بعد قرن بر التقاط غير منظم ايله
 وجوده كتورلمشدر ؛ ايمدي او دينك احكام قدسيه سنى صحت اوزره شامل
 اوله ماز وهر حالده بر دين حقاك كتاب مقدسى اولق اوزره عالمه عرض
 ايدلمه مك مناسبدر . اهم غير نصرانيه نك قبول وتقديسى ايچون غربيلر
 طرفندن ميليونلرجه نسخه سى دنيانك هر طرفنده نشر ايديلن انجيل ايسته
 بويله بر مصحفدر .

انجيلك نسخ موجوده سنك بر قدسيت اصليه يه مالك اولديغى قولنى

ومؤلفری وارد در که صلیبه معتقد بولان خلقك هلاله اتباع ایدن افراد نوع بشر
 حقنده کی بغضنی تحریک . غرضنی تحریشده بر فائده کوررلر . ایشته هلالك
 صلیبه مخاصم اولق اوزره شیوعی بولر طرفندن ترویج اولنه کمشدر . بو فصلك
 سرلوحه سنده هلال ایله صلیبی بر برینه مقابل اوله رق استعمال ایتمک کلمز
 ایلك باقیشده اسلامیتك خرسیتانلغه ضد اولدیغنی ایما مقامنده تلقی اولنه بیلور .
 حال بوکه مسلمانلق اساساً خرسیتانلغه ضد اولماق اوزره وضع ایدلشدر . حتی
 آشاغی ده ویره جکمز امثله تاریخیه نك شهادتندن آ کلاشیله جفی اوزره
 اوائل اسلامده او یله بر ضدیت قطعاً مفقود ایدی . دیانت اسلامیه حضرت
 عیسانك تقدیسی امر ایدر واهل اسلام آکا بر مذهب حق احکامك
 تبلیغ معنویسی وقوع بولدیغنه قائلدرلر؛ شوقدرکه موجود اولان نسخ انجیلیه نك
 بو احکام معنویه بالغه بی احتوائده یله جکمه اینانمازلر وکتب انجیلیه دن
 هیچ برینك قدسیتنی قبول ایتمزلر . ازمئه اخیرده آوروپاده بیطرف
 مقتدین هلم طرفندن انجیلک اصله دائر وقوع بولش اولان تحقیقات
 تاریخیه نك تبعی اسلامك اسکیدن بری ادعا ایلدیکی او ذهابی تأیید ایلر .
 بو ذهابی ابطال ایچون مروج ارکان نصرانیت اولانلر طرفندن « دیانت
 اسلامیه مؤسسك انجیل حقنده کی فکری کلیاً خطالی اولدیغنی ویا لکزکندی
 زماننده عربستان و سوریه ده معلق و غیر مصفا بر صورتده موجود بولشمش
 اولان خرسیتانلق اوزرینه بنای فکر ایلمکله خرسیتانلغك روحنه وغوامض
 مزایا سنه کسب وقوف ایده مدیکی » یوللو بعض دیسز ادعالدن بشقه
 دلائل مقعنه سرد اولنه مدیغنی کورلمکده در . فقط انتشار اسلام دورلرنده
 الك خالص ، الك مذهب شکل نصرانیتك نره ده موجود اولدیغنی حضرت

ایکینچی فصل

هول و صلیبک مناسبات قیومی

« هالال » کلمه سنک اسلامیه بر علم اولوق اوزره استعمال ایدیلدیکی کورلمکده درکه اسلامک بو وجهله تسمیه سی آوروپالیرک اختراعاتندن اولسه کرکدر؛ زیرا بو استعمال یالکز آوروپا سانلرینه منحصر در . امت محمدجه ولوکه مجازاً اولمش اولسون - دین اسلامک بو تعبیر ایله اطلاق عادتاً بر نوع کفر در؛ چونکه آنلرجه هیچ بر اودون ویا معدن پارچه سی ویاخود اشارت هالالی حاوی اولان بشقه برشی نشانه اعتقاد اوله ماز . « هالال » علامتک ابتدا رومالیر وصوکره بیزانتینلر طرفندن قوللانلدیغی بعض آثار عتیقه دن آکلاشمقده در . عثمانلیر ایسه بو اشارت هالالی بیزانتینلردن آلمشلولوی میلرینه علامت یامشلردر فی الواقع شرائط شریعت دائره سنده اجرای حکم ایده جک هر عثمانلی پادشاهنی مشرق اسلام خانک اکثریت عظیمه سی بر رئیس معنوی طایمقده ایسه لرده لوی عثمانیت عالم اسلامیتک بر معنای مجسمی اوله رق تلقی ایدیله مز؛ بناء علیه « هالال » قاعده صلیب نصرانیه قیاس اوله ماز .



سیاسیونندن اولان ویا رهبان طاقمندن بولنان بر نیچه آوروپا محرر

مزایا سندن بری اولدیغنی یقیناً آ کلار لر . کرک خرستیانلق و کرک - اکثریا
مدنیت خرستیانیه عنوانی طاقیلان و علویتی پک چوق مبالغه لر ایله اعلان
اولنان - آ دروپا مدنیتی حقنده اهل اسلامک کندی لرینه مخصوص ملاحظاتی
واردرکه بز آتی ده کی فصللرده بو ملاحظاتک سردینه چالیشه جنز .



لازمدر . بوندن طولای ضبط واستملاکنه نظر طمع عطف ایدیلن بر شرق
مملکتک احوالی غایت الیم ، غایت مشوش بر حالده تصویر ایدیور . و او
مملکتک اهلنه بیک دورلو مساوی اداریه نک . نیچه افعال وحشیه نک مسؤلیتی
اسناد اولنور ، حقیقته او مساوی و او شورش موجود اولسه ینله وسائط
خنیه ودقیقه ایله احداث ایدیورکه بو حال شرقده آوروپا دیپلوماسیسنک
جریان معاملاتنی ترصد ایدنلرجه معلومدر . ایشه بو سرد اولنان طرز زرده
مشرق اسلامده کندی حکومتلرینی ، کندی اداره لرینی تأسیس ایچون
آوروپا مدنیلری بر صلاحیت قزانش اولورلر .



غربک شرق اوزرنده کی تحکمی مسئله سی اهمیت عظیمه سیاسی بی
حاوی مسائلدن اولدیغندن شرقلیلرک او بابده کی نقطه ملاحظه سنی ایلریده
ذکر ایده جکمز . دول مخمه نک شرقده کی «وظیفه تمدنی» لری عالم نصرانیت
میسوئه لرلرینی غربک عادات وارکاننی واشکال مذهبی سنی شرقه ادخال
ایچون تشجیع ایتمکده در . فی الواقع شیمدی یه قدر بو اوغورده نیچه امکار
صرف ایدیله کمش ایسه ده ارکان وطرق نصرانیتک تحکم سیاسی افرنج
درجه سنده بر موفقیتله شرقیلره قبول ایتدیر یله میه جکنده کی ظنلر قوت
بولتمده در . علی الخصوص مشرق اسلام خلفه بو بابده وقوع بولان ابرام
وتشویقلر صدره شفا ویرر هیچ بر تأثیری موجب اوله میور . اهل اسلامک
فکر ساله مالک اولان افرادی اومدن آوروپانک اخلاق وارکاننده کی
نقاط سخیفه بی پک ای ادراک ایدرلر . آوروپالیرجه اتباع ایدیلن ارکان
نصرانیتک ایسه اهل اسلام ایچون موجب الهام معنوی اوله یلمک

خلفك ذهنه سياسيون ورجال دول طرفندن قصداً تلمين اولنيور . مقصد مزي
ايضاح ايده لم :

معلومدر كه آوروپاي غربي نك هر طرفنده جدال معيشت كوندن كونه
كسب شدت ايلمكده در . دأماً تزايد ايده كن احتياجات اجتماعيه ومضايقات
اقتصاديه نك مها امكن تخفيفي و بناء عليه عامه ناس آره سنده حصولي ملحوظ
اولان خشمود سرلغك و غلبان افكار ايله جنك داخلي بي بادي اوله حق وسائلك
او كي آتمسي رجال دولجه بر امر اهدر . بو مقصدك استحصالي ايچون اك
بويوك چاره ايسه اولا : محصولات ومعمولات مليه يه شرقده يكي يكي محل
فروخت بولق ، ثانيا : عاداتا اوردولر تشكيل ايده جنك قدر عددلري تزايد
ايده كن مأموريت طالبرينه شرق منصبلري تدارك ايتمك ، ثالثا : نفوس
زائديه مواقع مهاجرت تأمين ايلمكدر . يكي يكي بازار فروخت بولمسي
وتشبات كسيه ايچون ، قسمت اولامق ايچون يكي يكي ميدانلر تداركي ايسه
اويله قولايقله وقوع بولماز ؛ زيرا بو خصوصات چوق كره تشبات حريه يه
احتياج كوسترر حرب ايسه پاره يه توقف ايدر . ايمدي رجال دول و سياسيون
رسميت دائره سنده اوله رق — بر مسلك عوام پسندي اتخاذ ايدرلر ؛ يعني محرك
فساد اولان عادي پوليتقه جيلر كي عوام ناسك ملاحظه منطقيه دن مجرد اولان
« حسيات وطنپرورانه » سني اجتماعات عموميه ده ايراد ايتدكاري نطقلرله
وجرائده يازدقلى ويا يازديردقلى مقاله لر ايله متصل تخريش ايدرلر .
بوفصاحتلرده ، بو بلاغلرده شرف ملي و شان لوای ملت بر اعتناي مخصوص ايله
تكرار تكرار ذكر ايديله رك ناسك حسياتي اوقشانور . شرقده يكي فتوحاته
كيري شمك پك جدي بر ايش اولديغندن تشبات حريه يي حقلي كوسترمك

ساحنندن تا قافقاسیایه قدر اولان جهتلرده و تام آروپا قطعه سنه مقابل
 قطعات ممالکده ساکن اولدقلرندن غرب مدینتک پیشدارلرینه جولانی
 قولای بر میدان فعالیت عرض ایتمکده درلر . آروپا مدینتک غیرت
 کشلریله مباحثه یه کیریشوبده « دهها بر قاچ عصر اولنه کانه یه قدر
 اهل اسلامک کرک تعالی فکریمجه و کرک ترقی مادی جیتیله آروپا خلقتنه
 متفوق بولندقلری و حتی قرون وسطاده مسلمانلر آره سنده کی ترقیات علمیه
 سایه سنده او زمانلر قسماً بار بار بولنان افرنجک اوصاف متمدنه انسانیه یه
 دائر بعض شیلر او کریمکه باشمش اولدقلری » یولنده سرد ادله ایتیمک
 بیهوده در . بو آدملر دلائل تاریخیه یه قارشو کوزیومیورلر ؛ بیلمیورلر
 ویایلمک ایستمیورلر که اهل صلیب آره سنده اک آز متعصب اولانلر واک
 زکی بولانلر دشمنلری اولان مسلمانلر آره سنده اتخاذه شایان اوصاف حسنه
 موجود اولدیغنی کوردیلر و شرقدن آلدقلری وسائط ترقی سایه سنده آروپا
 مدینتک انشراحنه خدمت ایلدیلر . عوام افرنججه معلوم اولیان بو حقیقت
 بر خیلی فرنک مؤلفلری طرفندن اعتراف اولنه کلمشدر (۱)

حال بویله ایکن زمانزده - جاهل بر چینایک بو تون اجنیلره علی
 الاطلاق بار بار تسمیه ایتدیکی کی - آروپا لیلرده علی العموم اهل اسلامه وحشی
 و یاغیر متمدن دیوب کیدیورلر . مسلمانلرک فرنکگرجه بویولده تلقیسنه پکده
 تعجب ایلمهک اقتضا ایدر . زیرا اولجه ایما اولندیغنی وجهله بویله بر ذهاب

میلیرینی الفا ایتمک ، موجود اولان مؤسسہ لرینی یا تغییر ویا احیا ایلمک ، اجداددن منتقل اولان وآنلرجه معزز صاییلان هر شیء یا افساد ایتمک ویا چیغرنندن چیقارمق کی حرکتیه « تمدن » شکلی ویریله من . بالعکس بو کی معاملات او مترقی فرنکارک حسیاتنده ابا عن جد موروث بر نوع هوس وحشیانه نك حالا حکمفرما اولدیغنی اثبات ایلر . کذلک ، ینه او شرقلی اهل تدقیق نظرنده — نتیجه تتبع اوله رق — میدانیه بر حقیقت چیقارکه اوده ذکر کی کثرتله تکرر ایدن « مدنیت » سوزینک بر تعبیر مبهم دن عبارت بولنمسی وحتی فرانسزلرک La grande Encyclopédie نام قاموسلرندن (۱) اعتراف اولندیغنی اوزره « مدنیت » کلمه سنه بر تعریف صحیح اعطاسنک کوچ اولسیدر .

حقیقت مسئله بو مرکزده ایسه ده مادام که آوروپانک شرق اوزرنده کی تحمکی دوام ایدوب کیتمکده در او حالده بو تحمک دوامنه بر مخالفت فعلیه وقوده کلدکجه شرقیلیری « غیر تمدن » دیه تصویر ایتمک آوروپالیرک منفعتی اقتضاسندن بولنه جقدر ؛ زیرا آوروپالیر اقوام شرقیه آرسنه ادخالنی درعهده ایلدکاری شو معهود « وظیفه تمدن » لرنده بو وسیله ایله بر صلاحیت مالک بولنمش اولیورلر .



اقوام شرقیه آرسنده اک زیاده تحمک افرنجیه معروض اولانلر لوای اسلامه تابع بولمان مللردر ؛ چونکه بو مللر آفریقانک بحر محیط اطلاسی

(۱) مذکور قاموسک اون برنجی جلدی ۵۴۳ نجی صحیفه یه باقیله

احوال و حرکات ارائه ایتدکجه حسیاتنک او ترقیسی عالم غیر نصرانیت
عندنده افکار حیلہ کارانه نك انشراحى اولق اوزره تلقی ایدیلہ ییلور
واو افکار خدعه کارانه ایله شرقیونی آلداتدیغی ، مغالطه یه بوغدیغی
ذهابی کسب تقویت ایلر . غربك او ترقی ذهنیسی دانش و معارفك توسع
عظیمه مدار اولدیغی انبکار ایدیلہ من ؛ فقط معارف و معلوماتك بو وسعت
ترقیسنك بر تکمل معنوی احداث ایلدیکی کوریلہ مه مکده در .



« آروپا مدیتی » سوزینی « شرق وحشتی » تعبیری مقابلنده
قولانق پك چوق غرب محرر لرجه بر اعتیاد حکمه کچمشدر . تعبیر دیگرله :
آروپانك شو تحکم و تفوق دورنده نصرانیتك هیأت اجتماعیه سندن
برینه منسوب اولیان بر خالق غالباً متمدن عد اولتق ایستنامیور .

شو « مدیت » سوزینك معنای حقیقیسی نه اولدیغی آکلایه
بیلک اویله بر مسئله درکه شرقی بر اهل تدقیق جدأ شاتیرتسه کرکدر . او
اهل تدقیق آروپا مؤلفری طرفندن یازیلان و بو کی مواد خصوصنده
مأخذ اولان آثاره مراجعت ایتسه آکلارکه غربلیرجه قطعیا غیر متمدن
صاییلان بر نیچه اقوام — او آثارده کی تعریفله نظراً — متمدن افراد
بشردن عد اولتق لازم کور . بوندن ما عدا او شرقی اهل تدقیق مذکور
آثارده تعریف ایدیلن صفات تمدنی آروپالیرك عمل و حرکتلریله — و علی
الخصوص آسیا و آفریقاده کی عمل و حرکتلریله — مقایسه ایتمش اولسه
آروپا ملتلرندن بعضیلرینك « متمدن » صفتنه هیچده لایق اولدقلرینه حکم
ایلر ؛ چونکه قوهء مقاومه سی محدود اولان شرق اقوامنك استقلال

اولمق اقتضا ایدر ؛ زیرا آنلرجه عالم غرب بر « عالم ترقی » در . ایدی
مادۀ وقوع بولان ترقیات عظیمه دن طولاییدر که بر قاچ عصر دن بری
آوروپالیر شرق اوزرینه اجرای تحکم ایده ییله جک بر موقع قزاملشدر .
ایجاد فنی واختراع صنایع سبیلله فرنکالر قوه مسحرانه یی حاوی بونجه سلاح
تفوقه مالک اولمشلر وبو سایه ده شرقده انفاذ امال واجرای تحکمه
قویولمشدر . تاریخ شرقه آشنا اولنلرجه معلوم بر طاقم اسباب اساسیه دن
طولاییدر که اهل شرق غربلیر ایله موازی بر صورتنده طریق ترقی ده
یورومک اقتدارندن محروم قالمشدر .

مسئله یه ینه شرق نقطه مباحثه سندن کیریشیلنجه آوروپا خلقتک
« مدنیت » کله سنی بر خطای فاحش ایله قوللاندقلری میدان چیقار ؛ زیرا
ترقیات ماده صفات تمدنییه یی الکز غرب خلقتنه تخصیص ایچون بر سبب
کافی اوله ماز . مدنیتک برده جهت معنویه سی اولمق اقتضا ایدر که ایشه
بو جهت معنویه ملاحظه اولندقدن غربلیرک مدنیتی کندیلرینه حصر
ایتملرنده کی ادعا تسلیم اولنه ماز . آوروپا مدنیتک فضائلی ترویج وتعمیم
ایله اوغراشان بعض کیمسه لک ادعالرنجه مذکور ترقیات ماده ملل
نصرانییه یی حسیات عالیه وفضائل معنویه اکتسابنده سوق ایتمش وبو سببله
مادۀ اولدینگی کبی کافه فضائل معنویه جهتیه دخی آنلری مال غیر
نصرانیه نک فوقنده بر مرتبه یه ایصال ایلمش ! واقعا بو ادعا پک معتول
بر صورتنده اختراع اولمش ایسه ده نه فائده که بو کبی مدعیات مرتبه یه
اهل شرق طرفندن بلا تأمل قناعت اولنیویره جک دورلر کچمکده
بولتمشدر . بناء علیه عالم نصرانیت تفوق معنوی حقنده کی ادعاسنی مثبت

برنجی فصل

مردیت مقدره بعضی مطالعات

شرقه توسیع مستملکات مقصدینی تأویلاً آوروپالیلر طرفندن اختراع ایدلمش اولان « وظیفه تمدن » کلامنک ماهیتی فی الواقع بر زماندنبری شرقیلیرجه لایقینه آ کلاشیامغه باشلشدیر . مع ما فیہ بو باده آ کلاشیامغه محتاج بر حال دها واردر که اوده ممالک غریبه خلقدن بر قسم کلیسنک بویله بر « وظیفه تمدنیه » نک آوروپالیلر معرفتیه اجراسنه اهل شرقک اشد احتیاجی بولندیغنی قویاً ظن ایلملیدر ؛ بناءً علیه آنلرک ذهابنجه بویله بر وظیفه تمدنیه صرف بر خدمت انسانیتکارانه در . ازمئه قدیمه ده اقوام شرقیه نک بر حیات متمدنیه و ملل غریبه دن دها عالی حسیات انسانیت پرورانه یه مالک اولمش بولندقلرینی ، شرقک مهتد مدینت اولدیغنی ونور ترقینک شرقدن کلش ایدوکنی غرب خلقنک یالکزیک آز بر قسمی تأمل ایده بیلور . برده « عالم مدینت » تعبیرینک آنجق عالم نصرانیت حقدیه استعمال اولنه بیله جکنه وعالم شرقک یا نیم متمدن اولدیغنه و یا بوسبوتون باربارلق حالنده بولندیغنه دائر غربیلرک اکثریسی آره سنده بر ذهاب موجود در .

مسئله یه شرقیلر نقطه نظرندن باقیلورسه بو ذهابک بطلاننه قائل

حقننده کی ذهاب ابتدائیہ م پک یا کلش ایمس . ایشته نتیجہ تجارتی بدن
اولہ رق حصولہ کلن ذهاب حقیقی اوزرینہ شو اثری یازدم . صمیمیتله
امید ایدرم که مدنیت افرنجی علی العمیا تجیل ایله شرقه عائد هر
خصوصده بر حس نومیدی ، بر فکر تذایل بسیلین کیسه لرد . وجب
عبرت اولور .

هرکتی سنجی زاده

خلیل خالد

بشقه بر صحیفه ده مندرجدر . شبهه سز ترجه سنك قرائتی اوزرینه
 وقوع بوله حق تنقیدادن بعضیلری نا مالیم ظهور ایده جکدر؛ چونکه
 کتاب اساساً آوروپا مدینتی علیهنده در وآوروپا مدینتنك علویتتی
 اعظام ایتك ایسه بزده پك چوق کیمسه لك حسیاتنی تسمیم ایتمش
 معنوی بر فرنکی عاتی در . ایشه بو مقوله کیمسه لر بنم آوروپا مدینتی
 تنقید کی بر جرأنده بولمقلغمی تحظه ایدرلر . بن آداب مرعیه نی
 تجاوز ایتمه مك اوزره هرکسك اعتراضی سرد ایچون بر حریت مالک
 اولسنی تمی ایدنلر دیم . شوقدرکه معترضلرم سرد ایتدکاری افکارك
 مقبولیتی ایچون بنم قدر تجربه یه مالک اولمیدرلر . بو اثرك حجمی اوفقدر؛
 فقط مالی بر خیلی سنه لك تتبعك نتیجه سیدر . صنف علمادن قدیم
 بر عالیه منسوب اولدیغم ایچون تربیه اولیه م پك دیندارانه ایدی .
 صنف علیه مربوطیتی بر اقوبده دولت عثمانیه نك مکاتب عالیه سندن
 بر یسنه کیردیگ زمان ایسه اکثر کنجلمزده اولدیگی کی بنم فکر مده
 دخی آوروپایه منسوب اولان هرشیء اعظام ایله تقدیر ایتك اعتیادی
 حصول بولش ایدی . فقط انکاترده اون درت سنه لك اقامتم
 وآوروپانك بلاد مختلفه سنده دفعاتله سیاحتم وکه یمبریج دار الفنوننده کی
 موقعم نتیجه سی اوله رق آکلادم که آوروپای نصرانینك علویت مدینتی

بر ایکی - روز

کچن سسنه بو کتابک انکلیزجه سنی لوندرده ده نشر ایتدیردیم
 زمان برده ترجمه سنی وجوده کتوره بیلجه کی هنوز امید ایده.
 میوردم . هندستانده اک بویوک بر لسان اسلام اولان اردو دیانه
 ترجمه سی تکلیفی وقوع بولدیغی زمان ترجمه یه دخی نقلی ایچون کوکلده
 بر آرزو حاصل اولش ایدی . ترجمه ده طبع ونشری ایچون تصادف
 ایده جم مشکلات بو آرزونک یرینه کلسنه بر مدت مانع اولدی
 ایه ده حمیت اسلامیه سی پک بویوک اولان بر ذاتک تشویق
 لطف کارانه سی اوزرینه شیمدی طبع ایتدیریورم . اثرک انکلیزجه
 اصلی ایله بو ترجمه مال جهتله همان بر کیدر ؛ فقط ترجمه نک بعض
 یرلنده محو ویا علاوه ملاحظاته لزوم کوردلی . انکلیزجه سنک نشری
 پک چوق انکلیزلی مغیر ایتشیدی ؛ مع مافیه بر خیلی طرفلرجه
 دخی مظهر حسن تلقی اولدی . کرک آوروپاده وکرک شرقده آلتشی
 متجاوز جرائد و رسائل بو کتاب حقنده تنقید اتده بولمادی که
 بو تنقید اتدن ایلك نشر اولنانلرینک بعضیسی خلاصه الخلاصه اوله رق



ترجمہ صرہ سنده وطندن خبر وفاتنی آلدیغم والدم
حاجہ رفیقہ صدیقہ خانمک
روحنہ اهدا اولندی

BP

170

H349

Hālā, Hālā

هلال و صلیب منازعه سی

Hālā ve salīb münāza'atī

اُر


خایل خال

فیائی

دوت بحق فرانقدر

مصر

۱۳۲۵




فهرست کتاب

صفحه

- | | | |
|-----|--|--|
| ۶ | برنجی فصل ﴿ مدنیّت حقّنده بعض مطالعات | |
| ۱۴ | ایکنجی فصل ﴿ هلال و صلیک مناسبات قدیمه سی | |
| ۲۷ | اوچنجی فصل ﴿ خرسیا نلقده رهبانیت و موقع اسلام | |
| ۴۳ | دردنجی فصل ﴿ نشر نصرانیت و موقع اسلام | |
| ۵۶ | بشنجی فصل ﴿ نشر دیاتنده رقابت | |
| ۷۰ | التنجی فصل ﴿ رقابت اسلامیه ده کی موقیتک اسبابی | |
| ۸۳ | یدنجی فصل ﴿ اسلامیتده موقع نسوان | |
| ۱۱۱ | سکرنجی فصل ﴿ تعدد زوجات | |
| ۱۲۷ | طقوزنجی فصل ﴿ طلاق حقّنده در | |
| ۱۳۴ | اوننجی فصل ﴿ اسرای نصرانیه و اسلامیه | |
| ۱۵۰ | اون برنجی فصل ﴿ الغای اسارنده کی مقصد انسانیت | |
| ۱۶۸ | اون ایکنجی فصل ﴿ هالاک تسخیری | |
| ۱۸۸ | اون اوچنجی فصل ﴿ اتحاد مسلمان تهلکه سی | |
| ۲۰۵ | اون دردنجی فصل ﴿ بعض مطالعات اختامیه | |

هر مفی محفوظدر



603

BP
170
H349

Halid, Halil
Hilāl ve salīb münāza'
asī

PLEASE DO NOT REMOVE
CARDS OR SLIPS FROM THIS POCKET

UNIVERSITY OF TORONTO LIBRARY

UTL AT DOWNSVIEW



D RANGE BAY SHLF POS ITEM C
39 12 09 14 03 013 6